



Early European Books, Copyright © 2012 ProQuest LLC.  
Images reproduced by courtesy of the Biblioteca Nazionale Centrale di Firenze.  
CFMAGL 2.6.582



Early European Books, Copyright © 2012 ProQuest LLC.  
Images reproduced by courtesy of the Biblioteca Nazionale Centrale di Firenze.  
CFMAGL 2.6.582



Early European Books, Copyright © 2012 ProQuest LLC.  
Images reproduced by courtesy of the Biblioteca Nazionale Centrale di Firenze.  
CFMAGL. 2.6.582

2. 6. 582.

a S. 6



XL

PONTIC

in Pausan




REFLEXIONES  
LITERALES  
IN QVINQVE LIBROS  
MOYSIS.



REFLEXIONES  
LITTERALES  
IN QVINGVE LIBROS  
M O Y S I S







REFLEXIONES  
LITERALES

IN QVINQUE LIBROS  
MOYSIS

Ex Primarijs Ecclesiæ Doctoribus  
Desumptæ

A. D. PETRO PAULO PONTICELLO  
CASTRINOVÌ PROVINCIAE CAFERONIAE  
ARCHIPRESBYTERO

I. V. D.

SACRATISSIMÆ MAIESTATI  
LAVRETANÆ  
VIRGINIS DEIPARÆ  
DICATÆ



LVCÆ, Apud Marefcand. 1689. Super. permiffu.








AVGVSTISSIMA

Totius Vniversi

REGINA



Eteris Testamenti periculo-  
sum mare, innumeris val-  
latum scopulis, plurimis-  
que septum Syrtibus, ab-  
sque fidi Palinuri ductu,  
nulloque fausti Syderis invocato lumine,  
ingredi, est animi temerè audacis. Duce

A 2

nam-

namque indiget, qui Oceanum ingreditur, nisi imminentibus vel exterreri, vel obrui naufragijs, & à portus felicitate longius aberrare contendat. Id nobis etiam evenit, qui Divinarum amatores litterarum, sacrae peragimus Sapiientiae pelagum. In quasnam videlicet difficultates incidimus, quae Syrtes veluti, tenaciter morantur, iterque praecidunt, quod aggressi eramus, cum nautis Fatum commune fortiti, & pericula! Ad te igitur AVGVSTISSIMA VIRGO, quae Laureto praefides, & quam contra omnia pericula, velut fidissimum Firmamentum, Christianus Orbis adorat, omni fiducia plenus, confugi. Incongruum namque fuisset, in itinere tam arduo, aliud adiutorium, praeter tuum, quaerere, cum in eodem Sacri Codicis limine, tua gloriosa gesta recenseantur. Etenim stygium interimis Anguem, & superbum eius caput conteris, licet ipse



ipse triplici ignita lingua , tartareo tumida veneno , tuo DIVINO CALCaneo infidietur . Tuo igitur favente Aspectu , Immaculata Deipara , quinque Moy- sis libros percurri . Et sicut trilustræ servitutis meæ obsequium , tuæ Maie- stati , in Vrbe Roma , impensum , sub titulo Rectoris Lauretanæ Ecclesiæ tibi dicatæ , te sola adivvante , te protegen- te perfunctus sum ; ita sacras has pagi- nas , non nisi te ferente opem , non nisi te præbente lumen , ne me tenebræ com- prehenderent , me exarasse fateor . Quos ergo in hoc opere labores impendi ; quas curas subivi , Vni Tibi , Præclarissima , Dei Mater , humilitèr exhibeo , cui de- beo meæ , qualescunque sint , mentis opes . Eas tibi reddo quas à te accepi : ob id tantum non contemnendas , quia tuæ sunt ; nihil sane ducendas , si contempleris ut meas . Informe namque , ac rude aurum , è fodinis nuper eductum , me-  
um


um imitatur ingenium. Qua illud Luce præstat, Soli debet, quam illi uberimè impertivit, dum terræ latuit in visceribus. Et rursus Telluri debet asperitatem, qua turpiter defædatur. Tuum igitur est, si quid in hisce elucubrationibus luminis enitescit; & meum, quidquid informe caligaverit.

AVGVSTISSIMÆ MAIESTATIS TVÆ

*Humillimus Addictissimus, & Obsequentissimus famulus,*

Petrus Paulus Ponticellus.





## AD LECTOREM.



*Reflexiones in quinque libros Moysis, meo labore ex Lyrano, & Tostato desumptæ, tibi exhibentur, Amice Lector. Quidquid in istis breviter, & compendiosè per singula capita legeris, in his Auctoribus diffusè invenis. Quapropter in meis Reflexionibus nihil meum est, neque hoc quod tibi exhibentur, id enim ab Amicis recognosce. Isti namque, verecundiam meam, contra ambitionis stimulos ferream, scripta, quæ mihi soli texueram, typis committere, nescio quomodo, coegerunt. Dicto parens fui, licet mihi probè perspecta esset virium mearum ad hæc peragenda imbecillitas. Cum igitur res ita processerit, hoc unum à me te admonitum patiaris, ut nihil in hoc paruo volumine legas, nisi Sacrum Codicem prius perlegeris. Solent Iuris Consulti monere lectorem, humanas suas leges meditantem, ut prius legat Rubrum, si velit intelligere nigrum: ita ego te precor, ut prius Divini Textus fulgentissimum Ruborem consideres, ut melius possis advertere ad Nigrum mearum Reflexionum. Cæterum hoc mihi, velim, debeas, quod exhilas mea, in tuæ Pietatis profectum dedit tibi, quid benignus ignoscere. Vale.*

AD PRÆCLARISSIMUM

PRÆSENTIS OPERIS AVCTOREM,

QVI

IN EXIMIA DIVINI PENTATEVCI

Expositione,

SIBI NOMINIS IMMORTALITATEM,

&

SACRI VOLVMINIS STUDIO SIS

Permaximam utilitatem paravit.

ANAGR.

PETRVS PAVLVS DE PONTICELLIS  
DE CASTRO NOVO.

ANAGRAMMATIS. PVR.

PENTATEVCO ILLVSTRARIS VNDE  
POPVLOS DOCES.

AMEDEVVS SAMINIATE,








# GENESIS



*Liber iste Hebraicè vocatur Beresith, hoc est in principio, quia sic incipit. Hebræi namque libris suis, ab eorum exordijs imponunt nomina. Græce autem dicitur Genesis, idest Generatio, vel natura; quia de creatione rerum quæ natura subsistunt, in eo agitur. Et sicut generatio rei est prima via ad esse, ita Liber iste, quia de exordio rerum ad essendum agit, inter Sacras Scripturas principem locum tenet tamquam caput.*

## CAP. I. Reflexio I.



**I**N PRINCIPIO temporis adeoût, nec hora, nec instans præcesserit creationem rerum, (quia tempus est passio rei mobilis cum sit numerus motus; subiectum autem præcedit saltèm natura suam passionem; ideòque cum adhuc non esset ulla res creata, quæ est subiectum temporis, non poterat esse tempus; & solo Deo existente tempus non erat, quia Deus non commensuratur tempore: quia propter in ipsa rerum creatione tempus incæpit) in cuius primordio creavit Deus Cælum, idest omnia Corpora Cœlestia in suis formis substantialibus distincta, licèt adhuc in aliquibus proprietatibus accidentalibus essent informia. Et Terram in sua forma substantiali distinctam

A

cum



cum aliquibus proprietatibus formam substantialem necessario concomitantibus; tamen quantum ad aliqua erat informis. Et sub nomine terræ comprehenduntur reliqua Elementa in suis formis substantialibus distincta. Sub nomine verò Corporum Cœlestium intelligitur etiam Empyreum, quod statim repletum fuit Angelis Sanctis; diciturque à Piro, quod est ignis, non quia sit de natura elementari; sed quia convenit cum igne in splendore. Est enim locus splendidus, immobilis, quietus, & aptus contemplationi gloriæ. De isto non facit Mòyses particularem mentionem, quia loquebatur populo rudi, qui solummodò sensibilia, & grossa capiebat. Totum autem, quod erat infra Circulum Lunæ confusum prorsus erat: nam licet Elementa essent producta in suis formis substantialibus, ut prædictum est; tamen non habebant adhuc omnes proprietates accidentales sibi debitas: nam Aqua non habebat suam densitatem, sed quasi vaporaliter elevabatur per totum spatium Aeris, & Ignis, Terramque cooperiebat; & sic quædam confusio, & commixtio erat in Elementis, quæ in Text. nomine Abyssi denotatur. Græcè enim Abyssus, idem est ac latinè Vorago; & importat profunditatem, & commixtionem, seu confusionem. Dicitur autem in Text. *Spiritus Dei ferebatur super Aquas*: idest Spiritus eius factivus ferebatur super Elementa sic confusa. Et assimilatur Deus Fabro, qui priusquam aliquid agat flectit cognitionem suam super materiam, ut iudicet quid agat. Declarat enim Divina Scriptura eo modo quo nos intelligere possumus; quia, sicut in naturalibus, si visibile non proportionetur potentiæ visivæ numquam erit visio; sic contingit in intelligibilibus. Deus autem est supremum intelligibile excedens totaliter intellectus nostri conditionem; & ideò numquam intelligeremus operationes Dei, nisi scriptura Divina assumeret modum rerum inferiorum: qua proptèr de Deo, tamquam de corporeo homine passim loquitur; quia nos, per corporalia magis intelligimus.

R E



**P**ost creationem rerum secundum formas substantiales sequitur earum distinctio secundum qualitates, & proprietates accidentales. Advertendum est autem, quod dies, & nox distinguuntur per Lucem, quæ est quoddam positivum; & per tenebras, quæ important privationem lucis; & ideo opus distinctionis incipitur à Luce, quia est qualitas communis, in qua corpora Cælestia conveniunt cum inferioribus, puta cum igne, & aliquibus corporibus mixtis, quæ lucida sunt. Sicut in generatione naturali inchoatio fit à communiore formis. Nam secundum Philosophum Embrio prius vivit vita Plantæ, deinde Animalis, & tandem Hominis. Adde, quod distinctio non apparet, nisi per manifestationem: omnia autem manifestantur per Lucem; ideo distinctio debuit incipere à Luce. Ista autem fuit Lux Solis, & fuit informis usque ad quartam diem. Divisit autem Deus lucem à tenebris per motum Solis; nam quando movetur super unum Emispherium sunt tenebræ in alio propter opacitatem terræ, quæ est in opposito. Appellavit verò Deus lucem diem, quia dies est latitudo Solis super terram, & loquitur de die artificiali. Tenebras autem appellavit noctem; quia sicut per presentiam Solis efficitur dies, ita per sui occultationem efficitur nox. Notandum est autem, quod cum dicitur. *Factum est vespere, & manè dies unus*: loquitur Divina Scriptura de die naturali, qui est 24. horarum, & complectitur diem, & noctem. In vespere namque completur dies artificialis, qui est prima pars diei naturalis, & in manè diei sequentis completur nox, quæ est secunda pars diei naturalis, & ideo præposuit vespere ipsi manè, ut ostenderet completionem diei naturalis exprimendo terminos diei artificialis, & noctis, qui sunt partes integrantes diem naturalem. Dicitur autem in Tex. *Vidit Deus Lucem, quod esset bona*, id est per effectus, quos ei facere concessit, demonstravit esse bonam. Deus enim non vidit tunc noviter, quod Lux esset bona, nam ab



æterno cognoverat qualis futura esset. Sed placuit in existentia, quod placuerat ab æterno in præsentia.

## Reflexio I I I.

**I**N secunda die dixit Deus. *Fiat Firmamentum*, id est omnes Orbes Cœlestes usque ad ultimum Cælum Lunæ. Adverte autem, quod istud, *feri*, non intelligitur quantum ad formam substantialem, quia sic factum fuit per opus creationis primæ diei; sed intelligitur secundum aliquam qualitatem ipsius firmamenti; & ista, secundum aliquos Doctores fuit soliditas, de qua dicitur Iob. cap. 37. *Tu forsitan cum eo fabricatus es Cœlos, qui solidissimi quasi ære fundati sunt?* Secundum verò alios, fuit quædam virtus ad influendum super Ælementa ad ipsorum conservationem, & gubernationem. Quod autem in Sacra Scriptura res aliqua dicatur fieri secundum acquisitionem alicuius dispositionis accidentalis, patet per illud quod habetur in Deuteronomio Cap. 21. de Muliere Gētili capta in bello ab aliquo Isdraelita, de qua dicitur, quod si ducenda esset in uxorem ab illo, radere debebat Cæsaream suam, & circumcidere Vngues, secundum translationem nostram; sed in Hebræo habetur. *Et faciet vngues suos*. Ex quo patet, quod ly. *Fieri unguium*, accipitur pro dispositione accidentali. Item Levit: Cap. 23. dicitur. *Facietis, & Hircum pro peccato*, id est immolabitis; & sic ly. *Facere*: dicit dispositionem accidentalem. Et ideò dicendum est hic: quod dum dicitur factum firmamentum, intelligi debet de dispositione quoad qualitatem prædictam, non verò quoad formam substantialem. Præterea de Firmamento additur. *In medio aquarum, & dividat aquas, ab aquis*. Pro cuius intelligentia adverte, quod sub Cœlo Crystallino est octava Sphæra, quæ propriè dicitur Firmamentum, sub qua sunt Sphæræ septem Planetarum, nempe Saturni, Iovis, Martis, Solis, Veneris, Mercurij, & Lunæ; ita quod Sphæra Saturni est immediatè sub octava Sphæra superior omnibus alijs. Sphæra autem Lunæ



Lunæ est inferior omnibus, cui immediatè coniunguntur Elementa: ex quo patet, quod Firmamentum, prout includit Sphæras septem Planetarum medium est inter Cœlum CrySTALLINUM, & Elementa, quæ nomine aquarum designantur, ut supra dictum est; ideòque firmamentum, in tota sua latitudine sumptum, verè dividit aquas ab aquis; idest CrySTALLINAS ab Elementaribus. Dicuntur autem hic aquæ æquivocè, quia illæ, quæ sunt super firmamentum sunt de natura Cœlesti, & per consequens incorruptibiles; & vocantur CrySTALLINÆ à similitudine CrySTALLI propter suum esse lucidum.

### Reflexio I V.

**I**N tertiâ die distincta fuerunt Elementa per hoc, quod aqua accepit à Deo densitatem sibi debitam, & sic occupavit minorem locum dimittendo spatium aeris. Item per hoc, quod virtute divina factæ fuerunt concavitates in ipsa terra, ubi recepta fuit pars aquarum, & sic apparuit terra discooperta aquis ad habitationem hominum, & animalium. Dedit autem Dominus virtutem germinandi terræ: & quia quodlibet individuum in his inferioribus corruptibile est, voluit Deus ut illud, quod in se perpetuari non potest, perpetuaretur per generationem in suo simili. Adverte autem, quod licet in Tex. fiat solummodò mentio de aqua, & terra; tamen intelliguntur alia duo Elementa, Aer, & Ignis; sed quia talia non possunt à nobis in suis Sphæris videri, non expressit Mòyses ista populo rudi: maximè quia eius intentio non erat dare cognitionem Israelitis de omni genere creaturæ; sed solum dicere, quod Deus creasset omnia, quæ erant. Et quia Iudæi putabant esse solum illa, quæ videbant, ideò de solis Elementis visibilibus expressit. Sed hic potest alicui videri, quod productio plantarum, & herbarum, de qua hic dicitur, pertineant ad sextum diem, ut infra Deo dante dicetur. Pro qua difficultate solvenda. Adverte, quod ornatus accipitur ex similitudine in hominibus, in quibus propriè non perti-



nent ad ornatum ea, quæ inseparabilitèr adhærent corporibus humanis ; sed illa solum, quæ possunt apponi, & auferri, sicut Vestes, Monilia, & cœtera . Plantæ autem, & herbæ, immobilitèr adhærent terræ ; ideòque non sunt propriè illius ornatus, & per consequens non pertinet hoc ad opus sextæ diei, sed tertiæ, quando nimirum terra apparuit arida .

### Reflexio V.

**I**N quarta die ponitur ornatu corporum cœlestium . Notandum est autem, quod sicut ad ornatu hominis pertinent illa , quæ sunt separabilia ; ita quoque paritèr ad similitudinem huius in Firmamento Cœli dicuntur pertinere illa, quæ habent propriu motu secundu rem, vel saltem secundu apparentiam . Septem autem Planetæ habent proprios motus distinctos à motu Firmamenti . Stellæ verò fixæ, licèt non habeant propriu motu, sed moveantur motu primi mobilis, tamen quantum ad apparentiam sensus, deprehenduntur moveri . Non sic autem motu corporis firmamenti ; sed solum arguitur ex motu Stellarum : & quia Mòyses loquebatur rudi populo , qui tantum sensibilia capiebat ; ideò non solum Planetæ, sed etiam Stellæ fixæ describuntur pertinere ad ornatu firmamenti, licèt istæ in firmamento propriè dicto sint firmitèr adherentes . Fecit igitur Deus duo Luminaria magna ; unum ut præesset diei ; aliud nocti, & Stellas . Aliter tamen dicuntur esse in firmamento Stellæ fixæ, & Sol, & Luna, & reliqui Planetæ . Nam Stellæ fixæ sunt ibi immobilitèr ; Planetæ vero habent proprios motus, & proprios orbes ; & ideò non sunt in Firmamento nisi largè, quatenus Firmamentu continet sub se Orbes planetarum . Adverte autem, quod istud, *feri*, non intelligitur quantum ad substantiam Luminariorum, nec quantum ad lucem, quæ fuit assignata Soli in ipsa prima rerum creatione, & per ipsum alijs Corporibus Cœlestibus, quæ ab ipso illuminantur ; sed intelligitur quantum ad quandam informationem ,



tionem huius Luminis, quod fuit informè usque ad quartam diem; tunc enim accepit à Deo virtutem influendi ad varios effectus in inferioribus, quæ etiam communicata fuit alijs Corporibus Cœlestibus. Sensibilitèr namquè percipitur, quod radij Solis, & aliorum Corporum Cœlestium habent distinctos, & varios effectus circa inferiora. Præterea deserviunt homini, in quantum faciunt vicissitudinem temporis ad operandum, & quiescendum, & ad visum, qui est directivus in humanis operibus, & maximè utilis ad perfectam rerum cognitionem, ex primo Metaph.

### Reflexio V I.

**I**n quinta die ponitur ornatus Elementorum, in qua Elementa media ornata fuerunt, videlicèt Aer, & Aqua; Quandoquidè Ignis non habet ullum ornatum, quia tantæ activitatis est, quod in eo non posset aliquod animal vivere. Ad ornatum autem prædictorum Elementorum pertinent illa, quæ moventur in eis, videlicèt Aves, & Pisces, qui non sunt formati de sola aqua, sed de quatuor Elementis, licèt sola aqua exprimatur propter quandam convenientiam cum istis animalibus; habet enim aqua humorem, & vaporem. Per humorem convenit cum Piscibus; & per vaporem, qui sursum elevatur, convenit cum Avibus. Prædictis autem animalibus benedixit Deus: quæ benedictio fuit ordinatio ad multiplicationem individuorum, per commixtionem Maris, & Fœminæ. Porro Aves, & Pisces non sunt producti ex aqua activè, sed à Deo; ex Elementis autem solum passivè in genere causæ materialis. Nominantur autem hic in Tex: Cete grandia, idest Balenæ. Et dicunt Iudæi, quod isti Pisces si fuissent multiplicati devorassent omnes alios, & Mare fuisset innavigabile; nèc erubescunt asserere, quod postquam Deus creavit istam speciem in utroque sexu, occidit femellam, quam reservat in cibos Beatis in vita immortalis, & æternæ. Vnde isti obtenebrati.



nebrati ponunt felicitatem hominis in gustu, quod pariter turpissimi aliqui Epicurei fecerunt, sed non veri, & magni Epicurei, quos Arist. pr. Ethic. viros gravissimos vocat; sed illi solum, quos, ut turpissimos gulę sectatores, abiecerunt Philosophi: Hanc stultam positionem tenent Agareni; qui Beatos in vita aeterna rivis Lactis, & Mellis, & delicijs Puel- larum asserunt delectari, ut patet ex traditione sui Alcorani. Gentiles autem Philosophi, sequentes evidentissimum ratio- nis lumen, posuerunt perfectam hominis felicitatem in supe- riori parte animę; sed differunt à veritate catholica, quia ipsi in hac vita; nos autem in alia advenire dicimus, cum videbimus Deum sicuti est, eoque fruemur.

## Reflexio V I I.

**A**Ntequam ad ulteriora procedamus pono breviter aliam Sententiam circa creationem rerum, quia est celebris; licet non tam communis, quam illa, quę ponit omnia Corpora Cęlestia, & Elementa esse simul creata in suis formis substantialibus, ut supra diximus. Hęc autem ponit creationem rerum successivę, prout sonat littera. Auctores igitur talis Sententię dicunt: quod Deus creavit Cœlum, idest Empyreum cum Angelis simul: & ter- ram, videlicet materiam omnium corporum, quę sunt sub Empyreo; quęquidem materia producta fuit sub una forma communi corporeitatis; propterea nominatur diversis nomi- nibus, utpotę abyssi, & aquę. Erat autem inanis, & vacua, quia adhuc non erat per formas speciales distincta. Lux au- tem prima die facta, quędam nubes lucida fuit de superiori parte materię communis formata, quę Nubes motu suo faciebat diem, & noctem usque ad quartam diem, in quo factus est Sol, licet imperfectiori modo respectu Solis. Sicut enim in generatione naturali est processus ab imperfecto ad perfectum, ita fuit in productione rerum, non propter im- perfectionem Agentis, sed ad ostendendum ordinem Sa-  
pientię



pietis sue . Dum autem dicitur . *Fiat Firmamentum* , istud ,  
*Fieri* , accipitur quantum ad formam substantialem , quia de  
una parte materiae praedictae factum est secundum formam  
specificam Coeli sideris ; in qua productione intelliguntur  
etiam producti septem Orbes Planetarum , qui sub nomine  
firmamenti late sumpti , comprehenduntur . De superiori  
verò parte illius materiae communis factum est Coelum cry-  
stallinum , quantum ad formam substantialem , secunda die .  
Sub Firmamento autem , prout continet Orbes septem Pla-  
netarum , remansit materia communis , ex qua facta sunt  
elementa tertia die , quae quidem materia designatur nomi-  
ne aquae ; & sic patet quomodo secunda die factum sit Fir-  
mamentum in medio aquarum ; idest inter Coelum crys-  
tallinum , & materiam Elementorum . Similiter quarta die fue-  
runt facta Luminaria Coeli quoad formas substantiales  
specificas ; adeo ut Sol factus fuerit ex illa nube lucida , quae  
tribus praecedentibus diebus fecit motu diurno diem , ac no-  
ctem . Luna verò , & reliqua luminaria fuerunt facta ex ali-  
qua parte suorum Orbium . In reliquis autem diebus po-  
nuntur ornatus elementorum . Et haec breviter dicta sint pro  
ista sententia .

## Reflexio V I I I.

**I**N sexta die fuit ornata terra animalibus , quae signifi-  
cantur per animam viventem , quia res denominatur à  
forma ; post quorum productionem , ponitur formatio  
hominis , in illis verbis . *Faciamus hominem ad imagi-  
nem , & similitudinem nostram* . Et nota , quod de omnibus ani-  
malibus , & plantis dicitur . *Producat terra* , quia nimirum  
de potentia materiae dispositae educitur eorum forma ; non  
sic autem est de anima intellectiva , quia non est ex semine  
per generationem , sed immediatè à Deo per creationem .  
Et quia secundum Philosophum ille dicitur generare com-  
positum , qui formam coniungit materiae , cum Deus solus  
possit



possit animam creare, & creatam solus unire corpori, ipse dicitur propriè producens hominem. Duo enim sunt supra potentiam naturalium causarum in hominis generatione: nempe creatio animæ, & formalis ipsius unio corpori, ita ut sit forma sua: nam si anima separaretur à corpore per mortem, licèt postea permissione Dei applicaretur corpori relicto ut motor; tamèn non posset uniri formalitèr corpori, nisi Deus per suam omnipotentiam uniret illam. Qua propter, resuscitare mortuum, cum sit unire animam corpori, est potentia infinitæ, & per consequens proprium ipsius Dei. Ex dictis inferitur, quod magis propriè Leo generat Leonem, quam homo hominem. Nam Leo præbet materialem partem, quam disponit agendo ut educatur de potentia materiæ forma Leonis: nec requiritur actio Dei, in quantum est causa supernaturalis, sed solummodò, in quantum est causa ultima in connexionione causarum naturalium. Expressit igitur Deus suam actionem supernaturalem in creatione hominis, dum protulit ista verba scilicèt. *Faciamus hominem*, quasi una Persona divina loqueretur ad aliam: tota enim Trinitas individue operatur ea, quæ sunt ab extra; secus autem illa, quæ sunt ab intra. Nam Pater generat; sed non Filius; & Pater, & Filius spirant, sed non Spiritus Sanctus. At perversi Iudæi, volentes impiè fugere Sanctissimam Divinarum Personarum Trinitatem dicunt, quod, *ly, Faciamus*, est Verbum Dei ad Angelos. Sed hoc patet falsum; quia Angeli non cooperantur Deo in creatione animæ rationalis, cum creatio sit infinitæ potentia, quia est ex nihilo, & per consequens proprium ipsius Dei. Et ideò dicendum, quod per hæc verba denotatur pluralitas Divinarum Personarum. Et quia ista stat cum Vnitate simplicis Essentiæ, subditur in singulari. *Et creavit Deus hominem ad imaginem, & similitudinem suam*. Imago autem Dei consistit in anima, quantum ad proprietates naturales, videlicèt Memoriam Intellectum, & Voluntatem. Hæc imago, cum sit homini naturalis, perdi nequit, nisi perdatur ipsa natura. Similitudo



tudo autem consistit in Gratuitis ; & ideò similitudo est quædam perfectio imaginis, quia gratia perficit naturam : scilicet, quod sicut Deus est Iustus, & Sanctus, ita homo sit ei similis in Sanctitate, & Iustitia. Hinc patet, quod similitudo, cum ponatur in gratuitis, & gratuita sæpè perdantur, sæpè etiam perditur in homine similitudo Dei. Vide quid agat in homine peccatum ?


## Reflexio I X.

**P**ostquam Deus fecit hominem, dedit etiam illi dominium super omnia animantia, & super totam terram, dum dixit. *Et præsit Piscibus Maris, & volatilibus Cæli, & bestiis universæque terræ.* Ista autem dominatio, quantum ad actum, solum fuit in homine in statu naturæ conditæ, scilicet antequam caderet ab Originali Iustitia ; quia talis fuit homo in statu naturæ conditæ, ut quandiu permaneret in obedientia ipsius Dei, inferiora obedirent illi ; peccante verò in contrarium versum est ; nam animalia omnia repugnant, & adversantur ad mortem, ut sicut ipse non stetit subditus Deo suo, ita nec animalia permanerent ei subdita. Quia ergo homo factus est ad imaginem Dei, iustè obediunt illi inferiora secundum naturam institutam ; sed in pœnam peccati, ista obedientia fuit illi subtrahita ; sicut & obedientia virium inferiorum respectu rationis, & corporis respectu animæ. Istud dominium est homini naturale. Primo, quia imperfecta sunt propter perfecta, ut plantæ propter animalia, & animalia propter hominem ; & ideò sicut plantæ utuntur terra, & aqua ad sui nutrimentum, & animalia plantis, & herbis, ita homines animalibus ; ideòque iustè, & naturaliter præest illis. Secundo, quia perfectiora gubernant imperfectiora, ut Angeli homines. Regimen verò seu gubernatio est per prudentiam, quæ propriè est in homine ; & ideò animalia omnia sunt homini naturaliter subiecta ; ideòque ius dominandi super omnia animalia Principatu



cipatu dispotico, & magis quam dispotico, non fuit homini sublatum, immò etiam post peccatum confirmatum, ut patet infra Cap. IX.

## C A P. I I. Reflexio X.



Ostquam descripsit Mòyses hominis formationem, propter quem alia fuerunt producta; hic describit statum, seu conditionem illius. Prius tamen dicit, quod elapso sex dierum spatio, in quo Dominus produxerat omnia, septimo die requieuit; non tamquam fessus, quia Deus non est virtutis fatigabilis, cum eius virtus sit infinita; sed quia cessavit novas condere creaturas, & nihil factum est postea, quod non fuerit factum in operibus sex dierum, vel in suo simili ratione speciei, vel in suis causis. Quod dico propter multa genera animalium imperfectorum, quæ passim de putredine generantur. Deus enim dedit seminarias causas istorum. Benedixit autem Deus diei septimo; tum quia dedit illi excellentiam inter alios dies applicando ipsum Divino suo cultui; tum quia in isto cunctis rebus universaliter tradidit virtutem multiplicandi. Et insuper sanctificavit illum; per quæ verba describitur finis ipsius hominis. Pro quo adverte, quod experientia patet, appetitum hominis non quiescere in adeptione cuiuslibet boni finiti, sed ulterius tendit per desiderium: unde per hoc arguitur, quod finis ultimus ipsius consistit in adeptione boni infiniti, quod est solus Deus, in quo quiescit per cognitionem, & amorem sicut Lapis in centro. Item experimur, quod quantumcumque cognoscatur Deus ab homine in hac mortali vita per effectus; tamen non terminatur illius desiderium, donec Deus cognoscatur per seipsum. Ex quo concluditur, quod ultimus finis hominis consistit in visione Dei; unde Ioan. Cap. 17. dicitur. *Hæc s't vita æterna, ut cognoscant te solum verum Deum.* Ista autem beatitudo in præsentī vita quodammodo inchoatur



tur per hoc, quod mens humana elevatur à terrenis, & occupatur in contemplatione sui Creatoris, in ænigmate tamen. Et ad hoc deputatur septima dies, ut homines vacent à terrenis, & occupentur circa Cœlestia, contemplantes beneficia creationis, & continuæ conservationis, ad hoc ut insurgant deinde in gratiarum actiones pro tantis beneficijs à Divina beneficentia sibi præstitis; ut sic ratio humana, à sensualibus cupiditatibus libera, in aula mentis possit Divinæ vacare Sapientiæ, ubi omni strepitu terrenarum silente curarum in meditationibus sanctis, & in delicijs lætetur æternis.

### Reflexio X I.

**F**Acta mentione de fine hominis supernaturali, ostendit deinde Divina scriptura, quod in homine est forma non educta de semine per generationem; sed à Deo per creationem, per quam deinde transcendit naturam corporalium, & sic capax est ipsius Dei per cognitionem, & amorem: & quia nobilior forma exigit materiam nobiliori modo dispositam, ideò dicitur in Tex. *Formavit Deus hominem de limo terræ, & inspiravit in faciem eius spiraculum vitæ*. Hoc autem fuit; tum ad ostendendum, quod anima hominis est ab extrinseco per creationem, & infusionem, quia simul à Deo creatur, & corpori infunditur; tum quia sensus magis apparent in facie, quam in alijs partibus corporis; sunt enim ibidem omnes quinque sensus, ex quorum actibus arguimus animam intrinsecus agentem. Vnde totum quidem corpus animavit; sed hæc pars sensibus magis ornata est ad intuenda cœlestia. Rationali namque animæ naturaliter inditum est, ut sapiat, quæ sursum sunt, hinc quidam dixit.

Pronaque cum spectent animalia cœtera terram

Os homini sublime dedit, Cœlumque videre

Iussit, & erectos ad sidera tollere vultus.

Et Cic. 2. de Nat. Deor: ait. Deus homines humo excitatos celso, & erectos constituit, ut Deorum cognitionem, Cœlum intu-

Ovid. præ  
Metamor,



intuentes, habere possent. Fuit autem homo formatus de Limo terræ, ad ostendendum, quod convenit, quantum ad rationem materiæ remotæ, cum alijs animantibus. Natura verò humana fuit primo producta in uno individuo in sexu virili tantum, ut sic esset primus homo principium omnium individuorum, & per consequens totius humanæ speciei; sicut Deus est principium totius universi, ut etiam in hoc esset quædam similitudo hominis ad Deum propter dignitatem humanæ naturæ.

## Reflexio XII.

**F**ormato homine describitur consequenter illius habitatio pro statu Innocentiæ. Sciendum est autem, quod homo factus est immortalis non per naturam, quasi non potens mori sicut Angelus, sed per gratiam, idest potens non mori, quia servare poterat innocentiam, quam si servasset necessitatem moriendi non incurisset. Et ideò talis immortalitas non erat per qualitates intrinsecas, quæ redderent illum impassibilem, & incorruptibilem, sicut fiet post Resurrectionem, quando anima communicabit corpori suas proprietates, scilicet incorruptibilitatem, & impassibilitatem quantum ad electos; sed erat per remotionem eorum, quæ poterant illum corrumpere; quæ remotio, partim erat ex Divina providentia sibi assistente, & præcavente corruptentia ab extrinseco, scilicet Vulnerationes, Læsiones, & similia: partim verò virtute animi sibi divinitus collata, per quam poterat præservare corpus à distemperantia humorum, & ab infirmitatibus insurgentibus. Inter corruptentia autem, ab extrinseco unum erat, nempe locus corruptus; ideò Dominus Deus providit illi de convenienti loco quantum ad temperiem aeris, & loci amœnitatem assignans ei Paradisum voluptatis, idest deliciositatis. Erat enim ibi omnium bonorum copia, quæ potest in terra homini contingere secundum corpus; ita ut nihil possit optari quod ibi non esset. Omnes  
autem.



autem, qui loquuntur de Paradiso Terrestri, ponunt illum in partibus Orientis, sed in qua parte differunt. Dicit autem Arist. quod inter duos Tropicos non potest esse Regio habitabilis propter nimiam caliditatem, nam ibi transit Sol bis in annos; ideòque illi, qui sequuntur hanc positionem necesse habent dicere, quod Paradisus Terrestris sit extra Tropicos versus Orientem Æstivalem, vel Hyemalem. De situ autem illius dicendum est cum Tostato hic, & alios D.D., quod Paradisus terrestris excedit omnem terræ altitudinem, perveniens usque ad extremitatem superiorem aeris turbidi, in quo sunt impressiones Meteorologicæ, & sic ille aer superior valdè serenus est, cum infra se omnia turbida habeat. Ad istam altitudinem aquæ Diluvij non pervenerunt; tum quia destruxissent omnem pulchritudinem Paradisi; tum quia cum tempore Diluvij iam Enoch translatus esset in Paradisum, illum præfocando interfecissent, quod nō licebat. Alij dicunt, quod inter duos Tropicos sub Æquinoctiali Circulo est Regio temperatissima; & secundum istos Paradisus Terrestris est in Oriente sub Æquinoctiali. Igitur Adam formatus extra Paradisum in Campo Damasceno fuit ministerio Angelorum in ipso Paradiso ductus, ad ostendendum, quod ille locus non debebatur sibi ex natura, sed ex gratia, sicut & immortalitas prædicta.

### Reflexio X I I I,

**D**Icto de Terrestri Paradiso explicat subsequenter Divina Scriptura conditiones illius magis in particulari dicens: quod Dominus Deus produxit de humo omne Lignum pulchrum visu, & ad vescendum suave, & Lignum etiam Vitæ in medio Paradisi, ut nimirum fructus arborum essent homini ad escam, quia habebat vitam animalem cibus indigentem. Lignum autem Vitæ positum erat ad impediendam senectutem. Pro cuius intelligentia sciendum, quod ad vitam animalem continuandam prærequiritur cibus,  
per



per quem restauratur humidum deperditum per actionem calidi naturalis. Veruntamen ista restauratio non fit per æquivalentiam, ut ait Arist. pr. de generat. quia caro generata ex alimento est impurior quam prima. Sicut & vinum generatum per aquæ appositionem, & conversionem. Nam si talis appositio continuaretur, vinum fieret aquosum, & tandem species vini deficeret. Ita pariter evenit in restauratione, quæ fit per alimentum; nam caro generata est impurior, & per talem continuationem inducitur senectus, in qua carnes sunt impuriore, undè tandem deficit vita. Igitur quia homo factus est in vita animali, in qua calidum consumit humidum indigebat esu Fructuum de quibus hic dicitur. Sed ad hoc, quod prædicta restauratio fieret secundum æquivalentiam, & per consequens impediretur senectus indigebat esu Ligni Vitæ, quod habebat virtutem reducendi ad puritatem carnis primæ totam carnem alimentalem. Rursus facta nova impuritate per alimentationem, sumpto de Arbore Vitæ, semper reducebatur caro ad pristinam puritatem. Undè si homo permanisset in statu Innocentiæ, numquam senectutem probasset. Et quia talis Arbor, per virtutem sibi divinitus concessam, vitam prolongabat, meritò vocabatur Lignum Vitæ. Hinc Augustinus 14. de Civit. ait. Quod in Paradiso Terrestri cibus adherat homini ne esuriret; potus ne sitiret, & Lignum Vitæ ne illum senectus dissolveret.

### Reflexio X I V.

**P**ost pulchritudinem arborum Paradisi, describitur consequenter copia aquarum; Fluvius enim egrediebatur de loco voluptatis ad irrigandum illum, tum ad amœnitatem loci, tum ad fructificationem. Dividebatur autem iste fluvius in quatuor capita. Nomen uni Phison, sic dictus à fertilitate piscium, & vocatur iste fluvius alio nomine Ganges, à Gangete Rege, sicut dicitur Tyberis fluvius Romanus à Tyberino Rege Hetruscorum, qui Latium crebris  
latro-



latrocinij infestans, in eo suffocatus est, cum antea Abula diceretur. Est autem Ganges maximus inter omnia flumina Indiae, habens in latitudine aliquando quinquaginta stadia, & 20. in minori latitudine. Secundus fluvius dicitur Gehon, qui est Nilus: diciturque à Nilon, quod est limolum, & ideo totam tertiam Ægypti, per quam transit, multum fecundat. Tertius est Tigris, sic nominatus à velocitate cursus. Tigris namque est animal habens cursum velocissimum. Quartus est Euphrates, diciturque Hebraice, Perath, id est fructificatio, quia loca, per quæ transit, fructifera reddit. De cursu istius fluminis non facit Divina Scriptura specialem mentionem, quia erat unus terminus terræ promissionis; & ideo illius cursum erat satis notus Hebræis. Sed contra prædicta videtur esse: quia origines istorum fluviorum inveniuntur extra Paradisum in regionibus diversis; ideoque non videtur, quod inde deriventur. Ad quod dicendum, quod frequenter visum est aliqua flumina, licet magna, absorberi in terræ visceribus, quæ currentia per terræ mentus per magnum spatium, tandem egrediuntur alibi; & sic videntur ibi primo nasci, cum tamen ipsorum origo sit aliunde. Hinc Seneca de quæst. Nat. ponit de Alphee, flumine Siciliae, qui à terra absorbetur, deinde in Græcia renascitur, quod ex eo apparet, quia si palea, vel Virgæ supernatantes in Sicilia ponantur, inveniuntur post tractum temporis in Alphee, in Græcia, ad locum ortus fluminis: & ita dicendum de fluvij Paradisi.

## Reflexio X V.

**P**reparato à Divina beneficentia loco proportionato statui Innocentiæ, posuit Deus hominem in eo, ut operaretur, & custodiret illum, non opere laborioso, sed delectabili, ad experientiam, & exercitium suæ virtutis; præcipiens ei ut ederet de omni Ligno, uno tantum excepto, scilicet, Ligno Scientiæ boni, & mali. Per hoc autem præ-

B

ceptum



ceptum positivum, Adam tenebatur, ad conservationem suam edere de prædictis arboribus, quia natura animalis conservatur per cibum; fames autem, & sitis, poenalitates sunt, quæ in statu Innocentiæ non debebant esse, ideoque homo debebat cibum sumere; & cum esset valde perfectus in intellectu, poterat cognoscere, antequam adveniret poenalitas, quid ei esset necessarium. Fuit ergo conveniens dari homini præceptum in Paradiso terrestri, ut ederet, quia ad hoc non inclinabatur, cum non indigeret. Præceptum autem negativum de non comedendo de ligno scientiæ, boni, & mali, dedit Deus propter duo. Primo, in recognitionem dominij, ut videlicet, homo cognosceret se esse subiectum Deo. Secundo, ut in exercitatione præcepti magis mereretur, per iugem obedientiam Deo præstitam. Comextio autem fuit prohibita sub poena mortis, nam Deus dixit *In quacumque hora comederis ex eo, morte morieris*, id est, incurres necessitatem moriendi: unde in Hæbreo dicitur, *Moriens morieris*, quia gustato Ligno, non statim Adam mortuus est, sed cepit tendere ad mortem; statimque fuit mortalis per necessitatem, qui prius erat immortalis per gratiam. Porro hoc Lignum fuit sic nominatum ab eventu consequenti; quia per esum illius, experimentaliter homo cognovit, quanta distantia esset, inter bonum obedientiæ, & malum inobedienciæ; & inter poenam quam incurrerat, & bonum quod amiserat. Licet enim primi parentes speculativè intelligerent malum esse non obedire Deo, tamen numquam illud experti sunt, donec de fructu arboris vetitæ comederunt.

## Reflexio XVI.

**F**ormato homine in individuo, agitur deinde de liberorum procreatione. Ad hanc autem necessarium erat habere adiutorium, ideò Dominus dixit: *non esse bonum hominem esse solum*; quia nimirum Adam creatus fuerat, ut multiplicaret per generationem; ideoque non erat



erat conveniens intentioni Dei, vel ordini Univerſi, hominem eſſe ſolum; ſed debebat habere adiutorium, cum quo generare poſſet. Prius tamen Dominus adduxit, miniſterio Angelorum, ad Adam omnia animantia, ut per hoc demonſtraretur, quod iſta ſubijciebantur poteſtati illius. Secundo, ut videret, quod in cunctis animantibus, non erat aliquod ſimile ei quod poſſet ſibi dari in adiutorium generationis. Appellavit autem Adam nominibus ſuis cuncta animantia, conſiderando diligenter naturas eorum, de quibus habuit perfectam notitiam, cuius ratio eſt, quia perfectum præcedit naturaliter imperfectum, ſicut principium illius, quia reducit ipſum ad perfectionem: res autem inſtituendæ ſunt non ſolum in ſe ipſis, ſed ut principia ſequentium. Homo verò in mundi exordio, non ſolum erat principium aliorum hominum per generationem, ſed etiam quo ad inſtructionem, in quantum diſcipulus deducitur ad perfectionem Scientiæ per Magiſtrum, & ideo, ſicut in prima productione rerum, Deus produxit alias ſpecies perfectas, potentes ſimilia producere ex ſuis ſeminibus, ita formavit hominem perfectum, non ſolum quantum ad corpus ut poſſet ſtatim generare, ſed etiam quantum ad animam in ſcientia, ad quam poteſt naturaliter attingere, ut ſtatim poſſit docere; ſed illa ad quæ poteſt naturaliter attingere, ſunt omnia illa, quæ continentur in primis principiis per ſe notis, de quibus poteſt intellectus poſſibilis reduci in actum, virtute intellectus agentis; ideo Adam erat in potentia intellectiva perfectus, & ſic cognovit omnia naturalia cum ſuis proprietatibus, & per conſequens, habuit omnem Philoſophiam, Aſtrologiam, cæterasque Mathematicas diſciplinās. Habuit etiam notitiam omnium animalium, nam appellavit nominibus ſuis cuncta animalia; nomina vero bene impoſita, deſumuntur à proprietatibus rerum. Et quia homo in ſtatu Innocentiæ ordinabatur ad finem ſupernaturalem; ideo habuit cognitionem de ſupernaturalibus, quantum pertinebat ad illum ſtatum.



## Reflexio XVII.

**S**Vpra dictum est de adiutorio dando Adæ; hîc à Deo formatur, eiusdem quidem speciei, licet alterius sexus. Immisit enim Dominus soporem in Adam; cumque obdormisset, tulit unam de Costis eius, & ædificavit Costam quam tulerat de Adam, in Mulierem. Adverte autem, quod ille somnus non fuit ex causa naturali, nam somnus, solet accidere ex labore, vel ex repletione cibi, & potus; adeo ut, non possit repletis venis, ascendere spiritus moriuus, multiplicatus de corde per venas ad Cerebrum; tunc enim membra cessant à motu, & à sensu, & fit somnus. Nihil autem horum præcesserat in Adam, quia nec adhuc comederat, nec biberat, nec laboraverat, ideoque fuit supernaturalis. Nec contingit hoc, ut Adam non sentiret dolorem in ablatione costæ nam etiam si vigilasset, non sensisset dolorem, quia totum fiebat supernaturaliter. Sed sopor iste fuit in expressa figura Christi Domini in Cruce dormientis, de cuius latere Ecclesia sua Sponsa formata fuit, recipiendo Sacramentum redemptionis, & ablutionis in Sanguine, & Aqua: nam per Sanguinem Filij Dei, facta est redemptio; in Aqua vero Sacramenta ablutiva sumpserunt principium. Etenim in ipso rerum exordio, fuit etiam principium Mysteriorum. Sed dices: aut illa costa erat superflua, aut necessaria. Si superflua, ergò, primus homo immediatè creatus à Deo fuit monstruosus, quod asserere est inconveniens, cum opera Dei sint perfecta. Si autem erat necessaria, tunc remansit Adam imperfectus, indigens aliquo sibi necessario, prius habito, postea verò amisso. Dicendum, quod illa Costa aliquo modo erat superflua, & aliquo modo necessaria. Sicut dicimus, quod semen est superfluum individuo, sed est necessarium respectu speciei. Illa enim dicuntur necessaria individuo, quæ faciunt ad conservationem illius in esse proprio; & sic semen non est necessariū individuo, quia materia seminalis, numquam



nunquam transit in substantiam habentis; imò si non emittatur putrescit, & gignit magnos morbos. Quare oportet habentes propositum Castitatis servandæ, abstinere à multitudine ciborum, generantium materiam seminalem. Et quia non potest evitari, quin aliquid generetur, laborare oportet, ut per sudorem emittatur. Est tamen semen necessarium ad conservationem speciei; ideoque non est superfluum, nec reddit monstruosum individuum. Sic pariter dicendum, quod costa illa, Adæ erat superflua, respectu conservationis illius in esse proprio; sed erat necessaria respectu formationis Hevæ, quia Adam totius humani generis unicum principium erat. Formatio autem Mulieris de Costa, fuit sine additione materiæ. Deus enim, qui de nihilo produxit materiam, multo fortius potuit facere de Modica, Magnam, non per additionem materiæ aliunde sumptæ, sicut in segetibus contingit, sed per multiplicationem eiusdem materiæ in se ipsam; adeòut ex carne Costæ fuit formata Caro, & ex osse, ossa, in tota eorum latitudine: illa enim Costa, non fuit sublata de Adam, nuda, sed cum aliqua carne sibi adhærente.

### Reflexio XVIII.

**P**ostquam Heva sumpta est de viro, adduxit eam Dominus ad Adam, qui eam videns, ait *Hoc nunc os ex ossibus meis, & caro de carne mea*, ex quo patet, quod Adam cognovit supernaturaliter formationem Mulieris de Costa sua, quia sopore pressus, non poterat videre formationem istam. Deinde subiunxit, *Relinquet homo Patrem, & Matrem, & adhærebit uxori suæ*: Quod non intelligitur quantum ad dilectionem, sed quantum ad cohabitationem; quia filius cum est uxoratus, statim est emancipatus, & habet provideri sibi, Vxori, & familiæ: deinde ait, *Erunt duo in carne una*, miscendo, videlicet, semen; quia masculus, & foemina coniunguntur ad unam carnem prolis procreandam. Inter præcipuas autem causas, quare mulier de viro sumpta est



una fuit, ut Vir maximè diligeret Vxorem, quia ut patet 8. *Ethic*: in ordine diligendi; Primus amor, est ad se ipsum: quapropter, cum homo cognosceret fœminam ex se ipso sumptam, diligeret illam, sicut pater diligit filios suos, quia cognoscit esse partes decisas de substantia propria. Dilectio autem ista erat magis necessaria in Natura humana, quam in alijs animantibus, inter quæ non aliqua communicatio æconomica, ut patet ex *secundo Polit*; & ideo masculus, & fœmina non commorantur nisi ad generationem. Inter virum autem, & uxorem valde magna communicatio intercedit, & quotidiana; quæ sustineri non posset, nisi valde magnus amor esset, tollens omnia tædia, quæ nascuntur in communicatione continuata. Accedit, quod concubitus maris, & fœminæ inter homines, non est tantum edere prolem ut sit, & vivat, sicut contingit in brutis; sed ut debita educatione ad perfectum, secundum corpus, & animam perducatur; unde *Arist.* ait, quod filij à Parentibus tria suscipiunt maximè beneficia, nempe, *esse, ali, & educari*. Iste autem finis non potest modo debito obtineri, nisi per totam vitam Vir, & Vxor arctissimo nexu, & amore copulati, vicarias operas ad proles nutriendas, & educandas sibi invicem præstent.

### CAP. III. Reflexio XIX.



Descripta hominis formatione, hic agitur de illius casu. Dum enim beatam vitam in Terestri Paradiso agerent primi nostri parentes, inimicus Diabolus ardens invidia conatur eos, non solum à temporali, sed etiam ab æterna deijcere fœlicitate. Igitur mulierem aggreditur, ut per ipsam de Viro triumpharet; & serpentem intrat, non quia hoc ipse elegisset, sed quia ex Divina dispositione, non fuit permissus intrare in aliquod animal pulchræ figure, sed in uno horribilis speciei, ut sic fœmi-



foemina magis tentationem vitaret. De serpente autem dicitur in *Tex*, quod erat *callidior cunctis animantibus terre*. Sed ista calliditas principaliter referenda est ad Dæmonem, qui in Serpente loquebatur: nam verba serpentis, erant verba dæmonis, ut principaliter agentis; sicut lingua alicuius sapientis dicitur erudita, quia ab intellectu prudenter movetur. Sciendum est autem, quod in statu Innocentiæ non habebat Diabolus potestatem tentandi hominem interius, movendo videlicet appetitum sensitivum ad motus illicitos, vel Phantasiam, per cuius motum, aliquod illicitum proponeret intellectui: quandoquidem, in viribus inferioribus nihil inordinatum contingere poterat, nisi prius deordinata Ratione. Iustitia namque Originalis erat quædam ordinatio virium subiectarum rationi, nec aliquo modo potentium repugnare, donec ratio repugnaret Deo; & ideo callidus Infidiator hoc sciens, incepit ab ipsa ratione. Et quia homo naturaliter est multum liber, valdè ei servitus repugnat. Servitus autem est, quando alicui non licet facere quod vult, & hoc est per præceptum maxime negativum, quod coarctat imperium voluntatis; ideo quæsit à Muliere: quare Deus prohibuisset eis comestionem Ligni, quasi diceret: *Istud præceptum non fuit conveniens, cum sitis liberæ conditionis, & superiores omnibus lignis Paradisi*. Tunc Mulier mota fuit quadam elatione, & inclinata per hoc ad displicentiam præcepti, & ulterius ad dubitationem de pœna comminata, quod pertinet ad superbos. Insuper iudicavit se in hoc præcepto gravatam, ideoque respondit. *De fructu Lignorum vescimur, de fructu vero Ligni, quod est in medio Paradisi, præcepit nobis Deus ne comederemus, & ne tangeremus illud, ne forte moriamur*. Adverte autem quod, *ly, Tangeremus*, addidit mulier de suo, ex displicentia præcepti; nam ille cui displicet mandatum, libenter illud aggravat in referendo. Deus autem non prohibuerat Ligni tactum, sed gustum. Similiter illud *ne forte moriamur*, addidit mulier de suo, est enim adverbium dubitandi; cum tamen Deus asser-



tive mortem comminasset. Sed hoc dixit mulier, quia ad displicentiam mandati, quod reputatur indebitum, sequitur dubitatio de poena pro transgressione. Tunc Diabolus, cognoscens Mulierem de morte comminata dubitantem, statim asseruit, nullo modo pro illo actu secuturam, subdens falsam causam prohibitionis dicendo, quod Deus sciebat, quod si comederent de Ligno scientiæ boni, & mali, aperirentur oculi eorum; idest, Intellectus redderetur perspicacior ad intelligendum, & quod futuri essent sicut Dij. Non dixit autem insidiator, *Dij*, absolute; non enim promisit eis æqualitatem Divinam, quod erat manifeste erroneum; sed promisit quamdam similitudinem, quæ consistit in non subijci obedientiæ alterius; & habere quamdam excellentiam scientiæ in omnibus sibi expedientibus, sicut Deus nulli subest, & omnia dirigit per suam sapientiam. Igitur deordinata ratione in muliere, per ea quæ supra dicta sunt, statim incipit appetitus deordinari, male videlicet appetendo, & secundum extimationem, male iudicando, ideoque tulit de fructu Ligni, & comedit. Multipliciter autem Heva peccavit, antequam comederet de fructu vetitæ arboris. Primo, in elatione. Secundo, in displicentia de Divino mandato. Tercio, dubitando de morte comminata à Deo. Quarto, appetendo inordinatè fructus comestionem. Quinto, eligendo comedere de illo.

### Reflexio XX:

**H**Austo à Serpente veneno, propinat Heva illud innocentis Marito, imò omnibus filiis futuris. Post comestionem namque dedit Viro suo de fructu arboris, narrans ei omnia, quæ Serpens locutus fuerat: quæ tamen Adam non credidit: dicitur enim Timoth 2. *Vir non est seductus, sed Mulier*, seduci autem, est, falsa credere, quod fuit in Heva, sed non in Adam: tamen fuit deceptus aliunde, quia nimirum credidit post transgressionem consequi veniam, & sic



fic in statu suo felicissimo remanere. Comedit etiam de Li-  
 gno, ne contristaret delicias suas, videlicet, Vxorem. Quo  
 perpetrato, aperti sunt oculi eorum, scilicet mentis, non cor-  
 poris; prius enim habebant notitiam solummodo speculati-  
 vam boni, & mali; sed post comestionem, habuerunt no-  
 titiam experimentalem suæ transgressionis; nam subtracta  
 Iustitia originali, statim senserunt rebellionem carnis ad spi-  
 ritum, & motum inordinatum membrorum, ideoque co-  
 gnoverunt, quod sua nuditas erat verecundabilis, propter  
 partes pudendas. Quapropter *consueverunt folia Ficus*, ut  
 dicitur in Tex: ut cooperirent suam nuditatem. Et ex hac  
 litera dicunt Rabbini communiter, quod Ficus fuit arbor de  
 cuius fructu comederunt primi nostri parentes. Causa autem  
 huius erubescentiæ est: quia prædictæ partes magis moven-  
 tur contra imperium rationis. Anima enim nostra movet  
 omnes partes corporis ad arbitrium suum, quæ non obstant;  
 pars autem genitalis repugnat imperio voluntatis propter  
 fortem concupiscentiam veneream: unde voluntas regit om-  
 nes alias partes principatu dispotico, movendo eas ad placi-  
 tum: partes vero genitales, principatu politico, idest, libe-  
 rali, non qualiter vult, sed qualiter potest, rogando, & sua-  
 dendo. Cum autem anima nostra sit valde generosa, erube-  
 scit se esse à tam turpi passione devictam; maxime, quia in  
 actu venereo, cessat prorsus omnis operatio rationis: teste Arist.  
 7. *Ethic.* In alijs autem actionibus criminosis manet aliquis  
 actus rationis, licet non relatus; hic autem tota ratio absor-  
 betur, & totus homo efficitur caro. Potest autem alicui vi-  
 deri non fuisse conveniens, quod Deus permiserit hominem  
 tentari, cum sciret illum esse casurum. Ad quod dicendum  
 est: quod Deus sic administrat res, quas condidit, ut sinat il-  
 las proprios motus agere; ideòque rationabile, & iustissi-  
 mum fuit, hominem dimitti uti libertate arbitrij sui; maxime  
 cum pro illo statu, posset facile tentationem superare. Et  
 sicut voluit, ipsum per bonos Angelos ad bonum incitari; ita  
 etiam permisit illum à malis tentari: maxime quia, non ha-  
 bebat



bebat Diabolus potestatem tentandi hominem interius, ut supra dictum est; sed solum exterius, proponendo sensui, & ideo in specie sensibili apparuit ad hominē tentandum. *Hinc Aug. 11. super Genesim ait. Non mihi videtur magnæ laudis futurum fuisse hominem, si propterea posset bene vivere, quia nullus ei malè vivere suaderet.*

## Reflexio XXI.

**S**Ecuta transgressione primorum parentum, statim audierunt vocem Domini deambulantis in Paradiso ad auram post meridiem, ut dicitur in Tex. Adverte autem, quod ista ambulatio non est intelligenda in forma Deitatis, quia secundum illam, ubique est; sed in aliqua similitudine creata, in qua Dominus Deus apparuit. Per meridiem verò intelligitur determinatio temporis. Et dicunt multi DD. quod hora diei decima, fuerunt primi parentes expulsi de Paradiso. Aura autem est accipienda pro vento præcedente Divinam apparitionem. Sicut Act. 2. dicitur, quod sonus vehemens præcessit apparitionem Spiritus Sancti. Et simile habetur 3. Reg., quando Deus apparuit Eliæ, & in pluribus alijs locis. Vocavit autem Deus Adam dicens, *Vbi es?* Et quæstio fuit, ut ex responsione Adæ convenientius fieret increpatio. Serpentem autem non interrogavit, quia Diabolus, qui in serpente loquebatur, iam pro peccato suo fuerat de Coelo ad Tartara eiectus. Ad Divinam interrogationem respondit Adam. *Vocem tuam audiui, & timui, eo quod nudus essem,* cui Dominus dixit. *Quis indicavit tibi, quod nudus esses?* Quasi inferret, nisi, quia propter transgressionem præcepti mei, ablata est à te Originalis Iustitia, per cuius subtractionem facta est confusibilis, & erubescibilis tua nuditas. Adam namque ante transgressionem, bene videbat nuditatem carnis suæ, sed hoc non iudicabat ignominiosum: post peccatum vero cognovit nuditatem esse ignominiosam, & de hoc quæsit Deus. In Paradiso autem primi



mi parentes non habebant vestes, quia pulchritudo naturalis maior est, quam pulchritudo ornatas. Et ex hoc colligitur, quo Beati in Eterna vita non sunt habituri vestes, quia iste propter peccati turpitudinem inventæ sunt. Cessante autem omni culpa, & pœnalitate peccati, cessabit vestis: & Caro mundi, sicut Beatorum fulgebit tamquam Sol, in perpetuas æternitates.

## Reflexio XXII.

**P**Osito homine ante Tribunal Dei offensi, ponuntur maledictiones eo ordine, quo peccatum initiatum fuit. Et ideò, primò maledicitur Diabolus in serpente, quia primò elegit tentare hominem; unde Deus dixit illi. *Quia fecisti hoc, maledictus es inter omnia animantia.* Pro intelligentia autem sciendum est, quod in his verbis maledicitur tam Demon, quam serpens: principaliter tamen Demon, quia tentavit; & utrumque, in detestationem peccati; non vero, quia diabolus peccaverit, quia tentando non peccat, cum sit in termino; nec serpens, cum non sit animal rationale, in quo solo potest esse peccatum. Adverte autem, quod omnia, quæ hic ponuntur pro maledictione serpentis, erant ipsi naturalia, etiam homine non peccante; tamen ista fuerunt illi confirmata in pœnam, & ordinata in infamiam. Sic mors homini composito ex Elementis contrariis, est illi naturalis; sed post peccatum capit esse illi pœna peccati. Et Iris ante diluvium fuit naturalis apparitio; post diluvium vero capit esse signum pacti, inter Deum, & hominem. Multi vero DD. dicunt, quod ista maledictio serpentis est odium innatum, quod habet homo contra illum, quo magis eum detestatur, quam cætera animalia, eique maledicit: quod quidem odium non fuisset innatum, si homo per serpentem, tamquam per diaboli instrumentum, non peccasset. Indidit autem Deus nobis istud odium naturaliter, ut per hoc reducamur in primi peccati memoriam, quod per serpentem habuit originem.



nem. Deinde prædicitur ipsi serpenti, quod mulier contereret caput illius: quod exponitur communiter ab omnibus Doctoribus, de Beatissima Virgine Deipara, Domina nostra, quæ est infesta dæmonibus. Semen vero dæmonis sunt alij Angeli mali, propter similitudinem naturæ, & malitiæ. Semen vero Immaculatæ Virginis Deiparæ, est Christus Dominus, eius Filius naturalis, quo mediante contrita est potestas dæmonis.

## Reflexio XXIII.

**M**Aledicto diabolo, maledicatur subsequenter foemina, quæ illi consensit his verbis: *Multiplicabo æumnas tuas, & conceptus tuos: in dolore paries filios, & sub viri potestate eris, & ipse dominabitur tui.* Adverte autem, quod æumnæ sunt labores onerosi: quapropter labores Herculis æumnæ sunt appellati. Conceptus vero est tempus, in quo mulier gestat foetum in utero usque ad partum, in quo multi labores illi eveniunt. Sed dices: Homo, & foemina sunt communicivi, in vita æconomica *ex primo Polit.* In omni autem æconomia necesse est esse unum præpositum: Vir autem erat naturaliter sensatior; ideòque naturaliter præerat Mulieri, & ideò non videtur facta illi iniuria, dum ponitur sub potestate viri. Dicendum, quod in Paradiso Terrestri non fuisset proprie principatus, vel communicatio æconomica, nec politica, quia Principatus dicit Dominium in subiectum sibi: sed subiectio repugnabat statui illi beato. Item: omnis Politia regitur legibus; Lex autem ponitur peccatori; in Paradiso autem homines fuissent confirmati in bono si restitissent diabolo in principio, unde non indignissent Legibus; sicut Beati in Cœlo nullam legem habent, quia ibi nulla deordinatio esse potest. Præterea, non fuisset ibi propriè communicatio æconomica, quia hæc dicit necessitatem; in Paradiso autem nulla fuisset necessitas, nam illa beata tellus sponte producebat omnia necessaria ad vitam.



vitam. Item, quia vita æconomica constituitur essentialiter ex Domino, servo, & Vxore, ut patet ex *Arist. pr. polit*; sed in Paradiso non fuisset servitus, quia ista est pœna peccati. Educatio vero filiorum non fuisset laboriosa; quia filij nati non contraxissent miseras, & indigentias, quas modo patiuntur. Nunc verò, quia propter peccatum natura nostra incidit in multas necessitates, inter quas est victus, & vestitus, quæ per æconomiam acquiruntur, necessaria est æconomia, in qua licet naturaliter Mulier sit subiecta Viro, tamquam prudentiori, respectu dispositionis domesticæ: tamen in pœnam fuit illi hoc datum, ut esset sub viri potestate, ut illi iuberet id, quod facere debuisset, illamque puniret cum errasset, intra limites tamen Iustitiæ, & æquitatis.

### Reflexio XXIV.

**A**ssignata Mulieris punitione, ponitur pœna Viri si his verbis, *quia audisti vocem Vxoris tue, & comedisti de Ligno, maledicta terra in opere tuo; in laboribus comedes ex ea cunctis diebus vitæ tue*. Notandum est autem, quod ad conservationem familiæ, Vir est æconomus, idest, dispensativus domus, providens toti familiæ suæ de necessarijs: & quia ista acquiruntur de terra, ideò Deus illam maledixit, ut homo in acquirendo sibi necessaria, multum laboraret, & sic in sudore vultus sui vesceretur pane. Antea vero non indigebat terra cultore; nunc autem vix necessaria vitæ, licet sæpius culta, subministrat, & senescente Mundo semper minus fertilis efficitur. Si autem homo non decidisset à statu Iustitiæ originalis, produxisset terra sine ulla cultura, & diligentia fructus convenientes in abundantia omni tempore; & homo illam colvisset solummodo ad recreationem, & virtutis exercitium. Vnde in Hebræo dicitur, *maledicta terra propter te*, idest, propter peccatum tuum. Porro labor iste semper durabit usque ad mortem, quia omnibus communis est: nullus enim mortalium, tam compositæ felicitatis



citatis reperitur, qui vel curarum mole, vel pondere laborum pressus, unam transeat diem sine dolore, vel sine aliqua passione animi. Quapropter Adam vocavit Vxorem suam, Hevam, quod nomen in Hebræo significat, vitam pœnalitibus subiectam. Vnde per hoc descripta fuit transfusio pœnæ, inflictæ à Deo propter transgressionem ad omnes posteros; quia quales facti sunt primi parentes per peccatum, tales filios genuerunt, miserijs, & calamitatibus cruciandos.

### Reflexio XXV.

**A** Missa per peccatum Iustitia originali, privantur consequenter primi nostri parentes loco debito Innocentiæ, & puritati perditæ. Igitur Dominus Deus eiekturus illos de Paradiso, fecit eis tunicas pelliceas de pellibus animalium mortuorum; tum in signum propriæ mortalitatis; tum quia indigebant tegumento contra intemperiem aeris, ad quam erant eiciendi. Clementissimus enim Deus, licet hominem propter peccatum puniat, tamen semper in ipsa punitione miseretur. Expulso autem homine a Beata illa Regione, collocavit Deus ante Paradisum Cherubim, & flammeum Gladium, quod dupliciter exponitur, secundum duplicem opinionem supra positam de situ Paradisi. Nam in sententia illorum, qui dicunt Paradisum esse sub Circulo æquinoctiali: Gladius flammeus est zona torrida, inter habitationem nostram, & Paradisum. Diciturque Versatilis, quia Sol appropinquat ad nos in Æstate, & elongatur in Hyeme. Per Cherubim vero intelligitur Angelica custodia, per quam tota natura corporea administratur, & maximè, motus Orbium Cœlestium. Secundum vero illam sententiam, quæ ponit Paradisum extra æquinoctiale circa Tropicum Cancræ, vel Capricorni, intelligitur per flammeum gladium aliquis ignis materialis ibi factus à Deo, vel oriens è terra, sicut accidit in Monte Ætna, qui fere continuè ardet. Et significatur nomine gladij, quia ignis sursum ascen-



ascendens acuitur in superiori parte ad modum Gladij; per Cherubim autem intelligitur natura Angelica, ut prædictum est.

## CAP. IV. Reflexio XXVI.

**D**escripta hominis conditione, & transgressione, hîc agitur de illius propagatione. Expulso igitur Adam de Paradiso, cognovit Vxorem suam, quæ peperit Caim. Dicunt autem multi DD. quod ista generatio fuit decimoquinto anno post eiectionem de Paradiso: primi namque parentes egressi sunt virgines; & tanto tempore vacarunt à copula, quia erant dolentes de peccato commisso contra Divinam beneficentiam, & de amissione illius felicissimi status, non solum pro se, sed etiam pro tota eorum posteritate. Rursus Heva peperit alium filium, nempe Abel, qui interpretatur *luctus*, & *nihil*. *Luctus*, ab eventu, nam propter illius mortem, luxerunt Adam, & Heva centum annis in quadam Valle apud Hebron, quæ dicta fuit Vallis Lacrymarum, ut patet in lib. de divisione Terræ Sanctæ. *Nihil* vero, quia de illo nullum semen erat nasciturum. Porro isti duo fratres fuerunt multum differentes in moribus: nam Caim fuit Agricola, ex cultura terræ semper quærens lucra. Abel vero fuit Pastor ovium; congregavit enim oves, quæ mansuetæ erant, & factus est curam gerens illarum. Licet enim homines in illa ætate non vescerentur carnibus, tamen lacte pecorum, & pellibus animalium utebantur pro vitæ sustentatione, & pro tegumento contra intemperiem aeris. Sanctus autem adolescens suscepit hoc officium ad exercitationem continuam, ut à se removeret otium, non ut sublevaret necessitatem, recipiendo aliquid ab ovibus. Forsan in figura illius Prælati Ecclesiastici, qui Gregem sibi à Spiritu Sancto commissum, curat, tribuens potius ovibus, quam recipiens ab eis. Porro Caim fuit caput Civitatis diaboli. Abel verò fuit primus in Civitate Dei: ideoque frater carnalis

perse-



persequabatur spiritualement, quia Civitas Dei à membris Satanæ, dum vivit, multa sustinet adversa in hac mortali vita.

## Reflexio XXVII.

**N**Atis parvulis, & ad juvenilem ætatem perductis, uterque offerebat munera Domino; docuerat enim Adam filios suos colere Deum in Sacrificijs, & oblationibus: istud enim maxime pertinet ad actum Latriæ: quia licet adoratio, reverentia, & laudes fiant Deo, tamen exhibentur etiam hominibus: sed Sacrificia nullumquam exhibita fuerunt, nisi esset Deus, vel existimaretur Deus. Cain igitur obtulit de fructibus terræ; sed de peioribus, & corrosis, imò secundum DD., de putrefactis: ideòque illius oblatio non fuit accepta; quia licet Deo non adveniat aliquod malum, si de peioribus offeramus, vel bonum si de melioribus: tamen est magna irreverentia, exhibere Deo fordida. Abel vero obtulit de primogenitis Gregis sui, quia regulariter primogenita sunt pinguiora; & gratiosiora. *Et respexit Dominus ad Abel, & ad munera eius*, ut dicitur in *Tex.* Et ponitur prius Abel, quam munera; quia Deus magis acceptat intentionem offerentis, quam oblationem. Operatio autem dicitur bona secundum quod est virtuosa. Virtus autem ex Philosopho, est habitus electivus; ideòque electio est actus virtutis. Et in ista interiori operatione est bonitas, vel malitia moralis. Exterior verò operatio habet aliquid de bonitate, vel malitia secundum quod est imperata ab ipsa voluntate; & propter hoc electio Abel interior fuit magis accepta, quam munera, quia omnia exteriora sunt Dei; solam voluntatem reliquit nostræ potestati, quam vult ut subdamus in obsequium suum. Signum autem Divinæ acceptionis in Sacrificio Abel fuit per Ignem immissum à Deo consummantem sancti juvenis oblationem. Iste autem ignis non cecidit super oblationem Cain; quia cum Deus non respicit ad personam, nec ad id, quod extra geritur, respicit; nam



nam illa, quæ extra sunt, habent bonitatem ab interioribus. Videns ergo Cain oblationem fratris fuisse Deo acceptam non verò suam, inflammatus invidia, concidit vultus eius; non enim poterat respicere rectis oculis, & vultu placido fratrem innocentem; tristitia enim mentis apparet ex deiectione vultus. Tunc Deus benignè correxit Cain, ne malum, quod conceperat, perpetraret; & proposuit illi admonitionem, ut daretur iniquo germano occasio penitentiae. Sed ex clementissima Dei monitione non fuit motus ad sui sceleris detestationem; sed rabiem, furoremque magis augens, & ad mortem innocentissimi fratris atrocius inhians, sanctum Iuvenem verbis blandis alloquitur; suadens ei, ut simul exirent in agrum, quibus Abel credit. Sancta namque simplicitas, nunquam in verbis præsumit latere fraudem. Sic igitur Cain, factus, de fratre, proditor, occidit innocentem Iuvenem lapide, vel ligno, non autem ferro, cum non esset in illa ætate tale mortis instrumentum.

### Reflexio XXVIII.

**P**erpetrato scelere, statim subsequitur Divina ultio. Vocavit enim Dominus Cain, ipsumque interrogavit de Abel fratre suo. Quæ quidem interrogatio secundum DD. facta fuit ut daretur forma procedendi Iudiciis contra reos. Poena namque non debet inferri, nisi convicto de crimine. Respondit autem Cain Domino, se nihil scire de fratre suo; addens fratricidio mendacium, & falsam excusationem, dicens, *nunquid custos fratris mei sum ego?* Quasi diceret *non*; cum tamen ex lege naturæ ad hoc obligaretur. Tunc Dominus videns illum obstinatum in malo, protulit contra eum sententiam, dicens. *Maledictus eris super terram. Cum operatus fueris eam, non dabit tibi fructus suos: vagus, & profugus eris super terram.* Per hoc autem patet, quod magis laboravit Cain in acquirendo cibos, quam posteritas Adæ per Seth: etenim Terra habebat duas Maledictiones: primam


C

quam



quam incurrerat per Adam; secundam, quam incurrerat per Cain. Prima extendebatur ad totam naturam, quia Adam illam in se continebat. Secunda, respiciebat particulariter Cain, ratione peccati sui specialis; & hæc non extendebatur ad omnes homines, quia Cain non erat primus Parens. Fuit autem Cain vagus non habens certum locum habitationis; sed semper fugiebat ad diversa loca, timidus semper, & pavidus. Fuit vero maledictus; tum quia omnes ei maledicebant; tum quia, Deus reddebat illum in omnibus infortunatum.

## CAP. V. Reflexio XXIX.



Vidita Divina sententia, non fudit impius germanus lacrymas; non conteritur ut indulgentiam impetraret; sed addens scelus sceleris, dixit (*Maiores iniquitas mea, quam ut veniam merear*) Quibus in verbis, desperavit de Divina misericordia. Cupiens autem liberari, non à culpa, sed à pœna, subiunxit. *Omnis igitur, qui invenerit me, occidet me*: Dicunt autem DD. quod per hæc verba desideravit citò mori, ut sua miseria finiret: Sed Deus noluit hoc illi concedere, ideoque dixit. *Nequaquam ita erit, sed omnis, qui occiderit Cain, septuplum punietur*. Pro intelligentia autem Tex. adverte, quod ista littera videtur sonare quod ille, qui Cain occideret, magis puniretur, quam Cain. Sed hoc non videtur rationabile; quia maior pœna correspondet maiori delicto: Sed magis peccavit Cain, qui occidit innocentem quem cognoscebat, quam Lamech, qui occidit impium quem non agnovit. Ista autem diminuunt de ratione demeriti; ideoque dicendum, quod ista littera est obscura propter punctationem. In Hebræo enim sic punctatur, *Omnis qui occiderit Cain*: Et est una sententia, cui debet subintelligi, *graviter punietur*, licet non exprimatur modus punitionis. Deinde subsequitur. *Septuplum punietur* Et hoc refertur



refertur ad Cain: idest, punietur Cain in septima generatione, undè in Hebræo dicitur *Septennis punietur*, quia in fine septem generationum, post multas tribulationes, & misérias interfectus est à Lamech, in ultionem sanguinis innocentissimi fratris. Nolens igitur Dominus Deus, quod Cain tam citò migraret ex hac vita, posuit in eo signum, & fuit tremor horribilis omnium membrorum, quo mediante cognoscebatur, ut vir pessimus, & fratricida. Prolixa autem eius vita fuit, non solum ut diu cruciaretur, sed etiam propter correctionem aliorum, ut nimirum homines aspicientes hanc gravem pœnam, caverent ab homicidio. Mandavit ergo Deus, quod nullus occideret Cain: quod præceptum statim fuit divulgatum; qua propter homines, licet eum abominarentur, tamen ab occisione illius abstinebant.

## Reflexio XXX.

**A**ccepta iusta Sententia, iniustus, & semper detestabilis Germanus, egressus est à facie Domini; videlicet, à conspectu illius similitudinis, in qua loquebatur ei Deus, non potens sustinere vultum Dei loquentis, & irati. Et quia verecundatus est coram patre suo Adam comparere, fugit in longinquas terras versus Orientem; cognovitque uxorem suam, quæ erat etiam Soror. Dicunt enim communiter DD. quod Hæva in quolibet partu geminos pariebat, nempe masculum, & fœminam; & isti postea erant Vir, & Vxor: Hoc enim exigebat ratio temporis, ad genus humanum multiplicandum; quo multiplicato, numquam licuit ducere Sororem in uxorem. De Sorore autem Abel dicendum, quod nondum ei copulata fuerat; undè vel procedente tempore tradita est in matrimonium alteri viro; vel perpetua verginitate permansit. De fœminis autem non fit mentio regularitèr in Sacra Scriptura. Porro Cain ædificavit Civitatem, denominans illam à filio suo primogenito Henoch. Tempore enim huius ædificationis erant multi de



filij, & descendantibus Cain, qui sufficebant ad construendam, non solum unam Civitatem, sed multas: fuit enim ista ædificatio circa annum quadragentesimum ætatis Cain, ut refert Iosephus. Congregavit præterea multos ad se; tum quia semper erat in timore, ac tremore; tum ut exerceret rapinas, & latrocinia: mutavit enim simplicitatem hominum illius primi Sæculi ad malitiam.

## Reflexio XXXI.

**P**onitur deinde in Tex., successio Cain: habuit enim multos filios, & nepotes, inter quos fuit Lamech, qui accepit duas Vxores; & sic introduxit Bigamiam, contra naturæ institutionem, quæ fuit unius cum una. Post diluvium vero licuit in veteri testamento sanctis Patribus, ad multiplicandum populum Dei. Ex isto Lamech descendit Iabel, qui fuit Pater habitantium in Tentorijs, atque Pastorum. Instituit enim tentoria portabilia, in quibus habitarent Pastores ad diversa loca pascuorum: & dicitur, *eorum pater*, quia illos instruxit, & in hoc fuit inter eos principium. Iubal vero eius frater, fuit pater canentium Cithara, & Organo; invenit enim artem musicam, & pulsativam, quæ Citharistæ, & Organistæ utuntur, ut otiosa tædia Pastorum, delectatione musica tollerentur. Tubalcain verò, invenit Artem ferrariam, & ut refert Iosephus, bellicas res docuit. Insuper sculpturas operum in metallis, ad libidinem oculorum formavit, quo percutiente Iubal eius frater, Malleorum sono delectatus, ex ponderibus eorum, proportionem, & consonantias, quæ ex his nascuntur, excogitavit; & inventa Musica, reliquit præcepta in Columnis marmoreis. Homines enim illius temporis, audientes ab Adam futurum diluvium Aquæ, & Ignis, labores inventionum suarum, Columnis marmoreis consignabant, ut sic posteris documenta relinquerent permanentia. Modus autem inveniendi Metalla, talis fuit. Dum homines illius primi sæculi succenderent fruti-



frutices in pascuis, Venæ Metallorum, quæ superficie tenus eminebant, fluxerunt in rivulos, & sublata Laminæ, figuras locorum, in quibus iacuerant, referebant: ex quo Tubalcain cognovit, quod in varias figuras possent Metalla resolvi, & ideo factus est Compositor ferri; Quod, cum de terra extrahitur, per ignem, & malleationem depuratur. Aliæ autem species Metallorum, ut Aurum, & Argentum non fuerunt à principio inventæ; sed post, per magnum laborem, & cupiditatem hominum; hinc quidam dixit.

*Effodiuntur Opes, irritamenta malorum.*

*Iamque nocens Ferrum; & Ferro nocentius Aurum.*

Ovid. lib.  
pr. metamorf.

Ponitur deinde in Tex: Noema ob virtutem suam; quia ista adinvenit lanificium, ad faciendum vestes, cum prius homines pellibus animalium uterentur.


## Reflexio XXXII.

**D**Escripta generatione Cain delenda, consequenter describitur generatio Adæ permanenda, & eligenda; quia de ista natus fuit Noe, qui reparavit Sæculum. Currebat igitur prima Etas repleta malis hominibus descendantibus de perfido Cain: nec Adam habebat aliam immediatam successionem: Dicunt enim DD. communiter, quod interfecto sancto, & prædilecto filio suo Abel proposuit contineri de cætero; & diu continuavit, lugens centum annos mortem innocentissimæ suæ prolis; sed postea ex Dei revelatione admonitus, cognovit Vxorem suam, hoc Deo iubente, ut nimirum per istam Lineam nasceretur Christus Dominus, & non per Caim, qui erat à Domino maledictus. Peperit igitur Heva tertium filium, cui Adam nomen imposuit *Seth*, qui interpretatur *positio*: quandoquidem accepit hunc à Deo pro Abel. Decurrente autem tempore, Seth genuit Enos; & iste cepit invocare Nomen Domini. Instruitus enim à Patre iusto, multum profecit in cultu Divino; Et adinvenit quædam verba devota, ad humiliter deprecandum



candum Dominum. Insuper instruxit alios homines, ut erga Deum devoti, & humiles essent; ideoque dicitur quod ambulavit cum Deo, iuste videlicet, & pie vivendo; quapropter ob excellentiam suæ virtutis, assumptus fuit à Deo, & positus in Paradiso Terrestri, ubi, & Elias postea raptus fuit, ut habetur 4. Reg. & inde exituri simul sunt ad prædicandum in fine Mundi, contra Antichristum.

## CAP. VI. Reflexio XXXIII.




Onitur in hoc Capitulo generationis Adæ recapitulatio, ut illa deducatur, de qua Christus Dominus erat nasciturus, & quia in Textponuntur homines illius temporis pervenisse ad longissimam ætatem, merito quæri potest de causa. Et dicendum, hoc accidisse, primo, ex bonitate complexionis. Secundo, ex modo vivendi, quia homines illius primi sæculi sobriè, & temperatè vivebant. Tertio, ex bonitate nutrimenti; quia ante Diluvium, terræ nascentia meliora erant, quam post; nam aquæ Diluvij propter falsedinem, reddiderunt terram minus aptam ad producendum fructus tam substantiales. Quarto, ex scientia Adæ: cognovit enim virtutes herbarum, quæ conferunt ad sanitatem conservandam, & vitam prolongandam, docuitque de omnibus posteros suos. Quinto, ex bono aspectu syderum; talis enim aspectus multum facit ad longitudinem vitæ: iste autem mutatus est, tempore procedente, per continuum motum Cœli. Sexto, ex Divina dispositione, sic ordinante, ut per longam hominum vitam, multiplicaretur genus humanum. Septimo, ut homines illius temporis ex longitudine vitæ, possent habere experientias de motu Cœli, & effectibus Syderum; aliarumque rerum; quæ quidem experientiæ sunt principia artis, & scientiæ, ut habetur *pr. Metaph.* Ponitur autem hic in fine generationum



tionum Lamech, qui genuit filium; vocavitque nomen eius; Noë, dicens. *Iste consolabitur nos ab operibus, & laboribus manuum nostrarum.* Homines enim ante tempus Noe; multum laborabant in agricultura; quandoquidem proprijs manibus terram colebant. Noe vero adinvenit rusticalia instrumenta, & artem arandi, in qua plus laborant animalia, quam homines, & ideo dicitur requiem mortalibus dedisse.

## CAP. VII. Reflexio XXXIV.



**D**edita multiplicatione hominum, hic agitur de eorum peccatis; & per consequens de pœna a Deo illis infligta. Dicitur ergo in *Tex. Videntes filij Dei filias hominum quod essent pulchræ, acceperunt sibi Vxores.* Sciendum est autem, quod hic, *filij Dei*, intelliguntur illi, qui descendunt de Seth, qui à patre suo fuerunt instructi in vero cultu Divino. Vnde in pluribus locis Sacræ Scripturæ, fideles vocantur Filij Dei. Per filias autem hominum, intelliguntur Mulieres descendentes de Cain; quæ erant dissolutæ, & lubricæ ad libidinem, de quibus præceperat Seth filijs suis, de voluntate Domini, quod non contraherent Matrimonia cum illis, sed procedente tempore, transgressi fuerunt mandatum sibi impositum. Hinc Deus provocatus ad iracundiam, ait. *Non permanebit spiritus meus in homine, quia caro est.* Id est, indignatio mea, non permanebit in æternum contra hominem, quia non irascar contra ipsum irrevocabiliter, sicut contra Angelum malum, cuius peccatum est irremediabile; Homo vero habet pronitatem ad peccandum ex corpore, animam aggravante; propter quod est magis sibi parcendum, puniendo illum temporali tantum pœna, non æterna, dummodò tamen vera sequatur pœnitentia; ideoque subiunxit Dominus. *Eruntque dies eius centum viginti annorum.* Per quæ verba non potest dici, quod determinetur tempus humanæ



vitæ per diluvium, quia multi diutius postea vixerunt, ut patet infra; sed determinatur tempus, à prolatione Sententiæ Divinæ usque ad executionem, in quo poterant homines pœnitere. At depravatum illud Sæculum, nullam egit pœnitentiam, sed auxit magis culpam. Omnis quippe caro corruperat viam suam, dum homines quasi universaliter, non solum peccatis fornicationis, stupri, & adulterij se contaminaverunt, sed etiam peccato Sodomix. Licet autem in quolibet carnali vitio, homo corrumpatur, quia ordo rectæ rationis destruitur; tamen in hoc semper abominabili vitio, reperitur maior perversio Ordinis, & modi; adeo meritò dicatur contra naturam.

## Reflexio XXXV.

**V**Idens igitur Deus tam magnam, & continuatam scelerum multiplicationem, *pœnituit eum*, ut dicitur in *Tex. quod hominem fecisset in terra*. Adverte autem, quod pœnitentia, & dolor, cœteræque passionēs, quæ hic exprimuntur, nullo modo sunt in Deo secundum rem, sed secundum modum. Quapropter dicitur pœnituisse, & doluisse, quia ad modum pœnitentis, & dolentis se habuit, designans destruere quod prius fecerat; & sic videbatur pœnitere, voluntate tamen, ac dispositione immutabili permanente. Porro in hac iniquorum congerie, accedebat multitudo Gigantum. Et sic dicebantur, quia erant multum excedentes alios homines in statura: erantque robusti viribus, & incompoti moribus, & ab antiquo malæ famæ, quia erant raptores, & luxuriosi. Magnitudini autem corporis, correspondebat animorum superbia, & audacia. Cum ergo omne mortalium genus meruisset vindictam Omnipotentis Dei, solus Noe invenit gratiam coram Domino; placuit enim Deo in operationibus suis. Et ista vocatur gratia, gratum faciens, dum Deus acceptat opera nostra, tamquam



quam sibi placentia. Sicut famulus dicitur esse in gratia Domini sui, quando gaudet de illius servitio. Dicitur autem Noe vir iustus, quia non recessit à præceptis iuris naturalis, & à sanctis institutionibus Adæ, & Seth progenitoribus suis. Vocatur verò perfectus; quia vixit irreprehensibilis, etiam inter sceleratos, qui quotidie nitebantur trahere illum ad peccatum: inter malos autem non prævaricari, sed esse sicut Lilium inter spinas, summa perfectio est, & opus valde mirabile.

### Reflexio XXXVI.

**P**Vnitus igitur Deus Mundum impœnitentem, iussit servo suo Noe constructionem Arcæ, ut in ea salvaretur cum filiis suis, & uxoribus, & animantibus. Non vocatur autem hoc Lignum, Navis, sed Arca, quia non erat in superiori parte aperta, sed undique clausa; nec erat in parte inferiori, ita acuta, ut in aquis dirigi posset, more aliarum Navium, sed ampla, & talis, qualem magis Divina Providentia, quam ars humana dirigeret. Præscripsit autem Deus ordinem Noe, tum in Arcæ longitudine; tum in latitudine, dicens. *Trecentorum cubitorum erit longitudo Arcæ; quinquaginta cubitorum latitudo; & triginta cubitorum altitudo illius.* Sciendum est autem, quod ratio cubiti diversimodè assignatur a Doctoribus. Sanctus enim Agustinus, & Origenes tenent, fuisse cubitos geometricos; talis autem cubitus continet sex de nostris; & sic vastissimum fuisset Arcæ ædificium. Supposita verò ista sententia, omnia animalia, quæ ingressa sunt in Arcam, non strictè, sed valde late degere poterant. Alij dicunt quod fuerunt cubiti usuales. Iste autem cubitus tenet pedem, & dimidium pedis; idest tantam longitudinem, quanta est à cubito brachij, usque ad manum. Secundum vero alios, tenet cubitus, duos pedes, idest tantum spatium, quantum est à cubito brachij usque ad summitatem digitorum; & hæc positio magis



magis verisimilis reputatur. Sedes autem temporis illius erant multo maiores quam nunc; sicut & homines erant maioris quantitatis in mole. Hinc sequitur Arcæ capacitatem fuisse quadragintorum, & quinquaginta millium cubitorum usualium: nam si multiplices 300. cubitos longitudinis Arcæ per 50. latitudinis eiusdem, habebis cubitos quadratos quindecim millia; quæ si rursum multiplices per triginta cubitos altitudinis Arcæ, habebis prædicta 450. millia cubitorum solidorum. Ex quo sequitur tale ædificium fuisse sufficiens omnibus animalibus, & rebus ibidem repositis; maxime quia ex Genferico, & alijs, qui species animalium scrutati sunt, habetur, quod vix centum, & triginta species animalium quadrupedum reperiuntur; Reptilium vero triginta; sed ista per exiguo loco indigebant, cum in foraminibus lignorum, & tabulis excavatis contineri possent; unde reliquum spatium Arcæ, pertinens ad habitationem animalium quadrupedum, non solum erat capax pro habitatione eorum, sed superflua: maxime sic disponente Deo, cuius providentiæ non est numerus. Hic autem adverte, quod longitudo in Arca considerabatur secundum lineam iacentem in plano; & ista est sexcupla ad latitudinem, scilicet 300. ad 50. nam sex 50. faciunt 300. Altitudo vero, est decupla ad longitudinem, scilicet 30. ad 300. nam decies 30. faciunt 300. Et ista proportio reperitur in corpore humano bene formato. Nam longitudo, quæ est à vertice usque ad plantas pedis, est sexcupla ad latitudinem, quæ est, à latere in latus mediante toto pectore; & est decupla ad altitudinem, quæ est linea recta mensurans profunditatem pectoris, iacente corpore humano in planitiæ terræ. Hinc Sanctus Augustinus de Civitate Dei, ait. Istam Arcam magna significasse Mytheria.

Re-



## Reflexio XXXVII.

**A**ccepto Noe Divino Mandato de Arce fabricatione, statim se accinxit ad ipsam construendam; in qua non solum ipse cum tribus filiis suis laboravit, sed etiam cum alijs hominibus mercede conductis. Dicunt autem communiter DD., quod Arca fuit constructa spatio centum, & plus annorum; semperque sanctus Patriarca hortabatur homines illius corrupti sæculi, ad relinquenda peccata, & ad pœnitentiam agendam de commissis. Clementissimus enim Deus, licet tam graviter, & multipliciter offensus, tamen dedit spatium prædicti temporis sceleratissimis illis hominibus, ut resipiscerent. Quo transacto, iussit Dominus Noe, quod ex omnibus animantibus mundis tollerent septena, & septena, masculum, & fœminam: & de volatilibus Cœli pariter septena, & septena: quapropter de animalibus mundis fuerunt septem individua; sex ad multiplicandum per generationem, scilicet, tres masculi, & tres fœmellæ; septimum vero quod erat masculum, intravit, ut haberet Noe, quod offerret Deo in Sacrificium, in exitu de Arca. De animalibus autem immundis, duo, & duo, masculum, & fœminam; quia de istis non erat faciendâ oblatio Deo. Dicitur autem in *Tex. binæ, & binæ*, ad designandum, quod non poneret Noe masculum, sive fœmellam solam, sive duas fœmellas, & post, duos masculos; sed masculum, & fœminam de una specie, & masculum, & fœminam de alia specie: binus enim, non dicit hic principaliter numerum, sed ordinem. Si enim significaret numerum, esset sensus; quod de qualibet specie intrassent duo solum; sed hoc falsum est, quia de volucris, & animalibus mundis intraverunt septem, de immundis autem solum duo. Voluit autem Deus, ut plura Animalia de mundis, conservarentur, quam de immundis, ut facilius species animalium mundorum multiplicarentur, tum in Sacrificiorum, tum in huma-

næ



nae vitae usum. Porro in Arcam non intraverunt illa animalia, quæ nascuntur ex corruptione, quia non erat necesse ista conservari, cum rursus possent ex corrupta materia generari. Et similiter illa, quæ ex æquivoco generantur, cum post Diluvium gigni possent ex individuis aliarum specierum conservatarum.

## CAP. VIII. Reflexio XXXVIII.



Escrip̃to statu Noe ante Diluvium, hic describitur eius status in Diluvio, exeunte super terram: nam constructa Arca, ingressus est Noe cum filiis, & uxoribus, & animantibus eo ordine, quo præceperat illi Deus. Dicitur autem in Tex. *In Articulo diei illius ingressus est Noe in Arcam.* Pro quo sciendum, quod Articulus importat rem distinctam, & manifestam: homines autem illius depravati Sæculi, aspicientes Arcam totaliter completam, dicebant, quod si vidissent Noe illam ingredi, statim ipsum interficerent, ne ipsis morientibus, ille remaneret illæsus. Quapropter Dominus Deus fecit ingredi Noe in Arcam die clara; ad ostendendum futuris generationibus, quod nihil potest humana perversitas, contrà servos Dei. Animalia vero fuerunt adducta, etiam de remotissimis partibus Mundi, ministerio Angelorum. Alij dicunt, quod sponte sua venerunt, Divinoque instinctu, & deposita prorsus omni feritate, Servatorem suum Noe secuti sunt. Soli homines, licet ratione præditi, & etiam a brutis edocti, remanserunt obstinati, & non tutò in Arca, sed in cœnovitiorum super terram involuti, turpiter iacuerunt. Conservabatur autem in Arca magna pax inter animalia; adeout Leo non noceret Unicorni; nec Draco Elephanti, nec Accipiter Columbae, Deo sic iubente. Insuper omnia animalia, etiam rapacissima, modico cibo fuerunt contenta. Nec fuit



fuit in Arca coitus hominum, nec iumentorum, ut communiter dicunt DD. & hoc propter universalem Mundi ruinam. In Arca vero erant tres Mansiones, una super aliam; ita quod infima vocabatur, sentina, vel stercoraria, ubi deiiciebantur per Noe feces, ne computrescerent animalia in stercore suo. Et credendum est, quod miraculosè tolleretur fœtor stercoreum, ne corrumpere Aer. Secunda, vocabatur Apotheca, quia ibidem reposita erant victualia. Tertia, erat distincta duabus interclusionibus; unde ibi erant tria spatia: medium erat pro hominibus, & avibus; duo autem lateralia pro animalibus mundis, & immundis. Tandem erat in Arca, fenestra, quam vocant Hebræi, Lucernam; & multi DD. tenent, quod fuerit Lapis pretiosus, illustrans suo lumine totam Arcam sicut carbunculus. Alij dicunt, quod fuit fenestra crySTALLINA, ut lumen reciperet, & aquas prohiberet. Alij tenent, fuisse in Arca plures alias fenestras; sed quia una erat principalior, ideo de illa solum fit mentio in littera.

## Reflexio XXXIX.

**I**ngresso igitur Noe cum tota sua familia, & animalibus in Arcam, misit Dominus Deus super terram universale Diluvium: rupti sunt enim, ut dicitur in Tex., *omnes fontes Abyssi magnæ*; idest tota concavitas terræ, in qua latent aquæ: ad denotandum, quod non solum Oceanus, sed tota aqua, quæ manet sub terræ visceribus, eruperat ad illius superficiem. Et utitur Divina Scriptura nomine ruptionis, ad ostendendum, quod ista aquarum inundatio, non fuit ex causa naturali, sed supernaturali. Deinde, *Cataractæ Cæli apertæ sunt*: idest *fenestræ*: & est Metaphorica locutio. Nec loquitur Scriptura de Cælo stellato, sed aereo, ubi generantur Nubes, & Pluviæ. Cadebant autem pluviæ illæ, tam magnæ, quasi de Cælo orirentur flumina, velociter currentia ad ultionem inimicorum Æterni Numinis. Igitur aquæ  
fluen-




fluentes de Cœlo, simulque erumpentes de visceribus terræ, & Oceano, ita creverunt, ut supereminerent quindecim cubitis Cacumina Montium. Et sic, tam homines, quam cuncta animalia extra Arcam, perierunt. Peccata enim hominum perpetrata fuerant in terra, ideo, ad detestationem criminis deleta sunt animalia terrestria. Pisces autem non sunt mortui in Diluvio, quia adhuc peccata hominum non fuerant commissa in aquis, cum nondum esset usus Navium. In secundo vero Diluvio, quod erit per ignem, non solum purgabitur terra, sed etiam Mare, quia multa scelera, post inventam navigationem, commissa sunt in aquis. Cum hominibus autem, etiam terra dispersa est; quatenus virtus illius germinativa, valde diminuta fuit per falsedinem aquarum Oceani, relictam in superficie illius. Ista raptio aquarum, sicut dicitur infra, accidit anno 600. vitæ Noe, mense secundo, decimoseptimo die mensis secundi. Est autem October, secundus mensis, quia Mundus secundum sententiam magis communem, creatus fuit in Septembri. Non potest tamē nobis esse notum, quo die Octobris nostri hoc contigerit, quia Iudæi non incipiunt menses sicut nos, sed per Lunationes. Lunatio verò, quæ est propinquior Æquinoctio autumnali, quod fit, intrante sole primum gradum Libræ, & est quasi in medio Septembris nostri, est principium Septembris illorum, siue illa Lunatio sit ante æquinoctium, siue post. Igitur, si September eorum coinciderit cum Septembri nostro; tunc Diluvium accidit (ut loquar cohærenter ad nostra tempora) circa festum Sancti Lucæ. Si autem fuerit valde serotinus, accidit quasi in medio Novembris nostri. Porro, Diluvium, multum rationabile fuit; quia sicut se habet Puer ad puerilia deliramenta, sic se habebat Mundus ad prima vitia. Tota autem reatitudo disciplinæ in tali ætate est, quod pueri doceantur recte lætari, & recte tristari: cum vero à passione fortiter inclinentur ad malum, severe corrigendi sunt, ut timor pœnæ, & dolor, devincat passionales motus; tunc enim assueti passiones devincere, generatur in illis habitus



bitus ad virtutes. Igitur cum Mundus esset adhuc puer, & ad scelera totaliter deditus, severe puniendus erat, ut qui remanebant, & posteriores eorum, timore pœnæ iam à Deo incussæ, caverent vitia, & scelera in tota eorum vita.

## CAP. IX Reflexio XL.



Descripto statu Noe in Diluvio crescente, & stante, hic describitur illius status in Diluvio deficiente. Clementissimus enim Deus, non est passus Servum suum inter vehementissimas aquas amplius fluctuare, & ideo adduxit super illas Spiritum, nempe ventum siccum, diminuentem illas; Divinoque Imperio clausi sunt fontes abyssi: sicut enim ad præceptum Domini egressæ fuerant aquæ, tum de Oceano, tum de terræ visceribus, ita peracta ultione Divina, regressæ sunt illuc. Similiter, aquæ de Cœlo prohibitæ sunt cadere super terram, requievitque Arca mense septimo super Montes Armeniæ. Intelligitur autem hæc quies in septimo mense anni illius; non enim accipitur computatio ab ingressu Noe in Arcam; sed à principio anni currentis; & sic in Martio quievit Arca in Montibus prædictis circa finem, vel in principio Aprilis nostri. Mirabile autem fuit, quod ista Arca in uno anno, quo duravit in aquis per diversas partes, inter Valles, & Montes sine humano Rectore fluitans, fracta non fuerit ex aliqua allisione. Quid autem factum sit de illa post Diluvium, non apparet ex Tex. sed Iosephus dicit, quod Armeni demonstrant partes illius in Montibus, ubi reledit. Et qui Barbarorum historias conscripserunt, faciunt mentionem huius Arcæ: unde Berossus Chaldeus sic ait. *Dicitur magna Navis esse, quæ in Armeniam venit, circa Montem Cordicum, & aliquas eius partes adhuc superesse; & quoddam genus bituminis ex illa accipi, quo homines utuntur ad emundationem.*

Re-



## Reflexio XLI.

**A**Quæ igitur ibant, & decrescebant, usque ad decimum mensem, in cuius prima die apparuerunt Cacumina Montium: cumque transissent quadraginta dies ab ista apparitione Montium, aperiens Noe fenestram Arcæ, dimisit Corvum, qui non revertebatur. Emisit quoque Columbam post eum, ut videret si iam cessassent aquæ super faciem terræ; quæ cum non invenisset, ubi requiesceret, reversa est ad Arcam. Licet enim Cacumina Montium essent discooperta, tamen terra ipsorum, ex diuturna mora aquarum, erat quasi lutum, in quo non quiescit Columba, ideoque redijt ad Arcam. Expectatis autem ultrà septem alijs diebus, rursus dimisit Columbam. At illa venit ad eum ad vesperam, portans ramum olivæ; quapropter Noe intellexit, quod cessassent aquæ super terram. Expectavit nihilominus septem alios dies, & emisit Columbam, quæ non est reversa ultrà ad eum. Sed hic quæri potest: quare Noe expectabat inter unam missionem, & alteram, septem dies, & non plures, nec pauciores? Dicendum, quod intendebat scire, utrum aquæ cessassent; aquæ autem regulantur à Luna, quæ est mater humidorum. Luna vero, quando est in coniunctione, & maximè quando est in directa oppositione, habet magnam virtutem in humidis, multiplicando illa; unde in his temporibus reperiuntur Ostreæ marinæ, & Conchilia, & Canchri pleni humiditate: quando vero est in quadraturis, scilicet, quando distat à Sole per gradus 90. habet virtutem disiccativam; & tunc prædicta, vacua sunt. Sic humana cerebra, quando sunt multum humida, in coniunctione, & oppositione benè se habent, quia sunt plena: quando vero Luna est in quadraturis, in tantum diminuitur naturalis humiditas cerebri, quod aliqui homines efficiuntur amentes. Quia igitur in istis quatuor punctis, nempe, coniunctione, oppositione, & duabus quadraturis, fit muta-



mutatio in aquis per multiplicationem, vel diminutionem; ideo Noe consideravit istos quatuor punctos. Et cum Oppositio, & una Quadratura distent septem diebus, & ab illa Quadratura usque ad Coniunctionem sint alij septem dies; & à Coniunctione ad aliam Quadraturam, sint alij septem; ideo Noe misit aves terminatis septem diebus. Deus tamen voluit, quod non obstante actione Lunæ, aquæ æqualiter, & continuè diminuerentur; ut sicut supernaturaliter venerant, ita sine actione Agentis naturalis dissecarentur.

## Reflexio XLII.

**D**Issecata ergo perfectè terra, & reddita apta ad usum, tam hominum, quam animalium; iussit Dominus Noe, ut egrederetur de Arca. Licet enim servus Dei cognovisset in reditu Columbæ, quod cessassent aquæ; tamen sicut ingressus fuerat in Arcam de mandato Domini, ita ad egrediendum expectavit humiliter Divinum imperium. Egressus est autem anno revoluta, eadem die, qua intravit; statimque ad gratias reddendas de sua, & familiæ liberatione, ædificavit Altare, offerens Holocausta, & ut dicitur in *Tex. odoratus est Dominus odorem suavitatis*, id est, placuit Deo illud sacrificium, sicut placet homini aliqua res boni odoris. Et est figura, quæ vocatur *Antropaspathos*; quando humana passio attribuitur Deo. Nam Deus non odorat, cum non sit corporeus; & dato quod adoraret, talis odor non esset suavis, sed magis infestus, utpotè carnum combustarum cum adipibus suis. Et per hoc ostenditur, quod oblationes, quæ antiquitus fiebant, non erant Deo acceptæ, nisi ex fide, & devotione offerentium. Placatus igitur Dominus Deus sacrificio Noe, quia à sancto, & bono corde fiebat, promisit non delere amplius per Diluvium homines; & compatiens humanæ fragilitati, ait, *Sensus enim, & cogitatio humani cordis in malum prona sunt ab adolescentia sua*, id est, post pueritiam, quando incipit advenire pubertas.

D

In



In prima enim ætate, scilicet, Infantia, & in secunda, quæ est Pueritia, propter inexperientiam, & imperfectionem Naturæ, nondum inclinamur ad malum; licet in aliquibus malitia suppleat ætatem; in fine autem pueritiæ, incipit carnalis concupiscentia, & consequenter, aliæ passiones. Appetitus vero sensitivus, est pronus in malum; quia licet Intellectus, & Ratio semper deprecentur ad optima, *ut ait Arist. 2. Ethic*, tamen dictus appetitus multum repugnat rationi: corrupto autem appetitu sensitivo, sequitur prava cogitatio; deinde, pravam Iudicium, & post, mala operatio; ideoque cum homines sæpe peccent, sæpe etiam tota terra esset aquis submergenda: hinc quidam dixit:

*Si quoties peccant homines, sua fulmina mittat Iuppiter, exiguo tempore inermis erit.*

### Reflexio 43.

**D**Escripso statu Noè in diluvio, consequenter describitur status illius post diluvium; & specialiter quantum ad illius exercitium. Igitur post oblatum sacrificium benedixit Dominus Noe, & filiis eius. Adverte autem, quod benedictio in divinis scripturis, importat multiplicationem, vel in temporalibus, vel in spiritualibus: utrumque autem potuit esse hic; quia Noe, & eius filii erant iusti, & obtulerant Sacrificium; ideoque in hoc actu Charitatis merebantur gratiam sibi augeri. Si vero intelligatur de bonis temporalibus, fuit fecunditas prolis illis concessa in generando; & ideo Dominus post benedictionem dixit eis. *Crescite, & multiplicamini*. Quæ verba tunc temporis sonabant præceptum, obligans sub mortali. Nunquam enim reperitur Deus ista præcipiens, nisi cum temporis necessitas hoc exigebat, scilicet, in primordio conditionis humanæ, & post Diluvium; tunc enim perierant omnes excepto Noe, & filiis, & uxoribus. Deinde dixit Deus. *Terror vestester, ac tremor sit super cuncta terræ animalia*. Per hoc autem, non



non est intelligendum, quod Dominus dederit Noe, & filiis suis, illud dominium super animalia, quod datum fuit Adæ manenti in statu originalis Iustitiæ, in quo cuncta animalia obediebant ei ad nutum, nec ullo modo poterant illi nocere; sed intelligitur quantum ad quædam animalia, quæ sunt per artem domesticabilia: vel, quod omnia animalia naturaliter timent faciem hominis, cum factus sit ad imaginem Dei, licet aliqua eum invadant timore cogente, vel fame. Deinde dedit Dominus eis potestatem comedendi carnes. Ante diluvium namquæ non erat usus carnum, nec vini; post diluvium verò, quia terra fuit peiorata, etiam terræ nascentia non fuerunt ita nutritiva. Insuper natura humana facta est fragilior; ideoque indigebat cibo magis substantiali, cuiusmodi est caro, & vinum, quæ multum conveniunt humanæ complexionis. Prohibuit tamen Deus hominibus ne comederent carnem cum sanguine. Et aliqui DD. dicunt; quod per hoc prohibita fuit abscissio membri animalis viventis, & comextio talis membri, quia adhuc manet sanguis diffusus pervenas; & magna crudelitas videbatur sic trucidare animalia; maxime quia intendebat Deus revocare homines à crudelitate. Alij tenent hoc præceptum se extendere solum ad animalia suffocata, vel alio modo per se mortua, quorum sanguis manet in illis. Alij volunt, quod per tale præceptum prohibitus fuerit esus sanguinis per se. Adverte autem, quod nos non obligamur ad tale præceptum; quia in nova lege non manent, nisi præcepta moralia, idest illa, quæ sunt de iure naturæ, & illa, quæ Christus Dominus iussit: comedere autem carnem cum sanguine, vel ipsum sanguinem, per se non est de lege naturæ, sed purè ceremoniale, ad quod non tenemur.

### Reflexio 44.

**P**ost egressionem Noe de Arca, & oblationem sacrificij promissit Dominus Deus non amplius percutere genera,

D 2

litèr



litèr genus humanum aquis Diluvij, dicens. *Non ultra percutiam omnem animam, sicut feci: cunctis diebus terra sementis, & messis, frigus, & æstus, æstas, & hiems, nox, & dies non requiescent.* Adverte autem, quod hîc distinguntur sex tempora, & secundum Hebreos, cuilibet tempori duo menses attribuuntur. Tempori sementis, attribuitur medietas Septembris; totus October; & medietas Novembris. Tempori frigoris assignatur reliqua medietas Novembris; totus December; & medietas Ianuarij. Tempori hyemis reliqua medietas Ianuarij; totus Februarius, & medietas Martij, & secundum eos, gravius est tempus frigoris, quam hyemis. Tempori messis attribuitur altera medietas Martij; totus Aprilis; & medietas Maij. In terris enim calidis aliqua tempeſtiva incipiunt colligi circa finem Martij; et maximè secundum mensem ipsorum Hæbreorum: Quia primus mens illorum, cui correspondet Martius noster, semper concurrat cum aliqua parte Aprilis, & aliquando fere totus Aprilis noster includitur in eorum Martio. Tempori æstatis attribuitur altera medietas Maij; totus Iunius; & medietas Iulij. Tempori æstus attribuitur alia medietas Iulij; totus Augustus; & prima medietas Septembris. Est autem tempus æstus gravius in calore, quam tempus æstatis; & idè sic nominatur sicuti de frigore, & hyeme dictum est in contraria qualitate. Placuit deindè Domino affecurare etiam per sensibile signum Servum suum Noe, cuiusquè descendentes, quod deinceps numquam futurum esset Diluvium aquæ super terram & ad hoc denotandum, statim fecit apparere Iridem, quam declaravit signum Divini sui pacti. Sed circà hoc quæri potest: Quomodo Iris sit verè signum prædicti fœderis, cum procedat ex causa naturali? Ad hoc respondent aliqui Doctores, dicendo, quod usque ad Diluvium non fuerat pluvia super terram, & per consequens, numquam apparuerat Iris; Vel si fuerant nubes, & pluvix, tamen, non fuerant in tali dispositione, quod ibi generaretur Iris; ad cuius generationem prærequiritur nubes densa, seu constipata,



pata, & deindè, antè istam, necessaria est nubes rorida, ut habetur 3. *Metheor.* Quandoquidè Iris generatur in nube per modum speculi, ubi prærequiritur receptio in Roratione, & terminatio in densitate nubis: sicut in speculo requiritur perspicacitas Vitri, & densitas Plumbi terminans. Dicunt igitur isti Auctores, quod facta fuit talis dispositio solummodò, quando Dominus Deus ostendit Noè Iridem. Sed hæc sententia non videtur probabilis; Nam pluvia fit ex dispositione aeris, & ex motu corporum cœlestium; cum autem istæ causæ præcesserint tanto tempore Diluvium, nempe mille, & ferè septingentis annis, quibus duravit primæ ætas, non est verisimile, quod multis vicibus non fuerit secutus effectus. Ideò cum communi sententia dicendum est, quod Iris apparuit etiam antè Diluvium, sed non fuit in signum fœderis, cum non esset adhuc institutum pactum, quo facto, Iris fuit in signum fœderis. Sicut contingit in humanis, quod lapis magnus, qui diù stetit in aliquo loco immobilis, statuitur in signum distinctionis Regnorum, vel hæreditatum,

## Reflexio 45.

**V**Idens interea Sanctus Noè terram esse peioratam per diluvium præcedentem, & per consequens indigere diligentiori cultura, cepit ipsam colere, arando, & fodiendo; Sic enim melius disponitur ad pluviam, & Cœli influentiam recipiendam. Deinde plantavit Vineam, abscindens palmites de Vite silvestri, quos trāsplantavit: sicut nunc ponuntur noviter vineæ, & fiunt Vvæ optimi saporis. Bibens autem de fructu vineæ, inebriatus est, & nudatus iacuit in Tabernaculo; multum enim bibit de vino, putans bibendum de illo esse sicut de aqua, ignorabat enim fortitudinem illius. Quare, cum Cerebrum Noe esset debile, propter continuam assuefactionem ad aquam, statim conturbatum est à vini vehementia. Experientia enim cōstat, quod



illi, qui non sunt assueti ad vinum bibendum citò inebriantur, si de illo bibant. Videns igitur Cham Verenda patris sui esse nudata, nunciavit duobus fratribus suis, ut illos incitaret ad iriionem patris. Et ex hoc patet, quod homines adhuc non utebantur femoralibus, quæ fuerunt inventa à Semiramide, Regina Ninivæ. Tunc modestissimi adolescentes pallium imposuerunt humeris suis; & incedentes retrorsum operuerunt verenda patris. Vndè ex hoc valdè satis instruiamur circa Superiorum reverentiam, nè defectus illorum curiosè aspiciamus, sed quantum possumus contegamus. Evigilans autem Noe, cum cognovisset per relationem filiorum veritatem facti, dixit, *Maledictus Chanaam, servus servorum erit fratribus suis*. Sed queritur, quare maledicitur Chanaam, cum peccaverit Cham? Dicunt aliqui: quod Chanaam primo vidit verenda Noe discooperta, & statim indicavit patri suo Cham, ideoque maledicitur. Vel, ut per hoc intelligatur, non solum Cham meruisse in se ipso maledici, propter irreverentiam erga patrem, sed etiam in suis filijs. Alij melius dicunt: quod iam Deus benedixerat filijs Noe exeuntibus de Arca; ideoque Noè non fuit ausus alicui eorum maledicere; sed maledixit Nepoti. E contrario autem, benedixit Sem, & Iapheth: Et de Sem dixit *Benedictus Dominus Deus Sem*: Vidit enim in spiritu, quod Cultus unius veri Dei remansurus erat in filijs Sem, alijs ad Idolatriam declinantibus. De Iapheth vero, ait, *dilatet Deus Iapheth, & habitet in Tabernaculis Sem*. Et est sensus: quod quamvis Iapheth sit dilatandus in multitudine Gentium, ab eo descendentium; tamen aliqui eius posterii habitent in Tabernaculo Sem; idest, in Templo. Aliqui enim Gentiles ascensuri erant causa orationis in Templum, Divino cultui deputatum, ut patet *Ioan: 12*. Vel melius dic; Quod in adventu Christi Domini, plenitudo Gentium, quæ descendit de Iapheth, intravit Ecclesiam per susceptionem fidei; & sic habitavit in Tabernaculo Sem, per cultum unius veri Dei.

CAP.



## CAP. X. Reflexio 46.

**D**Escripta generatione Noe, qui erat Truncus in secundo ordine, consequenter hic describitur suæ generationis multiplicatio: à tribus enim filiis illius, totum humanum genus post diluvium propagatum fuit. Et dicunt Doctores, quod filij Sem tenuerunt Asiam. filij Iapheth, Europam; & filij Cham, Africam; relinquentes nomina sua locis, & gentibus ab ipsis descendentibus; ex quibus aliqua manent in se, vel in aliquo simili; aliqua vero, procedente tempore, prorsus deleta sunt. Vnde multi populi, qui hic in Tex. exprimuntur, sunt nobis prorsus ignoti, vel propter antiquas mutationes nominum, vel propter bella; vel si extant, ignorant suam originem: unde multi populi dicuntur Aborigines; quasi non habentes cognitam originem suam. A' filiis Iapheth, quos primo ponit Sacra Scriptura, divisæ sunt Insulæ gentium in regionibus suis; habitaverunt enim in diversis Insulis, & insuper, multas terras occupaverunt. Descendit autem ab isto stipite *Magog*, à quo duxerunt originem *Scythæ*, secundum *Dium Hieronymum*, & ab ipsis, Reges *Gothorum*, qui magnalia per Orbem gesserunt, & *Hispaniam* populaverunt. Sequitur *Iauam*, à quo descendant *Greci*. Deinde, *Tubal*, a quo descendunt *Hispani*: iste namque *Tubal*, sedem posuit in descensu *Montis Pirinæi*, apud locum, qui nunc dicitur *Pampilona*; & cum multiplicati fuissent sui Comites, extenderunt se ad *plana Hispaniæ*; et tunc illa terra, à *Cetu*, idest, comitiva *Tubal*, dicta est *Cetubalia*. Deinde cum se extendissent usque ad flumen, qui dicitur *Iber*, vocaverunt terram illam *Celtiberiam*. Sed quia videbant sub Iugibus terræ illius quandam Stellam, quæ dicitur *Hesperus*, in noctium principiis occultari, vocaverunt terram *Hesperiam*, à nomine prædictæ Stellæ. Sequitur *Tiras*, à quo descendant *Thraces*; sic dicti quia erant truces: fuerunt enim semper inter omnes gen-



tes, ferissimi; unde multa de illis fabulosa à Poetis memorantur: scilicet, quod Dijs suis litarent sanguinem illorum hominum, quos recipiebant hospitio; & quod sanguinem humanum, in ossibus capitum potare soliti essent, de quibus Poeta cecinit

*Heu fuge crudelesterras, fuge litus avarum.*

Est autem Thracia, Regio coniuncta Græciæ, habens pro Metropoli Constantinopolim, olim sedes Imperij Orientis; nunc Ottomanni Tyrannis Regia, propter Christianorum Principum deplorabiles discordias. Habuit autem Iapheth quindecim filios mediate, & im mediate, ut patet, in littera; ideoque quindecim Idiomatica ex illo descenderunt.

### Reflexio 47.

**D**ICTO de filijs Iapheth, sequitur dicendum de filijs Cham, ex quibus unus fuit *Chus*, à quo descenderunt Ethiopes; unde in Hebræo, Ethiopia vocatur *Chus*. Deinde *Mefraim*, à quo veniunt Egyptij, & ideo in Hebræo, Ægyptus dicitur *Mefraim*. Sequitur *Chanaam*, à quo descenderunt illæ Gentes, quæ Palestinam, & Arabiam tenuerunt. Deinde *Nembrot*, de quo dicitur in littera, quod *cæpit esse potens in terra; eratque robustus venator coram Domino*. Pro quo sciendum, quod iste fuit Gigas corpore; audax mente; robustus viribus; consilio discretus; & libidine dominandi avidus: ideòque rudem illam Gentem, quibusdam artificiosis persuasionibus ad se applicuit, ut sic dominaretur multis, & paulatim omnibus. Vocatur autem *robustus venator coram Domino*; quia per violentiam opprimebat homines, tanquam animalia capta in venatione. Et si aliquis nolebat subijci illius dominio, occidebat illum publicè, quod erat facere coram Domino, cui omnia sunt nota; sicut dicuntur fieri in oculis Solis ea, quæ publicè fiunt. Principium autem Regni illius fuit Babylon in terra Sennaar, de qua egressus est Assur, ut dicitur in *Tex.* Hoc autem interponitur acci-



accidentaliter; nam Assur, non fuit de filiis Cham, sed de filiis Sem, ut patet infra; Sed quia noluit rebellare contra Deum in ædificatione Turris, fugit de terra prædicta, ad aliam regionem inhabitatam, quæ ex nomine suo vocata est *Assyria*; ibique ædificavit Civitatem, quæ postea per longum tempus, vocata fuit Ninive, à Nino primo Rege Assyriorum; qui libidine dominandi, per quinquaginta duos annos contra diversas Gentes bellam movit, subijciens multos in suam ditionem, donec in bello cecidit, interfectus à Sagittarijs in obsidione cuiusdam Civitatis. Duravit autem istud Regnum per annos mille, & quadringentos, usque ad Sardanapalum. Dicunt vero DD. de Nembrot, ipsum sub anno à creatione Mundi ferè millesimo noningentesimo, invenisse Astrologiam, & Orbis dimensiones. Sed *Methodius Martyr in lib. Cicliadum*, refert: quod Noe centesimo anno Cicliadis, idest, centum annos post Diluvium, genuit Ionicum, cui fecit multas donationes, illumque misit in terram Etham; qui intravit usque ad Mare, quod dicitur Liocora, idest, Solis Regio, quo in loco accepit à Deo donum Sapientiæ, & invenit Astronomiam; ad quem deinde perrexit Nembrot, accepitque ab eo consilium, in quibus terris regnare deberet; eumque docuit Astronomiam, prædicens ei quosdam eventus, de Ortus, Occasu, & successionem Regnorum. Habuit Chus triginta filios, ideoque ab illo orta sunt triginta Idiomata.

## Reflexio 48.

**P**onuntur tertio generationes Sem; licet enim esset maior dignitate alijs duobus fratribus, quia erat primogenitus; tamen postponitur, quia intendit Legislator tenere in narrando lineam Sem; unde si illam præposuisset, oportebat interrompere; ideo alias lineas præposuit, ut istis dimissis, latius prosequeretur lineam principalitèr intentam. Adverte autem, quod Sem est ille, qui infra vocatur



catur Melchisedech, & sub isto nomine Sem, legimus de eo omnia supradicta. At sub nomine Melchisedech, non legitur habuisse patrem, nec matrem, nec Genealogiam, nec principium, nec finem vitæ, sed solum quod fuerit Rex Salem, idest, Ierusalem, & Sacerdos Dei Altissimi. Et isto modo loquitur Apostolus *ad Heb. 7. Assimilans Sacerdotium Christi Domini, Sacerdotio Melchisedech.* Fuit autem dictus *Melchisedech*, propter bonitatem sui Regiminis, quia Melchisedech interpretatur Rex Iustitiæ; & vixit usque ad quinquagesimum annum vitæ Iacob, ut tradunt DD. Ex filiis Sem, unus fuit *Assur* à quo descendunt Assyrij, de quo supradictum est. Deinde sequitur *Arphaxad*, à quo descendunt Chaldæi, & *Aram*, à quo veniunt Syrij; unde in hebræo Syria, vocatur *Aram*, cuius Metropolis est Damascus. Et *Hus*, qui tenuit Principatum Traconitidis, de qua terra natum fuisse Iob tenent multi DD.. Et *Mes*, à quo denominati sunt *Meones*, populi in Græcia, de quibus natus est Homerus, qui ideo dicitur Meonius Vates. Et *Heber*, qui fuit principium populi Dei, & ab isto denominationem receperunt Israelitæ. Iste Heber imposuit filio suo nomen *Phaleg* ex divisione terræ, quæ tunc erat futura; ideoque dicunt Hebræi, habuisse Spiritum Prophetiæ, quia imposuit nomen filio suo, ab eventu futuro. Habuit Sem viginti septem filios, ideoque ab illo orta sunt viginti septem Idiomata.

## CAP. XI. Reflexio 49.

**P**ostquam descripta est multiplicatio generationis Noe, consequenter describitur unius partis electio. *Erat igitur terra Labij unius*; nam omnes homines habebant unicum Idioma, & hoc erat hebraicum. Quod patet, quia Adam imposuit nomina rebus secundum illud Idioma, quod tunc erat; sed nomina ibi imposita, non inveniuntur in aliquo alio idiomate, nisi in hebræo: etenim Adam, Heva, Cain,



Cain, Abel, significant aliquod in hæbreo, videlicet, personas prædictas, sed non significant in aliqua alia lingua; ideoque patet, quod primum Idioma fuit hebræum. Non mansit tamen Lingua Hebraica nisi in stirpe Heber, & in illis qui erant in recta Linea, ideoque dicitur lingua hebraica *ab Heber*. Homines igitur concordēs in lingua, elegerunt unanimiter relinquere Armeniam, in qua post diluvium geniti fuerant, quærentes locum, ubi commodè possent manere, nam Armenia valde montuosa est. Cumque proficiscerentur de Oriente, invenerunt Campum in terra Sennaar, & habitaverunt in eo; erat enim terra valde magna, & plana, quæ nunc dicitur Chaldæa, sive Babylonica. In hac ergo regione quiescentes, dixerunt ad invicem: *Venite faciamus nobis Civitatem, & Turrim, cuius culmen pertingat ad Cælum: & celebremus nomen nostrum, antequam dividamur in universas terras*. Advertendum tamen est, quod eorum intentio erat, construere edificium ita altum, ut excederet omnem altitudinem Montium, ne posset illuc attingere Diluvium, non vero, quod perveniret usque ad summitatem Cæli, cum scirent hoc esse impossibile; maxime cum esset inter eos Nembrot, qui erat Astrologus, sciens distantiam magnam, Cæli à terra, & Sphæram Ignis, in qua nullus vivere posset; ideo Hyperbole est, sicut cum dicitur, *Astra ferit clamor*. Non solum autem timore diluvij, sed ex superbia fuerunt tales homines moti ad construendum tale ædificium: inordinatè enim appetierunt proprii nominis gloriam, & famæ dilatationem: tunc enim fama alicuius extenditur, cum opera magna, & memorabilia agit. Peccaverunt etiam infidelitate, dum timebant Diluvium, licet Deus promississet Noe non amplius dispergere terram aquis.



Refle-



## Reflexio 50.

**I**Ncepto igitur Turris ædificio, dicitur in Tex: *descendit autem Dominus ut videret Ciuitatem, & Turrim quam ædificabant filij Adam.* Hoc autem dicitur, non quod Deus indigeat descensu ad videndum illa quæ sunt in terra, cum ubique sit; nihil enim in omnibus entibus magis intimum est, quam Deus; sed ut per hoc instruantur Iudices, ne procedant ad sententiam contrà Reum, donec causam illius clarè videant, & maturè examinent. Deindè Deus loquens ad Angelos, qui sunt executores Divinæ Iustitiæ, ait *Venite descendamus, & confundamus ibi linguam eorum.* Dicunt autem aliqui DD., quod unus Angelus statim prostravit ad terram Turrim inceptam; & tunc Deus confudit linguam eorum, turbando ipsorum intellectum; fecitque eos obliuisci Idioma, quod ante cognoverant, radendo videlicet ab intellectu habitum illum cognoscituum verborum, & significatorum; & causavit in eis quosdam habitus cognoscitivos novorum verborum, quatenus sunt signa rerum. Qua propter, non amplius se intelligebant ad invicem, & ideo cessaverunt ædificare, quia quando unus petebat lapides, alter portabat cementum, & sic credebat unus ab alio irrideri; propter quod mota fuit inter illos rixa, & contentio; & sic divisit illos Dominus ex illo loco in universas terras. Vnusquisque enim iungebat se illis, quos intelligebat; tales autem erant illi quibus contigerat unum Idioma, & sic divina providentia factum est, ut in varia loca, variasque Insulas recesserint. Assur, videlicet, in Assyriam; Mesraim, in Ægyptum; Chus, in Ethiopiam; Tubal, in Hispaniam, & sic de alijs. Obstupesce ergo Christiane lector de ordine, & modo divinæ Sapientiæ, tùm in regendo res humanas; tùm in puniendo hominum scelera; & scias, quod modus per quem Dominus Deus ista inferiora gubernat, à nullo intelligitur, nisi à Beatissimis Spiritibus, clarè in Patria Deum videntibus. Quot autem



autem Lingue in hac confusione datæ fuerint, non apparet ex textu; Sed quia constat supra Cap. X., quod filij filiorum Noe, habebant singuli linguas suas; quod procul dubio dictum fuit per anticipationem; communiter tenetur, quod fuerint 72. Idiomatica; nam supradicti filij fuerunt septuaginta duo. Vtrum autem aliquod idioma de datis hinc perierit, gente pereunte per bellicas clades, ignoratur; & an omnia Idiomatica, quæ modo sunt, in prædicta confusione data fuerint; vel aliqua eorum humana voluntas, & industria excogitaverit, incertum prorsus est.

## C A P. XII. Reflexio 51.

**P**ostquam Moyses descripsit multiplicationem humani generis per duos stipites primos, nempe Adam, & Noe; hinc consequenter idem facit per tertium stipitem, nempe Abram, qui descendit de Semper Thare. Manebat autem Abram in Chaldæa, ubi traxit originem. Et dicunt DD. quod Nembrot, post divisionem Linguarum, dominatus fuit super Chaldæos; & quia cognovit homines illius temporis timere destructionem futuram per Ignem, docuit rudem illam plebem colere ipsum Ignem, affirmans, quod exhibita illi veneratione ista, non eos incenderet quando omnes alios consumeret. Sic postea Gentiles colebant Febrim, Timorem, Discordiam, & similia, ne illis nocerent. Inter deceptos autem ab impio Nembrot, unus etiam fuit, scilicet Thare Pater Abram. Tradunt enim Hebræi, quod colebat Ignem, & insuper in Domo sua conservabat Idola; quæ quodam die cernens Abram, Divino ardens zelo, statim illa in frustra concidit. Quapropter Thare accusavit proprium filium apud Nembrot; unde statim Abram, de mandato illius, fuit projectus in Ignem, sed Divina virtute exivit totaliter illæsus. Deinde Dominus, volens Abram segregatum ab Idolatris, dixit



dixit ei: *Egredere de terra tua, & veni in terram quam monstravero tibi; faciamque te in Gentem magnam, & benedicam tibi, atque in te benedicentur universæ cognationes terræ.* Id est, in semine de te nascituro, quod est Christus Dominus, in quo omnes Cognationes terræ, quæ erant morti æternæ obligatæ ratione peccati, liberatæ fuerunt, & redemptæ à misera servitute Diaboli, pretiosissimo suo Sanguine. Deus enim non solum promisit benedictionem Abrahæ, quæ respiciebat propriam personam, & particularem populum; sed etiam illam, quæ se extendebat ad omne genus humanum.

### Reflexio 52.

**A**Ccepto igitur Divino Mandato, statim Abram reliquit Patriam, nesciens quò iret. Deus enim adhuc non revelauerat illi terram, ad quam erat iturus, ut magis appareret Abrahæ obedientia exeuntis ad præceptum Domini etiam ad locum indeterminatum. Cum eo autem ivit Lot, magis eligens esse cum Auunculo fidei, & iusto, quàm remanere cum Consanguineis sceleratis. Venit ergo Abram in terram Chanaam cum Sara uxore sua, omniq; familia, ibique promisit Deus posteris suis ipsam terram; ideoque Abram statim ædificavit Altare, ut per sacrificia redderet gratias Deo de beneficijs acceptis. Dum igitur moratur tanquam peregrinus in prædicta terra, facta est fames in illa. Hoc autem permisit Dominus ad experimentum servi sui; & ut demonstraretur futuris generationibus fides illius, & constantia in adversis: magnus enim labor, & afflictio sibi erat in tanta penuriâ, cum multam familiam haberet. Sciens verò, quod in Ægypto magna fertilitas erat, descendit ibi cum Vxore sua; admonens illam, ut in Ægypto affirmaret solummodò se esse sororem suam, non vero Vxorem. Sciebat enim nefas esse apud ægyptios Adulterium, & morte plectendum; minusque reputabant homicidium Viri, quam accedere ad illius Vxorem; ideoque Abram ut præcaveret

vitæ




vitæ suæ, adhibuit hoc temperamentum; in quo tamen non docuit Saram mentiri, sed veritatem cautè occultare, erant enim filij eiusdem patris, licet non immediatè. Secundum autem morem Sacræ Scripturæ, omnes qui sunt de eadem Cognatione, vocantur fratres. Sed dices: quomodo homo tantæ Sanctitatis, exposuit Vxorem suam periculo adulterij? Dicendum, quod Abram habebat familiam magnam, nec poterat eam commode sustentare in terra Chanaam, cum non haberet sufficientem pecuniam in tanta penuria, ideoque debuit occurrere tali periculo. Ex alia vero parte, videbat quidem quod Vxor sua poterat pati periculum violatæ Castitatis, sed semper quando sunt duo pericula simul, tunc secundum humanam prudentiam, urgentissimum vitandum est. At periculum famis erat imminens, periculum autem Castitatis Vxoris erat solum probabiliter futurum; ideoque potius Abram debuit succurrere periculo famis, quam periculo Castitatis; cum primum esset certum; secundum vero solummodo præsumptum. Præterea existimabat, quod Vxor sua conservaretur Regi propter suam pulchritudinem. Sciebat autem quod tempore illo, Reges non accedebant ad Vxores suas de novo acceptas, nisi post anni circulum, sicut patet in *l. Esther. Cap. 2.* Primis enim sex mensibus, ungebantur oleo Myrtino, & in alijs sex, quibusdam pigmentis, ut deinde transirent ad Regis cubiculum. Infra autem tanti temporis spatium, sperabat Abram de divino adiutorio Vxorî suæ futuro. Hinc Sanctus Augustinus, ait de Abram: *Fecit quod potuit, quod non potuit Deo dereliquit.*

### Reflexio 53.

**I**Ngresso Abram cum Vxore sua Ægyptum, videntes Servi Regis tam decoram Mulierem, & existimantes gratiam Principis se consecuturos, statim ingressi sunt ad Pharaonem, commendantes pulchritudinem illius; & ex hoc inferentes, quod talis Mulier ad solum Regem pertinere debebat;




bebat; quapropter castissima Sara sublata est in Domu m Principis: *Abram vero bene usi sunt propter illam*, recepitq ue multa dona. Aliqui tamen DD. dicunt, quod Abram fuit multum honoratus ab ægyptijs, quia eos docuit Aritmeticam, & Astrologiam, ut refert Iosephus, quod quidem est satis probabile; quia Astrologia, & Geometria, & Aritmetica fuerunt inventæ in terra Chaldæorum; quare Abram cum esset origine Chaldæus, potuit ibidem perfecte addiscere has scientias, quas deinde alios doceret. Postea vero ex ægyptijs delatæ fuerunt istæ scientiæ ad Grecos. Cœterum si Abram docuit in Ægypto, hoc fuit per modicum tempus, quia non mansit ibi, nisi per annum. Veruntamen hoc modicum fuit ægyptijs principium ad excogitandum multa, tum in Astronomia, tum in alijs scientijs, quod satis concordat Aristoteli, dicenti *pr. Metaph.* quod propter nimium admirari, Sacerdotes in Egypto ceperunt philosophari. Sublata igitur Sara in Palatio Regis, flagellavit Dominus Pharaonem plagis maximis, & domum totam illius. Et dicunt DD. Catholici, quod fuit conclusio Vulvæ Vxorum Regis, & servorum suorum, itaquod parere non poterant. Hebræi autem dicunt, quod fuit fluxus seminis, itaquod concubitus carnalis erat non solum gravis, sed intolerabilis, tum Regi, tum Principibus illius. Quia ergo Abram fideliter fecerat, quantum poterat via humana, & residuum commiserat providentiæ Divinæ, Deus qui est protector omnium in se sperantium, pudicitiam Saræ, etiam in Aula Regia, conservavit illæsam.



CAP.



## CAP. XIII. Reflexio 54.



Esripto qualiter Abram se habuit ad Deum, hic describitur qualiter se habuit ad proximum. Relicto igitur Ægypto, & cessata penuria, redijt in terram Chanaam cum tota familia, per iter quò venerat, ut dicitur *in tex.* Sed in hebræo habetur: *Per mansiones, quibus venerat.* Et causa fuit, quia quando perrexit in Ægyptum, non habebat sufficientem pecuniam pro solvendis expensis, & ideo contraxit in hospitij aliquam debita: quapropter sanctus Vir redijt per easdem mansiones, ad illa exactissimè solvenda. Deinde accessit ad locum, ubi prius exierat Altare, ibique gratias egit Deo, qui ipsum, & Vxorem, totamque familiam conservaverat, & in bonis multiplicaverat. Cum vero tam Abrahæ, quam Lot, essent greges ovium, & multa substantia, facta est rixa inter Pastores utriusque: quia tam isti, quam illi, volebant sibi præoccupare meliora Pascua, & meliores Aquas. Ex hoc patet, quod divitiæ plerumque sunt causæ inimicitæ, non solum inter amicos, sed etiam inter consanguineos. Tunc Abram dixit ad Lot: *Ne quaeso sit iurgium inter me, & te, fratres enim sumus: recede à me obsecro: si ad sinistram ieris, ego dexteram tenebo.* Sanctus enim Vir, magis elegit recedere à Nepote suo, licet esset sibi hoc delectabile, quam inter discordias vivere; & ne propter istas moveretur lis coram Iudicibus Infidelibus. Pertinet enim ad virum prudentem, & superiorem, visa occasione mali futuri, statim providere, unde quidam dixit

*Principijs obsta, sero medicina paratur,*

*Cum mala, per longas convaluere Moras,*

Igitur divisi sunt alterutrum; & Abram habitavit in terra Chanaam, nempè in illa parte, pertinente ad populum,

E

qui



qui specialiter vocabatur Chananeus. Lot vero habitavit in Sodomis: tamen inter sceleratos retinuit semper puritatem, & intactam custodivit innocentiam. Post hanc separationem locutus est Dominus Abrahæ, promittens ei terram, & multiplicationem prolis. Divinæ namque revelationes solent fieri mentibus à perturbationibus sæculi totaliter purgatis. Societas autem Lot, propter rixam Pastorum, erat Abrahæ causa perturbationis, qua remota, secuta fuit Divina apparitio.

## CAP. XIV. Reflexio 55.



Ostquam Moyſes deſcripſit, qualiter Abram ſe bene habuit ad proximum in proſperis; hîc deſcribit, quomodo ſe habuit ad illum in adverſis. Dum ergo Abram domeſticis litigijs à ſe abdicatis in pace quieſcit, ecce bellum inſurgit. Cauſa fuit, quia Bara, Rex Sodomorum; & Berſa, Rex Gomorrhæ; Sennaab, Rex Adamæ; Semeber, Rex Seboim; & Rex Balæ, ſervierunt duodecim annis Chodorlahomor Regi Elemitarum, reddentes ei annuum tributum. In tertio decimo autem anno noluerunt hoc præſtare; quapropter Chodorlahomor iniit fœdus cum tribus Regibus, ſcilicet, cum Amraphel, Rege Sennaar, qui fuit Nembrot qui regnabat in Babylone, quæ eſt in terra Sennaar; & cum Arioch Rege Ponti; & cum Thedal, Rege Gentium, ſic dictus, quia in Regno ſuo erant multi de diverſis Nationibus. Cum auxilio igitur iſtorum trium Regum, direxit bellum Chodorlahomor, percutiens primò Gigantes, & alios ſuos inimicos. Tunc prædicti quinque Reges exierunt contra illum in pugnam; ſed inito certamine ſuperati fuerunt; quare cōfæderati Reges victores exiſtentes, tulerunt omnem ſubſtantiam Sodomorum, & vinctum etiam Lot duxerunt captivum. Ex ſocietate namque



que malorum incurrunt aliquando Iusti poenam temporalem, licet non sintullo modo participes criminis. Vnus autem, qui de pugna evaserat, nunciavit Abrahæ belli eventum, & captivitatem nepotis sui; unde, nulla interposita mora, numeravit expeditos Vernaculos suos, videlicet servos natos in domo sua. Et quia habebat fœdus cum Aner, & cum Elchol, ut orta occasione se invicem adiuverent, iunxit se illis, & divisis socijs fecit diversas Turmas, ut inimicis maiorem incuteret terrorem. Deinde totaliter sperans de Divino adiutorio sibi adfuturo, insequitur hostes; pervenit ad illos; committit bellum; & cum paucis servis gloriosum de quatuor Regibus, cum omnibus suis exercitibus, reportat triumphum. Sciendum est tamen, quod quilibet prædictorum Regum erat Dominus unius tantum Civitatis; licet forte aliquos viculos, vel suburbana circumquaque haberet: tantum enim in illo sæculo creverat libido dominandi, ut non solum in Civitatibus, sed etiam in parvis oppidis Reges insurgere vellent.

## Reflexio 56.

**R**Edeunte autem Abram de prælio, dicit Divinæ Scriptura: *At vero Melchisedech Rex Salem, proferens panem, & vinum, erat enim Sacerdos Dei Altissimi, benedixit ei, & ait: benedictus Abram Deo excelsio, qui creavit Cælum, & Terram: & benedictus Deus excelsus, quo protegente hostes in manibus suis sunt. Et dedit ei decimas ex omnibus.* Advertendum est autem, quod scelestissimi Iudæi, adversarii Fidei, nituntur semper depravare scripturas, quæ expressè loquuntur de Christo Domino, inter quas est ista. Dicunt igitur aliqui Rabbini: quod Melchisedech protulit panem, & vinum non in Sacrificium, sed ad reficiendum Abram, & populum eius redeuntem de prælio. Sed terrena hæc expositio, propria est terreæ mentis; & cum habeat pro obiecto cibum, carnali populo digna est. Falsitas autem il-

E 2

lius,




lius, expresse patet per litteram antecedentem: dictum est enim supra, quod illi quatuor Reges asportaverant de Sodomis universa, quæ pertinent ad cibum; non poterant autem in tam brevi tempore omnia consumpsisse, & ideo Abram satis ibi invenit de victualibus pro se, & pro populo suo. Item falsitas patet per litteram subsequentem, ubi Abram nihil voluit de præda, exceptis illis, quæ comederant pueri, idest, bellatores, qui secum fuerant. Accedit quod post illa verba *proferens panem, & vinum*, immediate subditur, pro qua causa, dum dicitur: *Erat enim Sacerdos Dei Altissimi*. Ex quo patet, quod obtulit panem, & vinum ad offerendum Sacrificium; hoc enim pertinet ad officium Sacerdotis. Alij Rabbini dicunt: quod Melchisedech protulit quidem panem, & vinum pro Sacrificio offerendo, sed non per seipsum, quia non erat Sacerdos; sed per Abram, qui tanquam Sacerdos legitur pluries Deo Sacrificium obtulisse; & ideo illud quod in Tex. sequitur: *Erat enim Sacerdos Dei Altissimi*: non referunt ad Melchisedech, sed ad Abram. Item illud: *& dedit ei decimas ex omnibus*, referunt ad Melchisedech, quasi iste dederit decimas de omnibus ipsi Abraham. Sed falsitas huius perversæ, & distortæ expositionis apparet ex hoc, quod Melchisedech benedixit Abraham, dicens, *Benedictus Abram Deo Excelso*, sed benedicere pertinet ad Sacerdotem, quia quod minus est, sine contradictione à meliori benedicitur, ut habetur ad *Hebr. cap. 7*. Item, quod Melchisedech daret decimas de omnibus reportatis Abraham, patet erroneum: quia res in præda acceptæ non erant in potestate ipsius Melchisedech, nec ab ipso acquisitæ in bello, sed ab Abram qui pugnaverant, & victor existens prædam habebat apud se. Tandem, ad illud quod dicunt, scilicet, Abram fuisse Sacerdotem, quia pluries sacrificavit, non valet illatio. Nam Abram sacrificabat, quia non erat hoc tibi prohibitum, cum adhuc non esset assignatum à Deo officium particulari personæ. Nam quod Sacerdotes soli hoc facerent, determinatum fuit postea per Legem. Melchisedech  
vero



vero dicitur Sacerdos Dei Altissimi, quia habebat officium offerendi, & immolandi potius quam alij. Ante legem enim datam, erant aliqui Sacerdotes, qui sacra facerent; tamen quia lex non prohibebat, poterat unusquisque offerre. Et dato quod soli Primogeniti essent Sacerdotes, tamen hoc non tollebat, quod alij non possent in Lege Naturæ sacrificare. Hoc autem patet: nam Caim, qui fuit primogenitus, offerebat Sacrificium, & idem faciebat Abel, qui erat secundogenitus. Relictis igitur Iudæorum deliramentis, & perfidijs, dicendum est: quod Melchisedech erat Sem primogenitus Noe, qui vixit etiam ultra nativitatem Iacob; eratque Rex Salem, idest, Ierusalem, quam ipse primò fundavit, licet Chananæi tunc illam violenter detinerent; & erat Sacerdos Dei Altissimi; tum quia habebat officium immolandi, ut prædictum est; tum quia erat pater illorum, qui remanserant in cultu unius veri Dei. Audita igitur Victoria Abrahæ, facta divina virtute, protulit panem, & vinum in Sacrificium, reddendo gratias Deo, & benedicens Abram, apud quem erant omnia acquisita in bello; ideoque statim Abram dedit decimas de omnibus ipsi Melchisedech, tanquam Sacerdoti Dei Altissimi; ut per hoc confiteretur, se ista habuisse à Deo, dum exhibebat decimas suo Ministro.

## CAP. XV. Reflexio 57.



Ido qualiter se habuit Abram ad Deum, & proximum, hic describitur, qualiter se habuit ad seipsum, & hoc fuit in petenda prole, quæ reputatur una persona cum illo cuius est; vivente enim filio dicitur vivere etiam pater, ut patet *Eccles.* 30. Sciendum est autem, quod Abram ex victoria tam solempni, quam Dominus illi dederat, timuit ne in hoc accepisset totam mercedem.



Iustitiæ suæ, & ideo Dominus affecuravit eum de alia magna, & vera mercede, dicens illi: *Noli timere Abram, ego protector tuus sum, & merces tua magna nimis.* Quasi diceret, parum est, quod tibi dederim præcedentem victoriam, nam maior adhuc merces tibi futura est. Ex hoc verbo Domini, sumpsit Abram occasionem petendi prolem. Secundum enim naturale desiderium, quodlibet Animal cupit se conservare per generationem in suo simili, & maxime homo, qui in filio suo recognoscit imaginem suam, cum sit rationis capax. Tunc Deus eduxit Abram foras, & dixit ei: *Suspice Cælum, & numera stellas si potes, sic erit semen tuum.* His auditis credidit, ut ait Tex. *Abram Deo, & reputatum est illi ad Iustitiam;* nam Deus reputavit ei hoc ad magnam bonitatem, quia promiserat Abrahæ aliquod, quod non poterat fieri cursu naturæ, cum ipse haberet centum annos, & Sara eius Vxor sterilis prorsus esset. Est autem Fides virtus secundum quam assentimur veritatibus à Deo revelatis; & dicitur iustificare, quia in Abram erat Charitate formata: Fides vero informis non iustificat, quia non facit hominem Deo acceptum. Deinde Dominus promisit etiam Abrahæ terram Chanaam. Adverte autem quod terra ista fuit data Abrahæ quantum ad proprietatem, quam Deus transtulit in illum, sed non quantum ad possessionem. Etenim sanctus Vir habitavit semper in illa tamquam peregrinus: Posteriores tamen sui illam possederunt. Audita ergo promissione Divina humiliter dixit Domino: *Vnde scire possum, quod possessorus sim eam?* Sed dices: si Abram credidit, cur signum petijt? Dicendum, quod hoc fuit duplici de causa. Prima, quia licet in nullo de facto dubitaret, tamen modum nesciebat; & ideo de isto quæsit. Sicut Beatissima Virgo Dei-para, assentiens verbis Archangeli, sed nesciens modum adimpletionis, percunctata est, dicens: *Quomodo fiet istud, quoniam virum non cognosco?* Secunda fuit; quia Abram sciebat, quod promissa Dei sunt conditionalia, scilicet, si ille cui fiunt non mutetur ad oppositum; & quia sciebat se posse



posse peccare, cum esset circumdatus infirmitate, timebat ne mutaretur à statu gratiæ, & sic promissum ob suam culpam non adimpleretur; ideo petijt de hoc certificari per signum sensibile.

## Reflexio 58.

**V**olens igitur Deus consolari servum suum, dedit ei signum quod eius semen possessorus esset terram, dicens: *Sume mihi Vaccam triennem, & Capram triennem, & Arietem annorum trium, Turturem quoque, & Columbam*. Pro intelligentia autem Tex: considerandam est: quod quandiu filij Israel steterunt in cultu unius veri Dei, possederunt pacificè terram promissionis; quando vero declinauerunt ad idolatriam, fuerunt ab inimicis devicti, ut patet in *Libris Iudicum, & Regum*. Et quando nimis abundavit eorum malitia, captivati tunc fuerunt per Chaldeos; & tandem per Romanos, eo quod Auctorem fidei, & Redemptorem Christum Dominum negauerunt, & occiderunt: ex quo manifeste sequitur, quod cultus unius veri Dei, erat illud per quod possideri poterat terra illa. Iste autem cultus, licet principaliter sit in actibus interioribus mentis, tamen requiritur etiam cultus exterior, qui est protestatio interioris. At in Lege veteri cultus exterior erat per Sacrificia; ideoque de talibus Dominus instruxit hìc Abram, dum præcepit ei, quodsumeret Vaccam triennem, & Capram, & Arietem annorum trium, nam de istis tribus speciebus erant fienda Sacrificia. Et quia de qualibet specie prædicta fiebat in lege triplex Sacrificium, nempe Holocaustum; Hostia pro peccato; & Hostia pacifica, ideo iussit Dominus hìc, ut quodlibet prædictorum individuorum esset trium annorum. De volatilibus autem non fiebat Sacrificium, nisi de duabus speciebus, Turturis, videlicet, & Columbæ; ideo istæ duæ species pariter hìc iubentur. Licet autem in mundatione Leprosi fieret oblatio de Passeribus, tamen non sit hic mentio



de tali specie, quia non erat communis oblatio. Tollens igitur Abram universa hæc, divisit illa per medium, & posuit utrasque partes contra se: Aves autem non divisit. Tunc descenderunt Volucres super Cadavera, & Abram abigebat eas. Causa autem huius partitionis fuit: quia tunc temporis, quando hominem adinvicem faciebant pacta, interficiebant unum animal, ipsumque dividebant in duas partes; ad designandum, quod contrahentes digni erant morte, si pactum illud transgrederentur. Et uterque transibat inter partes animalis occisi. Dominus autem pepigit hic fædus cum Abram; ideoque animalia prædicta fuerunt divisa in duas partes, & sic dispositæ, ut inter illas posset esse transitus. Aves vero non divisit, quia in confirmatione pacti, non dividebantur. Alia est causa mystica, quia per animalia prius dicta designatur vita Activa, quæ dividit hominem circa multa: per Aves autem designatur vita contemplativa, quæ non dividit, sed unit hominem ad Deum per ascensum mentis in ipsum.

### Reflexio 59.

**H**Is ergo dispositis, cum sol occumberet, sopor irruit super Abrâ, & horror magnus, & tenebrosus invasit eum. Fuit enim passio multum formidolosa, quia talis horror venit in tenebris; res autem sunt magis terribiles in tenebris, quam in die. Per hoc autem designabantur afflictiones, quas passuri erant filij eius, antequam obtinerent terram promissionis. Principaliter vero signabantur per hoc, tribulationes quas oportet sustinere fideles antequam perveniant ad cœlestem patriam. Deinde Dominus dixit Abrahæ: *Scito prænoscens, quod peregrinum futurum sit seminum tuum in terra non sua, & subicient eos servituti, & affligent quadringentis annis. Generatione autem quarta revertentur huc.* Sciendum est autem, quod isti anni non sunt computandi à primo anno quo intraverunt Israelitæ in Ægyptum, quia  
non



non manserunt ibi 400. anni, sed solummodo 210., ut tradunt Hebræi ex suis Chronicis; ideo isti 400. anni deducendi sunt à nativitate Isaac, in qua vocatum est semen Abraham, ut patet infra Cap. 21., à qua nativitate usquequò genuit Iacob, fluxerunt anni 60., ut habetur infra Cap. 25. Iacob autem erat annorum 130. quando descendit in Ægyptum, ut habetur infra Cap. 47. & sic, à nativitate Isaac usque ad descensum in Ægyptum, fluxerunt anni 190., quibus si iungantur anni 210. quibus steterunt filij Israel in Ægyptum, habentur precisè anni 400. in quibus semen Abraham fuit peregrinum in terra non sua, scilicet, partim in terra Chanaã, in qua tam Isaac, quam Iacob, habitaverunt ut peregrini; & eorum filij in Ægypto, ubi sustinuerunt tot afflictiones. Generatione autem quarta reverterunt Israelitæ ad terram promissionis. Sed adverte quod istæ quatuor generationes non sunt accipiendæ ab Abram, sed à Iacob qui descendit in Ægyptum. Nam Iacob genuit Iudam, Iudas autem genuit Phares; Phares autem genuit Esron; Esron autem genuit Caleb, ut habetur *primo Paralip: Cap. 2.*, & iste Caleb, in quo completa fuit quarta generatio, intravit cum alijs in terram promissionis, ut habetur *Num 14.*, & *Iosue 14.* Interea, dum consumaretur Abraham sacrificium, apparuit Clibanus fumans, & Lampas ignis transiens inter divisiones. Signabat autem iste Clibanus duram servitutem Israelitarum in Ægypto; & erat ardens ad denotandas passiones, & angustias, quas Hebræi debebant ibidem sustinere; nam ignis est maxime afflictivus; & erat fumans, ad designandum fletum, quem in Ægypto passuri erant: fumus enim excitat lacrymas. Lampas vero ignis transiens inter divisiones animalium, denotabat qualiter pactum erat confirmatum; quia sicut prædictum est, iniens pactum cum aliquo, transibat inter partes animalis occisi; Deus autem fecerat pactum cum Abram: at Divinitas oculis sensibilibus videri non potest, ideo apparuit Ignis representans præsentiam Dei. Et quia Deus non poterat transire per divisiones, cum ubique sit, faciebat loco sui



co sui transire flammam inter ipsas, ad ostendendam firmitatem pacti. Sicut in confirmatione Legis, populus quidem fuit aspersus sanguine, sed loco Dei, qui non poterat aspergi, fuit aspersum Altare, quod Divinam suam Maiestatem representabat.

## CAP. XVI. Reflexio 60.



Stento qualiter se habuit Abram in desiderio prolis, hic ostenditur qualiter bene se habuit respectu Vxoris. Sciens ergo Sara per Divinam revelationem, vel à Marito, quod Dominus promiserat Abrahæ multiplicationem sui Seminis, & videns se ineptam ad concipiendum, rogavit Maritum ut gigneret ex Ancilla: tunc Abram acquievit deprecanti. Non accessit vero ad Agar, tanquam ad concubinam, sed tanquam ad Vxorem. Semper enim actus carnalis, extra propriam Vxorem, fuit peccatum. Nec reprehenditur Abram de Bigamia sicut Lamech, quia non accepit secundam uxorem libidine ductus, sed amore prolis; nec absque consensu primæ uxoris, sed ipsa supplicante. Dicunt autem multi DD., quod ista Agar fuit filia Regis Ægypti, Vna enim de Vxoribus Pharaonis, videns sanctitatem Saræ, tradidit ei in ancillam unam de filiabus suis. Ad hanc igitur ingressus est Abram; quæ concepto fœtu, statim despexit dominam suam. Existimavit enim, quod omnia bona à Deo promissa Arahæ adimplerentur in sua prole; & ideo prorupit in elationem, contempsitque Saram tanquam exclusam à Divino promisso. Quapropter Sara afflixit illam, quæ fugam arripuit; reputans ex superbia correctionem Dominæ intolerabilem. Dum autem erraret per Desertum, Angelus Domini vocavit eam quærens quò tenderet; quæ respondit, fugere à facie Sarai Dominæ suæ. In qua responsione humilitatem exhibuit, manifestè recognoscens Saram pro Domina sua.



ha sua. Vnde Angelus cernens illius humiliationem promissit ei bona futura, dicens: *Multiplicans multiplicabo semen tuum*. Et loquitur in persona Dei, quia Angelus non potest multiplicare sua virtute filios, cum non sit Dominus naturæ. Dicunt autem DD., quod Angelus sic apparebat in similitudine assumpta, quasi habens faciem averfam ab Agar; ideoque dixit Agar: *Profecto hinc vidi posteriora videntis me*. Et per hoc designabatur, quod de Angelis non habemus cognitionem nisi valde longinquam, non vero propriam, & determinatam. Addunt aliqui, quod Agar in solitudine passa fuerat Abortum, in pœnam Dominae suæ contemptæ; sed quia acquievit Angelo monenti reditum, & humiliata fuit, Deus vivificavit in utero filium. Valde autem Agar affligebatur de tali Abortu; quapropter Angelus dixit ei, quod vocaret nomen pueri nascituri Ismael, eo quod audierit Dominus afflictionem suam.

## CAP. XVII. Reflexio 61.



Esripto statu Abrahæ in quantum fuit incipiens, hinc describitur status in quo fuit proficiens. Et quia suprâ Deo adhæserat per fidem, hinc adhæret per Circuncisionem, quæ erat signum distinctivum populi Dei à cæteris Gentibus. Dixit igitur Dominus ad illum: *Ambula coram me, & esto perfectus*. Istud enim est præcipuum, quod tollit hominem à peccato, continua videlicet meditatio de præsentia Dei in omnibus operationibus suis. Deinde explicavit pactum dicens: *Circumcidetur ex vobis omne Masculinum, & circumcidetis carnem præputij vestri, ut sit in signum fæderis inter me & vos*. Sciendum est autem, quod in Circuncisione tria necessario requirebantur. Primum erat, sexus masculinus, cuius ratio erat, quia Circuncisio fuit signum distinguens Israelitas à reliquis



quis Gentibus, in quantum habebant veram fidem, & cultum unius veri Dei; & cum datum fuerit tempore Legis naturæ, debuit dari in sexu per se intento à natura: talis autem est sexus masculinus, nam secundum Philosophum, foemina est mas occasionatus. Item fides illa, & cultus Divinus tunc temporis derivabatur ad alios per generationem carnalem, in quantum patres docebant filios de talibus: in masculo autem est principium generationis activum. Secundum fuit, determinata pars, nempe præputium, propter duas rationes. Prima, ad debilitationem concupiscentiæ carnalis, quæ magis viget in illa parte. Secunda, ad detestationem Idolatriæ, quia Gentiles in sacris nefandissimis Priapi, honorabant pudendam illam partem, & per modum cuiusdam augmenti aliqua addebant; ideo voluit Deus, quod in tali membro fieret recisio. Tertium, fuit tempus octo dierum, quod non poterat anticipari, quia ante octavum diem Puer est valde tener, ideoque in circumcissione poterat incurrere vitæ periculum; nec poterat differri ultra prædictum tempus à parentibus Infantis, vel Tutoribus sub poena mortis; quam etiam poenam incurrebat adultus negligens circumcidi. Vocatur vero hîc circumcisio foedus æternum. Sed adverte quod iste terminus, non accipitur hîc proprie secundum quod dicimus Cœlum æternum, vel animæ rationalis; sed accipitur pro magno quodam tempore: sicut in psalmis, montes vocantur æterni, videlicet propter eorum longam durationem. Similiter hîc etiam dicitur: *Daboque tibi, & semini tuo terram peregrinationis tuæ in possessionem æternam.* Et tamen Israelitæ possederunt solummodò illam ad longum tempus.

### Reflexio 62.

**P**ost præscriptam Circuncisionem, ne putaret Abram quod promissiones Divinæ essent adimplendæ in Ismaele, suisque descendentibus, promisit Deus illi filium ex Sara; in cuius semine, quod est Christus Dominus,



nus, benedicerentur omnes Gentes. Quo audito Abram risit, præ cordis, videlicet, exultatione; non enim fuit irrisio diffidentis, sed exultatio congaudentis, & similiter cum dixit: *putas ne centenariorum nascetur filius?* Non fuerunt verba dubitantis, sed admirantis divinum beneficium. Et quia certus erat, stante divina promissione, de alio filio, timuit ne Dominus vellet abbreviare vitam Ismaelis, & ideo rogavit Dominum pro ipso dicens: *Vtinam Ismael vivat coram te:* id est, faciens semper tuam voluntatem. Quapropter Dominus dixit ei: *Super Ismael quoque exaudi vi te:* Et ex hoc dicunt multi DD., quod Ismael finivit in bono vitam, quia de tali fine, qui solus est summa rerum, rogavit Abram Deum. Promisit etiam Dominus multiplicare Ismael valdè, & quod duodecim Duces generaret. Sed pactum de possidenda terra, respiciebat solummodo Isaac, eo quod in semine illius, quod est Christus Dominus, benedicerentur omnes Gentes. Dicit autem Methodius Martyr, quod in quibusdam Arcanis sæculorum reperitur scriptum, quod de genere Ismael quatuor Principes futuri sunt, qui vocantur ibidem *flij Vineæ*, id est, pro Vefania, ebrij. Dicit etiam, quod filij Ismael semel exeant, & obtineant Orbem per octo Hebdomadas annorum, id est 54. annos, & tunc vocabitur via illorum via angustiae: nam in sacris locis interficient Sacerdotes, & ad sepulchra Sanctorum relegabunt lumenta sua, ibique cum Mulieribus dormient; post elapsam vero tempus prædictorum annorum deficient.

### Reflexio 63.

**A**ccepto igitur Abram à Domino, circumcisionis mandato, tulit Ismael filium suum, & omnes Vernaculos, universosque servos quos emerat, & circumcidit carnem preputij eorum statim in ipsa die. In quo patet magna ipsius obedientia: verus namque obediens moras nescit; sicut verus moralis, nihil in agendo moratur, postquam




postquam consiliatus fuerit, ut ait *Arist.* 6. *Ethic*: quia post perfectum consilium, nihil remanet nisi operatio: ita proposito præcepto obedienti, nihil restat nisi executio. Patet etiam obedientia Ismaelis; qui licet esset quatuordecim annorum, non recusavit subire dolores acerbissimos circumcisionis, & similiter totius familiæ masculinæ. Et si quæras, quare non fiebat aliquod signum in mulieribus Hebræis, per quod distinguerentur à mulieribus Gentilibus: Dico: quod non erat hoc necessarium, quia cum Viri earum essent principales, & Vxores sequerentur ritum Virorum suorum, facta in illis distinctione, satis apparebat facta in feminis. Adverte autem, quod hæc Lex non obligabat nisi Hebræos, cum non esset data nisi illis; licet Gentiles, si vellent circumcidi, consequerentur eundem effectum, videlicet, remissionem peccati Originalis. Sed isti poterant bene salvari sine Circumcisione, scilicet, non peccantes contra præcepta Decalogi, & non colentes Idola, sed credentes unum Deum verum, remuneratorem bonorum operum; & tales morientes, si nullum peccatum haberent puniendum, recipiebantur in sinum Abraham, ubi nullus dolor, vel sensitiva passio est. Si vero habuissent peccata contra præcepta Decalogi, tunc si vere poeniterent, ducebantur in Purgatorio, ut in expletam satisfactionem scelerum, sustinendo illas pœnas, complerent. Contritio namque, non fuit ullo tempore minoris virtutis, quam nunc. Accedit, quod feminæ hebrææ per fidem unius Veri Dei, & bona opera absolvebantur à peccato originali, & ab actualibus; & idem erat de Gentibus viventibus secundum legem Naturæ, ad quam solum tunc temporis tenebantur.



CAP.



## CAP. XVIII. Reflexio 64.



Ita qualiter Abram proficiens se habuit ad Deum; hic demonstratur, qualiter se habuit ad proximum in operibus charitatis. Manebat igitur sanctus Vir in Convalle Mambre, sedens in Ostio Tabernaculi in ipso fervore diei; & hoc erat ad videndum si transirent Viatores, quos posset recipere ad mensam: quando enim incipit fervescere dies in meridie, tunc est hora in qua Peregrini solent ad hospitia declinare causa refectiois. Expectabat ergo cum vehementi desiderio ut aliqui venirent, quibus pietatis obsequia exhiberet. Tunc Deus videns affectum servi sui ad opus charitatis, fecit apparere tres Angelos in specie Virorum, ut Abram exhiberet illis hospitalitatem; quos ut vidit statim surrexit in eorum occursum: Peregrini namque non solum sunt invitandi, sed etiam trahendi. Deinde humiliter precatus est eos, ut dignarentur secum manere; & licet essent tres, tamen sic apparebant quasi unus esset principalis inter eos. Dicunt autem Hebræi, quod unus Angelus veniebat ad nunciandum Saræ conceptum; alius ad subvertendam Sodomam, & quatuor alias Civitates; tertius verò ad sanandum Abram, qui erat de novo circumcissus, & ad liberandum Lot de Sodomis. Et addunt, quod tres isti Angeli fuerunt Michael, Gabriel, & Raphael; ita quod Michael erat in medio, quia venerat ad nunciandum Saræ conceptum: hoc autem erat principale negotium, eo quod inde nasciturus erat Christus Dominus: & interpretatio nominis consonat prædictis tribus Angelis; Michael namque interpretatur, *quis ut Deus?* Gabriel vero, *fortitudo Dei*, & Raphael, *medicina Dei*.

Re



## Reflexio. 65.

**C**Um igitur Angeli acquiescerent Abrahæ deprecanti, cucurrit ad Armentum, & tulit inde Vitulum tenerimum, & optimum, deditque illum puero, qui festinavit, & coxit illum. Dicunt autem aliqui DD. quod iste puer fuit Ismael, cui Abram, ut illum assuefaceret operibus charitatis in tenera ætate, tradidit cibum parandum. Tulit quoque butyrum, & lac, & posuit omnia coram Angelis; ipse vero stabat iuxta illos sub Arbore, ut observaret, si aliquid deficeret illis. Ista autem Arbor est quæ vocatur Ilex Mambre, quæ valde magna & umbrosa erat. Cumque comedissent, dixit Angelus ad Abram: *Revertens veniam ad te tempore isto, vita comite, & habebit filium Sara Vxor tua*: Loquebatur autem Angelus more humano, quia putabatur homo ab his, quibus loquebatur, nam certum erat, quod Angelus victurus erat, quia spiritus est, & non potest deficere per naturam, cum non constet ex contrarijs. Sed hîc occurrît dubium. Quomodo verè comederunt Angeli cum animalia non essent? dicendum: quod illum cibum resolvebant in aerem, sicut ignis resolvit oleum, vel lignum, quæ sunt sua alimenta. Et idem fuit de Christo Domino, quando post resurrectionem comedit partem piscis assi, & fauum mellis. Corpora enim glorificata post resurrectionem, nec cibo indigent, nec transmutant in se, sed destruunt resolvendo. Aliter tamen erat de Christo Domino, & de istis Angelis, quia Salvator Deus comedere proprie poterat, cum haberet potentiam nutritivam, convertentem cibum in substantiam corpoream, licet tali conversione non indigeret. Angelus autem non habet corpoream substantiam in quam naturaliter cibus converti possit, nec vim nutritivam convertentem, sed solum est in eo quædam vis consumptiva, vel transmutativa cibi in alteram speciem: sicut ignis transmutat lignum, nullam habens vim nutritivam, sed solum consumptivam.

Re-



## Reflexio 66.

**T**Erminato convivio, surrexerunt Angeli aspicientes Sodomam, & incipientes ire versus illam partem; quapropter Abram ex urbanitate conducebat eos per aliquod spatium, demonstrans illis viam. Etenim adhuc credebatur eos esse homines itinerantes, quoadusque revelaverunt ei veritatem; & maximè quando ille qui apparebat quasi principalis dixit: *Clamor Sodomorum, & Gomorrhæ multiplicatus est, & peccatum eorum aggravatum est nimis.* Sciendū est autem, quod istæ Civitates peccaverunt vitio pessimo contra naturam; quod quidem dicebatur clamare, quia valdè publicum erat. Potissima autem causa tanti sceleris fuit naturalis copia illius terræ: parvo enim labore, propter irrigationem aquarum, habebat omnem abundantiam, ideoque habitatores otiantes, & continuis dediti delicijs, non solum ad illicita, sed etiam ad nefanda defluerunt. Tria verò genera peccatorum leguntur in scripturis Sanctis clamare ad Deum. Primum, est occisio innocentis; ideo dixit Dominus ad Cain: *Ecce vox sanguinis fratris tui clamat ad me de terra:* Secundum, est peccatum contra naturam, ut patet hic. Tertium, est defraudatio pauperum laborantium, unde dicitur Iacob 5. *Merceres operariorum vestrorum, qui messuerunt regiones vestras, quæ fraudata est à vobis, clamat.* Porro peccatum Sodomorum dicitur hic aggravatum nimis, quæ aggravatio secundum multos Doctores fuit, quia, (horresco referens) occiderunt morte acerbissima, & insolita quandam Puellam, eo quod dederat alimentum pauperi petenti elemosynam. Et hoc dictum consonat Ezechiel. 16., ubi dicitur *Hæc fuit iniquitas Sodomæ sororis tuæ; Superbia, Saturitas panis, & otium: & manum Egeno non porrigebant.* Demum, dum staret Abram coram Domino, rogavit ut non perderet Iustum cum impio; maximè si invenirentur in Civitate quinquaginta, vel quadragintaquinque: vel quadraginta, vel tri-

F ginta



ginta, vel viginti, vel decem. Et notandum est, quod ista petitio à principio utque ad finem, fuit pro omnibus quinque Civitatibus; quando vero Abram unam gratiam à Domino obtinuerat, rursus petebat aliam maiorem descendendo usque ad decem: infra autem descendere non est ausus; quia decem homines faciunt populum, pauciores autem non. Quod autem peteret liberationem maioris populi pro merito minoris, non erat irrationabile; sed quod peteret liberationem quinque populorum pro tam paucis, qui non constituerent populum, videbatur indiscretum.

## CAP. XIX. Reflexio 67.



Escrip̃ta Abrahæ oratione, hîc ponitur eius exauditio quantum ad liberationem Lot. Qui duobus Angelis venientibus Sodomam occurrit, existimans esse Peregrinos; edoctus enim fuerat ab Abram de officio charitatis illis exhibendo. Introduc̃tis igitur in domum suam Angelis, statim perversa Turba currens ad domum Lot, petivit ut traderet eis peregrinos ingressos in illam, vallaveruntque domum a parvo usque ad Senem: licet enim in senibus calor naturalis, & veneris ferè extingatur; tamen quia erant secundum habitum intemperatissimi, cupiebant facere etiam id quod ipsa natura negabat. Tunc Lot cupiens salvare hospites suos ab inaudita Sodomorum libidine, exhibuit illis proprias filias dicens: *Habeo duas filias, quæ non dum cognoverunt virum, educam eas ad vos, & abuti-  
mini eis.* Sciebat enim quod iniqua gens, non naturali modo, sed in vase indebito eas cognovisset. Sciendum est autem, quod in ista oblatione Lot peccavit, & ratio ea est: quia charitas debet esse ordinata; ideoque nullus debet committere aliquod inordinatum quo ad se, ut præcaveat maiori peccato alterius; Lot autem, non poterat offerre filias quin



quin consentiret in rem, quæ erat de genere suo peccatum mortale, ut est stuprum, vel peccatum contra naturam: excusatus tamen fuit à tanto, licet non à toto; tum quia mentem habebat perturbatam; tum quia violentiæ in suis hospitibus occurrere intendebat. Nec valet si dicatur, ipsum non peccasse, quia de iure naturæ est conservare hospites suos: Nam dico, quod quilibet ad hoc tenetur in quantum potest bono modo, & licito, non autem prevertendo ordinem charitatis, ut prædictum est.

### Reflexio 68.

**I**nterea non est passus Deus hanc petulantem libidinem Sodomorum remanere inultam; nam Angeli statim percusserunt populum cecitate, quæ vocatur *Achrisa*, per quam non perdiderunt totaliter visum; sed non videbant distinctè illa, quæ querebant. Deinde salvato Lot in montem cum tota sua domo, subvertit Dominus Sodomam, & Gomorrhæam pluens de Celo Ignem cū sulphure ad denotandum execrabile vitium Sodomorum. Ignem quidem, quia denti fervore infamis concupiscentiæ ad invicem ferebantur. Sulphur vero, quia dum ardet, fætet; tale autem vitium foetidum, imo omni foetore foetidius est. Submersis ergo Civitatibus, locus ille factus est lacus magnus salissimus, & valde spissus, ita quod vestimenta ibi proiecta non abluuntur, sed sordidantur; nec ullus piscis, ut refert *Arist.* 2. *Metheor.* potest ibi vivere. Quod totum factum est dispositione Divina, ut nimirum consumptis sceleratissimis hominibus, etiam eorum quondam Regio per omnia Sæcula infœcunda, & infamis remaneret. Interea dum arderent Civitates cum suburbanis eorum, accidit ut Vxor Lot respueretur retrò, dolens nimis de rebus quas in Civitate reliquerat, contra præceptum Angeli dicentis ad Lot in egressu Civitatis: *Noli respicere retrò*. Videlicet, per inordinatum affectum ad illa, quæ remanserant in Civitate; quod qui-



dem erat repugnare Divinae Iustitiae, quae exigebat, ut illa totaliter perirent. Quod praeceptum non fuit datum soli Lot, sed etiam filiabus, & Vxori; ideo quia ista inobediens fuit, conversa est in statum Salis. Quod totum fatum est in figura, Deus enim aliquando verbis, aliquando factis res designat. Vnde Ieremias portabat ad collum catenas, ut designaret futuram captivitatem Babylonicam: et Isaias captivitatem Egypti, & Ethiopiae. Igitur, quia Sal est condimentum ciborum, denotat sapientiam; & ideo punitio Vxoris Lot, dat condimentum sapientiae poenitentibus, ne redeant ad pristina scelera; nec desistant à bono incepto, ne peior exitus illos sequatur: hinc filius Dei dixit *Luc. 17. Memores estote Vxoris Lot.*


### Reflexio 69.

**M**Anebat interea Lot in Segor, vidensque quatuor Civitates igne consumptas, timuit ne subverteretur etiam Segor; ideoque ascendit in Montem, cum duabus filiabus suis. Civitas autem Segor post eius recessum subversa est, sicut propter illius merita salvata prius fuerat. Filiae vero illius putaverunt, quod sicut per Diluvium aquarum omnes mortui fuerant, excepto Noe, & eius familia; ita in praedicto incendio periissent generaliter omnes homines: maximè quia audierant à patre Mundum incendio peritum in futuro, sicut per aquas perierant in praeterito. Putaverunt etiam, quod sicut Deus reservaverat Noe, eiusque filios, & uxores ad restaurandum genus humanum, ita ipsae servatae fuissent cum patre ad idem propagandum: quapropter, falsa pietate delusae, ut haberent generationem dormierunt cum Patre. Et dicunt DD., quod miscuerunt in vino aliqua, quae habebant virtutem, non solum inebriandi, sed etiam provocandi ad coitum. Igitur inebriato patre, & secuta copula, de illo conceperunt. Sed hic oritur difficultas, occasione Textus dicentis: quod Lot



Lot non sensit, nec quando accubuit filia, nec quando surrexit. Videtur enim impossibile, ipsum cognovisse carnaliter filias, quæ erant Virgines, & non advertisse ad concubitum: quandoquidem requirebatur intentio dirigens organa executiva, cum deberet fieri claustrorum ruptio. Sed dicendum, quod Lot advertit quidem Mulierem esse iuxta se, & quod illam carnaliter cognoscebat, sed quod esset filia, vel Virgo non advertit, calefactus vino; putabat enim se esse cum Vxore sua, nihil reminiscens de morte illius: Vinum enim tollit prorsus reminisceniam.

## CAP. XX. Reflexio 70.



Descripto qualiter Abram se habuit proficiens ad proximum, hic describitur qualiter se habuit ad propriam domum. Consumptis igitur incendio impijs Civitatibus, reliquit Abram locum ubi manebat, idest Convallem Mambre, quæ non multum distabat à Sodomis. Causa mutationis domicilij fuit; quia per hanc Vallem transibant multi Viatores ad Civitates prædictas, ut emerent varias merces, quia terra illa in omnibus erat abundantissima; tunc autem non erat amplius ullus transitus, & perconsequens, nec ulla occasio exercendi hospitalitatem, ideo transivit ad aliam terram ubi posset hanc virtutem colere. Venit ergo in Geraris, cuius Rex videns Saram, & intelligens à suis Aulicis, quod esset Soror Abrahæ, misit servos suos, & accepit illam, ut esset eius Vxor. Licet enim Sara esset vetula, nam erat nonagenaria, tamen usque ad finem vitæ suæ remansit in ea carnis teneritudo, sicut erat in iuventute, & vivacitas coloris, quæ omnia conservata fuerunt à Deo propter illius sanctitatem. Dicit autem Iosephus, quod statim Abimelech infirmatus est, & desperantibus Medicis de vita illius, apparuit ei Dominus in visione dicens,


F 3

En



*En morieris propter Mulierem quam tulisti, habet enim virum.* Non fuit autem hinc determinatio Divinæ voluntatis; sed ostensio eius, quod causa particularis requirebat. Intendebat enim Deus dicere, quod certe moreretur sub tali conditione, nempe si non restitueret Saram; quia peccatum suum, supposita tali detentione, merebatur mortem. Igitur Rex de nocte confurgens restituit Saram. Non enim distulit exequi quod sibi fuerat à Deo imperatum; sed statim ac evigilavit, tradidit executioni præceptum. Deinde dedit munera Abraham, & mille argenteos in velamen oculorum Saræ, ut videlicet emeret unum Velamen, quia Mulieres honestæ velant vultum suum ne videantur; ideoque vocatur hinc in *Tex. Velamen oculorum.*

## CAP. XXI. Reflexio 71.



Iso qualiter se habuit Abram ad domum, hinc describitur qualiter se habuit respectu prolis. Igitur cum esset centum annorum nascitur ei filius ex Sara sterili, quem Mater vocavit Isaac, dicens: *Risum fecit mihi Deus.* Id est, materiam exultationis in partu prolis, conceptæ supra virtutem naturæ. Crescente autem puero animadvertit Sara quod Ismael pronus erat ad idolatriam, & libidinem; unde timens ne ad hæc induceret prædilectum filium suum, dixit Marito, ut dimitteret Ismaelem. Hoc autem durè accepit Abram; sed certificatus de voluntate Divina, statim dimisit Ancillam Agar cum puero; non enim poterat filius convenienter dimitti sine matre: cui dedit panem, & Vtrem aquæ; etenim terra illa per quam transire debebat, nec fluminibus, nec fontibus abundabat; forte etiam dedit ei aurum, & argentum, & aliqua alia bona, licet hinc non exprimantur. Adde, quod Abram habitabat in Bersabee, & Ismael in desertum Pharam, unde propter propin-

quita-



pinquitatem poterat pater ministrare filio omnia necessaria. Errabat interea Agar per desertum cum filio suo Ismaele, qui iam habebat vigintos annos, ut tradunt DD.; cumque defecisset aqua infirmatus fuit valde; & videns se in periculo mortis, vehementer doluit de peccatis suis, rogavitque Dominum pro sua salute. Vnde Deus respexit poenitentiam, quam tunc exhibuit, condonans ei malitiam, quam temporibus preteritis exercuerat. Dicunt tamen multi DD. quod licet poenituerit in infirmitate, tamen recuperata salute redijt ad pristina scelera, exercens latrocinia, & prædas à transeuntibus per Desertum. Hoc eodem tempore habitabat Abram in Bersabee, ibique plantavit nemus; vel ut alij volunt, Hortum plenum fructiferis Arboribus, propter hospites transeuntes per illam partem, quos continuè in domum suam recipiebat, ut fructibus, & amœnitate loci magis recrearentur, quos post refectiorem incitabat ad reddendas Deo gratias pro beneficijs receptis.

## C A P. XXII. Reflexio 72.



Es scripto qualiter se habuit Abram proficiens, hîc subiungitur qualiter se habuit perfectus existens. Tentavit ergo Deus Abram, & dixit ei: *Tolle filium tuum unigenitum quem diligis Isaac, & vade in terram visionis, atque ibi offeres eum in Holocaustum super unum Montium, quem monstravero tibi.* Sciendum est autem, quod tentare est accipere experimentum de re quam ignoramus. Sic dicimus aliquem tentare amicum, ut sciat quid sibi possit de eo promittere. Deus autem omnia cognoscens, de nullo dubitat, & sic proprie non tentat, ut capiat experimentum de re ignota, sed solummodo, ut alijs, qui ignorant, detur experimentum de aliquo. In hoc ergo sensu tentavit Deus Abram, præcipiendo illi immolationem



filij, ut nimirum ostenderetur alijs eius obedientia erga Deum. Considerandum est autem, quod in unico præcepto multa proponuntur pertinentia ad amorem paternum. Non enim mandavit Dominus, quod immolaret filium suum prope locum ubi manebat, sed in terram visionis, quæ est mons Moria, valde ab eo distans, quia Mandato Dei concepto, antequam alia contraria cogitatio subintraret, exequi facilius potuisset; sed perambulando per tres dies, ut communiter dicunt DD., multæ contrariæ cogitationes occurrebant, quæ animum teneri patris à recto proposito distrahere valebant: nempe naturalis amor filij, qui erat consolatio suæ senectutis; & tamen de ipso non debebant remanere, ratione holocausti, nisi cineres vento dispergendi. Accedebat inconsolabilis tristitia Matris, & ut multi DD. affirmant, continuæ tentationes Dæmonis, dicentis: O insensate senex: nescis quod immolatio ista repugnat voluntati Divinæ, nam Dominus dixit tibi, quod ex prædilecto filio tuo futuri sunt Reges, & Populi? Non ergo habes mandatum Dei de immolando filio, sed tua impietas, & insania hoc tibi suggerit. In his omnibus Abram vultum immotum tenere potuit per tres dies itineris cum proprio filio semper sibi præsentem, quod quidem difficile valde est: unde *Arist. 3. Ethic:* ait. *Difficile est immorari cognitis:* idest quando aliquis cognoscit dura, difficile est immorari in actuali consideratione, & non mutare propositum. Sed quia Abram erat invictus Dei miles, hæc omnia non solum sustinuit, sed generose contempsit. Charitate Dei armatus superavit omnia incitamenta naturæ; & fide semper stabilis, omnes insidias Diaboli repressit.

### Reflexio 73.

**A**ccepto Abram Divino mandato, de nocte consurgens stravit Asinum suum, ad portandum videlicet Ligna necessaria pro Sacrificio; non expectans aliquius



cuius servi famulatum, ut iussa Dei celerius exequeretur; nec aliud restabat, nisi videre locum immolationis fiendæ, quando Dominus hunc demonstravit per Columnam ignis celitus missam super montem Moria, ut tradunt communiter DD. Viso igitur loco determinato, reliquit Abram servos ad radices montis: timebat enim ne per istos impediretur eius obedientia, si fuissent præsentes ad immolationem filij, dixitque eis: *Expectate hic cum Asino: ego & puer illuc properantes, postquam adoraverimus, revertemur ad vos.* Hoc autem prophætice dixit, sed non advertit ad quid diceret; ideoque non fuit prophætia proprie dicta, ad quam requiritur intelligentia, ut patet *Daniel 10.*, sed large sumpta; qui Spiritu Sancto dictante, & movente sic protulit, ut significaret illud, quod erat futurum. Deinde posuit ligna Holocausti super filium, in expressa figura Christi Domini, qui baiulans sibi Crucem, exivit in montem Calvarie, ut esset ibi Victima salutaris pro totius Mundi delictis. Porro Abram portabat ignem, & gladium in manibus. Gladium, ad immolandum filium. Ignem vero, ad incendendum, & incinerandum ipsum immolatum. Igitur ascenso montis vertice, alligavit filium, non invitum, alioquin potuisset fugere cum fortior esset ipso patre, erat enim annorum triginta quinque, ut dicit Iosephus; sed audito à patre mandato Dei, humiliter, & voluntarie se obtulit ad immolandum.

### Reflexio 74.

**D**Ispositis igitur omnibus, Abram invicta fortitudine elevat gladium, ut filium prædilectum immolaret. Et ecce Angelus Domini de Cælo clamavit dicens: *Per memetipsum iuravi dicit Dominus: quia fecisti rem hanc, & non pepercisti filio tuo unigenito propter me, benedicam tibi, & multiplicabo semen tuum sicut stellas Cæli, & velut arenam quæ est in littore Maris; & benedicentur in semine tuo omnes Gentes.*

Adver-




Adverte autem quod omnes *per maiorem* iurant, ut patet 6. *ad Hebræ.* non potest autem aliquid esse maius Deo, & ideo Deus per semetipsum iuravit. Licet autem promissio Dei, quomodocunque fiat, firma sit; tamen ex natura verborum, firmior videtur esse promissio iuramento firmata, quam sine iuramento. Et ad maiorem intelligentiam sciendum est: quod Deus aliquando dicit aliqua secundum quod ipse determinavit in se; & tunc sunt simpliciter immutabilia. Aliquando vero dicit aliqua secundum quod est in causa inferiori; & tunc ad mutationem predictæ causæ mutantur. Illa autem, quæ cum iuramento à Deo dicuntur, semper pronunciantur secundum quod à Deo determinata sunt; & ideo sunt immobilia, sive dicantur conditionaliter, sive non: quia si pronunciantur conditionaliter, faciet Deus stare conditionem, quam etiam cognovit futuram. Hic autem ponitur revocatio præcepti, quia hoc solum factum fuerat ad ostensionem obedientiæ Abraham; & ideo ipsa futuris generationibus declarata, revocandum etiam erat mandatum. Quia vero Abram non recusavit, ut Deo obediret, immolationem proprii filij, meruit per hoc audire multiplicationem sui seminis; & quod in eo consequerentur omnes Gentes benedictionem. Quod fuit impletum in Christo Domino, qui fuit de semine illius, secundum carnem assumptam. Nam in Christo Domino fuerunt benedictæ omnes Gentes; quandoquidem æterna salus non habetur nisi per illum; cum non sit aliud nomen sub Cælo datum, in quo oporteat nos salvos fieri, ut patet *Act. 4.* Comparantur deinde filij Abraham stellis Cæli, & arenæ Maris; tum quia prædicta sunt nobis innumerabilia, licet in se habeant certum numerum cum tot sint, & non plura; tum ad denotandum, quod si boni essent, nullus eis nocere potuisset, sicut nullus nocere valet stellis, in sublime positis. Si vero mali, deprimerentur ab omnibus, sicut pulvis pedibus conculcatur.

CAP.



## CAP. XXIII. Reflexio 75.




Descripta vita Abrahæ cum Vxore, hîc describitur qualiter se habuit ad illam sepeliendam. Cum pervenisset igitur Sara ad annos 127. migravit ex hac mortali vita. Abram vero nolens eam sepelire cum infidelibus, recusavit omnia eorum Sepulchra sibi exhibita, emens ab Ephron pretio 400. Siclorum Agrum, in quo erat spelunca duplex. Sciendum est autem, quod licet Abram emerit agrum, non tamen emit ius sepeliendi, quia Res Sacræ vendi nequeunt. Ius autem sepeliendi est aliquod sacrum: quia propter Abram petijt gratis ius sepeliendi, sed emit locum sepulturæ: empto autem Agro, dabatur ei ex consequenti potestas sepeliendi. Sicut si aliquis habens Ius patronatus in una Villa, vendat illam cum omnibus, quas ibi habet, transit Ius patronatus cum Villa; non tamquam aliquod emptum, sed tamquam aliquod fundatum in rebus emptis, & consequens illas; nisi fiat expressa mentio, quod Ius patronatus non transeat, ut patet *in Cap. ex literis de Iur. patron.* Generaliter ergo dicendum est, quod Ius sepulturæ non potest vendi; locus vero in quo est sepultura, aliquando vendi potest, aliquando non. Si enim locus ante non erat sacer per sepulturam alicuius mortui ibi positi, potest vendi tanquam locus profanus; secus vero si fuisset ibidem sepultus aliquis. Sic est nunc in Cemeterijs nostris, quæ sunt loca sacra per mortuorum sepulturam, & benedictionem: ideoque terra illa vendi nequit. Et licet ab antiquo habeant ibi homines distincta loca sepulturæ secundum cognationes, & familias; hoc tamen non est, quia emerint; sed quia gratis à principio illis donatum fuit à Prælati, vel Superioribus illius Ecclesiæ. Et si dicas, quod quando aliquis intra Ecclesiâ sepelitur, dat etiam ipsi Ecclesiæ certam pecuniam, vel Ministris eiusdem Ecclesiæ, alias  
non



non reciperetur: Respondeo, quod locus sepulturæ conceditur gratis ab illo qui administrat Ecclesiam; sed ille qui accipit Sepulchrum, dat Ecclesiæ aliquid, non tanquam debitum, vel ex pacto, sed in eleemosynam; & si hanc dare nollit, compelli potest per Iudicem Ecclesiasticum ad solvendum; non virtute alicuius præcedentis contractus, sed vigore laudabilis consuetudinis. Sicuti quando Clerici faciunt exequias mortuorum, non possunt convenire heredem pro certa pecunia; tamen si illi ad quos spectat solvere renuant, compelli possunt ad dandum id, quod est de consuetudine laudabili; ut patet *extrau. de Simonia Cap. Suam nobis*, & ibi *Gloss.* Demum adverte, quod locus sepulturæ emptus ab Abraham non erat Sacer: licet enim factæ ibidem fuisset speluncæ, tamen numquam in illis spultus fuerat Mortuus: fundus autem non efficitur Sacer per defossionem Sepulchrorum, sed per actualem mortui repositionem.

## CAP. XXIV. Reflexio 76.



**D**Esripto qualiter se habuit Abraham ad tumulandam Vxorem, hîc ponitur qualiter se habuit ad filium matrimonio copulandum. Quia vero filiæ Chananæcrum erant idolatræ, noluit pro filio suo ullam earum eligere, ne traherent nepotes suos ad Idolatriam. Filius enim semper conversatur cum Matre dum tener est; quo tempore fiunt in puero fortes impressiones, unde *Arist. pr. polit.*: ait. Quod ordinantem politiam non modicum attendere oportet ad mulieres, quia *Mater dimidium filiorum est*. Ideo misit Abraham servum suum in Mesopotamiam, ut acciperet filio suo Vxorem de Cognatione sua. Et fecit servum iurare subter femur suum, ut non acciperet Vxorem filio suo nisi de dicta sua cognatione. Hoc autem erat iurare in nomine Christi Domini, tunc nascituri de mine



mine Abrahæ. Et tali modo loquendi utitur Sacra Scriptura  
*Exod. pr.* ubi dicitur : *Omnes animæ quæ egressæ sunt de femore*  
*Iacob.* Perrexit ergo servus in Mesopotamiam, & quiescens  
 cum Camelis iuxta Puteum aquæ Urbis Nachor, recursum  
 habuit humiliter ad Deum pro fine suo obtinendo. Et ut sci-  
 ret, quænam verè esset Puella electa à Deo pro Domino suo,  
 posuit hoc signum, videlicet: si ipse petens ab illa aquam,  
 exhiberet eam non solum sibi, sed & Camelis. Ex hoc  
 namque satis sufficienter manifestabatur Divina præordina-  
 tio. Nam quod aliqua Puella daret potum Eliezer hominì  
 ignoto, & ulterius, libenter se exhiberet subministrare  
 aquam Camelis sine ulla instantia sibi facta, magna valdè  
 bonitas videbatur, ad quam nulla puella inclinaretur, nisi  
 illa quam Deus specialiter elegisset. In hoc autem Eliezer  
 non tentavit Deum, quia non quæsit signum per modum  
 augurij, vel divinationis, quod semper est illicitum, sed  
 in magno dubio, & præmissa oratione; immo inspiratus à  
 Deo, ut communiter dicunt Doctores. Quapropter non  
 erat imponere Deo legem. Igitur Deus, qui moverat ser-  
 vum ad petendum signum, movit etiam eodem tempore  
 Rebecam ut veniret ad fontem; cui servus petivit aquam  
 pro se. At illa non solum pro se dedit, sed ulterius generosè  
 se obtulit ad exhibendam aquam omnibus etiam Camelis; ef-  
 fundensque Hydriam in canalibus recurrit ad puteum, ut hau-  
 rir aquam pro Camelis. Deinde requisita, indicavit suam  
 cognationem. Tunc Eliezer adoravit Dominum, gratias  
 agens quod prosperum fecisset iter suum. Et ingressus do-  
 mum Bathuelis, patris Rebecæ, narravit omnia, quæ sibi  
 occurrerant: quibus auditis cognoscentes voluntatem Dei  
 esse, ut Rebecca fieret Vxor Isaac, dimiserunt illam, impre-  
 cantes ei prospera. Pergebat ergo Rebecca ascensis Came-  
 lis, cum Puellis sibi assignatis à suis Maioribus; & pervenit  
 ad locum habitationis Abrahæ eo tempore, quo Isaac egres-  
 sus fuerat ad meditandum in Agro. Et aliqui Doctores di-  
 cunt, quod egressus fuerat ad orandum circa tempus Vesper-  
 tinum;



tinum; & ad reddendas gratias de beneficijs in illa die à Deo receptis; & ad cogitandum, tum de Deo, tum de vita æterna. Quæ quidem cogitationes valde lætificant animam, & confortant nos in huius vitæ miserijs: prædicta autem, melius in agro, quam in Civitate fiunt, quia prorsus mentem liberam à Curis sæculi prerequirunt. Alij dicunt, quod egressus fuerat ad videndum dispositionem Cœli, & aliquarum stellarum, quæ incipiebant apparere: edoctus namque fuerat à Patre in Astronomia.

## CAP. XXV. Reflexio 77.



Postquam Moyſes deſcripſit electionem Populī fidelis, deducendo per Abraham, hīc idem facit per Isaac: Fit tamen prius mentio de alijs filijs Abrahæ, qui aliam duxit uxorem nempe Ceturam, non propter libidinem explendam, vel compescendam, quandoquidem ætas utrumque removebat, sed Deo sic disponente, propter significationem futuri. Etenim sicut Agar, & Ismael significabant carnales Veteris Testamenti; ita Cetura, & filij eius denotabant hæreticos, qui se iactant pertinere ad novum Testamentum; sed non pertinent, quia Ecclesia, per Saram significata, una manet. Dicunt autem Doctores, quod ista Cetura fuit iuvenula de Chananeis; & ideò naturaliter potuit Abraham ex ea habere filios propter caliditatem seminis ipsius Puellæ, contemperantis semen senile, quod est frigidum, & per consequens ineptum ad conceptum. Licet autem Abraham habuerit ex Cetura multos filios, qui hīc recensentur; tamen dedit cuncta, quæ possidebat filio suo Isaac: filijs autem concubinarum largitus est munera; & separavit illos ab Isaac, dum adhuc viveret; cognovit enim in spiritu, quod si simul mansissent, magnæ rissæ secutæ fuissent. Adverte autem quod filij Ceturæ, & Agar vocantur *in tex. filij concubi-*



*subinarum*, non quia istæ fuerit concubinæ; nam supra *cap.* 16. dicitur quod Abraham accepit Agar in Vxorem, & hic in principio dicitur pariter, quod accepit Ceturam in Vxorem. Sanctus enim Vir non accepisset concubinam, cum sciret hoc esse mortale peccatum. Vocantur tamen concubinæ, quia sola Sara erat eius uxor principalis; prædictæ autem erant uxores secundo loco acceptæ. Vnde alibi in Sacra Scriptura, uxor vocatur concubina ut patet *Iud.* 19. ubi dicitur: *Habeo filiam virginem, & hic homo habet concubinam.* Certum autem est, quod erat eius uxor, ut patet ibidem. Si autem quæras, cur Abraham assumpsit mulierem de Chananæis, cum noluerit filium suum accipere uxorem de illis? Dico, quod totus Populus Dei derivandus erat per Isaac; quapropter, si iste accepisset uxorem de Chananæis, Populus Dei fuisset coniunctus Gentibus; quod non decebat propter Christum Dominum tunc nasciturum de semine Isaac. Abraham vero non intendebat in hac tertia uxore augere Populum Dei: sciebat enim quod benedictiones complendæ erant in Isaac; ideo cum filij nascituri non pertinerent ad Populum Dei, non referebat accipere uxorem de cognatione propria, vel de Chananæis.

### Reflexio 78.

**S**eparatis igitur filiis, & assignata hereditate Isaac, cum esset Abraham centum septuaginta quinque annorum, deficiens mortuus est, ut dicitur in *Tex.* Adverte autem, quod aliquis dicitur deficere, quando non moritur morte violenta, nec ex aliqua magna corporis egritudine, sed paulatim deficiente calore naturali, per consumptionem humidi radicalis, donec homo remanet quasi disiccatus: unde omni, qui deficit, moritur; sed non omnis qui moritur, deficit; cum deficere signet mortem mansuetam, sicut accidit in Abraham, qui defecit in senectute bona, nempe mansuetè, & in Divina gratia, quæ sola reddit bonam senectutem, & appo-



appositus est ad Populum suum; nam eius animā migravit ad illos iustos, qui erant in Lymbo: etenim Porta Paradisi pro peccato primi Parentis fuit semper clausa usque ad Christi Domini mortem. Sepelierunt autem eum Isaac, & Ismael filij sui in spelunca duplici, ubi sepulta est Sara eius Vxor. Non solum autem filij convenerunt ad exequias sancti Patris, sed etiam Populi circumstantes: fuit enim semper Abraham amabilis, & reverendus, adeo ut tamquam Princeps à Deo positus haberetur; & sic vocabatur ab Ethæis, adeo ut, quando aliqua causa valde dubia erat inter illos, recurrebant ad illum, ut per Divinum oraculum de causa responderet. Notandum est etiam, quod anni Abraham, qui fuerunt 175., ponuntur in hebræo distincti numericè sic, 100. anni, 70. anni, 5. anni: ad denotandum, quod Abraham fuit ita mundus à peccato in ætate 100. annorum, & in 70. annorum, sicut in ætate 5. annorum: idemque est in numero annorum Saræ; nam ibi pariter ponuntur numeri distincti, ad designandum eius bonitatem omni tempore.

### Reflexio. 79

**M**ortuo Abraham, manebat Isaac cum Vxore sua, quæ sterilis erat: quamvis enim facta illi fuisset promissio de multiplicatione sui seminis, tamen precibus erat complenda præfinitio. Et simile accidit in prædestinatione, quæ licet sit imputabilis, tamen Deus prædestinans alicui Gloriam, prædestinat etiam ei illa, quæ sunt ad Gloriam consequendam: quapropter, sicut ab æterno aliquem prædestinavit ad vitam; ita eum prædestinavit, ut cum sanctorum precibus vel cum talibus laboribus, patienter toleratis, adipisceretur salutem. Igitur sanctus Patriarcha, antequam Rebecca pareret, deprecatus est Dominum per spatium viginti annorum, quod patet manifestè: nam ut hic dicitur, erat quadraginta annorum, quando accepit uxorem; quando vero Rebecca peperit, erat sexaginta annorum.

Sed



Sed hic quæri potest: quare Isaac cum videret Vxorem sterilem esse, non duxit aliam Vxorem minus principalem, sicut fecit Abraham pater suus, qui postquam stetit decem annos cum Sara, accepit Agar, ut ex illa filios haberet? Dicunt communiter Doctores: quod ex tempore quo Isaac voluntarie se obtulit Deo ut immolaretur, fuit per hoc consecratus Domino; ideoque non erat ei licitum accipere nisi unicam Vxorem. Et hoc consonat dicto Apostoli *ad Timoth.* 3. dicentis de Episcopo, qui est Deo consecratus, quod debet esse *unius Vxoris Vir*. Elapsis ergo viginti annis exaudivit Dominus preces servi sui, deditque conceptum Rebeccæ. Sed collidebantur in utero Parvuli, nam mutuo se impellebant: in signum videlicet contentionis futuræ inter illos, & inter Populos ab eis derivandos; nempe Iudæos, & Idumæos. Deus enim ostendit futura aliquando verbis, aliquando factis. Tunc Rebecca perrexit ut consuleret Dominum. Et dicunt Doctores, quod se contulit ad Montem Moria, ubi Abraham voluit immolare filium; reputabat enim talem locum sanctum. Igitur factis ibi Victimis in Holocaustum, posuit se ad dormiendum super pelles Sacrificiorum, ut in somno audiret à Deo veritatem. Alij dicunt, quod perrexit ad Melchisedech, qui erat Sacerdos Dei Altissimi, ut per Dei Sacerdotem consuleret Dominum. Vel accessit, secundum alios, ad Heber, qui habebat spiritum prophetiæ. Deus ergo, vel per se ipsum, vel per unum de prædictis servis suis respondit ei dicens: *Due gentes sunt in utero tuo*, videlicet capita duarum gentium. *Populusque Populum superabit, & maior serviet minori*. Hoc autem impletum est tempore David, qui fecit Idumæos sibi tributarios, ut habetur 2. Reg. Cap. 8. sed perfectius impletum est in Christo Domino, cui colla gentium, & Principum terræ subdita sunt; & maxime Romanum Imperium, quod Iudæi dicunt significari per Esau.



## Reflexio 80.

**T**Empus interea pariendi advenerat, & ecce gemini in utero reperti sunt. Qui prior egressus est Rufus erat, & totus in morem pellis Hispidus; homines vero habent pilos in ætate aliquantulum perfecta, quando ex calore invalescente digeruntur humores sicci; & cum emittantur per stricissima loca pororum, in pilos formantur; Esaù autem, cum de Matris utero nasceretur, totus apparuit pilis coopertus: unde hoc fuit, vel quasi monstrum, vel miraculum. Alter vero protinus egrediens, tenebat manu plantam fratris, & ideo vocatus fuit Iacob. Procedente autem tempore, apparuit Indoles utriusque: nam Esaù factus est vir gnarus venandi; invenit enim multos modos fallendi aves; & vir agricola. Ex quo patet, quod tota sua occupatio erat circa terrena. Iacob vero fuit vir simplex, scilicet sine plica doloſitatis; non autem quasi haberet defectum industriæ, & prudentiæ: & habitabat in Tabernaculis, quæ erant loca Scolarum, in quibus addiscebatur sapien-  
tiam, & timorem Divinum. Erat autem unum Tabernaculum Melchisedech, ubi cultus Dei vigeat. Aliud erat Heber, qui erat Propheta, & docebat de rebus Divinis. Dicunt autem Hebræi, quod Iacob in Tabernaculo Heber mansit quatuordecim annos, ut res Divinas addisceret. Porro Isaac diligebat Esaù, eo quod de venatione illius vesceretur, nam senex erat; homines autem in tali ætate optant, & exigunt delicata cibaria, cuiusmodi sunt Animalia venatica, quæ teneriora sunt, & per consequens digestibilia. Rebecca vero diligebat Iacob; tum propter singulares virtutes, quæ in ipso erant; tum quia per Divinam revelationem cognoverat, quod Iacob debebat præferri fratri suo maiori.

Re-



## Reflexio 81.

**A**ccidit autem quadam die, ut rediret Esaù de agro lassus; Iacob vero coxerat pulmentum, quod videns Esaù dixit ei: *Dà mihi de coctione hac rufa*. Erant enim lenticulæ, quæ naturaliter rubæ sunt; non vero quia sic fuissent confectæ: nondum enim gulosa aviditas, curiositatem, & delicias in cibis invenerat. Dicunt autem Hebræi, quod eadem die mortuus fuerat Abraham; ideoque in domo Isaac omnes comedebant Lentes: hinc generaliter Iudæi in die mortis patris familias, & in die exequiarum parant Lenticulas in cibum. Tunc Iacob respondit fratri: *Vende mihi primogenita tua*. Quæ statim Esau vendidit, firmans iuramento venditionem. Sed hic quæritur: quomodo Iacob, qui erat vir tam eximiæ sanctitatis, petijt sibi vendi Primogenituram? nam tempore legis naturæ, Primogeniti erant Sacerdotes: at Sacerdotium semper fuit reputatum aliquod sacrum, & ideo videtur commisisse simoniam. Item de Iure Primogenituræ erat duplex portio hæreditatis paternæ respectu aliorum filiorum. Cum igitur Isaac haberet multa bona, videtur Iacob fecisse fratri suo magnam deceptionem dum pro re tam modica acquisivit ius ad tanta temporalia bona. Dicendum, quod ius Primogenituræ erat ipsius Iacob de Iure, quia ex determinatione Divina dictum fuerat Rebecce, quod maior serviret minori; & hoc sibi fuerat revelatum à Matre: quapropter Esaù possidebat solum de facto ius primogenituræ; & ideo licitum erat ipsi Iacob, prædictum ius sibi caute vindicare, quod & fecit parata sibi occasione. Nec in hoc ullo modo peccavit respectu simoniacæ labis; quia non intendebat emere directe rem sacram, sed solum redimere suam vexationem: nec emit pro parvo pretio rem alienam, sed suam propriam vindicavit, quam etiam pro nihilo poterat accipere. Esaù autem non solum peccavit peccato gulæ, appetendo inordinate cibum, sed etiam pec-



cato simoniæ, intendens verè vendere rem sacram, & ideo reprehenditur ab Apostolo ad *Hebr.* 12. tamquam Profanus. Sciebat enim se vere esse Primogenitum: quod autem Deus aliter disposuisset de Primogenitura, non ei constabat. Et dato quod scivisset hoc, adhuc fuisset simoniacus, & iniustus. Simoniacus, quia pro pretio tradebat rem sacram. Iniustus vero, quia accipiebat pretium de re non sua.

## CAP. XXVI. Reflexio 82.




Descripta generatione prolis, hìc describitur probatio Patris in adversis. Igitur orta est fames in Palestina: noluitque Deus, quod Isaac descenderet in Egyptum, ubi erat fertilitas. Cuius causa secundum Hebræos est: quia Isaac fuit Domino consecratus cum oblatus est in Monte; & ideo non erat decens quod exiret de Terra promissionis. Mansit ergo in Geraris, ibique valde locupletatus fuit, nam in illo anno habuit centuplum, quod fuit ex speciali dono Dei; etenim ille annus non fuit fertilis. Ex hoc autem surrexit contra eum invidia; nam Rex Geraris eiecit ipsum de civitate sua, non potens tam celerem prosperitatē aspicere: reliquus autem Populus, ut Regem imitaretur, obstruxit puteos Isaac operiens eos humo. Magnitudo namque potentix actualis, vel probabiliter præsumptæ futuræ, causat invidiam, & ista parat prosperati nocumentum; sola namque paupertas, & miseria, caret tali peste. Sanctus ergo vir obedivit mandato iniqui Regis; recessit enim statim ab eo, & perrexit Bersabeæ, ibique ædificavit Altare, ut prius gratias redderet Deo, quam sibi extenderet Tabernaculum. Dum autem hìc moraretur, accessit ad eum Rex Geraris cum principibus suis, petens ab illo confederationem, quos omnes Isaac benignè suscepit, fecitque eis etiam Convivium. Mane autem surgentes



tes fœdus inierunt, & sibi mutuo iuraverunt antequam quidquam gustarent propter reverentiam iuramenti. Et ex hoc videtur sumptum *cap: Placuit. extra de Testibus*, ubi dicitur: quod nullus testimonium dicat nisi ieiunus; quod tenet ex honestate, ut notat ibi *Gloss.* Deinde patienter toleratis ab Isaac iniurijs extraneorum, probatur eius virtus respectu propriæ familiæ, dum eius filius Esau, absque consensu proprii genitoris, accepit duas Vxores ex Chananæis; quælibet autem erat in moribus male instructa, & prona ad idolatriam. Sanctus autem pater optabat ut acciperet Vxorē de cognatione Rebeckæ, vel de filiabus Ismaelis, seu aliorum filiorum Ceturæ: sed profanus filius, cum prius parvipendisset Divina, pro nihilo habuit humana iura contemnere.

## C A P. XXVII. Reflexio 83.



Escrip̃ta tolerantia Isaac tempore adversitatis, hic describitur ordinatio suæ posteritatis, quæ fiebat per benedictionem. Senuit ergo Isaac, & caligaverunt oculi eius, & videre non poterat. Non erat tamen ista formaliter cæcitas, sed valde modicum videbat, deficientibus oculis illius ex infirmitate. Quapropter vocavit Esau filium suum primogenitum, cui præcepit, ut capta venatione faceret sibi pulmentum; intendebat enim dare illi benedictionem: filius autem, secundum consuetudinem illius temporis, debebat prius præstare patri aliquod obsequium antequam illam acciperet; & ideo Isaac misit eum ad venandum, ut deinde componeret cibaria, & ista deferret pro obsequio debito. Audiens vero hoc Rebecca, misit Iacob ad Gregem, iubens illi ut afferret duos Hædos, quibus allatis composuit cibum pro marito; vestivitque Iacob vestibus Esau valde bonis. Nam tunc temporis primogeniti erant Sacerdotes, ideoque habebant vestes pretiosas, & odor-



doriferas, quibus induti in magnis solemnitatibus offerebāt sacrificia: deinde circumdedit pelliculas manibus filij, ut sic crederetur a patre Esau: sancta enim mater, certificata de divino oraculo confidenter exponebat filium periculo, firmiter credens, quod Dominus dirigeret actum eius. Pergit ergo Iacob ad cubiculum Patris; offert pulmentum; dicit se esse primogenitum Esaū, & Deo omnia dirigente, consequitur paternam benedictionem, his verbis: *Det tibi Deus de Rose Cæli, & de pinguedine Terræ abundantiam frumenti, & vini; & serviant tibi Populi, & adorent te Tribus: esto Dominus fratrum tuorum, & incurventur ante te filij Matris tuæ.* Notandum est autem quod Isaac precatur filio bona temporalia: primò, in terræ nascentibus quorum multiplicatio sequitur ex influentia corporis Cælestis tamquam ex causa efficiente & ex bona dispositione Terræ, tamquam ex causa materiali; ideo ponitur in benedictione *Ros Cæli, & pinguedo terræ.* Secundò, precatur illi honorem, & excellentiam super fratres. Si vero ista bona inter se comparentur, melior est honor quam divitiæ; nam honor ponitur præmium Virtutis, non autem abundantia divitiarum: hinc *Arist. 5. Ethic.*, cum determinasset conditionem boni Regentis, dixit, quod pro præmio bonis viris honor, & gloria dari debet, tamquam nihil melius habeat Civitas ad illis tribuendum; qui autē ijs non est contentus, sed requirit alia, Tirannus est. Posuit tamen Isaac primo loco divitias, non propter earum dignitatem, sed propter earum necessitatem; vel propter Plebis opinionem, quæ magis attendit delectabilia sensus, quam spiritualia. Advertendum tamen est, quod supradicta in paterna benedictione contenta, non fuerunt impleta in propria persona Iacob: etenim quandiu vixit fuit minus potens ipso Esaū, sed in posteris suis: tempore enim David, & Salomonis, Idumæi ab Esaū descendentes, servierunt filijs Israel. Perfectius vero impleta fuerunt in Christo Domino, cui potestates non solum terre, sed etiam Cælestes sunt subditæ; data est enim illi omnis potestas in Cælo, & in Terra, ut patet *Matthæi ultimo*,  
Re-



## Reflexio 84.

**H**Is gestis regressus est Esaù de venatione, attulitque Patri cibum ut benedictionem consequeretur; & querente Patre quis esset, respondit se esse filium suum primogenitum Esaù. Tunc expavit Isaac stupore vehementi. Et causa huius timoris secundum aliquos Doctores fuit: quia auditis prædictis voluit retractare benedictionem datam ipsi Iacob; sed Deus fecit ei statim videre Gehennam apertam, sibi que paratam, si retractasset illam; qua propter aspiciens hoc tam terribile obiectum, expavit, & benedictionem datam confirmavit. Alij dicunt quod Isaac raptus fuit in Exstasi, & cognovit totum fuisse factum circa Iacob de voluntate, & ordinatione Divina; propterea admirans inexcrutabilia Iudicia Dei expavit, dixitque filio suo Esaù: *Venit Germanus tuus fraudolenter, & accepit benedictionem tuam.* Aliqui tamen legunt, *providenter*: nam dictio Hebraica hic posita est æquivoca, significans aliquando dolum, aliquando prudentiam; in Iacob autem magis prudentia presumenda est quam dolus, maxime quia Deus movebat illum ad ista facienda; ideoque eius operatio non potest fraudi imputari. Audiens autem Esaù verba patris, flevit eiulatu magno; deinde ait: *num unam tantum benedictionem habes pater? mihi quoque obsecro ut benedicas.* Credebat enim quod si pater aliquo modo sibi benediceret, irritaretur benedictio Iacob: tunc Isaac motus instantia filij ait: *In Pinguedine Terræ, & in Rore Cæli desuper, erit benedictio tua. Vives gladio, & fratri tuo servies: tempusque veniet cum excutias, & solvas iugum eius de cervicibus tuis.* Quod fuit impletum, cum Idumæi, qui Iudeis tributa solvebant, rebellaverunt sub Rege Ioram, nolentes amplius eaolvere, ut patet 4. Reg: 8. Non dedit tamen Isaac benedictionem Esaù pertinentem ad Ius Primogenituræ, ad quam spectabant repromissiones; hanc enim Esaù non invenit, licet cum lacrimis



mis eam quæsiuisset, ut patet ad *Hebræ: 12.* sed solum dixit pater: *In pinguedine terræ, & in Rore Cæli erit benedictio tua;* videlicet in abundantia terræ nascentium quæ ex istis duobus causatur.

## CAP. XXVIII. Reflexio 85.



Descripta linea populi Dei per duos stipites, Abraham, & Isaac; hîc describitur per tertium stipitem nempè Iacob, quem Isaac vocavit, confirmans priores benedictiones, & illas repetens ad augmentum gratiæ: præcepitque filio, ut pergeret in Mesopotamiam Syriæ, & acciperet Vxorem de filiabus Laban Auunculi sui. Vnde Sanctus Iuuenis, sciens quod obedire patri in licitis est principium totius boni, profectus est in Syriam. Cumque venisset ad quendam locum, & vellet in eo requiescere, tulit de lapidibus qui iacebant, & supponens capiti suo dormiuit in eodem loco. Erat autem iste locus, *mons Moria*, ubi fuerat oblatus pater suus in sacrificium Deo; unde reputabat locum sanctum, propter quod ibi declinavit ut in nocte vacaret orationi, sperans habere Divinam revelationem. Dicunt autem *Hebræi* quod Iacob sumpsit tres lapides ut in illis caput reclinaret; quâdo vero evigilavit facti sunt unus Lapis, nam infra dicitur: *Tulit Lapidem quem supposuerat.* Et dicunt, hoc fuisse in signum quod Dominus uniretur cum eo in itinere, ipsum dirigendo in omnibus. Sed de hoc facto non est bene assignata causa; etenim si Deus voluisset hoc significare, permisisset quod Iacob acciperet duos lapides, qui deinde unirentur ad significanda prædicta. Quapropter melius Doctores Catholici dicunt, quod hoc fuit in signum Vnitatis essentiæ, & Trinitatis Personarum in Deo, de cuius apparitione hîc agitur. Item, quia facta fuit hîc revelatio de futura tunc Filij Dei Incarnatione, prædicti tres lapides, eorumque unio significabat



tres naturas in Christo Domino in Vnitate suppositi; vel proprius tres substantias, videlicet Divinam, Corporis, & Animæ; Quia licet corpus, & anima sint duæ substantiæ realiter distinctæ; tamen non sunt duæ naturæ, sed ambæ sunt una natura humana, cum nullum istorum habeat perfectam rationem speciei, sed sint partes speciei, ut materia, & forma, ab utraque vero alteri unita, completur ratio speciei, quia in Compositis accipitur esse à materia, & forma simul unitis, ut ait *S. Thom. l. de Ente, & Essentia*: quapropter proprie loquendo debemus ponere in Christo Domino duas naturas, nempe Divinam, & humanam, & istarum duarum Naturarum tres substantias, nempe Divinam, Corpoream, & animam. Loquendo vero large, poterunt concedi tres naturæ, si convertamus Substantiam, & naturam.

### Reflexio 86.

**P**ost longam, & devotam orationem, dormivit Iacob in Monte Moria; viditque in somnis scalam stantem super terram cuius Cacumen tangebatur Cælum. Angelos quoque Dei ascendentes, & descendentes per eam, & Dominum innixum scalæ. Dicunt autem Hæbrei quod ista scala designabat Divinam gubernationem, quantum ad omnes creaturas. Deus erat super cacumen scalæ, quia tota rerum gubernatio ab ipso originarie incipit. Angeli ascende-  
bant, & descende-  
bant per illam, ad denotandum, quod sunt subministratores voluntatis Divinæ in rerum gubernatione. Tenebat pedem in terra, & caput illius tangebatur Cælum, ut significaretur universitas gubernabilium; quia ultra Cælum nihil est, nec infra terram; ideoque omnia creata comprehendebat. Varij gradus, denotabant diversos modos communicationis Bonitatis Divinæ in inferioribus. Sed melius dicunt Doctores Catholici, nempe quod scala ista ex multis gradibus significabat gradus Generationum per quas Christus Dominus, secundum carnem, descendit ab Abraham



ham usque ad Sanctissimam Virginem quæ illum peperit. Duo Latera sunt Iusti, & peccatores; tum quia ex utrisque descendit; tum quia pro utrisque natus, & passus est. Dominus Scalæ innixus signabat, quod ipsa Deitas uniretur carni descendenti à Patribus in Christo Domino. Quod pes scalæ terram tangeret, & Cacumen illius Cælum, designabat quod ipse Christus secundum humanitatem, convenit cum hominibus in natura humana, & per Deitatem cum Patre, & Spiritu Sancto, cum ipsa Deitas sit in tribus Divinis Personis, ut sic diceretur Mediator Dei, & hominum. Per Angelos descendentes signabatur, quod Misterium Incarnationis fuit revelatum primo Patriarchis; secundo, Prophætis clarius; tertio, Ministris Novi Testamenti clarissimè. Per Angelos ascendentes, intelligebatur Fides, & devotio Iustorum in quolibet statu presentata Deo per ipsos, ut patet *Tob: 12.* fuit enim facta hæc revelatio Incarnationis Filis Dei, quia hæc firmatæ fuerunt Benedictiones, & Promissiones de dilatazione seminis Iacob in Populos; ista vero Benedictio, & dilatio, intelligebatur precipue de Christo Domino, ut patet ad *Galat. 3.* ideoque posita fuit hæc figura de illius Incarnatione.

### Reflexio 87.

**F** Vigilans autem Iacob à somno ait: *Quā terribilis est locus iste; id est Venerabilis*, adeo ut non indifferenter sicut ad alia loca sit accedendū, sed cum magna reverentia, humilitate, ac tremore: hinc Deus per Prophetā dixit *Pauete ad Sanctuarium meum*. Nostris autem temporibus, longe est à multis timor iste: nam aliqui intra Ecclesiam, ubi specialiter colitur Deus, ita manent, ac si essent in Foro. Vacant enim vaniloquijs, motibus inkompositis, dissolutionibus, ut alia raceam. In isto scandalo delendo, multum debent vigilare Episcopi, & alij Ecclesiarum Præsules, ne ex eorum tolerantia, vel negligentia, ante Divinum Tribunal sint par-



participes tanti sceleris. Surgens autem Iacob mane, tulit Lapidem quem supposuerat capiti suo, & erexit in Titulum, videlicet, in signum Divinæ revelationis sibi ibidem factæ; & in signum foundationis Templi, & passionis Christi Domini. Deinde fudit Oleum desuper, quod emerat in Civitate vicina, in signum consecrationis; nam Res Sacræ unguntur Oleo. Vovit etiam Votum dicens: *Si fuerit Dominus mecum, & custodierit me in via, & dederit mihi panem ad vescendum; reversusque fuero prosperè ad domum Patris mei, erit mihi Dominus in Deum.* Sed dices: hoc videtur ridiculum, quia Votum non est de his quæ sunt de necessitate salutis, sed de his quæ sunt supererogationis. Dicendum, quod Iacob non vovit quod Dominus esset sibi Deus; nam etiam si nihil de postulatis illi dedisset, tamen erat Deus suus; quandoquidem Deus nomen absolutum est, significans Naturam; ideoque eo ipso quod Deus est, omnium etiam est Deus; sicuti, si aliquis homo est, eo ipso est homo comparatus ad quamcunque rem; & ideo Iacob erat obligatus de necessitate salutis, tenere Deum pro Deo suo. Sed vovit quod recognosceret Deum, exhibendo illi specialem cultum, quod erat supererogationis.

## CAP. XXIX. Reflexio 88.



Escrip̃ta posteritate Iacob in Divina revelatione, hìc describitur in actuali multiplicatione. Pervenit ergo post multos labores in Mesopotamiam, & Deo ipsum dirigente invenit domum Laban Aunculi sui, qui cū haberet duas filias unam nomine Liam, alteram Rachelem, hanc adamavit Iacob; quam ut haberet Vxorem, pollicitus est servire Laban septē annis. Et videbantur Iacob dies pauci præ amoris magnitudine. In comparatione namque ad rem tam amabilem, plu-




pluribus annis servisset, si fuisset requisitus. Transacto igitur servitio septem annorum, petivit ab Avunculo Rachelem. Tunc Labam fecit Convivium, & vespere introduxit Liam ad Iacob. Mane autem facto, cognoscens Iacob se fuisse à Labam deceptum, conquestus est cum illo; qui adducens pro falsa excusatione consuetudinem loci, coegit illum ad complendam hebdomadam cum Lia; qua transacta promisit ei tradere Rachelem, pro servitio tamen prestando septem annorum futurorum. Sed dices: quomodo Iacob non cognovit Liam ad vocem, vel tactum? Dicendum quod in hoc apparuit bonitas ipsius Iacob; nam nocte illa fortasse vacavit orationi, sicut de Tobia legitur: vel si eam tetigit, non quæsit in Lia blandicias meretricias in tactibus, & verbis, sed ea usus est in castitate maritali. Sciendum autem quod inter Liam, & Iacob non fuit pro tunc verum Matrimonium, ad quod requiritur necessariò consensus; Iacob vero consenserat solummodo in Rachelem. Non peccavit tamen Iacob si cognovit Liam, quia fuit per ignorantiam facti, quæ excusat à toto, adhibita sufficienti diligentia, quod & fecit; quia in talibus non requiritur magna perscrutatio; maxime quia Iacob, non habebat probabilem causam dubitandi de fraude Labam. Fuit vero matrimonium, quando Iacob acquievit instantiæ Labam de explenda hebdomada cum Lia; tunc enim in illam consensit, tamquam in Vxorem, & ex tunc fuit inter eos verum Matrimonium. Transacta igitur hebdomada, potitus est Iacob desideratis nuptiis cum Rachele; prætulitque amorem sequentis priori. Vicens autem Dominus quod despiceret Liam, dedit ei fecunditatem, Sorore sterili permanente. Erat autem Lia femina boni animi, unde patienter sustinebat Mariti contemptum. Deus ergo videns humilitatem illius, & afflictionem, dedit illi quatuor filios, quia quatuor ignominias patiebatur: nam videbatur quodammodo à Deo relictà, ab hominibus neglecta, à Sorore, licet minori, contempta; & à proprio Marito totaliter extranea.

CAP.



## CAP. XXX. Reflexio 89.



Ita de multiplicatione filiorum Lia, hic agitur de fructu Rachelis; quæ videns Sororem tam foecundam, invidit ei, & dixit Marito: *Dà mihi filios alioquin moriar*: imprudenter autem sic locuta fuit, stimulata magna cordis amaritudine. Omnes namque passionati generaliter petunt irrationabilia; quia sicut Ira, ita quælibet passio impedit animum ne possit cernere verum. Desiderio igitur prolis ardens, persuasit marito ut acciperet Balam servam suam, ex qua Iacob habuit duos filios. Ecce quanta Divinæ Sapientiæ in rebus apparet ordinatio. Rachel quæ ante ita sibi ipsi felix videbatur ob amorem mariti, ut sororem despiceret, per sterilitatem depressa est, ut se miseram recognosceret. Et Lia parere cessavit, ne superbia nimis inflaretur. Ista tamen, exemplo Rachelis sororis suæ, dedit marito Zelfam ancillam suam, ex qua Iacob genuit filios. Non potest tamen per hoc notari Iacob de incontinentia circa pluralitatem Vxorum; quia ipse non petivit nisi unam, nempe Rachelem: quod autem Lia fuerit sibi supposita, id accidit ipso ignorante; postea vero consensit, Deo sic disponente. Ancillas vero accepit ad preces Vxorum, & amore prolis, non autem perverso incentivo libidinis. Adde quod pluralitas coniugum, pro illo tempore licita erat, cum non esset prohibita; maxime quia hic suberat legitima causa, & debitus finis, videlicet multiplicandi Populum Dei. Sciebat enim Iacob, quod ipse solus erat, in quo remanebat Populus Dei; nam Esau non pertinebat ad repromissiones; & ideo si solummodo unam accepisset, Populus Dei non potuisset sufficienter multiplicari. Porro Iacob, potens erat ad reddendum debitum tot Vxoribus; tum quia semper in iuventute continenter se habuit, nullam unquam mulierem cognoscens; tum quia accepit uxores in ætate provecta; in qua



qua vires robustiores sunt, hinc *Arist.* 7. *Polit.* ait, quod mala est generatio in tenera ætate facta; nam filij carent viribus, & matri plerumque in partu mori contingit, propter parvitatē organorum; & quia parva ætas non potest sustinere acerbissimos partus dolores; ideo ait, quod conveniens ætas in masculo est circa trigesimum septimum annum; in foemina vero vigesimum secundum. Sed hinc quæri potest: cum licuerit aliquo tempore, & pro aliquo bono fine, eundem hominem plures uxores habere; numquid licuerit aliquando, eandem mulierem simul plures viros habere, si fuisset idem motivum? Dicendum negativè, & præcipua ratio inter multas ea est, quia Vir, & Vxor non solum ordinantur ad communicationem naturalem, quæ est propter gignere; sed etiam ad pacem, & communicationem æconomicam, ut patet ex *pr.* & 2. *Polit.* Pax autem æconomica consistit in bona habitudine Reſtoris ad subditos. Reſtor vero est solus Vir; subditi sunt, Mulier, Filij, & servi. Si ergo plures Viri eidem Mulieri essent, propter diversitatem animorum contraria præciperent, & sic turbatio in familia, & in tota Republica oriretur. E contrario vero, licet dentur plures Vxores uni viro, non per hoc dantur plures Reſtores; sed plures subiectæ. Datis autem pluribus Reſtoribus, dantur quidem plura principia agendi, quæ dissonant inter se, nam omnis potestas impatiens Consortis est; sed datis pluribus subditis non dantur diversa principia movendi; quia subditus in quantum subditus est, non habet in se principium sui motus, sed movetur ab extrinseco, nempe à Reſtore iubente.

### Reflexio 90.


**E**Xaudivit tandem Deus preces Rachelis, peperit enim filium quem Ioseph nominavit. Quo nato cum Iacob complevisset servitium suum quatuordecim annorum, petivit à Laban licentiam redeundi ad terram suam. Sed iste, avaritia motus, cernens quod mora Iacob erat sibi utilis, nite-



nitebatur illum apud se retinere, offerens mercedem, quasi vellet gratiam facere, cum tamen intenderet illum decipere. Tunc Iacob promisit remanere sub ista conditione, scilicet: quod separarentur Oves variæ, & sparso vellere, nempe maculosæ, & istæ ponerentur in manu filiorum Labam. Animalia vero unius coloris, ponerentur in manu Iacob; & fœtus si essent varij coloris, pertinerent ad Iacob. Tunc Labam libenter acceptavit conditionem, quia quod fœtus nigri nascerentur ex ovibus nigris, & albi ex albis, erat secundum consuetum cursum naturæ; sed quod ex puris albis, vel puris nigris variæ, & maculosæ nascerentur, erat contra naturæ cursum. Tulit ergo Iacob Virgas, & ex parte illas decorticavit, itaut aspiceretur aliquod viride, & aliquod candidum, & alias reliquit non decorticatas; posuitque Virgas varij coloris in canalibus quando erat conceptus primi temporis, idest in principio veris; tunc enim fœtus nascuntur meliores, & fortiores. Videntes igitur Fœmellæ, & Masculi, super ipsas ascendentes, colorem varium Virgarum in aqua, imprimebant fœtibus talem colorem, itaut varij nascerentur. Hanc enim virtutem habet imaginativa super materiam unde fiunt conceptus, quod isti concipiantur similes illis, qui aspiciuntur in extremo coitu: habet enim in illo puncto anima magnum vigorem, attrahitque in fervore libidinis formas visas, & illas imprimit fœtui. Hinc Isidorus dicit, quod in Thalamis Coniugum, pingendæ essent aliquæ pulchræ personæ, ut illis visis fœtus similis Imagini formetur. Et hoc prodest siue mulier videat illas imagines, siue de illis recogitet. Vnde S. Hieronymus ait, quod Quintilianus orator, defendit quandam Matronam, quæ filium nigrum ut æthiopem pepererat, quia reperta fuit in eius cubiculo similis pictura. Et Hippocrates pariter defendit aliam mulierem, quæ peperit filium utrique parenti totaliter dissimilem. Eademque arte utuntur Hispani in Gregibus equarum, ponentes pulchros equos tempore conceptus ante equas



## CAP. XXXI. Reflexio 91.



Vprædictum est de Iacob incipiente, hîc subiungitur de eodem proficiente. Maximus autem virtutis profectus consistit in tolerantia adversitatum; istas vero patienter semper Iacob sustinuit. Et primò passus est à Labam Socero suo. Dum enim pergeret in terram suam cum Vxoribus, & Liberis, & universa substantia quam dederat illi Deus, insecutus est illum Labam animo perverso nocendi; sed Deus imposuit illi, ut nec asperere ipsi Iacob loqueretur: quapropter, timore Dei sibi apparentis perterritus, & cernens quod Deus erat pro Iacob, quæsit confederari cum illo, non amore, sed avaritia incitante. Rachel autem in recessu à paterna domo, furata est Idola patris sui; non ad colendum, cum iam esset edocta à Marito de cultu unius veri Dei, sed ad retrahendum patrem suum ab idolatria. Alij dicunt quod Rachel viderat sæpe patrem suum, cum aliquod vellet incipere, responsa quærere ab illis Idolis: certum est autem quod talia non habent virtutem dandi responsa; tamen aliquando Deus hoc permittit, propter peccata hominum credentium talibus vanitatibus, quia merentur istis deceptionibus illudi. Igitur Rachel timens, ne pater suus quæreret ab idolis de via mariti, & totius familiæ suæ, & accepta responsione à Demone eos insequeretur, secum tulit prædicta Idola.

## CAP. XXXII. Reflexio 92.



Esripto qualiter Iacob sustinuit persecutionem Avunculi sui, hîc agitur de afflictione quam sustinuit pro Esaù fratre suo. Relicto igitur Labam abiit Iacob itinere quo ceperat, fueruntq; illi obviam Angeli Dei, ad ipsum



ipsum videlicet confortandum contra timorem fratris. Dicunt autem Doctores, quod isti erant Angeli Custodes Provinciae Chanaan: habet enim quaelibet Provincia Angelum magnum de ordine superiori, & sub illo sunt multi de ordine inferiori, ad Gentem illam custodiendam, ut patet *Daniel. x.* ubi ponitur unus Angelus Princeps Persarum, qui resistit Gabrieli viginti uno diebus. Advertendum est autem, quod licet Iacob fuisset confortatus à Deo in recessu de Mesopotamia, & nunc ab Angelis sibi occurrentibus; tamen ex naturali infirmitate, timuit de fratre suo, per cuius terram transire debebat. Licet enim Ratio sua esset certificata ex promissione Divina, & ista certificatio retineretur habitualiter in ratione; tamen non erat circa illam actualis consideratio; ideoque, terribili superveniente, pavere poterat: hinc *Arist. 7. Eth. ait*: quod in moralibus scire secundum habitum, non tollit malam operationem; cognitio enim moralis virtutis, non repugnat malæ operationi, quia actus, & habitus non repugnant simul esse, cum non sint eiusdem rationis. Misit ergo Iacob Nuntios ad Esau, qui redeuntes dixerunt: *Ecce properat tibi in occursum, cum quatuorcentum Viris.* Impius enim frater, tot homines secum ducebat, ut captivum duceret, si sibi expedire cognovisset, Iacob; si autem contrarium vidisset, saltem ostenderet potentiam suam. His auditis Iacob, orans ad Deum ait: *Erue me de manu fratris mei Esau, quia valde eum timeo.* Disposito namque omni eo, quod poterat per humanam industriam, convertit se ad Divinam clementiam, in qua sola principaliter confidebat,

### Reflexio 93.

**D**Um igitur Iacob, ut prædictum est, timeret: ecce Vir luctabatur cum eo. Iste autem fuit Angelus eius custos, qui cepit cum eo luctari, & permittebat se vinci, fingens se non posse contra Iacob prævalere, ut sic daretur ei audacia ad non timendum Esau. Luctabatur

H  
autem



autem cum eo usque mane; quia volebat illi dare magnam consolationem, & confidentiam, quam dare non poterat, si modico tempore luctatus fuisset. In fine autem Luctæ tetigit Angelus Nervum Femoris eius, & statim emarcuit. Pro quo advertendum est: quod licet Iacob non fuerit totaliter diffusus de Divino adiutorio, tamen parum confidit, & nimis timuit Esau; ideoque Angelus dedit illi hanc punitionem pro dicta diffidentia. Postea verò Iacob claudicabat, ut per hoc ostenderetur quomodo claudicasset in mente, confidendo parum de protectione Divina. Facto autem mane dixit Angelus ad Iacob *Dimitte me, iam enim ascendit Aurora*, quasi diceret: non debes me amplius tenere; nam tempus est ut cantem Dei laudes, cum alijs Angelis, secundum illud *Iob. 38. Vbi eras cum me laudarent Astra matutina, & iubilarent omnes filij Dei?* Tunc Iacob, optavit scire nomen Angeli secum luctantis: cui Angelus ait: *Cur quæris nomen meum quod est mirabile?* quasi diceret, non potes illud habere. Ratio autem ea est: quia Angeli non habent nomina fixa, & stabilia; sed sortiuntur diversa nomina, secundum legationes ad quas mittuntur. Præterea nomen imponitur ad notificandam rem, quando accidit, vel potest accidere aliqua dubitatio, vel æquivocatio: in Angelis autem est certissima cognitio, quia sunt individua substantialia, inter se numero, vel specie differentia. Quando igitur Angelis imponuntur nomina, non sunt secundum naturam, sed secundum officium; si autem *quod est mirabile*, non est de textu: tamen dic, quod cum imponantur Angelis nomina ex officijs, tunc nomen erit admirabile, quando officium erit admirabile;

iste autem Angelus luctator gerebat

magnum officium, quod ta-

men hic taceretur;

ideo dixit

suum nomen esse

admira-

bile.

CAP.



## CAP. XXXIII. Reflexio 94.



Es scripto timore quem habuit Iacob de adventu fratris; hic describitur illius prudentia: nihil enim omisit, quod posset ab humana ratione dictari. Et per hoc admonemur, quod in periculis constituti, agamus ad evadendum quantum prudentia dicat, dummodo peccati culpa non intercedat, alioquin esset tentare Deum ut miraculum faceret, quod quidem maximum peccatum est. Igitur Iacob, dispositis omnibus, perrexit primus ante alios, ut illis præberet exemplum: nam facillimum est alios exhortari verbis; sed perfectæ virtutis est firmare subditos exemplo. Videns vero Iacob Esau, statim pronus ad terram, septies illum adoravit, inclinando videlicet caput, & hæc est adoratio Dulix: frater enim suus erat Primogenitus, licet ordinatione Divina fuisset primogenitura ad se translata. Tunc Esau currens obviam fratri suo amplexatus est eum, & osculans fleuit. Ex Divina namque ordinatione mutata fuit eius indignatio in pietatem. Iacob vero licet amicabiliter à fratre receptus, tamen prudenter declinavit societatem illius; poterat enim timere, ne animus fratris mutaretur in contrarium; ideoque requisitus de societate, illam recusavit, allegando causam de filiis parvulis; quapropter Esau rediit in terram suam. Iacob autem pervenit in Socoth, & fixit tabernaculum extra Civitatem; non enim voluit habitare intra Urbem, quia Cives erant idolatræ; ne familia sua contaminaretur perversis moribus illorum; erectoque Altari, invocavit super illud Fortissimum Deum Israel; recognoscens videlicet Dei potentiam, qua illum conservaverat à Labam ipsum persequente, & ab Esau sibi occurrente.



## CAP. XXXIV. Reflexio 95.



Escriptis tribulationibus Iacob illatis à cognatis, hìc ponitur iniuria accepta ab extraneis. Morante igitur sancto Viro extra Civitatem, Dina eius filia egressa est de domo paterna, ut aspiceret mulieres regionis illius: erat enim in illa die generale festum, ad quod omnis Populus concurrebat, & agebant magna gaudia; quam cum vidisset Sichem Princeps terræ illius, captus amore, & fretus potentia, rapuit illam, vi opprimens Virginem. Quod cum audisset Iacob filius, dissimulando prudenter id quod emendare non poterat. Redeuntes autem filij eius domum, & audito quod acciderat, irati sunt valde: ad quos veniens Sichem precatus est illos, ut darent sibi Sororem in Vxorem. Cui fratres responderunt, se non posse hoc facere nisi omnes de Civitate circumciderentur: dixerunt autem hoc in dolo, quia non proponebant Circumcisionem, ut attrhaerent Sichimitas ad Dei cultum, sed ut illos occiderent. Non distulit adolescens Princeps, quin statim expleret quod petebatur. Et licet circumcidi dolorosum sit, maxime viris perfectis ætate, tamen quia diligebat, satis facile ei visum est. Amans enim vult magis mortem, quam pati amoris dispendia. Ingressus ergo Civitatem locutus est ad Populum suum dicens: *Viri isti pacifici sunt, & volunt habitare nobiscum: negotientur in terra, & exerceant eam, quæ spatiosa, & lata Cultoribus indiget; & substantia eorum, & pecora, & cuncta quæ possident nostra erunt, & habitantes simul, unum efficiemus Populum.* Incepit autem à Pace ut persuaderet Plebi; quia communis regula est, quod illa, quæ obviant statui politico, repelli debent: maximum autem bonum Civitatis est Pax, in qua quilibet rerum suarum Dominus est. Secundò, quia Plebs avara est, ibique incli-



inclinat ubi cognoscit lucrum; ideo proposuit varias utilitates, quæ sequebantur ex confederatione cum filiis Iacob, affirmans quod efficerent unum Populum. Hoc autem erat per unitatem Loci, & Legum; requiritur enim ad Populi unitatem identitas loci, ut ait *Arist. 3. Polit.*; deinde requiritur unitas Legum; nam dato quod duæ Civitates coniunctæ sint uno muro, tamen si non sit eis Legum identitas, non est unus Populus, quia moribus, & Legibus sunt dissimiles. Prædictis ergo utilitatibus auditis, stulta Plebs propositam conditionem acceptavit, omnesque Cives circumcisi sunt, hoc exigente insano Principe. Die autem tertio, in quo dolor est vehementissimus, adeout circumcisi se movere nequeant, acceptis filij Iacob gladijs, ingressi sunt Civitatem, & Populum cum Principe occiderunt; Parvulos quoque, & Vxores captivas duxerunt. Dicunt tamen Doctores, quod Iacob fecit liberare omnes captivos, & relinquere omnia animalia, quia iustè possideri non poterant, cum per bellum iniustum acquisita fuissent.

## CAP. XXXV. Reflexio 96.



Postquam Moyſes descripiſit ſtatum Iacob ut incipientis, & proficientis, hîc deſcribit illum ut perfecti; quæ quidem perfectio oſtenditur in eminentia contemplationis. Iuſſit igitur Deus illi ut aſcenderet Bethel, id eſt, ad Montem *Moria*: ibique ædificato Altari, redderet gratias de Divina protectione, in ſua peregrinatione, & multiplicatione in bonis ſpiritualibus, & temporalibus. Tunc Iacob præcepit, ut omnes de domo ſua abijcerent idola, quæ acceperant in præda Sichen: ad ſtatum namque perfectionis tendens, voluit omnem impuritatem à domo ſua remove, ut purius poſſet Deo vacare. Deinde Dominus dixit illi: *non vocaberis ultra Iacob*, quod interpretatur *Luctator*,

H 3

&amp; con-



& convenit proficienti in vita activa: *sed Israel erit nomen tuum*, quod interpretatur princeps cum Deo; vel directus ad Deum, & hoc competit Vitæ contemplativæ. Vocatur autem vita activa *lucta*, quia est quoddam genus exercitationis, & militiæ dum pugnatur contra concupiscentias. Cum vero ad altitudinem contemplativæ pervenitur, cessante tumultu rerum secularium, in Deum tota cura cordis iactatur: & felix anima cum sponso suo Christo dulciter requiescit. Sed quæri potest, quomodo dicitur hic, quod non vocaretur amplius Iacob, cum in hoc eodem capitulo pluries fuerit sic appellatus? Dicendum, quod sensus est, ut non vocaretur ultra Iacob tanquam nomine principali, sed non excluditur quin secundario sic diceretur: cuius ratio est, quia illa mutatio nominis facta fuit ad designandum transitum de vita activa, ad contemplativam. Vita autem activa est imperfectior, pro ut præcedit, & disponit ad contemplativam, quæ perfectior est tali actione, sicut finis respectu eius, quod est ad finem. In hoc autem transitu, homo non deserit simpliciter ipsam vitam activam, ne per cessationem ab activa insurgant de novo passionibus perturbantes rationem; ideo ad hoc designandum, postquam vocatus est Israel, rursus vocatus est Iacob; quasi diceret illi Deus: usque nunc fuisti principaliter actiuus, licet aliquantulum contemplativus: nunc autem eris principaliter contemplativus, licet aliquantulum actiuus.


### Reflexio 97.

**P**ergebat interea Iacob de Bethel, quæ est Ierusalem, ad terram, quæ ducit Ephratam. Hæc autem est Bethlehem, quæ Civitas vocata est Ephrata ab Vxore Caleb, & postea dicta fuit Bethlehem, hoc est domus panis, à fertilitate, quæ post penuriam ibi acciderat tempore Elimelech, ut habetur *in lib. Ruth.*, in qua terra, cum pareret Rachel mortua est; unde appellavit filium natum *Benoni*, id est *filius doloris*. Pater vero appellavit *Beniamin*, id est *filius dexteræ*, nempe



nempe *fortitudinis*; ut interpretatione nominis ostenderetur constantia Iacob in tanta anxietate positi, propter immaturam mortem dilectissimæ Vxoris suæ: per dexteram enim constantia, & fortitudo designatur. Sepelivit autem Iacob Vxorem suam in via; tum quia adhuc non pervenerat in Civitate; tum quia antiquitus Sepulchra erant extra urbem; erexitque titulum, idest memoriam in futuro super Sepulchrum. Ex quo patet, quod ab antiquo fuerunt Sancti Patres diligentissimi in construenda sepultura notabili, ut sic mortui in memoriam hominum remanerent, ad orandum pro ipsis, & ad ostendendam fidem futuræ Resurrectionis. Egressus autem Iacob inde, fixit Tabernaculum trans Turrim Gregis. Et est locus propè Bethlehem ubi Angelus, nato Christo Domino, apparuit Pastoribus vigilantibus super Gregem suum: modò vero est Ecclesia, quæ vocatur *Angelus ad Pastores*. Dum autem Sanctus Iacob hîc lugens moratur, ecce causa maioris afflictionis ei insurgit; dum impudens eius filius Rubem, ausus est dormire cum Bala: factum enormissimum, quod sancto Patri materia extremæ patientiæ, & perconsequens occasio magnæ virtutis exercendæ fuit.

## CAP. XXXVI. Reflexio 98.



Escrip̃ta multiplicatione Iacob, hîc describitur multiplicatio Esau, qui habuit tria nomina. Nam vocatur Esau nomine proprio. Secundo, dicitur *Seir*, idest hispidus, erat enim sicut pellis. Tertio, dicitur *Edon*, idest rubeus, ob ruborem Lenticulæ, quam ita ardentè concupivit; vel ob rubedinem corporis. Mortuo enim Isaac, tulit Esau Vxores suas, & filios, omnemque substantiam quam potuit habere in terra Chanaam; perrexitque



que ad habitandum in Monte Seir, qui est idem cum Idumæa. Vel potest dici, quod Idumæa est magna terra, in qua est quædam pars, quæ vocatur mons Seir; & sic dicitur quia est terra valde montuosa. De filiis autem Esau exierunt primò Duces, qui erant Principes alicuius Civitatis tantum. Videntes verò Idumæi se non bene regi per Duces, constituerunt sibi Reges. Vnus tamen actualiter regnabat in tota Idumæa. Porro isti Reges non erant per successionem, sed per electionem. Sed videntes, se non bene manere sub Regibus, reversi sunt ad Duces priores, & post istos rursus ad Reges. Sciendum autem quod ante Esau habitaverunt Idumæam aliqui Populi, qui vocantur in *Tex. Horrai*, & dicuntur filij Seir; iste tamen non fuit Esau, sed alius ante ipsum. Expulerunt vero filij Esau predictos Horraeos de terra sua, & dominati sunt ibidem. De Ducibus Descendentibus de Esau fuit Hiram ultimus Dux; & dicunt Hebræi, quod ab isto descendit Regnum Romanorum.

## CAP. XXXVII. Reflexio 99.

**D** Icto de statu Iacob in terra Chanaam, hîc agitur de illius descensu in terram Ægypti. Dicitur autem in *tex. Hæ sunt generationes eius*. Pro quo adverte, quod generatio accipitur dupliciter. Vno modo pro generatione successionis. Alio modo pro re ipsa genita; & neutro modo accipitur hîc; sed intelligitur pro novo eventu rei: sic dicimus: *Nescis quid superventura pariat dies*. Quia ergo accidit Iacob tribulatio de venditione Ioseph; & post hanc multas alias misérias sustinuit; ideo istæ dicuntur eius generationes. Pascebat interea Ioseph Gregem, eratque cum filiis Balæ, & Zelphæ: nam filij Liæ despiciebant illos, reputantes eos quasi servos; & ideo sanctus Puer, qui erat filius Vxoris principalis, faciebat eis societatem ad ipsum con-

sola-



solationem. Deinde procedente tempore accusavit fratres apud Patrem crimine pessimo: & hoc erat odium fraternum, quod in translatione nostra meritò vocatur crimen pessimum; quia sicut fraterna charitas optimum quid dicitur, ita è contrario inimicitia fraterna, pessimum crimen nominatur: unde in Hebræo habetur: *Et retulit Patri rixam eorum pessimam.* Et hoc concordat cum eo quod iam dictum est, nempe quod filij Liæ despiciebant filios ancillarum. Sanctus autem Iuvenis increpavit multoties illorum superbiam; sed quia erat minor ætate, eius monitio non fuit recepta; unde tunc Patri denunciavit qui poterat remedium adhibere. Diligebat verò Iacob Ioseph, eo quod in senectute genuisset eum. Virtus enim generativa in senectute debilior est, ideoque solent in illa generari partus defectuosi, & imperfecti. Ioseph autem è contrario erat gratiosior omnibus fratribus; tum ratione corporis; tum animi: quapropter videbatur hoc procedere ex speciali dono Dei, ideoque Patri magis omnibus amabilis erat.

### Reflexio 100.

**V**Idit interea Ioseph somnium de Sole, Luna, & Stellis, & de Manipulis Spicarum. Omnia autem ista pertinebant ad unicum significationem, suæ videlicet exaltationis super fratres; & hoc pura mente narravit fratribus, & etiam Patri: quo audito increpavit eum pater suus, non quod invideret futuræ prosperitati prædilecti filij, sed volebat ut ista taceret, ne fratres sui magis acuerent odia. Prius tamen Pater rem sibi relata tacitus considerabat; licet enim loquendo coram filiis videretur parvipendere somnium; tamen intra se cogitabat, quod vere esset presagium futuræ dominationis. Per Solem namque figurabatur Pater, cum Sol sit principium caloris, & vitæ, ideoque 2. *de Anima* dicitur *pater hominum, Deorumque*. Per Lunam vero, quæ habet dominium super humida, denotabatur Mater; nam



nam sicut Luna existens corpus opacum recipit lumen à Sole; ita Mater in generatione, est principium passivum, & receptivum. Similiter per Stellas intelligebantur filij: nam sicut Stellæ recipiunt lumen à Sole, sic filij habent esse à parentibus. Igitur filij Iacob odio, & invidia inflammati, cogitaverunt magis fratrem occidere, quam eum habere dominatorem. Quod facinus perpetrassent, nisi Iudas id prohibuisset. Miserunt ergo innocentem Iuvenem in Cisternam; & pretereuntibus Madianitis, qui alio nomine vocantur Ismaelitæ, vendiderunt illum. Sed postea eum adoraverunt, quia vendiderunt; nihil enim valet, nihil potest humana temeritas contra consilium Divinitatis.

### CAP. XXXVIII. Reflexio 101.



Vpra posuit Moyfes partem principalem pertinentem ad historiam Ioseph, hic subiungit partem incidentalem, in qua agitur de Iuda, uxorem ducente. Divertens enim ad Virum Odollamitem, accepit Mulierem Chananæam nomine Sue, ex qua tres filios suscepit, scilicet Her, & Onam, & Sela. Deditque filio suo primogenito Her Vxorem nomine Thamar. Fuit autem Her nequam in conspectu Domini; fundebat enim semen in terram, ne Vxor sua conciperet, timens ne amitteret concipiendo pulchritudinem; unde Deus dedit illi aliquam terribilem plagam, itaut liquidò constaret, quod non naturaliter, sed à Deo fuisset de terra sublatus in pœnam sui sceleris, & tam inauditæ libidinis. Tunc Iudas tradidit Thamar alteri filio suo Onam: qui ad Vxorem accedens, semen fundebat in terrâ; exercebatque rem tam detestabilem, ne filios nomine fratris sui prædefuncti gigneret. Magna vero hæc invidia fuit, nempe sibi nocere, ut alteri non prodesset. Non enim erat consuetudo illius temporis, ut frater minor gigneret



ret omnes filios nomine fratris defuncti, sed solum ut vocaret primogenitum nomine fratris præmortui, reliqui vero pertinebant ad familiam ipsius generantis. Talis ergo frater fuit sicut primus percussus à Domino: quo mortuo dixit Iudas Thamar, quod remaneret vidua in domo patris sui, donec cresceret Sela tertius eius filius; hunc enim Thamar accipere cogebatur per legem illius temporis, nec poterat ullo modo nubere cui voluisset, nisi omnibus fratribus primi sui Mariti defunctis. Et ex hoc patet quod aliqua de Legalibus, & Iudicialibus, datis in lege Moyfis, observabantur etiam ante illam; sed quia non habebant vim obligandi, tamquam Dei leges, sed tamquam Consuetudines, fuerunt in lege confirmata.

### Reflexio 102.

**E**Volutis tandem multis annis, cognovit Thamar quod Iudas nolebat sibi dare in Maritum Sela filium suum; timebat enim ne illi accideret mors, sicut accidit duobus alijs filiis: quapropter depositis Viduitatis vestibus, assumpsit Theristrum, quod erat vestis linea qua utebantur Mulieres in ætate; & ut crederetur meretrix, sedit in Bivio: in tali enim loco solebant meretrices manere, ut ab omnibus undequaque transeuntibus viderentur. Non movebatur tamen Thamar ad ista facienda incentivo libidinis, sed amore prolis habendæ; maxime quia non habuerat illam ex duobus alijs filiis Iudæ. Actus vero illius non iustificatur, quia secundum se malus erat. Pergens autem Iudas ad Oves tendendas, & videns Thamar, quæ operuerat vultum suum ne agnosceretur, putavit esse meretricem; quilibet enim ex habitu iudicatur donec contrarium probetur; unde Idiotæ bene vestiti, sapientes esse iudicantur: hinc vulgo dicitur:

*Vir bene vestitus pro vestibus esse Peritus*

*Creditur à mille quamvis Idiota sit ille.*


Requisivit ergo Iudas Thamar de copula, quæ statim assensit;

sti-



stipulata tamen prius mercede, & accepto Anulo, Armilla, & baculo Iudæ pro pignore. Secuta igitur copula statim concepit Thamar; assumptisque viduitatis vestibus, rediit in domum suam. Intumesciente autem utero eius, nuntiatum est Iudæ, quod Thamar fornicata esset, qui statim protulit sententiam, ut combureretur. Erat enim tunc Iudex in terra illa, vel Lex illius temporis dabat ei potestatem vindicandi iniuriam sibi illatam. Per hoc autem dicunt aliqui Doctores, quod Thamar erat filia Sacerdotis Melchisedech; nam filia Sacerdotis fornicans, debebat tunc comburi, sicut postea per Legem sancitum fuit *Levit. 21*. Igitur Thamar cum duceretur ad mortem, misit Anulum, Armillam, & Baculum ad Iudam, asserens se concepisse de viro cuiuserant prædicta. Tunc Iudas cognoscens mulieris innocentiam, statim revocavit sententiam. Sed videtur quod fuerit iniustus dum eam minime punivit. Dicendum, quod punitio erat propter iniuriam Iudæ, & filij sui Selæ quibus inferebatur ignominia; ipsis autem non conquerentibus, nulla punitio infligenda erat ipsi Thamar. Iudas ergo quatenus erat privata persona, poterat iuri suo renunciare, & remittere iniuriam; secus autem si fuisset solus Iudex; nam remittendo, peccasset contra Iustitiam distributivam, & per consequens fuisset iniurius Reipublicæ.

## CAP. XXXIX. Reflexio 103.



Descripta parte incidentalī, hīc Legislator revertitur ad historiam Ioseph, describendo illius promotionem. Igitur Madianitæ pervenientes in Ægyptum, vendiderunt Ioseph Putiphar Eunuchō Pharaonis. Invenit autem Ioseph gratiam coram Domino suo, & ministrabat ei, à quo præpositus omnibus, gubernabat domū sibi creditam, & universa quæ sibi tradita fuerant: nam Putiphar



tiphar optime noverat, Deum esse cum illo. Videbat enim quod tanta prosperitas, & bonus eventus inerat rebus, quas disponebat Ioseph, ut nulla prorsus humana industria hoc haberi potuisset; unde necessario arguebat, aliquam causam superiorem dirigentem esse, nempe Deum. Tales autem eventus vocant philosophi bonam fortunam, ut patet per *Arist. lib. de bona fortuna*; quæ est quidam instinctus in mentibus humanis à causa superiore prospere dirigente absque aliqua ratione, vel iudicio nostri Intellectus: ut quando cor dat nobis, ut faciamus aliquid, & nescimus rationem, quare magis illud, quam oppositum eligamus, & postea feliciter nobis evenit, tunc bona fortuna vocatur. Hæc autem est aliqua directio à causa non errante, nempe Deo. Igitur omnia negocia quæ Ioseph tractabat, prosperum habebant eventum; ideoque Putiphar fecit illum præpositum omnibus, & gubernabat creditam sibi domum. Nec quicquam aliud noverat, nisi panem quo vesceretur. Licet enim ex administratione generali, posset multa sibi accipere Domino ignorante, tamen nihil volebat nisi cibum ad vitam sustentandam,


### Reflexio 104.

**D**Vm Ioseph fideliter se gerit erga Dominum suum, ecce Mulier Putipharis capta amore illius, impudenter insurgit contra pudicitiam sancti famuli. Qui nullo modo acquiescens nefariæ petitioni, correxit illam dicens, quod cum Dominus suus tradidisset ei omnia bona domus, non poterat peccare in illum; quanto enim maior fuit Domini confidentia, tanto maior fuisset eius ingratitudo, si talia pro talibus, benefactori suo retribuisset. Sed iniqua mulier, non ratione commota, sed effrenata libidine agitata, per singulos dies molesta erat pudicissimo adolescenti, qui immobilis in sancto proposito semper remansit. Quod autem in prima acie, verbis amatorijs restiterit, mirabile quidem, & valde virile fuit; sed quotidianis iaculis impu-



impudicæ mulieris instigantis, Iuvenem elegantis formæ non succumbere, divinissimum fuisse fateamur. Accidit autem quadam die ut intraret Ioseph domum, quando impudens domina apprehensa Lacina vestimenti eius, tentavit inducere ad peccatum Iuvenem innocentem. At ille, relicto in manu adulteræ pallio, aufugit: sciens quod libido sola fugam superatur. Tunc impia Mulier pergens ad Virum suum, non erubuit imponere peccatum suum adolescenti innocentissimo, qui statim missus fuit in carcerem. Deus autem dedit ei gratiam in conspectu principis carceris, qui amovit à Ioseph ferramenta quibus tenebatur, & meliorem cibum apposuit, relinquens in sua potestate omnes, qui in custodia tenebantur. Divina namque consolatio statim adfuit, ne nimia tristitia innocens Puer absorberetur.

## CAP. XXXX. Reflexio 105.



Descripta consolatione Ioseph in poenæ mitigatione, hic ponitur Divina alia consolatio in mentis illustratione, per cognitionem occultorum. Manente ergo illo in Carcere, commiserunt delictum duo Eunuchi Pharaonis, ideoque missi sunt in carcerem; videruntque ambo, & simul somnia. Hoc autem Divina dispositione factum est, ut per eorum interpretationem ostenderetur sapientia Ioseph, & sic exaltaretur. Viso igitur somnio, contristati sunt valde prædicti Eunuchi: ad quos cum introisset Ioseph, vidit illos tristiores solito. Cum enim affectiones nostræ causentur à rebus exterioribus, necesse est, mutatis illis, mutari nostras affectiones; quia ergo somnia videbantur tristia, facies etiam eorum ex expectatione mali futuri, tristiores redditæ fuerunt. Igitur Ioseph interrogavit de causa. Qui responderunt, se tristes esse, quia non poterant ab aliquo habere interpretationem. Egyptij



Egyptij enim instabant augurijs, & divinationibus. Tunc Ioseph illos correxit de tali superstitione, asserens quod somniorum interpretatio, pertinet ad Deum; quia in nobis non sunt viæ naturaliter cognoscitivæ supernaturalis veritatis in speciali. Deinde iussit, ut ea sibi narrarent: talis enim notitia pertinet ad spiritum prophetiæ, quæ est gratia gratis data; sciebat autem Ioseph, se consecuturum à Deo tale donum. Narratis igitur somnijs ab ægyptijs, interpretatus est illa Ioseph, & evenit sicut prædixerat; nam post tres dies Pistor suspensus fuit in patibulo, & Pincerna restitutus ad suum officium exercendum coram Rege. Sed succedentibus prosperis, præpositus Pincernarum oblitus est Interpretis sui. Prosperitas enim, facit homines oblivisci amicorum. Nam ille qui in prosperitate est, intendit sibi soli, semperque augmentum fortunæ pro se solo quærit. Adversitas autem nos cautos reddit, & vigilantes; & ideo magis cognoscimus veros amicos in adversitate, quam in prosperitate.

## CAP. XXXXI. Reflexio 106.



Descripta incarceratione Ioseph, hinc agitur de illius liberatione. Igitur Pharaon post duos annos, a restitutione Magistri pincernarum, vidit somnium; & statim vocati fuerunt Magi, & Incantatores Ægyptiorum; nec inventus fuit qui illa interpretaretur. Licet enim darent multas responsiones, tamen erant incongruæ, nec quietabant animum Regis. Tunc Pincerna narravit Pharaoni interpretationem sibi datam à Ioseph de somnio suo, & quomodo fuisset secutus effectus: ut propter statim ad Regis Imperium Ioseph eductus est de carcere, cui Pharaon narravit somnia sua; responditque sanctus Puer: Somnium Regis unum esse, quantum ad significationem, licet esse duplex quantum ad imaginariam visionem;



nem; asserens quod Deus per hoc ostenderat sibi illa, quæ erat factururus. Providentia namque Divina, quodam speciali modo respicit Principes, quia præsumt Reipublicæ; ideoque aliqua futura Divinitus eis panduntur præ cæteris. Deinde Ioseph dedit interpretationem dicens: Quod septem Boves pulchre, & septem spicæ plenæ, denotabant septē annos ubertatis. Septē vero Boves tenues, & macilentæ, quæ ascende-  
 debant post eas, & septē Spicæ tenues, & vento urente percussæ, septem annos vêturæ famis significabant. Potest autem de prædictis assignari ratio, quare per hæc intelligeretur fertilitas, & sterilitas. Etenim duplex est causa fertilitatis, scilicet optima terræ cultura, quæ designatur per Vaccas pingues; istæ namque fortiter terram colunt; & bona seminatio, quæ denotatur per spicas plenas. Etenim quando grana multa sunt, nascuntur etiam fruges in abundantia. E contrario autem duæ sunt causæ sterilitatis; nempe mala cultura agrorum, quæ innuitur per Vaccas macilentas, nam istæ parum colunt terram; & per Spicas vento percussas, consumente humidū naturale granorum, signatur mala seminatio, quia in talibus granis nulla, vel parva vis est. Rex igitur videns in Ioseph esse sapientiam Divinam, constituit illum Principem domus suæ; eique dedit proprium Anulum, & vestivit illum Stola Byssina, & Torquem auream collo suo circumposuit, & super Currum suum secundum ascendere illum fecit, ut à toto Populo cognosceretur tamquam Præpositus universæ terræ Ægypti, clamante Præcone. In hebræo autem,

habetur: *Et clamaverunt coram eo*

*Abrec. Quæ dictio signat idem quod Pater tener.*

Et est sensus: quod Ioseph ratione sapientiæ suæ erat Pater aliorum, licet esset tener

*prate.*

CAP.





Ostquam descripsit Moyſes deſcenſum in  
Ægyptum reſpectu Joſeph, hîc deſcribit de-  
ſcenſum in eandem terram quantum ad fra-  
tres. Interea fames advenerat, nec ſolum  
erat in Ægypto, ſed etiam in terra Chanaam;  
unde Iacob miſit filios in Ægyptum ad eſcas emendas. Ve-  
nientes ergo fratres Joſeph in Ægyptum, adoraverunt eum.  
Qui illos cognoscens locutus eſt ad eos verbis duris, & cauſa  
fuit, quia non videns Benjamin fratrem ſuum uterinum, ti-  
muit ne machinati fuiſſent contra eum, ſicut fuerant contra  
ſeipſum; ideoque, ut ſcire poſſet veritatem, aſpere locutus  
eſt. Et primo interrogavit de patre ſuo; poſtea de fratre,  
aliſque circumſtantijs. Poſt reſponſionem vero tradidit illos  
in vinculis tribus diebus. Quibus elapſis dimiſit illos cum  
frumento, & pecunia poſita in Saccis, retinens tamen Simeo-  
nem in vinculis, quem ligavit illis præſentibus. Cauſa  
fuit, quia iſte proiecit in foveam Joſeph; unde cum plus  
cæteris peccaverit, plus etiam debuit puniri. In abſentia  
tamen illorum, iuſſit eum à vinculis abſolvi, ut dicunt Do-  
ctores, & de cibo convenienti provideri in loco tamen clau-  
ſo, ut ſic in Juſtitia, ſervaretur Pietas fraterna. Sed hîc quæri  
poſteſt: quomodo Joſeph qui erat tam dulcis, & manſuetus,  
afflixit tam diu fratres, antequam ſe illis manifeſtaret, cum  
ſtatim poſſet iniuriam ſibi factam remittere? Dicendum  
quod licet perſona ſingularis poſſit hoc facere, tamen ille qui  
eſt Superior, & Iudex, cum ſit Cuſtos Juſtitia, nequit hoc  
facere; maxime quando iniuria ſibi facta redundat in alterum,  
ut hîc: nam offenſa facta Joſeph redundavit in patrem ſuum,  
qui inſolabiliter afflictuſ erat propter ſuam venditionem.  
Ex ordinatione autem Divina Joſeph factus erat Superior, &  
Iudex fratrum ſuorum, ut patet per Viſiones ſupra poſitas; &  
ideo non debuit illos dimittere ſine punitione, ne dedecus  
culpæ tranſiret ſine decore Juſtitia: tamen in punitione plus  
fuit de miſericordia, quam de rigore. I CAP.



## CAP. XXXIII. Reflexio 108.



Esripto descensu fratrum Ioseph in Ægyptum, hic describitur descensus Benjamin. Fratres igitur predicti redierunt in terram Chanaā, ferentes cibaria ad patrem, quibus consumptis, iussit Iacob ut redirent ad novas escas emendas. At illi narrantes omnia quæ acciderant eis, dixerunt non posse nova alimenta in Ægypto recipere, nisi ducerent secum Benjamin: qua propter Iacob consensit, & generosè remisit duplicem pecuniam, & insuper munera. Peruenientes igitur filij eius in Ægyptum, steterunt coram Ioseph, quibus in meridie dedit etiam prandium. Tali namque hora revertebatur, occupatus semper negocijs Regni. Summi namque honores magnis alligantur oneribus: hinc pusillanimes non sustinent magnos status, quia onus subire formidant, & per hoc illos recusant. Et in hoc advertendum est, quod aliqui circa honorum fugam valdè falluntur. Etenim non eos fugiunt, ut dominari fugiant; sed solum ut onera Dignitatum non sustineant. Tales autem non virtuosus, sed miseri sunt, carentes viribus animi. Qua propter alij virtuosius suscipiunt honores quam illi refugiant. Solus enim virtuosè fugit honores, qui cum onera non respuat, solam laudem, & mundanam ambitionem, fastumque secularem respuit; non condemnans Dignitates, & potestates: omnia enim ista sunt à Deo; sola voluntas prava, & abusus potestatis, quæ in malis reperitur, est detestanda, & per consequens fugienda. Rediens ergo Ioseph prædicta hora, comedit cum fratribus, fecitque quod maior pars perveniret ad Benjamin; ut nimirum experiretur, an illi inviderent, sicut sibi ipsi inviderant. Comederunt igitur biberuntque, & inebriati sunt, ut dicitur in littera. Accipitur tamen inebriatio, non pro carentia actus rationis, sed pro sufficienti potu inductivo letitiæ, eo modo loquendi, quo dicitur *Cant. 5. Comedite & bibite, & inebriamini charissimi*: talis autem Ebrietas non est vitiosa.

CAP.



## CAP. XXXXIV. Reflexio 109.



Esripto descensu Benjamin, hîc agitur de tribulatione propter illum orta. Voluit enim Ioseph sumere experimentum de fratribus, an succurrerent Benjamin in periculo posito; ideo fecit ponere Scyphum, & pecuniam in eius sacco, & omnes abire versus terram

Chanaam, mittens deinde dispensatorem domus ut illos apprehenderet, & ad se reduceret, tanquam commisissent furtû. Scrutans igitur dispensator saccos, incipiens à maiore usque ad minorem, nam maior malitia præsumitur in maioribus quam in minoribus, invenit scyphum in sacco Benjamin. Tunc omnes, in signum magnæ tristitiæ, sciderunt vestimenta sua; oneratisque rursus asinis reversi sunt ad Ioseph. Primus autem Iudas, deinde alij ante Ioseph simul in terra corruerunt ad petendam suppliciter misericordiam. Ad magnanimos namque viros pertinet supplicantibus ignoscere. Tunc Ioseph locutus est durè dicens: *Cur sic agere voluistis? an ignoratis quod non sit similis mei in augurandi scientia?* Adverte autem quod Ioseph, cum esset Sanctus, nullo modo intendebat augurijs, cum hoc sit superstitiosum; sed protulit ista verba, ut fingeret se agere secundum morem Egyptiorum ad regendam ad tempus veritatem. Vel dic quod fuit mendacium officiosum, eratque solum peccatum veniale, à quo non est necesse excusare antiquos Patres.

## CAP. XXXXV. Reflexio 110.



Osita tribulatione filiorum Iacob, hîc agitur de eorum consolatione in manifestatione Ioseph. Pietas namque fraterna non permittebat eum amplius retinere signa interioris, & naturalis affectus. Igitur eleuata voce cum fletu dixit: *Ego sum Ioseph frater*



frater vester, quem vendidistis in Ægyptum: nolite pavere, pro salute enim vestra misit me Dominus ante vos in Ægyptum. Solius namq; Bonitatis Divinæ, & Sapientiæ proprium est, ut ipsis malis bene utatur, convertendo ea ad rectitudinem alicuius boni effectus. Deus namque ita bonus est, quod non permetteret mala fieri, nisi inde eliceret maiora bona. Tunc divulgatum est in Aula Regis, quod venissent fratres Ioseph; unde Pharaon iussit quod veniret etiam eorum Pater; quapropter Ioseph statim misit fratres ad nunciandum omnia patri suo: qui pervenientes ad paternam domum dixerunt Iacob: *Ioseph filius tuus vivit, & ipse dominatur in tota terra Ægypti.* Quo audito Iacob, quasi de gravi somno evigilans, non credebat eis. Mæstissimus enim Pater, tantum prius doluit, quod nunc tantum gaudium sustinere non potuit; quia ut ait *Arist. 2. de Anima. Excellens sensibile corrumpit sensum, & si aliquando illum non corrumpit, tamen stupefacit.* Hic igitur præsentato tanto gaudio potentiæ, quæ iamdudum miserijs, & angustijs assueta fuerat, bonum tam magnum, subito adveniens, sustinere nequivit.

## CAP. XXXXVI. Reflexio III.



Descripto descensu filiorum Israel in Ægyptum, consequenter ponitur descensus Patris. Certificatus namque de voluntate Divina, se illuc transtulit cum tota familia. Prius tamen venit ad puteum iuramenti, nempe in Bersabeæ; quia Abraham avus suus invocaverat ibi Dominum, & similiter Isaac eius Pater; & ideo quia locus erat devotus, & Sacer, illuc prius pergere voluit ad deprecandum Deum pro suo itinere: nam ut ait *Boetius 3. de cons. Prosa 9. Semper invocandus est rerum omnium Pater, quo prætermisso nullum rite fundatur exordium.* Et *Plato in Timeo* dixit: *In minimis quoque rebus Divi-*



*Divinum esse implorandum presidium.* Iacob igitur, matris ibidem victimis, audivit Deum dicentem sibi: *Iacob noli timere: descende in Ægyptum. Ego inde adducam te revertentem: Ioseph quoque ponet manus suas super oculos tuos.* Erat enim apud antiquos consuetudo, quod filius magis prædictus, patri morienti clauderet oculos. Licet autem Iacob valde desideraret videre filium suum Ioseph, tamen formidabat descendere in Ægyptum: tum quia erat senex, & debilis; tum quia timebat in aliena terra sepeliri extra sepulchra patrum suorum. Est autem valde naturale terminare vitam in propria Patria: hinc quidam cecinit:

*Ossa quieverunt manibus tumultata suorum:*

Et ideo Deus affecuravit illum de utroque: nam semper direxit Iacob dum vixit in Ægypto, conservans cum protectione speciali; & mortuo, fecit reportari corpus suum in terram Chanaan ad sepeliendum in spelunca duplici, ubi Patres sui sepulti fuerant.

## CAP. XXXXVII. Reflexio 112.



Esripto descensu Iacob in Ægyptum, hinc describitur eius incolatus. Igitur ingressus Regnum, stetit cum tota familia in terra Gessen. Ioseph vero nuntiavit hoc Pharaoni: desiderabat enim quod illa terra assignaretur fratribus suis, & ideo prudentissimè hoc Regi nuntiavit, ac si ei insinuaret: Ex quo Vxores, & familie omniaque bona illorum sunt ibi, bonum etiam esset ut ibidem remanerent. Deinde introduxit fratres ad Regem, quos Rex interrogavit de illorum exercitio. Qui responderunt, se esse Pastores ovium. Instruxerat enim illos Ioseph, ut sic responderent, ne Pharaon faceret illos milites, vel poneret in Aula. Deinde dixerunt, se venisse ad peregrinandum in terra Ægypti, instructi etiam in hoc à Ioseph, ne viderentur

1 3

futuri



futuri onerosi Regi; ideoque protestati sunt, se optare solummodo mansionem per modicum tempus in terra sua, videlicet, usquequò transiret sterilitas. Post fratres introduxit Ioseph Patrem suum, qui ingressus ad Regem benedixit ei; quæ benedictio fuit imprecatio bonorum temporalium, & conservationis Regni sui. Interrogatus autem à Rege de sua ætate, respondit: quod dies peregrinationis suæ centum, & triginta annorum erant, parvi, & mali. Quod quidem intelligendum est, non in se; sed propter malum poenalitatis, quod sustinuit in vita sua: Primo, ex persecutione fratris sui Esaù. Secundo, ex longa servitute apud Labam. Tertio, ex violatione filia suæ Dinæ. Quarto, ex transgressione Ruben primogeniti sui, dum Paternum Thorum fœdavit. Quinto, ex venditione Ioseph, de qua fuit inconsolabiliter afflictus. Vocavit autem dies suos peregrinationem; quia Iusti vivunt in mundo tamquam advenæ, & peregrini, ponentes pro termino itineris sui Patriam Cœlestem.

### Reflexio 113.

**I**Nterea fames oppresserat terram, unde Ioseph vendidit frumenta iam in horreis congregata omnemque pecuniam in Erarium Regis intulit. O Vir semper laudandus! In tanta namque pecuniarum copia, manus semper rectas custodivit, & cor mundum ab omni avaritia. Cum autem pecunia defecisset Ægyptijs, venerunt supplices ad Ioseph, petentes de novo alimenta: quibus imperavit, ut adducerent pecora ad illa commutanda cum frumento. Licet enim essent subditi in fame positi, non tamen tenebatur Rex dare illis bladas gratis, quandiu haberent bona, ex quibus alimenta emere possent. Consumptis tandem bladis receptis, venerunt iterum ad Ioseph, exhibentes terram quam possidebant, pro prætio alimentorum. Tunc Ioseph dedit eis fruges; emitque omnem terram Ægypti, subijciens eam Pharaoni, præter terram Sacerdotum, qui non fuerunt com-



compulsi vendere possessiones suas: nam Pharaon dabat illis sufficientem victum, tanquam personis ad Sacra deputatis, ut sic possent liberius intendere studio Scientiarum speculativarum, & maxime Astronomiæ; nec cogerentur diverti ad turpes negotiationes. Hoc exemplo debent Principes nostri sæculi magis pietate inflammari erga ministros veri Dei, eisque præbere omnia illa quæ tum pro Sacerdotibus, tum pro Ecclesiæ decore necessaria sunt; ne Rex gentilis, qui nullam de vero Deo cognitionem habebat, arguat eos ante Tribunal Christi, de inobservantia Religionis, & defectu pietatis circa Divinum Cultum. Si enim Sacerdotes non habeant unde sustententur, secundum quod requirit eorum dignitas, cessat virtus, vilescit apud plebem eorum semper venerabile ministerium; adeo ut nulla differentia sit inter ministros Dei, & populares.

### Reflexio 114.

**M**Anente Iacob in terra Gessem, sibi assignata liberalitate Regis, cognovit tandem, post spatium decem, & septem annorum quibus ibidem mansit, quod appropinquaret dies mortis suæ, hoc Deo sibi revelante: ideoque vocavit filium suum Ioseph, dixitque ad eum: *Pone manum tuam sub Femore meo, ut non sepelias me in Aegypto.* Optabat enim Sanctus Vir sepeliri in terra promissionis, ubi fuerant sepulti Abraham, & Isaac progenitores sui: principaliter tamen optabat hoc propter Redemptionem humani generis, tunc ibi fiendam. Videbat enim in Spiritu Sancto, quod Christus Dominus debebat conversari cum hominibus in illa terra, ibique mori, & resurgere, & cum eo multa Corpora Sanctorum; ideoque iussit filio, ut sepeliret corpus suum in terra Chanaam, ut cum Christo Domino suo resurgeret. Mittere autem manum sub femore Iacob, erat iurare per Christum Dominum, tunc nasciturum de semine illius. Iurante autem Ioseph, adoravit Israel Deum, con-



versus ad Lectuli caput: reddendo, videlicet, gratias de tanto beneficio à Deo sibi præstito, sicut illi promiserat dum descendit in Ægyptum. Causa vero conversionis Iacob ad Lectuli caput, fuit quia caput Lectuli erat versus terram promissionis, ideoque conversus ad illam partem, Deum adoravit: hinc Iudæi in progressu temporis hunc modum adorationis observarunt, quando erant in captivitate politi; nam orando Deum aspiciebant versus illam partem ubi erat terra promissionis, ut sic magis orando, elevarentur in Deum.

### CAP. XXXXVIII. Reflexio 115.



**I**N hoc capitulo describitur benedictio filiorum Iacob particulariter, nempe quo ad duos filios Ioseph: statim enim ac nuntiatum fuit Ioseph quod ægrotaret Pater suus perrexerat ad illum, cum Manasse, & Ephraim filijs suis: in cuius adventu lætatus valde fuit Iacob, statimque adoptavit prædictos pueros sibi in filios, adeo ut facerent duas Tribus: subdens, quod si Ioseph generasset alios filios, tunc isti non deberent facere diversas Tribus; sed vocari sub nomine fratrum suorum, nempe Manassis, vel Ephraim. Tunc Ioseph pronus adoravit in terram: ista enim erat quædam dispositio ad Paternam benedictionem recipiendam; & posuit Ephraim ad dexteram suam, idest ad sinistram Israel; Manassem vero, in sinistra sua; videlicet ad dexteram patris. Pro quo sciendum, quod vultus puerorum, & ipsius Ioseph erant contra vultum Israel; & ideo ille qui erat ad sinistram Ioseph, erat ad dexteram Iacob; sic enim posuerat illos Ioseph, volens quod Manasses, qui erat primogenitus, esset sub manu dextera Iacob, tanquam principalis in illa benedictione. Sed Pater fecit contrarium, ponens manum dexteram super Ephraim, constituens per hoc illum ante Manassem, & prædicens, quod licet Ephraim esset minor natu, tamen futurus



rus erat maior primogenito Manasse, quod impletum est, dum Iosue fuit electus Dux Populi, post Moysen; & Ieroboam, qui fuit primus Rex Israel, postquam divisum fuit Regnum Israel à Regno Iuda: tamen enim Iosue, quam Ieroboam fuerunt de Tribu Ephraim. Fuit etiam per hanc constitutionem Tribus Ephraim prælata Tribui Manassis in oblatione primitiarum, in situatione Tabernaculorum, in motione Castrorum, & in alijs Dignitatibus.

## CAP. I L. Reflexio 116.



Ata benedictione in particulari, sequitur benedictio filiorum Iacob generalis. Et licet aliquibus magis maledicat, ut patet de Simon, & Levi, tamen dicuntur omnes benedictiones; tum quia denominatio sumitur à potiori; tum quia ut infra dicitur, benedixit eis benedictionibus proprijs, licet taceantur quæ fuerint. Primo igitur alloquitur Israel ad Ruben dicens *Tu fortitudo mea, & principium doloris mei: effusus es sicut aqua, non crescas, quia ascendisti Cubile Patristui, & maculasti stratum eius*. Dicitur: *Tu fortitudo mea*, quia illum genuit in ætate robustiori, in qua viget hominis fortitudo. Dicitur *principium doloris*; quia licet Iacob habuerit in vita sua multas misérias multosque dolores, tamen omnes afflictiones pro nihilo reputabat, in comparatione illius doloris, quem habuit, dum talis filius, pro nihilo ducens reverentiam Paternam, ausus est contaminare Thorum proprii genitoris. Dicitur *prior in donis, maior in Imperio*, quia duplex portio hæreditatis illi debebatur, & Regnum, & Sacerdotium, quod ante Legem datam annexum erat Primogenituræ. Omnia namque perdidit Ruben, propter scelus prædictum; quandoquidem duplex portio hæreditatis translata fuit ad Ioseph, ut patet *cap. præced.* & Regia dignitas ad Iudam. Sacerdotium vero ad Levi



Levi; & ideo dicitur *effusus sicut aqua*: ista enim perfectius effunditur, quam alij humores: nam de oleo effuso remanet in vase pinguedo, & humor; de vino sapor, & sic de reliquis: sed effusa aqua citò Vas difficcatur, nullum deinde remanens aquæ vestigium.

## Reflexio 117.

**S**ecundò benedicatur Simeon, & Levi his verbis: *Frates Vasa iniquitatis bellantia; quia in furore suo occiderunt virum: maledictus furor eorum, quia pertinax, & indignatio eorum quia dura. Dividam eos in Jacob, & disperdam eos in Israel.* Vocat autem istos specialiter *fratres*, quia fuerunt concordēs in scelere perpetrato contra Sichimitas. Vocat *Vasa*, quia homines continent in se aliquod, sive bonū, sive malum: hinc *Apostolus ad Rom: 9.* vocat quosdam homines Vasa Iræ parata in interitum; alios autem Vasa misericordiæ ad gloriam. Dixit *eos dividendos, & dispergendos*, quod fuit impletum tempore divisionis fortium: nam Levi non accepit inter fratres suos partem; sed omnes Levitæ dispersi fuerunt super Israel, recipiendo solummodo aliquas Civitates in qualibet Tribu. Simeon vero, quia parva Tribus erat, recepta fuit in medio sortis Iudæ, ut patet *Iosue 19.* tamquam peregrinus, habitans præcariò in sorte alterius. Maledicit sanctus Pater furorem istorum filiorum, & indignationem eorum tanquam duram: nam nimis durè punierunt prævaricationem Principis Sichem: ad hoc enim ut fiat Iustitia commutativa in assignandis pœnis pro scelere, oportet habere rationem contrapassi, quod consistit in quadam commutatione, & proportionē, ut declarat *Arist. 5. Ethic.* Sed in punitione prædicta, non fuit observata iusta proportio; quia pro defloratione unius Puellæ solitariè vagantis inter alienigenas, non totus populus, sed libidinofus, & infanus Princeps solummodo delendus erat.

Re-



## Reflexio II 8.

**T**ertio benedicatur Iudas his verbis: *Iuda te laudabunt fratres tui: Manus tua in cervicibus inimicorum tuorum: adorabunt te filij Patris tui. Catulus Leonis Iuda: ad prædam fili mi ascendisti: requiescens accubuiſti ut Leo, & quaſi Leona, quis ſuſcitabit eum? Non auferetur ſceptrum de Iuda, & Dux de femore eius donec veniat, qui mittendus eſt, & ipſe erit expectatio gentium. Ligans ad vineam Pullum ſuum & ad vitem Aſinam ſuam. Lavabit in vino ſtolam ſuam, & in ſanguine uve pallium ſuum. Pulchriores ſunt oculi eius vino, & dentes eius lacte candidiores. Dicitur: Te laudabunt fratres tui, quia Tribus Iuda ab alijs laudata fuit. Pro quo ſciendum, quod laudabile ſecundum Philoſophum dicitur, id quod bene ſe habet, & eſt ad alterum: unde quilibet bonus habitus, ſecundum quem benè operativi ſumus, laudabilis eſt. Iudas autem excellebat omnes Tribus; tum in naturalibus, tum in moralibus potentijs: erat enim cœteris eloquentior, conſtantior, & animoſior; unde fuit prima ad intrandum Mare Rubrum miraculoſè diviſum, timentibu alijs ſequi Moysen. Dicitur *manus tua in cervicibus inimicorum*; propter David primum Regem talis Tribus, qui inimicos Iſrael pro magna parte interfecit, & alios redegit ſub tributo; & licet eſſet minimus inter fratres ſuos, tamen generoſè perrexerit ad pugnam contra Goliath: ideo vocatur *Catulus leonis*. Et quia in tantum prævaluit, ut circa finem Regni ſui, nullus auderet inſurgere contra ipſum, ideo dicitur: *Acquiſcens accubuiſti*. Prædicat deinde adventum Meſſiæ ſanctiſſimi, tunc futuri de Tribu Iuda; & dat manifeſtum ſignum, quo mediante cognoſci poterat illius adventus dicens: *Non auferetur ſceptrum de Iuda, ideſt Regalis dignitas, ad quam pertinet ſceptrum; & Dux de femore eius, donec veniat, qui mittendus eſt; & ipſe erit expectatio Gentium*. Additur autem, *& Dux de femore eius*: quia deficiente Regno interfecto Sedechia Rege,*



Rege, in captivitate Babylonica gubernatus fuit Populus per illos, qui erant de Tribu Iuda. Nam post dictam captivitatem Zorobabel de Tribu Iuda fuit Dux eorum, ut habetur *Zachai 4. & Aggæi 2.* Postea Sacerdotes gubernaverunt Populum, ut patet tempore Machabæorum, qui etiam erant de Tribu Iuda; nam Tribus Sacerdotalis, & Tribus Regia erant commixtæ, ut patet *4. Reg. cap. 11.* & istorum regimen duravit usque ad tempus Herodis, qui fuit alienigena, videlicet de genere Idumæorum: quo regnante natus est Christus Dominus. Dicitur; *Ipse erit expectatio Gentium.* Secundum quod vaticinavit *Aggæus Propheta cap. 2.* *Ecce veniet desideratus cunctis Gentibus.* In Hebræo autem habetur sic: *Et erit ei aggregatio gentium.* Quod totum fuisse impletum post Ascensionem Christi Domini, & prædicationem Apostolorum, luce meridiana clarior est. Sciendum tamen, quod hanc Prophetiam, quæ clarissima est de Christo Domino, Iudæi iniqui nituntur multipliciter subvertere. Ad cuius intellectum, considerandum est, quod in Hebræo habetur: *Donec veniat silo.* Quæ dictio est æquivoca, ad significandum nomen loci *Silo*, & ad significandum Missionem. Igitur isti perversi, & Deo, & veritati scripturarum rebelles, dicunt, quod hæc *Silo* est propriè accipienda dictio, prout est nomen loci; unde dicunt quod hæc prophætia impleta fuit quâdo Saul electus est in Regem, & inunctus in *Silo*, ubi erat Tabernaculum Domini, & Arca, & per consequens unctio pro Regibus; & sic Sceptrum quod fuerat in Tribu Iuda, fuit translatum ad Tribum Benjamin de qua erat Saul. Sed hoc dictum manifestissimè contrariatur textui; quia ante electionem Saulis, Arca Dei iam erat amota de *Silo*, eratque in *Cariathiarim*, ut habetur *primo Reg. cap. 7.* Item post Saul immediatè, immo ipso adhuc vivente, fuit David inunctus in Regem per Samuelem, tanquam primus Rex de Tribu Iuda. Alij Rabbini dixerunt: quod ista prophætia impleta fuit in electione Ieroboam in Regem, qui erat de Tribu Ephraim. & sic exponunt *Donec veniat Silo*, idest *Ieroboam* in tali loco,

CORO-



coronandus, qui dicitur Silo. Sed ista perversa expositio ostenditur falsissima per textum: quia congregatio decem Tribuum eligentium Ieroboam in Regem, non fuit in Silo, sed in Sichem, ut habetur 3. Reg. 12. Item non fuit ablatum Regnum de domo Iuda tunc, sed stetit in ea usque ad captivitatem Babylonicam, per successionem hæreditariam. Alij Rabbini addentes cœcitatē super cœcitatē, dicunt: Hoc nomen Silo, vere significare missionem, sed hanc Prophætiam dicunt impletam fuisse tempore Nabuchdonosor, quando venit contra Ierusalem, & occidit Sedechiam Regem, & sic defecit Regnum Iudæ; unde exponunt litteram sic: *Donec veniat qui mittendus est*. Id est *donec veniat Nabuchdonosor*, qui propter peccata Populi Iudaici missus fuit à Deo ad destruendam Civitatem Ierusalem, & ad auferendum Regem, & Sceptrum de Tribu Iuda. Sed ista terrena expositio, & similes somniatæ à Rabbiniis destruuntur per translationem Chaldaicam, quam Iudæi vocant *Tbargum*; & est tantæ auctoritatis apud illos, ut nullus unquam Rabbini ausus fuerit ei contradicere. Immo quando vetus expositio Hebraica est obscura, recurrunt pro explanatione ad dictam translationem. In ista autem sic habetur: *Non auferetur Sceptrum de Iuda, & Dux de femore eius donec veniat Messias*. Sed nec Nabuchdonosor, nec aliquis prædictorum vocatus fuit in Scriptura Sacra Messias, sed solum Christus Dominus, promissus in Lege, & Prophætis. Agnosce ergo ò Christiane Lector in tenebris cœcutientium Iudæorum lumen, quod in Scripturis datum tibi est à Deo, per missionem in Mundum Vnigeniti Filij sui. Post prædictionem Messis Sanctissimi, prædicit Iacob conditionem terræ, quam Tribus Iuda debebat accipere; quæ terra fuit valde fertilis in vino, & lacte, ideo dicit: *Ligans ad vineam pullum suum, & ad vitem asinam suam*. Pec hoc designans, quod in uno stipite vitis, posset de uvis onerari una asina, vel pullus; unde sequitur: *Pulchriores oculi eius vino*: sed in Hæbreo habetur, *Rubicundiores oculi eius vino*. quia potatio vini abundans apparet



paret in oculis scintillantibus, maxime quando vinum optimum est. Abundatio vero lactis significatur illis verbis: *Et dentes eius lacte candidiores*. Quia albedo apparet in dentibus, magis quam in reliquis partibus corporis.

## Reflexio 119.

**P**ost Iudæ benedictionem, benedicantur deinde filij Ancillarum, & primo Zabulum his verbis: *Zabulon in litore Maris habitabit*. Sors enim sua fuit supra Mare mediterraneum, & in illa fuerunt aliqui Portus, in quibus Naves stabant. Issachar sic benedicitur: *Issachar asinus fortis, accubans inter terminos: vidit requiem quod esset bona, & supposuit humerum suum ad portandum, factusque est tributis serviens*. Pro intelligentia *Tex.* sciendum, quod homines huius Tribus erant validissimi ad sustinendum laborem; unde in Hebræo habetur: *Asinus offeus*. Sors autem illius erat inter duos terminos nempe Iordanem, & Mediterraneum: & quia terra sua optima erat, iudicavit melius esse quiescere in illa, quam discurrere ad terras longinquas pro mercibus emendis; & ideo reddebant censum annuatim Regibus. Tercio benedicitur Dan his verbis: *Dan iudicabit Populum suum*. Et exponitur hoc de Sansone, qui fuit de ista Tribu, & iudicavit Populum Israel per annos viginti, eosque vindicavit de Philisthæis. Et dicitur *Coluber in via*, quia in diebus suis, Philisthæi non audebant venire adversus Israel per vias, & semitas, quas Samson custodiebat. Dicitur *Cerastes mordens Vngulas equi*: quia sicut Cerastes facit cadere equitem tangendo solummodo Vngulam Equi, sic Samson, amplexatus Columnas, fecit cadere domum super Philisthæos. Licet autem Samson tam fortis futurus esset, non per hoc reputandus erat Messias, ideo subditur: *Salutare tuum expectabo Domine*. Quarto benedicitur Gad his verbis: *Gad accinctus præliabitur ante eum; & ipse accingetur retrorsum*. Hoc autem fuit impletum, quando hæc Tribus, accepta sorte circa

Ior-



Iordanem, transivit armata ante filios Israel, ut illos adiuva-  
ret in acquirenda terra promissionis, quibus introductis in  
illam, rediit ad terram suam unde venerat. Quinto benedi-  
citur Aser sic: *Pinguis panis eius, & præbebit delicias Regibus.*  
Per hoc autem designatur fertilitas sortis illius in omnibus  
necessarijs ad victum. Nam in Sacra Scriptura nomine panis  
omnis cibus denotatur. Insuper in sorte illius crescebant  
aliqua pretiosa, quæ pro delicijs Regum inserviebant. Sex-  
to benedicatur Neptali his verbis: *Cervus emissus, dans elo-  
quia pulchritudinis.* Per hoc autem signabatur quod terræ na-  
scentia in sorte sua prius accedebant ad maturitatem, quam in  
alijs sortibus, sicut Cervus velocior est alijs animalibus ad  
cursum. Ex hoc autem fiebant citius oblationes primitivorum,  
& ideo Sacerdotes, & Levitæ pulchras laudes Deo redde-  
bant.


## Reflexio 120.

**B**enedictis filijs Ancillarum benedicuntur consequen-  
ter filij Rachelis uxoris Iacob magis prædilectæ. Et  
primo benedicatur Ioseph sic: *Filius accrescens Ioseph,  
& decorus aspectu. Filia discurrerunt super murum, sed exaspe-  
raverunt eum, invideruntque illi habentes iacula: sed in forti  
arcus eius.* Pro intelligentia *Tex.* sciendum quod Tribus Io-  
seph notabiliter crevit præ cæteris, ideo dicitur *filius accre-  
scens.* Erat vero Ioseph pulcherrimus, adeout in Ægypto,  
quando exhibat de domo, mulieres ascendebant ad fœnes-  
tram, ut illum aspicerent. Licet autem tam gratus esset,  
tamen fratres dure illum tractaverunt, videlicet verbis pun-  
gitivis, quæ hic iacula vocantur. In his autem angustijs to-  
tam spem suam & defensionem, quæ designatur nomine  
arcus, posuit in Deo. Et quia Ieroboam fuit de Tribu Ephra-  
im filij Ioseph, & fuit primus Rex Israel, pro ut distingui-  
tur contra Regnum Iuda, ideo subiungitur: *Inde Pastor egres-  
sus est Lapis Israel:* Regia namque dignitas designatur per  
offi,



cium Pastoris, quia habet Rex regere Populum sibi subditum per bonas Leges: hinc *Arist. 8. Ethic.* ait quod Rex debet amare subditos, sicut Pastor Oves. Et probat hoc per dictum Homeri, qui Agamenonem Regem nuncupavit bonum Pastorem populorum. Ultimo benedicatur Benjamin his verbis: *Benjamin Lupus rapax: mane comedet prædam, & Vespere dividet spolia:* Hoc autem dupliciter exponitur. Primo quia Templum fuit in sorte Benjamin, ibique erat Altare Holocausti cum igne perpetuo, super quo tum mane, tum vespere ponebantur per Sacerdotes Hostiæ, quas ignis devorabat. Vespere autem, partes hostiarum dividebantur Sacerdotibus, ideoque dicitur, *Lupus rapax, & dividens spolia.* Secundò exponitur de bellis; fuit enim dicta Tribus valde bellicosa, adeo ut iniret bellum contra alias undecim Tribus, quas bis debellavit, ut patet *Iud. cap. 20.* Postquam vero Sanctus Iacob prædixit filiis futura, dicitur in Textu, quod benedixit singulis benedictionibus proprijs. Quare Doctores communiter dicunt, quod postquam instruxit filios circa statum huius mortalis vitæ, erexit deinde animos illorum ad spem vitæ immortalis, imprecando filiis bona spiritualia, & Æterna, quæ sola sunt vera & propria bona, ad quæ debet dirigi intentio finalis omnium actuum humanorum. His igitur dictis in pace Iacob quievit.

## CAP. L. Reflexio 121.



Acto de morte Iacob, hic agitur de illius tumulatione. Prius tamen Ægyptus flevit illum septuaginta diebus, & hoc amore Ioseph, filij sui, qui illis tot bona contulerat. Fratres vero Ioseph, timentes ne recordaretur iniuriæ receptæ ab illis, miserunt ad eum dicentes. *Pater tuus præcepit nobis antequam moreretur, ut hæc tibi, verbis illius diceremus. Obsecro ut obliviscaris sceleris fratrum tuorum*



*tuorum, & peccati, atque malitiæ.* Ista autem tria nomina ponuntur in littera ad signandam unam rem, sed sub diversis rationibus mali. Scelus enim significat aliquam magnam iniquitatem, quam ratio ipsa abhorret, & huiusmodi fuit venditio fratris innocentis. Peccatum vero est illud quod est contra Legem Divinam, vel humanam: prædicta autem venditio fuit contra utramque legem, ut per se patet. Malitia vero est peccatum ex deliberatione, scilicet ex habitu, pro ut distinguitur contra peccata, quæ repente fiunt ex passione. Hoc autem accidit in dicta venditione; nam fratres isti ex multis præteritis diebus conceperant odium, & deliberaverant illum occidere. Quod autem Pater dixisset eis verba prædicta, ut illa referrent nomine suo Ioseph, non fuit verum; quia si pater dubitasset de recordatione iniuriarum filij sui Ioseph, proculdubio dixisset illi ne ulcisceretur dum adhuc erat in vita; sed non curavit hanc instantiam illi facere, tamquam impropriad suæ naturali pietati: rogaverunt ergo fratres ex parte Patris, ut ex reverentia debita Genitori, facilius flecterent animum Ioseph ad indulgentiam, & amorem: tanta enim mala gesserant contra ipsum, ut prorsus iudicarentur indigni exaudiri; & ideo quod in se non poterant iuste petere, patris intercessione accedente, speraverunt obtinere. In hoc autem patebat manifestè signum veræ penitentiae, cum cognoscerent gravitatem præteritæ culpæ.



K

EXO-





*Iste Liber vacatur Græcè Exodus, Latine Exitus, Hebraicè Vellefemoth; idest Hæc sunt nomina, quia sic incipit. Hebræi namque Libros suos à principijs eorum nominare consueverunt, ut taliter vocentur qualis prima dictio in capite Libri fuerit. Sciendum est autem, quod Lex ut ait Isid. lib. 5. Ethim: nullo privato commodo, sed pro communi utilitate ponenda est: & per hoc patet, quod datio Legis præsupponit adunationem Plebis; & ideo postquam Moyses descripsit in Genesi electionem populi fidelis, separando ipsum ab infidelibus, hic describit dationem Divina Legis populo adunato sub fide unius veri Dei. Et quia ex illo erat tunc nasciturus, secundum carnem, Christus Dominus, debuit talis populus speciali sanctitate pollere; unde data est illi Lex Divina, ad Christum dignè suscipiendum.*

CAP.



## CAP. I. Reflexio 122.



Ortuo Ioseph, eiusque fratribus, Filij Israel creverunt, & quasi germinantes multiplicati sunt, dicunt enim Doctores, quod mulieres Hebræe in quolibet partu, pariebant plures filios, ideoque dicuntur germinantes: sicut per germinationem unius grani, multa simul nascuntur. Surrexit interea Rex novus, quia translatus fuerat Regnum ad aliam domum, ut ait Iosephus: & iste Rex fuit octavus ab illo Pharaone, qui toti Ægypto præfecit Iosephum. Videns igitur iste Princeps multiplicationem populi Israel, ait ad Populum suum: *Venite sapienter opprimamus eum*. Ad hoc autem intēdebat affligere Hebræos laboribus, ne vacare possent generationi. Ex nimio namque labore redduntur homines ad illam indispositi, quia labor excitat ardorem, & sic consumit humorem seminis; adeo ut si contingat generatio, cum semen illud ad parvam quantitatem redactum sit, foetus nascuntur valde corpore diminuti. Et quia premente labore spiritus seminis exhalant, necesse est quod foetus viribus multum deficiant, & sint distemperatæ complexionis. Causa igitur afflictionis Populi Israel fuit Ægyptiorum invidia; non enim poterant videre Hebræos esse robustiores se ipsis. Hoc autem eveniebat, quia Ægyptij erant valde luxuriosi, & in parva ætate vacabant libidini, quæ vires enervat, & tollit etiam fortitudinem in futura prole, reddens illam imperfectam, tum respectu corporis; tum respectu intellectus ut probat *Arist. 7. Polit.* Hebræi autem se continebant usque ad tempora generationi proportionata, ideoque abundabant in prole, & in fortitudine filiorum. Fuerunt igitur Iudæi afflicti oneribus ab ipsis magistris ad hoc specialiter deputatis: nec solum constringebantur ad duros labores in construendis ædificijs, sed ut refert Iosephus, compellebantur ex-

K 2

portare



portare fæces, & alias immunditias extra Civitatem. Sed quanto magis opprimebantur, tanto magis crescebant: non enim valet Politicorum perversitas, & iniquorum malitia, nec potentium tyrannis contra consilium Diuinitatis. Hic autem notanda est humanorum actuum misera conditio, & infelicis fortunæ sevientis mutatio: nam cum prudenti consilio, & indefessis laboribus Ioseph Ægyptios à morte liberaverit, tamen post brevissimum decursum sexaginta quatuor annorum, ut dicunt Doctores, nullum de tantis beneficijs mansit recordationis vestigium; adeo ut eius progenies crudeli subijcietur servituti.

### Reflexio 123.

**D**Vm Hebræi affliguntur laboribus continuis, non cessat per hoc eorum multiplicatio: quapropter impius Rex iussit obstetricibus, ut masculos interficerent, fingentes esse abortum: fœminas vero reservarent. Istæ namque erant pulchriores fœminis Ægyptiacis; ideoque desiderabant Ægyptij explere cum illis libidinem suam. Timuerunt autem Obstetrices Deum; tum quia Dominus movit earum mentem ad horrorem tanti sceleris; tum quia informatæ fuerunt per mulieres hebræas, ostendentes illis offensam Dei, & pœnam quam incurrisent, si exequerentur contra innocentes infantes crudele præceptum Pharaonis, quapropter Obstetrices non occidebant, sed conservabant mares. Unde Deus ædificavit eis domos: fuerunt enim promotæ inter maiores familias Israelitarum, & insuper dedit illis Dominus gratiam, per quam conversæ fuerunt, de superstitione Ægyptiaca, ad fidem unius veri Dei. Videns autem Pharaon, quod per Obstetrices, masculi hebræorum occultè non occidebantur, furore, & insania agitatus, iussit hoc fieri manifeste; nam per generale edictum præcepit omnibus Ægyptijs, inter quos manebant Hebræi, ut proijcerent in flumen omnes Israelitarum infantes. Non præcepit autem



tem illos iugulari, quia proiectio in flumen, erat minus horrenda ad exequendum, & citò poterat exequi præceptum, quia fluvius Nilus, in multis locis per totam terram Ægypti dividitur.

## CAP. II. Reflexio 124.



Ostquam descripta est miserandæ gentis Iudaicæ dura afflictio, hîc subiungitur provisio Ducis liberantis. Igitur post crudele præceptum Regis, Vir de domo Levi, qui fuit Ambram, accepit, ut dicitur *in tex. Vxorem stirpis suæ*. Hæc autem acceptio, non potest intelligi respectu Matrimonij, quia ante hoc edictum, Vxor Ambram pepererat ei Aaron, qui natus fuit tribus annis ante Moysen, ut habetur *infra cap. 7.* Similiter habuerat Mariam, quæ in nativitate Moysis erat iuvençula; & ideo communiter dicunt Doctores, quod ista acceptio intelligitur quo ad copulam: post præceptum namque Pharaonis, Ambram separaverat se ab Vxore, magis eligens non generare, quam quod filij sui submergerentur in flumine. Intendebat deinde continuè orationibus, rogans Deum, ut Populum suum, tam vehementer afflictum, aspicere vellet: quare Dominus admonuit illum in somnijs, quod ex Vxore sua generaret filium, qui populum de dura servitute liberaret. Tunc Ambram cognovit Vxorem, quæ concepit, & peperit filium elegantem, & pulcherrimæ formæ. Dicunt enim DD. quod de facie pueri exhibant radij lucidissimi, præferentes insignia futuræ virtutis, & magnitudinis, quapropter Pater abscondit infantem. Sed cum iam non posset amplius illum celare, quia statutum perversi Regis iubebat, ut completis tribus mensibus fieret inquisitio per domos hebræorum, sumpsit Fiscellam, nempe Cistam factam de iuncis, ut propter levitatem materiæ fluctuaret super aquam, & exposuit eam in Carecto, idest in loco ubi crescunt carices, qui sunt herbæ factæ ad modum gladij, ne impetus aquæ aliunde



de devolueret fiscellam. Sed videtur quod hæc fuerit tentatio Divina. Dicendum quod non: quia homo in periculo constitutus, si non omittat ea quæ potest facere secundum humanam prudentiam, non tentat Deum. Amram vero, & Vxor illius pro conservatione Infantis fecerant omne id quod poterant via humana usque ad tres menses, à Rege præfinitos; servando autem ultra hunc terminum in domo Puerum, exponebant non solum illum morti, sed etiam semetipsos, ideo non tentaverunt Deum, committendo residuum Divinæ Providentiæ, exponendo proprium filium prædicto modo.

### Reflexio 125.

**H**is gestis, Filia Pharaonis descendebat ut lavaret se in flumine, in loco tamen remoto, ut conveniebat filiæ Regis; quæ cum vidisset fiscellam, misit unam de Ancillis ut illam acciperet, sibi que deferret; tunc pergens accepit fiscellam, detulitque illam Reginæ. Videns autem in ea Parvulum vagientem, omnique humano solatio destitutum, & morti acerbæ expositum, statim misericordia mota est: maximè quia puer ita dulcis erat, ut aspicientes ad pietatem excitaret, adeo ut omnes afficerentur ad amorem illius. Unde filia Regis, cognoscens quod puer habebat necessitatem nutrimenti, fecit illi porrigi mammillas plurium mulierum Ægyptiarum; sed infans omnes prorsus respuebat: quapropter Maria soror pueri, quæ stabat procul attendens exitum rerum, videns opportunitatem accessit ad Reginam, dixitque illi, quod infans erat Hebræus; quapropter si mulier huius gentis mammillam illi porrigeret, forsitan puer sumplisset nutrimentum, propter simpatiam sanguinis: cui dicto, tanquam rationabili, Regina assensit, iussitque illi, ut Nutricem hebræam quæreretur. Tunc Maria perrexit ad paternam domum, vocans propriam Matrem, quæ veniens ad Reginam, accepit ab ipsa prædilectum filium alendum tamquam extraneum Puerum. Portavit igitur in domum suam puerum,



puerum, adultumque, idest ad tertium, vel quartum annum perventum, tradidit Reginae, quem illa adoptavit sibi in filium, non enim habebat ullum filium naturalem.

## Reflexio 126.

**P**ostquam creverat Moyses, egressus est ad fratres suos, ut nimirum videret quomodo in laboribus vexarentur: viditque virum Ægyptium percutientem crudeliter Hebræum. Ille autem erat unus de præpositis super Israelitas, ut illos compelleret ad continuos labores; unde Moyses videns hoc, statim occidit Ægyptium. Nec in hoc Moyses peccavit, quia licet non esset Iudex constitutus ab hominibus, tamen quia ex Divina electione missus fuerat ad liberationem Hebræorum, habebat auctoritatem vindicandi iniurias illis factas, & hoc sciebat per Divinam revelationem; unde non faciebat contra conscientiam. Et Ægyptius ille, iniuste opprimens Hebræum, efficiebatur de foro Moysis, tamquam Iudicis ratione delicti: ad Iudicem autem spectat vindicare iniurias innocentum. Audiens autem hoc Pharaos, quærebat Moysen occidere, tum quia interfecerat Præpositum, quod redundabat in Regis iniuriam; tum quia secundum quod refert Iosephus, circa tempus nativitatis Moysis, quidam Sacerdos Ægyptiorum, intentus divinationibus, dixerat Regi, quod caute attenderet circa Pueros Hebræorum, nam unus ex illis nasci debebat, qui populum Israel educeret de Ægypto, suumque Regnum humiliaret; quapropter statim, ac Pharaos audivit factum Moysis, ita zelantis pro Hebræis, existimavit quod Moyses esset puer ille, de quo sibi Sacerdos prædixerat; unde statim iussit occisionem illius. Quo audito Moyses, fugit in Madiam, ibique accepit in Vxorem Sephoram filiam Sacerdotis Madiam, de qua habuit duos filios Gersan scilicet, & Eliezer.



## CAP. III. Reflexio 127.



Nterea Moyſes paſcebat Oves Soceri ſui: cum-  
que minaſſet Gregem ad interiora Deſerti,  
tum quia ibi erant meliora paſcua; tum ut  
remotus ab alijs Paſtoribus inſtaret orationi,  
& contemplationibus Divinis, quæ prære-  
quirunt totalem elongationem à converſa-  
tionibus ſecularibus, venit ad Montem Dei Oreb, qui eſt  
Mons Sinai: & prædicitur hic in textu *Mons Dei*, ratione  
eventus tunc futuri, quia ibi Dominus daturus erat Legem.  
Manens ergo ibi Moyſes, apparuit ei Dominus in flamma  
ignis de medio Rubi; & videbat Moyſes quod Rubus arde-  
ret, & non combureretur. Sciendum eſt autem, quod in  
Hebræo habetur: *Apparuit ei Angelus Domini*. Et quia lo-  
quebatur in perſona Dei, idem aliquando Angelus, aliquan-  
do Dominus nuncupatur. Poſſeſt autem quaſi generaliter di-  
ci, Deum nemini unquam apparuiſſe in veteri Teſtamento,  
ſed Angelus loco Dei: quandoquidem, in ipſa datione Le-  
gis, quæ fuit maximum beneficium, cum per illam uniretur  
Iſrael ipſi Deo in populum peculiarem, non loquebatur ipſe  
Deus, ſed Angelus, ut patet 3. *ad Galat.* & *Aſt.* 7. Dicitur  
autem hic Angelum apparuiſſe in flamma ignis de medio ru-  
bi; quia aliquis ibi eſſe dicitur ubi loquitur. Vox autem An-  
geli non audiebatur procedens à latere Rubi, vel de ſuper  
ipſum, ſed de medio; ideo ibi apparere, vel eſſe dicebatur.  
Angeli enim licet incorporei ſint, & leges corporis, & loci  
non ſequantur, nempe circumscriptionem, & motus conti-  
nuitatem ad acquisitionem loci; tamen eo modo, quo An-  
gelus in loco eſſe dicitur, in uno eſt, & non in pluribus, quia  
inſinitus non eſt. Locatio autem propriè convenit corpori  
per commenſurationem, & applicationem ſuæ quantitatis  
ad ipſum locum, Subſtantix autem ſpirituales dicuntur lo-  
cari per applicationem, non quantitatis quam non habent,  
ſed



sed virtutis, sive potentiae operativae ad locum. Sicut autem in corporibus, quantum aliquod corpus occupat, tantum dicimus locum illius: ita quantum occupat virtus alicuius substantiae spiritualis, tantum dicimus locum eius: unde si aliqua spiritualis creatura esset, cuius operatio ad nullam partem loci se extenderet, nullum locum diceretur habere: quapropter Angeli, secundum quod indivisibiles sunt, nec propriè, nec impropriè in loco sunt; secundum autem quod in eis reperitur aliqua extensio, non vera, sed metaphorica, nempe virtutis, vel operationis, dicuntur impropriè esse in loco, quia ibidem operantur.

### Reflexio 128.

**V**idebat igitur Moyses quod rubus arderet, & non combureretur, nam ardebat quia flammam emittebat, cum in circuitu illius esset ignis circumfusus occupans totam viriditatem rubi, sed non comburebatur, quia comburi est deficere, vel consumi. Ignis vero non minuebat rubum, licet esset materia combustibilis, suspendente Deo actionem naturae, sicut suspendit actionem ignis in Fornace Babylonica. Per hanc autem visionem signabatur, quod labor affligens Hebræos, qui per ignem denotabatur, nam ignis est maxime afflictivus, non consumeret illos, licet in eis esset humana infirmitas, sed liberarentur illæsi: sicut ignis ille circumdabat quidem rubum, qui erat materia satis levis, & per consequens citò combustibilis. Tunc Moyses videns ista mirabilia dixit: *Vadam, & videbo visionem hanc magnam, quare non comburatur rubus*: putabat enim quod accedendo posset cognoscere causam; vel forte existimabat, non esse verum ignem, sed apparentem; unde Deus statim dixit ad illum: *Moyses Moyses, ne appropinques huc*; Quasi diceret. Humana fragilitas non præsumat curiosè inquirere Arcana Divina. Et ex hoc deducitur quod nullus, licet Sapiens, & Sanctus, audeat scrutari Iudicia Dei



Dei Omnipotentis; sed sicut Moyſes, abſcondat faciem ſuam, ideſt intellectum, Pallio humilitatis, ne ſcrutando deficiat, & pereat.


## Reflexio 129.

**P**ost mirabilem hanc apparitionem manifeſtavit Deus ipſi Moyſi liberationem futuram Populi ſui, tam crudeliter oppreſſi ab Ægyptijs, & quod mitteret ipſum ad Pharaonem. Tunc Moyſes iterum ſe humiliavit dicens: *Quis ſum ego, ut vadam ad Pharaonem, & educam filios Iſrael de Ægypto?* Sed Dominus aſſecuravit illum de felici eventu, dicens: *Ego ero tecum; & hoc habebis ſignum quod miſerim te: cum eduxeris Populum meum de Ægypto immolabis ſuper Montem iſtum:* Ac ſi diceret: prædico tibi quod poſt educationem populi, immolabis Deo ſuper Montem iſtum; & cum hoc tibi acciderit, erit tibi certum ſignum rememorativum, quod fui tecum in liberatione populi. Sciendum eſt autem quod hoc fuit etiam ſignum de futuro: nam Dominus dixerat Moyſi duo: videlicet, educationem populi de duriffima ſervitute, & introductionem eiufdem populi in terram promiſſionis: quapropter ſicut immolatio prædicta erat ſignum rememorativum reſpectu præteriti, ut dictum eſt, ita erat ſignum prognosticum reſpectu futuræ introductionis in terram lacte, & melle manantem. Certificatus ergo Moyſes de ſua miſſione ad populum, humiliter ſe exhibuit ad ſerviendum Deo, dicens: *Ecce ego vadam ad filios Iſrael, & dicam eis: Deus Patrum veſtrorum miſit me ad vos; ſi dixerint mihi, quod eſt nomen eius, quid dicam eis?* Tunc Deus dixit ad illum: *Ego ſum qui ſum;* Per hæc autem verba ſignificatur neceſſitas eſſendi, quæ eſt conditio propria ipſius Dei. Omnia enim alia entia, eo quod ſunt de nihilo, habent principium ſui eſſe, & ſunt vertibilia in nihilum; quia ſubtracta manutentionia Divina, caderent in non eſſe: unde non eſſe;  
con-



convenit illis, quantum est ex se. Solus Deus est, qui habet ex se necessitatem essendi. Et per hoc vocatur Deus summum Ens in entibus: hinc *Arist.* 6. & hinc, vocat æterna, per se entia.

## CAP. IV. Reflexio 130.



Descripta Moyſis miſſione, ponitur hinc eius inſtructio per ſigna oſtenſiva Divinæ Virtutis. Quamvis enim Moyſes, certificatus fuiſſet per verbum Domini, quod ſeniores populi crederent verbis eius, tamen ſciebat, quod in populo erant multi rebelles, & increduli, qui non acquieſcerent verbis, niſi viderent ſigna Divinæ Omnipotentia: quapropter Deus dedit illi poteſtatem faciendi mirabilia in tribus: videlicet, *in Virga, in Manu, & in Aqua.* Quia vero, ſicut eſt in naturalibus, omnia quæ ſunt ad finem, debent illi proportionari; ideo cum iſta ſigna darentur ad demonſtrandam liberationem Hebræorum de ægypto, debebant illi liberationi convenire. Pro quo ſciendum, quod ſtatus filiorum Iſrael in ægypto, poteſt tripliciter conſiderari. Primò quantum ad ingreſſum, qui fuit per dominium Ioseph, & ad hoc principaliter refertur ſignum Virgæ, per quam designabatur Principatus ipſius; quandoquidem in ſignum domini, portabat in ægypto ſceptrum, quod eſt idem cum Virga. Iſta tenebatur in manu Moyſis, ad denotandum, quod tempore Ioseph, Hebræi honorificè ſuſtentari ſunt nemine affligente; ſed poſtea fuit proieccta in terram, ad denotandum, quod poſt mortem Ioseph deductus fuit honor Iudæorum uſque ad pulverem, cogentibus ægyptijs illos in laboribus luti, & lateris, alijsque viliſſimis operibus. Poſtquam vero proieccta eſt Virga in terram, vertitur in Colubrum, vel Draconem: ad ſignandum, quod Rex Ægypti, qui vocatur Draco per Eze-



Ezechiel, latenter insidiatus est Iudæis, ut illos inficeret, dicens: quod concepissent rebellionem contra Regnum suum. Sed Coluber à Moyse apprehenditur per Caudam, & vertitur in Virgam, ad denotandum, quod in fine illorum malorum, convertendi erant filij Israel in Dominos, accipiendo videlicet de novo potestatem regnativam in terrâ Chanaam. Secundo consideratur status populi quantum ad egressum de ægypto sub cura Moyfis: & ad hoc refertur signum Manus, quæ primo intra sinum Moyfis facta est leprosa, sed ibidem reposita sanata est. Per quod designabatur, quod filij Israel quando primo suppositi sunt curæ Moyfis, quæ denotabatur per sinum, fuerunt magis abominabiles Ægyptijs, & in conspectu eorum foetidi: unde dixerunt Moyfi: *Fœtere nos fecisti odorem nostrum coram Pharaone, & servis eius*; Sed per sanationem manus in sequenti repositione, denotabatur consolatio eis futura, per curam Moyfis populum dirigentis: sicut patuit in Mari Rubro, & in alijs beneficijs, per orationem Moyfis à Deo collatis. Tertius status populi, consideratur in ægypto medio tempore, ubi duros labores perpeffus est: inter quos maxima afflictio fuit illud crudele edictum de pueris masculis submergendis in flumine. Et ad hoc refertur signum de Aqua fluminis versa in sanguinem, per quod designabatur, quod Deus requireret ab Ægyptijs sanguinem innocentium puerorum ibidem extinctorum.

### Reflexio 131.

**A**ccepto igitur Moyse Divino mandato, recessit de Deserto, ut illud exequeretur; reversusque est ad socerum suum, cui dixit; *Vadam, & revertar ad fratres meos in Ægyptum, ut videam si adhuc vivunt*. Hanc enim causam solam expressit, aliam vero subticuit, videlicet Divinam iussionem, & apparitionem, ne videretur gloriari. Deinde tulit Vxorera suam, & filios, pergens in Ægyptum: cumque esset in itinere occurrit ei Dominus, idest Angelus  
Deum



Deum representans, quasi veniens ex adverso, ad inferendum malum, eo quod ducebat secum Eliezer filium suum incircumcislam. Cum enim Moyses futurus esset legislator Hebræorum, decebat ut ipse perfectius observaret Legem. Tunc Sephora tulit acutissimam petram, quæ sibi occurrit, & statim circumcidit filium, dicens ad Moysen: *Sponsus sanguinum tu mihi es*. Videlicet, maritus talis conditionis, ut propter te effundere debeam sanguinem filij mei. Dicunt autem Doctores, quod tremor, vel morbus durus incepit torquere Moysen, apparente sibi Angelo; & cum ipse præ anxietate non posset puerum circumcidere, innuit Vxori, ut statim ipsa hoc exequeretur. Peracta igitur circumcissione, Sephora indignata dimisit Moysen, & reversa est in Madiam cum filijs suis. Moyses vero pervenit in Ægyptum, habuitque obviam Aaron: Deus enim revelaverat illi adventum fratris; qui statim narravit ei mandata Dei, & Aaron narravit illa populo. Tunc videntes Israelitæ, quod Dominus respexisset afflictionem illorum, proni adoraverunt Deum in gratiarum actione pro tanto beneficio. Deo enim non possumus aliquod æquale suis beneficijs retribuere; ideoque solas gratiarum actiones in testimonium immensæ suæ Bonitatis exhibemus. Sic in moralibus facit Civitas, quæ non potens dare Regi optimo aliquod æquale, tribuit illi honorem tanquam bonorum maximum inter omnia, quæ possunt Principi dari à devota, & obligata Republica.

## C A P. V. Reflexio 132.



Es scripta provisione Ducis, qui debebat populum liberare, hic consequenter ponitur flagellatio Regis, ipsum populum retinentis. Ingressi igitur Moyses, & Aaron ad Pharaonem, dixerunt ei: *Hæc dicit Dominus Deus Israel: dimitte populum, ut sacrificet mihi in deserto*. Sed impius Rex respondit: *Nescio Dominum, & Israel*.



*Israel non dimittam.* Sciendum est autem, quod licet Deum esse sit per se notum, naturaliter enim est inserta menti humanæ eius notitia; tamen hoc est in quantum mens humana cogitat, Deum esse id quod iudicat maximum in Entibus; sed sub ista determinatione quod sit Deus populi Israel, per fidem, & specialem cultum, pro ut sonabant verba Moysis, non est naturaliter notum. Et sic respondit Pharaon, *nescio Dominum*, quia Ægyptij colebant animalia, tamquam Deos. Deinde præcepit impius Rex, quod nullo modo darentur amplius Israelitis Paleæ de sumptibus Regis ad conficiendos lateres. Commiscebantur enim istæ paleæ cum luto, ut lateres essent fortiores pro ædificijs. Tunc Præpositi Hebræorum valde conquesti sunt contra Moysen, & Aaron dicentes: *Videat Dominus, & iudicet, quoniam fœtere fecistis odorem nostrum coram Pharaone, & servis eius, & præbuisistis ei gladium, ut occideret nos.* Patienter autem toleravit Moyses hanc offensam, nihilque illis dixit, sciens eos in amaritudine positos. Et ex hoc discant Prælati observanda esse tempora proportionata correctioni: nam aliquando non prodest corrigere, immò nocet si fiat in tempore indebito; quandoquidem exacerbatur ille qui corrigitur, & plerumque vilipenditur superioris auctoritas. Ratio autem prædictorum ea est: quia tunc correctio optima est, quando correctus iudicat, & dolet se malum egisse: iudicare vero pertinet ad intellectum practicum; dolere vero de malo commissio, proprium est voluntatis dispositæ, atque imperturbatæ. Passio autem vehemens utrumque destruit. Porro Deus permittebat tanta mala populo suo, ut desideraret exire de Ægypto, & ardentem appeteret pergere ad terram promissam. Hoc vero continue Deus facit, non uni Genti, sed toti mundo; ex Divina namque Providentia fit, ut quilibet status, licet secundum se felicissimus, habeat diversas tribulationes, ut nimirum optemus exire de sæculo hoc, & ad Cœlum festinare: Vnde Aug. ait. *In omnibus rebus posuit Deus aliquam amaritudinem, ut alia queratur felicitas, cuius dulcedo non sit fallax.*

CAP.



## CAP. VI. Reflexio 133.




Descripta Moyſis anguſtia propter afflictionem  
populi ſui, hîc agitur de eius conſolatione à  
Deo ſibi data, qua promiſit illi clariorem  
cognitionem de ſe ipſo, quàm conceſſa fue-  
rit antiquis Patribus, dicens: *Ego Dominus,*  
*qui apparui Abraham, Isaac, & Iacob in Deo*  
*Omnipotente, & nomen meum Adonai non indi-*  
*cavi eis.* Sciendum eſt autem, quod hæc littera varie expo-  
nitur à Doctõribus. Aliqui dicunt, quod hoc nomen *Ado-*  
*nai* ſignificat generale dominium; licet autem Patribus præ-  
cedentibus oſtenderit Deus, ſe totius naturæ Dominum, non  
tamen ita perfecte ſicut Moyſi, per tranſmutationem Crea-  
turarum; ut virgæ in ſerpentem, & ſerpentis in virgam, &  
Fluminis in ſanguinem: quibus mirabilibus clariſſime oſten-  
debatur dominium Dei ſuper Creaturas obedientes ei ad  
nutum, etiam contra naturæ curſum. Sed hoc videtur in-  
ſufficienter dictum, quia antiquis patribus oſtendit Deus ſi-  
milia, ut patet in converſione Vxoris Loth in ſtatuam ſalis;  
& in deſcenſione ignis contra ſuam naturam, ſuper Sodomam,  
& Gomorrhæ, & in miſſione Diluvij. Præterea hoc nomen  
*Adonai*, non ponitur hîc in Hebræo, ſed ponitur nomen Do-  
mini *Tetragrammaton*: hoc autem nomen apud Hebræos re-  
putabatur tantæ ſanctitatis, quod non debebat nominari, niſi  
à ſummo Sacerdote, & in benedictionibus fiendis in Templo;  
ideoque loco huius nominis pronunciabatur, *Adonai*. Sicut  
ſi apud nos hoc nomen Deus, propter ſui ſanctitatem, non  
eſſet licitum nominari, & loco illius, ubicumque ſcriptum  
inveniretur, pronunciaretur hoc nomen, *Dominus*. Et hoc  
modo noſtra tranſlatio, poſuit nomen *Adonai*, loco nominis  
Domini *Tetragrammaton*: nomen autem Domini *Tetragram-*  
*maton*, non ſignificat dominium; & ideo prædictus modus di-  
cendi procedit ex ignorantia idiomatis Hebræi, nam iſti  
Aucto-



Auctores accipiunt nomen quod pronuntiatur, pro illo quod scribitur. Igitur pro meliori resolutione sciendum: quod aliqua dicuntur de Deo per respectum ad creaturas, ut Dominus, Creator, Conservator, & similia. Alia dicuntur de Deo per modum qualitatis circa Divinam essentiam, ut Sapiens, Bonus, & cœtera. Alia per modum quantitatis, ut Immensus, Incircumscriptus, & sic de alijs, licet transeant in Divinam substantiam, quantum ad rem significatam. At nomen Domini *Tetragrammaton*, significat Divinam Essentiam puram pro ut in se existit, circumscripto omni alio, & ideo est nomen incommunicabile, appropriatum soli Deo, quia significat veritatem Divinæ Essentiæ in se. Et ideo melius alij Doctores dicunt, quod Dominus apparuit Patribus præcedentibus, non sub nomine Domini *Tetragrammaton*; sed locutus fuit nomine importante respectum ad creaturas, ideoque dicitur hîc: *Apparui eis in Deo Omnipotente*; Id est, indicavi me illis sub nomine importante respectum ad Creaturas. Moyfi autem indicavit Deus nomen Domini *Tetragrammaton*, dum dixit illi: *Ego sum qui sum*. Per hoc enim significatur necessitas essendi, & plenitudo ipsius esse; quia per verba prædicta importatur infinitus quidam substantiæ Pelagus, quod est proprium Dei.

## CAP. VII. Reflexio 134.



Postquam Moyſes, & Aaron monuerunt Pharaonem verbis, hîc describitur monitio eiusdem in mirabilibus signis. Dixit igitur Deus Moyſi: *Conſtitui te Deum Pharaonis*. Pro quo notandum, quod non dicitur *Deum* absolute, sed *Deum Pharaonis*, quia Deitas non est communicabilis ab extra, licet ab intra sit communicabilis, per generationem, & ſpirationem: nam Pater in Divinis communicavit Filio ab æterno, eſſe Deum, generando ipsum.



ipsum. Et Pater, & Filius tamquam unicum principium, communicaverunt ab æterno Spiritui Sancto esse Deum, per Processionem, & Spirationem activam. Ad extra autem, Natura Divina, seu Deitas, non est communicabilis, licet sit unibilis, vel aliquid sibi unire potens ad Suppositi identitatem. Sicut Verbum Divinum assump sit hominem Christum, ad unitatem suppositi, vel Hypostasis, quod idem est. Aliqua tamen similitudo, & participatio ipsius Deitatis, bene communicatur Creaturæ: unde dicitur *Psal. 81. Ego dixi Dijs estis, & Filij excelsi omnes*: Et infra *cap. 22. dicitur: Applicabitis ad Deos*. Id est, ad Iudices: & hoc modo Moyses dictus est *Deus Pharaonis*, id est potens super eum in Plagis mirabilibus, suo iudicio infligendis. Ingressi ergo Moyses, & Aaron ad Pharaonem, tulit Aaron Virgam, proiecitque illam in terram, quæ statim versa est in Colubrum; non secundum apparentiam sicut Virgæ Magorum, sed secundum veritatem; quia talis conversio facta fuit ad declarationem Divinæ virtutis. Tunc vocavit Pharaon Sapientes, & maleficos, & fecerunt etiam ipsi per incantationes Ægyptiacas, & arcana quædam similiter; proieceruntque singuli Virgas suas, quæ versæ sunt in Dracones, sed devoravit Virga Aaron Virgas eorum. Dicunt autem aliqui Doctores, quod ista devoratio fuit antequam Virga Aaron rediret ad naturam Virgæ, quia devorare competit serpenti, non Virgæ: vocatur tamen Virga, quia prius eius natura talis erat. Alij dicunt, quod Virga Aaron versa fuit in colubrum, & deinde in pristinam naturam Virgæ, ut colligitur ex verbis Textus; & tunc facta Virga, devoravit virgas Incantatorum. Licet autem devorare, proprie loquendo, non competat virgæ, cum non habeat vim nutritivam; tamen similitudinarie, & large loquendo, convenit devoratio etiam rei inanimatæ, sicut dicimus ignem devorare ligna,



## Reflexio 135.

**O**ccasione conversionis virgarum Ægyptiorum Magorum in Dracones, quæritur per Doctores, utrum virtute Dæmonum potuerit fieri ista conversio. Et dicendum absolutè quod non. Pro quo sciendum, quod in compositis ex materia, & forma, materia non fit per se, nec forma, sed totum compositum; & ideo totum transmutatur in totum. V.G. ex toto aere fit totus ignis, quando aer convertitur in ignem ex *Arist. pr. de Generat.* Effectus autem assimilatur Agenti, & in ipso præexistit, saltem virtualiter; & ideo compositum ex materia, & forma non potest produci nisi ab agente composito ex materia, & forma; vel nisi habeat totum compositum in virtute sua. Angelus autem est forma simplex, non habens materiam; nec habet totum compositum in virtute sua, quia solus Deus hoc habet. Conversio autem virgæ in serpentem includit compositum ex materia, & forma; & ideo dæmones ex potentia sua propria, non poterant convertere virgas in dracones. Quia tamen remanserunt in eis naturalia integra, possunt per modum artis applicare activa naturalia passivis naturalibus; & sic potest resultare effectus naturalis; ex subtilitate namque sua innata, cognoscunt omnia naturalia, & sciunt virtutem cuiuslibet rei, scilicet quid agere possit; & quid, & a quo pati possit; & ubi hoc fieri debeat, & quo tempore; ideoque poterant materiam existentem in proxima dispositione ad formam serpentis, supponere proprio activo, & sic sequuta fuisseteductio formæ serpentis de potentia materiæ. Secundo dici potest, quod dicta conversio fieri poterat secundum apparentiam: nam licet materia corporalis non subijciatur virtuti Angelicæ, quantum ad transmutationem prædictam; tamen ei subijcitur, quantum ad motum localem, ut ab omnibus conceditur: & ideo dæmones propria virtute dimissi, potuerunt virgas, à Magis projectas in terram, per motum localem, imper-



imperceptibiliter sensui humano tollere, & loco earum, serpentes aliunde asportatos supponere. Videmus enim quod aliqui Mimi per subtilitatem manuum, & localem motum aliqua sic transmutant, quod homines non percipiunt: unde multo fortius dæmones hoc possunt, quorum subtilitas, & celeritas in motu locali maior est quasi incomparabiliter. Item dici potest, quod dicta conversio fieri poterat secundum apparentiam à dæmonibus, per quandam turbationem organorum scilicet, ut potentia visiva turbaretur aliquibus speciebus naturalibus, secundum quod consueverunt facere omnes Apparitores, sive Prestigiatōres: ut cum oleo quodam incenso, videtur tota domus plena frondosis vitibus; & ex quodam alio fumo, videntur omnes trabes domus esse Serpentes magni. Quarto dici potest, hoc processisse ex quodam motu specierum sensibilium. Etenim nos non immutamur organice ab ipso obiecto per se, sed ab obiecto per formam sensibilem, nempe per speciem rei sensibilis: cum autem talis species maneat in sensu, nihil refert, an ipsum obiectum sensibile sit in potentia organica, aut non, quia æqualiter sentietur. Cum igitur contingat species reservatas in thesauro specierum, refluere ad principium organicum, necesse est, ut fiat sensatio, sicut fieret obiecto præsentē. Vnde sicut aliquis habens coram se serpentem, videt illum, et ab eo organice immutatur, non per se, sed per speciem transmissam per medium; ita si species serpentis manens in thesauro specierum, id est in potentia imaginativa, refluxerit ad potentiam visivam, necesse est, quod ille qui hoc patitur, videatur aspicere coram se serpentem. Istam autem refluxionem formarum fieri demonstrat *Arist. 2. de Somn. & Vigil.* dicens: quod descendente plurimo sanguine ad principium sensitivum, descendunt etiam formæ in imaginatione contentæ; & tunc videntur multa nobis adesse, quæ non adsunt. Ideoque dicendum, quod poterant dæmones immutare vires corporeas intuentium, & cogere de parte imaginativa defluere speciem virgæ ad oculum. VG. dum aspicerent circumstantes



draconem, per prædictam speciem virgæ, putabant virgas esse conversas in dracones; & cessante illa specie, & alia succedente, nempe specie draconis, putabant dracones esse conversos in virgas. Sed licet ista sint optime dicta, tamen non tollunt difficultatem, quæ oritur *ex tex.*, in quo expresse dicitur de Maleficis: *Fecerunt etiam ipsi per incantationes Ægyptiacas, & arcana quadam similiter.* Ex quibus verbis, innuitur vera conversio. Et ideo dicendum, quod fuit vera conversio virgarum in dracones, sed non virtute dæmonum, sed virtute Divina; ut nimirum virga Aaron devoraret virgas Magorum. Sicut Samuel, non revixit per verba Phitonissæ, sed virtute Divina, disponente sic Deo, ut Samuel nunciaret mortem Saulis; non vero quasi Deus concurreret cum Magia. Sic in isto casu: virtute Divina facta fuit conversio, ut devorante virga Aaron virgas Ægyptiorum, resultaret gloria Dei; unde ipsi malefici coacti fuerunt dicere: *Digitus Dei est hic.*

### Reflexio 136.

**P**Ræmissa igitur Regis monitione, & signo ostensivo Divinæ virtutis describitur deinde inflictio pœnæ. Nam tollens Aaron virgam extendit manum suam super aquas Ægypti; idest contra omnes partes Regni, maledicendo aquis; & iubendo illis, ut converterentur in sanguinem. Deinde tetigit coram Pharaone aquam fluminis Nili, quæ statim versa est in sanguinem; computruitque fluvius, quia multitudo piscium ibidem mortui sunt; ex quibus deinde fœtidæ exhalationes manabant: & quia humor ille sanguineus, spissus, & crassus erat, ideo multum susceptivus putrefactionis fuit; adeo ut fœtor intollerabilis, & Tabes pestifera ex eo oriretur, ex qua Ægyptij affligebantur, non vero Hebræi; quia terra Gessen, in qua manebant erat prorsus immunis à tali contagione. Correspondet autem hæc punitio peccato Ægyptiorum, qui tam crudeliter suffocaveran



verant in flumine infantes Hebræorum; & ideo per easdem  
 aquas afflicti fuerunt: sed nec ista poena tanto suffecit sce-  
 leri; nam hîc solum incæpta fuit, deinde in Mari rubro con-  
 summata; ut sicut Ægyptij extinxerant in aquis pueros inno-  
 centes, ita ipsi maris fluctibus miserabiliter mergerentur.  
 Quia vero dicitur in *Tex.* quod Malefici etiam hoc fecerunt:  
 quæritur unde habuerunt aquam convertendam in sangui-  
 nem, cum iam tota aqua Ægypti versa fuerit in sanguinem?  
 Dicunt Hebræi, quod sola aqua Nili, & quæ inde manabat  
 ad rivos, & paludes, versa fuerat in sanguinem; sed aquæ  
 fontium non erant conversæ, & sic ex illis fuit sumpta aqua,  
 & Maleficis exhibita.

## CAP. VIII. Reflexio 137.



Ecce prima plaga, hîc agitur de secunda de  
 Ranis, quæ magnæ, & horribiles, & in ma-  
 xima multitudine erant; nam præter illas  
 quæ reperiebantur in flumine, alias subito  
 produxit Deus magis tumentes, & defor-  
 miores. Dicit autem Iosephus, quod istæ  
 Ranæ brevi tempore moriebantur, & subito putrescebant;  
 adeout ex illis foetor intolerabilis exhalaret. Cum vero  
 Ægyptij comedere vellent, saliebant super cibos in mensa  
 paratos, & super vasa, in quibus fiebant Pulmentorum de-  
 coctiones, fluidaque Tabe maculabant universa. Corres-  
 pondet hæc poena culpæ interfectionis puerorum, sub alia  
 tamen ratione, quam supradicta. Ægyptij namque volue-  
 runt occidere infantes in aqua, ne clamor eorum audiretur, &  
 per hoc oriretur aliquis tumultus in Regno; ideoque iusto  
 Dei iudicio ex eadem aqua Ranæ loquaces exierunt, totam  
 terram suo clamore infestantes. Fecerunt autem, & Malefici  
 per incantationes suas similiter. Dæmones enim de flumi-  
 nibus Ægypti, vel aliunde statim illas adduxerunt, vel Deo



sic disponente, ut supra diximus, productæ fuerunt Divina virtute. Tunc Pharaon vocavit Moysen, & Aaron dicens illis ut orarent Dominum pro ablatione Ranarum: pœnis enim actus, cognovit Deum sibi iuste intulisse supplicium. Orante igitur Moyse recessit statim ab Ægypto Ranarum plaga, non iniquitas à perverso Rege: videns enim quod data esset sibi requies, induravit magis cor suum, & in beneficijs Divinis auxit malitiam.

### Reflexio 138.

**P**ost secundam plagam infligitur obstinatissimo Regi tertia; nec præmittitur comminatio sicut in præcedenti, quia Pharaon non debuit moneri, quasi noviter peccans, sed dure puniri, tanquam in malo perseverans. Igitur Deo iubente percussit Aaron Virga pulverem terræ, & statim facti sunt Scinifes in hominibus, & in iumentis per totam terram Ægypti. Erant autem hæc animalia, Muscæ minutissimæ, & subtiles, quæ tam homines, quam iumenta acutissimis stimulis cruciabant. Correspondet hæc plaga, facta ex elemento terræ, culpæ Ægyptiorum, qua dure afflixerant filios Israel in operibus terreis, videlicet, luti & lateris, ad ædificia construenda. Conati sunt autem Malefici hoc idem facere, sed non potuerunt: dæmones enim nihil possunt, nisi quantum eis permittit Divina voluntas; in hoc autem fuerunt à Deo prohibiti, & sic non potuerunt adducere Scinifes ex diversis mundi plagis, quod facere potuissent propter imperceptibilem eorum velocitatem; non quod possent virtute sua Scinifes prædictos generare, ut prædictum est: nec potuerunt talia animalia producere applicando activa naturalia passivis naturalibus; quia hoc illis non permisit Deus, nec ad conatum Magorum voluit Deus, quod resultarent dicta animalia, sed sola virtute sua Divina, ut appareret in hoc impotentia Ægyptiacæ superstitionis.

Re-



## Reflexio 139.

**C**Um in tot prodigijs dura cervix Pharaonis non flecteretur ad dimittendum populum Israeliticum, Divina Iustitia misit super eum quartam plagam, quæ fuit multitudo muscarum diversi generis. Erant autem foetidissimæ, & venenose; ideoque magnæ afflictionis Ægyptijs. In terra autem Gessen non erant muscæ affligentes Hebræos; quia tamen erant ibidem multi Ægyptij admixti Hebræis, in illa parte, in qua Israelitæ morabantur, & in domibus eorum nullæ muscæ prorsus erant; sed solum in domibus Ægyptiorum: & si aliquando contingebat Hebræum intrare domum alicuius Ægyptij, muscæ ibidem existentes non ledebant illum. Si vero è contrario Ægyptius domum Hebræi intrasset, muscæ eum sequebantur semper adherentes carni illius. Correspondet ista plaga culpæ ægyptiorum, qua afflixerant Hebræos in varijs operibus vilissimis; nempe in exportandis fœcibus extra Civitatem, alijsque immunditijs. Muscæ namque, viles sunt inter omnia animalia, institutæ à natura ad purgandam terram fœcibus. Pharaon igitur sic afflictus, rogavit Moysen ut oraret ad Deum pro cessatione pœnæ sibi & toti Regno suo inflictæ; promittens, si tamen, dimittere populum Dei: unde Moyses dixit, se esse oraturum ad Deum, sed cum egressus fuisset à Pharaone: indignus enim erat Rex impius videre Moysen orantem. Deinde asservit quod recederet plaga à Deo inflicta, tamquam certus de voluntate Dei, qui dederat ei potestatem faciendi quidquid vellet. Non solum autem Moyses, noluit orare Deum præsentem Pharaone, sed prorsus voluit recedere à domo Regia. Et ratio ea fuit, quia in oratione Dominus erat illi appariturus, & locuturus, quod contingere non decebat in domo tam perversi Regis; cum tam ipse quam eius servi, indigni essent audire Angelum Dei cum Moyse loquentem.



## CAP. IX. Reflexio 140.



Descripta quarta plaga, & permanente Pharaone in sua obstinatione, hic devenitur ad quintam. Liberatio namque poenæ præcedentis, non emollivit ullo modo duritiam Regis; sed liberatus à poena, redijt ad pristinam iniquitatem. Quapropter Dominus Deus, misit in toto ægypto pestilentiam, qua perierunt animalia ægyptiorum; remanentibus prorsus illæsis animalibus filiorum Israel. Fuit autem hæc pestis causata ex corruptione aeris cadente super pascua; ideoque animalia pascentia in campis statim perierunt, tamquam fumentia cibum totaliter corruptum, & in summo gradu infectum. Mirabile autem fuit, quod in iisdem campis animalia ægyptiorum, & animalia filiorum Israel simul pascebant, eundemque alimentum prorsus sumebant; & tamen pro ægyptijs fuit mortalis cibus, pro Hebræis vero optimum alimentum. Correspondet ista quinta plaga culpæ ægyptiorum qua afflixerant Hebræos, non solum in proprijs corporibus, sed etiam occidendo eorum animalia, imponentes illis onera gravia, & importabilia. Licet autem dicatur hic in *Tex.* quod mortua sunt omnia animalia ægyptiorum; non est per hoc intelligendum, quod totaliter omnia consumpta fuerint, quandoquidem alia plaga successit, nempe Grandinis, in qua multo plura iumenta perierunt quam in hac; sed vocantur *omnia*, idest multa secundum morem Sacræ Scripturæ, quo iste terminus, *omnis*, ponitur pro multis, ut patet in multis locis.

## Reflexio 141.

Misit interea Pharaon servos suos, ut videret si animalia filiorum Israel eodem modo periissent sicut Aegyptio-



tiorum; cumque cognovisset nihil prorsus perijsse de his, quæ possidebat Israel, auxit magis rabiem, furoremque suum, noluitque dimittere populum. Tunc Deus dixit ad Moysen, & Aaron: *Tollite plenas manus cineris de camino, & spargat illum Moyses in Cælum, coram Pharaone; sitque pulvis super totam terram Egypti: erunt enim in hominibus, & iumentis ulcera, & vescicæ turgentes in universa terra Egypti.* Sciendum est autem quod caminus non solum signat fornacem, sed ignem, vel fornacem ardentem: tollebatur autem cinis iste quasi ardens, ad denotandum eius effectum quod sequi debebat; nam vescicæ turgentes fiunt ex calore: etenim in illo, qui nimis applicatur igni, causantur primò quidam tumores pleni aquositate resoluta per calorem; cinis autem iste erat sumptus de fornace; ideoque satis demonstrabat quid inde futurum esset. Igitur, sparso cinere per manum Moysis, statim facta sunt, tum in Egyptijs, tum in eorum iumentis ulcera turgentium vescicarum, quæ continebant pungentissimam calefactionem; deinde, Cutis combusta, & in se contracta, ruptis vescicis, & putrida facta carne, apparuerunt in eis amarissima vulnera. Correspondet hæc sexta plaga culpæ Egyptiorum, qua afflixerant Hebræos in decoctione laterum in igne fornacis; ideoque facta fuit ex elemento ignis, cum per ignem tam crudeliter fuissent afflicti Hebræi ab Egyptijs.

### Reflexio 142.

**A**Ntequam ad ulteriora procedamus, resolvendæ sunt due difficultates, quæ videntur oriri ex verbis *text.* nam dicitur: *Induravitque Dominus cor Pharaonis;* Et multoties ista verba repetuntur. Igitur sciendum, quod cor accipitur hic pro anima, quæ mollis, & indurata dicitur secundum metaphoram; nam sicut corpus, non cedens volenti imprimere in eo aliquam formam, dicitur durum; & è contrario, si cedat vocatur molle; ita anima, si non assen-

tia



tiat rectæ rationi, dicitur dura; si vero assentiat dicitur mollis: ideoque cor Pharaonis dicebatur indurari, quia visis tot signis, quæ solus Deus facere poterat, non assentiebat; vel si ad modicum, præmentibus angustijs, assentiret, mox rediviva pertinacia, resumptis viribus, superbè dissentiebat. Deus autem qui summè bonus est, non induravit cor Pharaonis apponendo malitiam, sed suam gratiam iustissime subtrahendo. Gratia vero Divina est aliquod mollificativum animæ; quæ cum inest, reddit illam faciliter ad bonum convertibilem; si vero non inest, redditur anima dura, & immobilis ad bonum. Hæc gratia dependet à duobus. Primo à Deo excitante ipsam in anima nostra. Secundo à libero arbitrio ipsi gratiæ se conformanti: quando autem liberum arbitrium gratiæ se conformat, manet gratia; quando verò se illi non conformat, perditur, & sic homo cadit in peccatum; quia licet gratia perficiat liberum arbitrium, tamen ad operandum non violentat: quapropter nisi Deus iterum hominem moveat per suam gratiam motricem, manebit peccator durus quasi lapis; ita ut quantumcumque persuasoria verba ab extra dicantur; aut quæcumque affligentia mala urgeant, mori quidem potest, sed converti non potest; licet enim maneat liberum arbitrium ad bonum, malumque vertibile, tamen non habet id, quo vertatur ad bonum. Hæc autem gratia, quam Deus largitur homini post lapsum, vocatur prima gratia, quæ non cadit sub merito, quia præcedit motum liberi arbitrij; huic autem gratiæ, si liberum arbitrium consentiat, eique cooperetur, promeretur homo secundam gratiam, quæ facit hominem Deo gratum; & ideo vocatur gratia sanctificans. Igitur si aliquis sit, quem Deus post lapsum non moveat, ille induratus efficitur, & in malo finiet; & quia ista induratio resultat ex privatione gratiæ, ideo dicitur Deus indurare aliquem; non quidem positive, apponendo malitiam, vel qualitatem indurativam; sed privative, subtrahendo iustissimè gratiam, propter demerita peccatoris. Sicut Pharaon, tanta mala fecerat, & toties illa  
 itera-



iteraverat, quod non merebatur gratiam sibi apponi. Sed dices; quid magis est, quod Deus aliquem induret apponendo aliquam qualitatem indurativam; aut induret, non conferendo gratiam, cum ista æqualia sint? nam sicut existente malitia in homine, impossibile est ipsum esse bonum; ita non movente Dei gratia, impossibile est ipsum bene agere, & esse bonum. Dicendum, quod licet respectu nostri idem sit, tamen non est idem respectu Dei: quandoquidem apponere malitiam dicit imperfectionem; subtrahere verò gratiam nullam imperfectionem importat; immò dicit perfectionem Divinæ iustitiæ, quæ in pœnam scelerum tam multoties replicatorum, subtrahit iustissimè Deus gratiam suam indigno. Secunda difficultas oritur, ex eo quod dicitur Pharaonis: *Idcirco posui te, ut ostendam in te fortitudinem meam, & narretur nomen meum in omni terra.* Pro intelligentia autem adverte: quod non est putandum quod Deus faciat aliquem peccare, ut in illo demonstret magnitudinem potentiae suæ; quia Deus non indiget nostris malis, ut ostendat suam Omnipotentiam; quandoquidem pluribus alijs modis possunt nobis innotescere attributa Divina: etenim Dei sapientia patet in universali rerum gubernatione, & in quotidiana admirabili rerum dispositione. Bonitas, & eius liberalitas, in numerosa beneficiorum exhibitione. Potentia, in Mundi creatione, mortuorumque resurrectione. Clementia, in remissione delictorum. Iustitia, in præmiorum, & pœnarum condigna retributione. Et sic patet, quod omnia attributa possunt notificari nobis, sine præsuppositione malitiæ hominum, eos flagellando ad declarationem suæ fortitudinis. Et sic concluditur, Deum non induxisse Pharaonem ad obstinationem, ut ipsum deinde puniendo, iustitiam, & fortitudinem suam demonstraret: quapropter, ly, *ut*, non tenetur causaliter, sed consecutivè; quia nimirum Deus est adeo potens, & bonus, quod vertit malum in bonum; ex qualibet enim culpa, elicit aliquod bonum. Et quia peccatum Pharaonis valde malum erat, oportebat ex hac culpa elicere aliquod



quod bonum : hoc autem fuit, ut in ipso demonstraretur fortitudo Dei, & Iustitia, & sic narraretur nomen Domini in omni terra. Est ergo sensus huius literæ; quod malitia perversi Regis erat materia, in qua Divina Iustitia relucebat, His explicatis redeamus ad plagas Ægyptiorum.


### Reflexio 143.

**P**ost sextam plagam, non reliquit Pharaon, sed auxit magis peccatum suum, perseverans in obstinata malitia; quapropter Deus milit contra illum septimam plagam: iussit enim Moyse, ut extenderet manum suam in Cœlum, statimque facta sunt tonitrua terribilia, concutientia mentes malorum ad timorem vicinæ mortis. Deinde Dominus pluit grandinem super terram Ægypti, ad consumendum terræ nascentia, quæ erant in agris. Correspondet ista plaga, per quam fuerunt terræ nascentia contrita, & in modum palearum redacta, culpæ Ægyptiorum, qua afflixerant Hebræos in congregatione Palearum; cum enim non darentur amplius Paleæ expensis Regijs, cogeantur magna industria, & labore illas sibi congregare. In hac ergo plaga superba cervix perversi Regis humiliata fuit; vocavit enim Moysen, & Aaron dicens ad illos: *Peccavi etiam nunc: Dominus iustus; Ego, & populus meus impij: orate Dominum ut desinant Tonitrua Dei, & Grando, ut dimittam vos, & nequaquam hic ultra maneatis.* Adverte autem quod Pharaon non contrebatur meritoriè, ita quod contritio illa esset charitate formata; sed solum pœnitebat ex timore servili, nempe ex formidine pœnæ: dolebat enim, non quia mala quæ fecerat essent offensiva Divinæ Maestatis; sed quia pavebat sibi à Deo mitti duram punishmentem; ideoque nihil merebatur in hac volitione; quia non insurgebat ex radice Divini amoris, à qua redditur opus bonum, & meritorium; sed ex timore servili proveniente ex amore sui ipsius.

CAP.



## CAP. X. Reflexio 144.



Es scripta septima Plaga, subiungitur octava: ablati enim Tonitribus, & Grandine, ita ut nec pluvia appareret, non cessavit Pharaonis inveterata durities: non enim dimisit populum Dei iuxta conditum; sed proposuit magis illum affligere, retinendo in durissima servitute; qua propter Dominus misit super totum illius Regnum Locustas. Sunt autem animalia quæ segetes ita demoluntur, ut solas paleas relinquant in Agris. Fuit igitur devorata ab istis animalibus herba terræ, & quicquid in arboribus erat. Tunc servi Pharaonis, tot calamitatibus afflicti, dixerunt ad illum: *Vsq̃uequò patiemur hoc scandalum? dimitte homines, ut sacrificent Domino Deo suo, non ne vides quod perierit Aegyptus?* Timens ergo Pharaon aliquam seditionem plebis, festinus vocavit Moysen, & Aaron dicens eis: *Peccavi in Dominum Deum vestrum, & in vos; sed nunc dimittite peccatum mihi, & rogate Dominum ut auferat à me mortem istam.* Impius enim Rex simulabat pœnitentiam, ut iustam pœnam evaderet, non verò culpam, de qua nihil dolebat. Vocavit autem Pharaon istam plagam, mortem, quia disponebat ad illam: ex corrosione namque terræ nascentium facta per prædicta animalia, non remanebant fructus terræ necessarij pro sustentatione humanæ vitæ. Correspondet ista plaga culpæ Aegyptiorum, qui perduxerant filios Israel ad amaritudinem; & ideò receperunt pœnam inductivam immediatè ad mortem, qua nihil amarius reperitur. Egressus ergò Moyses de conspectu Pharaonis oravit ad Deum, & statim plaga cessavit, adeo ut nec una quidem Locusta remaneret in cunctis finibus Aegypti.

cfe




## Reflexio 145.

**R**Emota Locustarum plaga, in multiplicatione beneficiorum Dei, magis crevit Pharaonis malitia: quapropter dixit Dominus ad Moysen: *Extende manum tuam in Cælum, & sint tenebræ super terram Ægypti tam densæ, ut palpari queant.* Dicunt autem DD., quod aer ita fuit constipatus vaporibus humidis, & densis, quod tactu poterant percipi: nam tenebræ ipsæ, cum sint privatio lucis, non sunt tactu perceptibiles. In istis autem tenebris, fiebant Ægyptijs visiones imaginariæ horribiles; adeo ut per tres dies in quibus duraverunt, nullus recessit de loco ubi erat propter timorem. Existimabant enim Ægyptij, totum naturæ ordinem fuisse relaxatum; & ideo timebant graviora discrimina affutura quocunque se verterent. Vbi vero habitabant filij Israel, nempe in terra Gessen, erat lux; & quia in hac erant Ægyptij commixti hebræis, respectu Ægyptijs erat caligo obscurissima; respectu vero hebræos, lucidissimus aer; ex quo patet, quod ista plaga facta fuit mediantibus luminaribus Cœli, Deo ad nutum obedientibus, retrahendo videlicet ægyptijs radios suos; & eodem tempore communicando Hebræis lumen suum. Correspondet ista plaga cœcitati mentis ægyptiorum, qui post tot signa manifeste indicantia omnipotentiam, & voluntatem Dei, manebant in obstinata cecitate intellectus. Elapsis autem tribus diebus, in quibus semper manserunt tenebræ in toto ægypto, vocavit Pharao, Moysen, & Aaron; quibus dedit licentiam exeundi de ægypto, dummodo relinquerent Armenta in suo Regno. Sed Moyses respondit, quod debebant secum ducere omnes Greges. Tunc impius Rex in rabien actus, dixit Moyse: *Recede à me, & cave ne ultra videas faciem meam.* Sed valde mirandum est, quomodo Pharao non mandabat Moysen occidi, cum videret omnes plagas sibi infligi ipso operante. Dicendum, quod Pharao secundum se motus fuisset



fuiſſet ad hoc perpetrandum; ſed Deus non permittebat hoc perficere, incutiens illi timorem, & faciens eum credere, quod ſi tangeret Moylem, ſtatim ipſe periret.

## CAP. XI. Reflexio 146.



Esſcripta nona plaga, hîc deſcribitur decima, licet ſolummodo ponatur comminatio, nam inſiſtio ponitur cap. ſequenti. Iuſſit autem Dominus, ut quilibet vir hebræus poſtularer ab amico ſuo, & mulier à vicina ſua, vaſa aurea, & argentea. Satis autem habebant hebræi apparentem cauſam ad petendum talia; quandoquidem proteſtabantur pergere ad ſacrificandum Deo ſuo; in talibus autem requiritur magnus apparatus, ideoque neceſſaria erant vaſa pretioſa, quæ pertinent ad ornatum, & honorem ſolemnitatis. Et ne Iſraelitæ timerent improbabilem talem accomodationem, promiſit Dominus ſe daturum gratiam populo ſuo coram ægyptijs; hoc autem dupliciter erat. Primo quia Deus immittebat quandâ promptitudinem ægyptijs, in modum cuiuſdam liberalitatis, non tamen erat liberalitas, quo ad habitum, ſed quædam impreſſio, quæ pertinebat ad genus cuiuſdam paſſionis, ſeu proclivitatis ad concedendum petita. Secundo poteſt intelligi, quod iſta gratia non fuerit in ægyptijs impreſſa, ſed in Hebræis; ſcilicet quod Dominus dederit illis quandam qualitatem ſupernaturalem, ſecundum quam ita placuerunt ægyptijs, ut darent eis ſtatim omnia quæ poſtulabant: ſicut aliquando experientia patet, quod aliquis non ſcit denegare aliquam rem alicui, quam tamen noluît concedere alteri, quia nimirum placuit ei unus, & non alius. Notandum eſt autem, quod Hebræi in hoc non commiſerunt fur- tum, quia totum fecerunt auctoritate Dei, qui eſt Dominus ſimpliciter omnium rerum; & ideo ſine iniuria poteſt  
uni



uni auferre, & alteri dare. Accedit quod ista fuit iustissima compensatio: nam ægyptij abstulerant multa bona Iudæorum, per extorsiones, & irrationabiles impositiones. Insuper angariaverunt illos multis laboribus, pro quibus nullam mercedem receperant; ideoque nullam ægyptijs irroga-  
verunt iniuriam.

## CAP. XII. Reflexio 147.



Ic inter comminationem Mortis Primogenitorum, & eius executionem, interponitur præceptum de celebratione Agni Paschalis; quia talis celebratio instituta fuit in memoriam percussione primogenitorum ægyptiorum, & salvationis filiorum Israel. Notandum est autem, quod circa immolationem Agni Paschalis duo sunt attendenda. Primum est de præsentis, videlicet status populi Dei exeuntis de ægypto. Secundum autem, erat figuratio ipsius Agni, qui designabat passionem tunc futuram Christi Domini, qui in omnibus Sacrificijs figurabatur; nam ut ait Apostolus *pr. ad Corint. 10. Omnia in figura contingebant illis*. Et antiqui Doctores Hebræorum, asserunt, quod omnes Prophetæ prophetaverunt ad dies Messiae; idest principaliter prophetaverunt de his, quæ fieri debebant à Messia Sanctissimo. Moyses autem fuit maximus Prophetæ, ideoque totum quod scripsit, ordinabatur principaliter ad Christum Dominum; & ideo in immolatione Agni Paschalis, duplex est sensus. Vnus est respectu populi exeuntis de ægypto, de quo primo dicemus. Alius est respectu præfigurationis Christi Domini pro tunc passuri; & hunc sensum tangemus post prædictum: qui sensus licet sit ultimus in prosecutione, tamen est primus in intentione, sicut finis respectu eorum, quæ sunt ad finem.

Re-



## Reflexio 148.

**D**ixit igitur Dominus ad Moysen, & Aaron: *Mensis iste vobis principium mensium, primus erit in mensibus anni.* Sciendum est autem, quod September erat primus mensis anni, secundum communem opinionem Hebræorum, quia in eo creatus fuit mundus; & usque ad illud tempus vocabatur September primus mensis apud omnes Hebræos; sed ex notabili beneficio quod Deus illis præstitit in mense Martij, vocatus fuit de cœtero Martius primus anni mensis. Hoc autem valde faciebat ad memoriam Divini beneficij: videndo namque mense mutato, recordabantur quod propter eorum liberationem mutatio facta erat, & sic elevabantur mente devota ad gratias reddendas Divinæ Clementiæ. Insuper Hebræi mutaverunt ex hoc mirabili eventu Ægyptiacæ liberationis computationem annorum: nam prius computabant ab Orbe condito; sed tunc incep-  
runt computare annos ab exitu de Ægypto. Sic Græci, à primo anno Regni Alexandri annos suos computant, cum prius computarent illos per Olympiades; quia nimirum Alexander Monarchiam, inter Græcos Reges, primus adeptus est. Similiter Romani, annos suos computabant ab Vrbe condita; quia constructio Romanæ Civitatis, aliquod magnum, & mirabile reputandum erat. Et tandem nos Christiani, maiori & sanctiori motivo, annos computamus à Nativitate Christi Domini, quia ista fuit beneficiorum omnium maximum, cum extiterit nostræ reparationis exordium, & totalis causa felicitatis æternæ.

## Reflexio 149.

**P**ost constitutionem primi mensis dedit Dominus præceptum de immolatione Agni Paschalis dicens: *Decima die mensis huius tollat unusquisque Agnum per familias,*

M

lias,



*lias, & domos suas . Erit autem Agnus absque macula, masculus, anniculus : iuxta quem ritum tolletis, & Hædum ; & servabitis eum usque ad quartam decimam diem mensis huius : immolabitq; eum universa multitudo filiorum Israel . Sciendum est autem, quod non solum Agnus, sed etiam Hædus poterat immolari ; nam ubi translatio nostra habet : *Iuxta quem ritum tolletis, & Hædum .* In Hebræo habetur : *De Arietibus, vel de Capris accipietis illum .* Iubetur vero summi à decima die mensis, & fervari usque ad decimam quartam diem, duplici de causa . Vna erat, quia filij Israel occupati erant in præparando se ad recessum de Ægypto, cum omnibus quæ habebant ; in qua præparatione requirebatur magna sollicitudo, & distractio ; & ideo ne hoc daretur oblivioni, præceptum fuit, quod acciperetur Agnus, vel Hædus ante solemnitatem per quatuor dies . Secunda fuit, ut in illis quatuor diebus videretur, an in illo Agno, vel Hædo, esset aliqua macula, propter quam non deberet immolari ; eaque reperta, haberent tempus providendi sibi de alio Agno . Iste autem debebat esse masculus, quia sexus masculinus est perfectus, & anniculus, idest infra primum annum ab octavo die nativitatis, & non ante, usque ad completionem anni, & non post ; quia in hoc tempore iudicabatur magis perfectus : Deo autem debent immolari sola perfecta, cum ab illo omnis humana perfectio emanet . Immolandus erat Agnus ad Vesperam, quæ incipiebat ab hora septima quartæ decimæ diei ; quia tunc sol incipit tendere ad occasum ; & talis hora iam pertinebat ad diem sequentem solemnem, in quo exierunt Israelitæ de Ægypto .*

### Reflexio . 150.

**D**eterminata immolatione Victimæ iussit Deus, ut de sanguine illius aspergerentur Postes domorum, dicens : *Sument de sanguine eius, & ponent super utramque Postem, & insuper liminaribus domorum .* Erant autem Postes



Postes duo Ligna, intra quæ clauditur Ostium secundum suam longitudinem. Superliminare vero, erat Lignum transversale super Postes Ostij, quod vocatur Limen superius; unde tota pars superior Ostiorum, erat rubricata sanguine. Per hoc autem distinguebantur habitacula Hebræorum à domibus Ægyptiorum: sicut enim erant distincti interius per fidem, ita voluit Deus, quod prædicta sanguinis aspersio, esset signum exterius distinguens populum suum; & protestatio fidei interioris; ideoque subditur in Tex. *Videbo sanguinem*: scilicet visione approbationis, in quantum erat signum fidei. Adde quod in ceremonia Agni Paschalis, intendebat Dominus principaliter, signare mortem Christi Domini Mediatoris; ideoque mandavit, ut iste sanguis poneretur in Postibus domorum, ad hoc ut liberæ essent à percellione futura. Sicut sanguis Filij Dei liberat fideles à morte æterna: & sic Hebræi, saltem implicite confiterentur, se per Messiae sanguinem esse liberandos. Et idem erat in alijs ceremonijs. Etenim ceremonialia proficiebant Hebræis, non quidem in seipsis; sed quia per ea expresse, vel tacite profitebantur Messiam tunc futurum, in quo illa Vmbratilia cessare debebant.

## Reflexio 151.

**P**ost immolationem Victimæ Paschalis, describitur eius comectio. Et notandum est, quod Hebræi debebant comedere carnes nocte illa assas igni; quia prædicta immolatio, significabat dispositionem populi ad velociter recedendum de Ægypto; & ideo præcipiuntur carnes assari, quia hoc speditius fieri poterat: sicut pariter iuebatur eis, ut comederent panes azymos; quia isti statim fieri poterant, ex commixtione aquæ, & farinæ. Cum istis autem manducare debebant lactucas agrestes, ad designandam amaritudinem, quam in servitute Ægyptiaca sustinuerant; ut cognita miseria præterita, assurgerent humiliter in Dei laudes, cuius

M 2

miseri-



miseriordia fuerant liberati. Non poterant autem cum Agno comedere aliquod crudum: & hoc iuebatur in detestationem idolatriæ: nam aliqui Idolatræ in honorem deorum suorum, carnes aut crudas, aut semicradas manducabant: nec poterant Hebræi comedere coctū aqua, propter supradictam rationem; nam carnes expeditius assantur, quam aqua coquantur. Omnia namque ista, portendebant quandam velocitatem exeuntium de Ægypto. Dicitur deinde in Tex: *Caput cum pedibus eius, & intestinis vorabitis*. Sed sciendum, quod in hæbreo non est: *Vorabitis*. Et ideo ista litera non refertur ad comestionem, sed refertur ad assationem, de qua immediatè prædicitur. Est igitur sensus, quod caput Agni de corpore abscissum, & pedes non debebant per se assari; sed caput iunctum corpori, & pedes similiter. Intestina vero amovebantur, ut lavarentur; & lota reponebantur, assanda cum corpore Agni. Omnia autem ista mandabat Deus consumari; quia hæc erat Victima Domini; ideoque nihil de illa perire debebat, cum esset aliquod sacrum. Demum iuebat Deus, ut omnes Israelitæ haberent renes accinctos, & calceamenta in pedibus, tenentes Baculos in manibus, ad denotandum, quod debebant esse parati ad exeundum de Ægypto; & quod post cœnam illam, nihil aliud agere debebant quam egredi.

### Reflexio 152.

**P**ostquam, Deo concedente, vidimus de Figura, debemus breviter videre de ipso Figurato. Agnus ergo à Iudæis immolabatur; quia Christus Dominus ab eisdem pati debebat. Tota multitudo filiorum Israel immolat Agnum; quia omnes coram Pilato petierunt Dei Filium interfici. Immolatur Agnus ad Vesperam, quia Christus ad vesperscente Mundo, & in ultimis diebus passus est: dies namque Messiae vocantur novissimi per Prophetas. Sanguis Agni in utroque Poste ponitur: quia sanguis Christi Domini



ni liberat animas ab æterna morte. Istud animal debebat esse Agnus; ut sic signaret mansuetudinem Christi Redemptoris; poterat autem aliquando accipi Hædus qui foetet; quia Caro Christi, licet esset mundissima, tamen venit in Mundum in similitudinem carnis peccati. Non confringebatur Os Agni; ad signandum, quod in Corpore Christi Domini, nullum Os erat in sua amarissima passione frangendum. Porro sicut Agnus iste typus Christi fuit, ita comestio illius designabat sumptionem Eucharistiæ. Carnes igitur Agni comedebantur nocte, quia Corpus Domini in tenebrosa nocte huius Sæculi accipitur à fidelibus, tanquam solamen verum infirmarum nostrarum mentium. De carnibus Agni nihil relinquebatur in mane; quia in mane, quod est principium Vitæ gloriosæ futuræ, non sumemus sacramentalitèr Christum; sed delectabimur in illo fruantes ipso Deo. Carnes Agni erant assæ igni; quia Christus Dominus passus est ex nimio amore suæ Charitatis erga nos. Si quid autem maneret de carnibus Agni in nocte, igne cremandum erat; ad significandum, quod si de credibilibus pertinentibus ad Christum, in tenebrosa nocte huius sæculi à nobis aliquid concipi non potest, relinquendum est Igni Spiritus Sancti. De carnibus Agni nullus alienigena comedebat; quia nullus nisi Catholicus debet accipere Christum sacramentalitèr. Carnes Agni comedebantur cum Azymis, quia Christus debet sumi cum magna puritate, & sinceritate cordis. Comedebatur Agnus etiam cum Lactucis agrestibus; ad designandum, quod debemus sumere Eucharistiam cum amaritudine animæ, memores nostrorum scelerum. Renes accingebantur, ut significaretur futuris credentibus, quod non licet sumere Eucharistiam, nisi quis abstineat à carnalibus delectationibus. In esu Agni tenebant Israelitæ Baculum in manibus; ad denotandum quod in sumptione Eucharistiæ, debet mens nostra sola fide sustentari. Habebant Hebræi calceamenta, & quia ista fiunt de pellibus animalium mortuorum, signabat quod ut dignè Christum sumamus, Sanctorum Patrum, in Domino



mortuorum exempla, mentibus nostris affigere debemus; ut sic in virtute proficiamus. Tandem Agnus in una domo comedebatur; ad denotandum quod extra unitatem Ecclesiæ non potest sumi Christus, quandoquidem extrà Ecclesiam non datur verus Sacerdos, qui possit Eucharistiam conficere.

### Reflexio 153.

**I**Nstituta, & celebrata Agni Paschalis festiuitate, devenitur ad decimam plagam iam comminatum. Etenim in medio noctis illius, in qua comederant filij Israel Pascha, percussit Dominus omne Primogenitum in tota Aegypto, tam in hominibus, quam in iumentis; & incæpit plaga à Primogenito Pharaonis, qui in solio eius sedere debebat, perveniens usque ad primogenitum Ancillarum: quapropter clamor magnus factus est in toto Regno; non enim erat domus, in qua non reperiretur mortuus. In tali nocte prohibiti fuerunt Hebræi exire hostium domus; quia apparebant visiones horribiles, transeunte per vicos Angelo exterminatore; undè nimis territi fuissent videndo talia. Tunc Pharaon surrexit de Strato suo; & timens totam Aegyptum perituram, si Iudæi mansissent in illa, statim dedit licentiam illis, ut recederent, & immolarèt Deo, sicut petierant. Insuper Aegyptij urgebant populum Israel, ut velocitèr de terra sua exiret. Igitur profecti sunt filij Israel sexcenta fere millia peditum Virorum, absque Parvulis, & Mulieribus. Insuper Vulgus promiscuum innumerabile ascendit cum Israeliitis; etenim multi Aegyptij viri, & mulieres, videntes ea, quæ fecerat Dominus pro Hebræis, iunxerunt se illis, conversi de Gentilitate ad Iudaismum. Habitatio verò filiorum Israel, qua manserunt in Aegypto, fuit quadringentorum triginta annorum, ut dicitur in Tex. Iste verò numerus, secundum Doctores Catholicos, incipiendus est à tempore, quo Abraham recessit de Aram, ut veniret in terram Chanaam, in qua cum filio suo Isaac mansit, ut peregrinus; & similiter Iacob



cob usque ad descensum filiorum Israel in Aegyptum, ubi solum steterunt 210. annos, ut dicunt Hebræi ex suis Chronicis: quapropter exponenda est litera sic. Habitatio filiorum Israel, qua manserunt in Aegypto, unita cum illo tempore, quo manserunt in terra Chanaam ut peregrini, fuit 430. annorum. Tota vero mansio denominatur ab Aegypto, quia fuit diuturnior, & ultima; res autem denominatur à fine. Secundum Hebræos autem numerus prædictorum annorum incipit ab illo tempore, quo Dominus apparuit Abrahamæ, dicens ei Gen. 15. *Peregrinum erit semen tuum in terra non sua annis 400.*

## CAP. XIII. Reflexio 154



Ecce morte primogenitorum Ægyptiorum, ponitur hîc Præceptum de redemptione primogenitorum Israelitarum; ut nimirum per hoc semper gratias redderent Deo de tanto beneficio sibi præstito. Dixit igitur Dominus ad Moysen: *Sanctifica mihi omne primogenitum quod aperit vulvam in filiis Israel, tam de hominibus, quam de Iumentis, mea sunt enim omnia.* Sciendum est autem, quod licet omnes res sint ipsius Dei per creationem, & conservationem; tamèn primogenita Hebræorum dicebantur esse Dei, non solum prædictis modis, sed alio speciali: nam ex hoc quod Dominus, percutiens primogenita Ægyptiorum salvavit primogenita Israelitarum, fuerunt tunc speciali modo obligata Deo. Prætereà adverte, quod sanctificatio propriè accepta, est applicatio alicuius ad Divina, & hoc modo Tribus Levi fuit sanctificata Domino. Alio modo accipitur magis largè, nempè pro redemptione illius rei, quæ est Domino obligata, & sic accipitur hîc; quia primogenita debebantur redimi per pretium datum Sacerdoti. Sanctificatio verò animalium primogenitorum, intelligebatur tantum de



mundis, quæ erant immolatitia, & per consequens applicabilia ad Divinum cultum. Si verò accipiatur sanctificatio largè, prout se extendit ad sustentationem Ministrorum; tunc etiam primogenita animalium immundorum sanctificabantur Domino in quantum redimebantur, ut habetur *num. 18.* & pretium erat Sacerdotum, excepto primogenito canis, qui non redimebatur, sed interficiebatur. Primogenitum autem Asini mutabatur Ove immolanda. Et dicunt Rabbini, quod Asini fuerunt in magno adiutorio filijs Israel dum exirent de Aegypto, portando Mulieres, & Parvulos, & reliqua onera; ideoque quantum ad aliquid, primogenitum Asini fuit positum cum animalibus mundis: non quod immolaretur Deo, sed quod loco ipsius offerretur ovis immolanda pro illo,

### Reflexio 155.

**P**ost ceremoniarum narrationem, redit Divina Scriptura ad historię continuationem, dicens: *Cum emisisset Pharaon populū, non eos duxit Deus per viam terræ Philisthym, quæ vicina est, reputans ne forte pœniteret eum, si vidisset adversum se bella consurgere, & reverteretur in Aegyptum.* Adverte autem, quod Divina Scriptura loquitur hic plano modo, ut nos intelligamus: nam ponitur Deus deliberans more humano aliquid conditionalitè fiendum, quasi Deus dubitaret quod populus pœniteret in futurum capti itineris, & vellet redire in Aegyptum; sed non est talis conditio, aut dubitatio in Deo, qui omnia actualitè scit, sive præsentia, sive futura. Licèt autem posset Deus solo nutu defendere Israelitas, & Philisthæos delere, tamen quia nondum demeruerant sic puniri, & expelli de terra sua, noluit Dominus Hebræos pergere per dictam terram, ne pugnando illos occiderent; sed circumduxit illos per viam Deserti, quæ est iuxta Mare Rubrum, & armati ascenderunt; habuerunt enim arma ab Aegyptijs, qui sicut dederant vasa aurea, & argentea, vestesque pretiosas; ita etiam tradiderunt arma ad illa de-

fen-



fendenda à prædonibus, si occurrissent eis. Dominus autem præcedebat illos per Angelum, qui anteibat exercitum per diem in Columna Nubis, quæ non solum ostendebat viam, sed etiam protegebat populum ab ardore Solis, cuius calor multum intemperatus est in terra illa, cum maior pars Arabiæ sit in Tertio Climate. Per noctem verò in Columna Ignis. Dicunt autem aliqui Doctores, quod eadem fuit Columna, quæ obumbrabat per diem, & illuminabat per noctem: & vocabatur duplici nomine, propter duplex officium. Alij dicunt quod fuit duplex: Vna per diem, quæ recedebat in Vespere, peracto officio suo, & tunc subintrabat Columna Ignis, ut luceret per noctem: utraque autem positio potest esse vera, nam totum illud fiebat Divino miraculo.

## CAP. XIV. Reflexio 156.



Vm supra descriptus fuerit modus procedendi Israelitarum, hinc ponitur remotio impedimenti. Igitur cum filij Israel pergerent versus Mare Rubrum, reversi sunt aliquantulum, de Præcepto tamen Dei, versus Aegyptum, posueruntque castra in loco valde periculoso; nam ut ait Iosephus, locus ille ex una parte habebat Mare; & ex alio latere Montem asperissimum, adeo ut non patebat illis fuga nisi ex illa parte per quam venire poterat Pharaon. Qui audiens Israelitas posuisse Castra in loco sic arctato, tulit statim sexcentos Currus, & cum Ducibus exercitus sui insecutus est Hebræos. Fuit autem apud Antiquos Currus bellicum instrumentum, eratque Quadriga habens falces, sive gladios acutos in Rotis, adeo ut quicquid obviam haberet scinderet, & secum traheret. Et si quæras, unde Pharaon habuerit equos, cum supra dicantur omnia iumenta mortua? Dico quod illa mortalitas fuit solummodo super animalia, quæ erant in campis, equi autem fortiores, & pretio-



pretiosiores tum Regis, tum nobilium personarum, reservabantur in domibus. Præterea, multi de populo miserunt servos ad illa accipienda, quæ morabantur ad pascendum in agris; crediderunt enim multi ex Aegyptijs plagæ futuræ à Moysè comminatæ. Ascendit igitur obstinatissimus Rex Curram; cumque in conspectu filiorum Israel cum toto suo exercitu stetisset, magnus pavor invasit populum Dei, adeo ut Plebs murmuraret contra Moysen. Tunc sanctus Dux convertit se ad humiliter Deum orandum: cui Dominus dixit: *Quid clamas ad me? loquere filiis Israel ut proficiantur. Tu autem eleva Virgam tuam, & extende manum tuam super Mare, & divide illud, ut gradientur filij Israel in medio Maris per siccum.* Non est autem per illa verba: *Quid clamas ad me?* Intelligendum, quod Oratio Moysis displiceret Deo; sed ut ostenderetur exaudita. Patet etiam, quod licet Moyses esset securus de adiutorio Dei, tamen non cessabat ab oratione; quia Deus adhuc vult rogari à Sanctis de his, quæ facere disposuit, ad illorum meritum. Præterea, notandum quod noluit Dominus Hebræos pugnare cum Aegyptijs, quia nati erant in servitute, & in illa nutriti; ideoque licet fortitudinem corporis haberent magis quam Aegyptij, tamen eorum animus nimis pavidus erat. Naturaliter enim illi, qui tota vita sua assueti sunt iugum ferre servitutis, inepti sunt ad bellum, & ad virilitates animosas, maximè contra illos quos Dominos habuerunt. Et ista fuit una de causis, quare Deus tenuit Hebræos in deserto, usquequò moreretur universa illa generatio, quæ de Aegypto egressa fuerat; introduxitque in terram Chanaan novam generationem natam in deserto, inter asperitates viarum, nulloque iugo servitutis oppressam; ut sic corde impavido occurreret hostibus; nec bellorum labores abhorreret, utpotè assueta miserijs.

Re



## Reflexio 157.

**A**ccepto igitur Moyſes mandato Dei, percutiens Virga Mare, ſtatim diſiſum eſt, adeout aqua eſſet quaſi murus à dextris, & à ſiniſtris. Porro iſta elevatio Virgæ, & extenſio manus ſecundum ſe nihil proderat; ſed iſta fiebant ad ſignandum, quod Deus ad tale ſignū dividebat Mare in utilitatem populi ſui. Igitur diſiſo Mare ingreſſi ſunt filij Iſrael in fundū illius, ſiccatum per ventū immiſſum à Deo, ut mundius, & ſuavius incederent. Deinde Columna Nubis, quæ prohibebat Ægyptios accedere ad Hebræos (erat enim tenebroſa ex parte exercitus Pharaonis, adeout nullo modo poſſent Ægyptij videre Iſraelitas; ex parte verò Hebræorum erat lucidiſſima) noctem totaliter illuminans, reſceſſit; & tunc Ægyptij videntes Hebræos per Maris alveum tranſiſſe, perſecuti ſunt illos per eandem viam, credentes feliciter pergere etiam ipſi per Maris alveum; ſed extendens Moyſes manum ſuā ſuper Mare, reſverſum eſt ſtatim ad priorem locum; fugientibuſq; Ægyptijs, occurrerunt aque, & involuit eos Dominus in medijs fluctibus: factūque eſt Dei ordinatione, ut cadavera eiſcerentur ad litus oppoſitū, tum ad conſolationem Hebræorum; tum ut iſti haberent ſpolia Ægyptiorum, quæ quidem fuerunt multo maiora quam illa, quæ per accomodationem ab ipſis acceperant; tum ut haberent arma ad ſe defendendum contra hoſtes inſurgentes.

## CAP. XV. Reflexio 158.



Narrato Divino Beneficio hinc ſubiungitur gratiarum actio. Moyſes enim composuit Carmen, docuitque filios Iſrael, ut illud unanimiter canerent. Poſt gratiarum autem actionem relinquentes Mare Rubrum, ambulaverunt Iſraelitæ tribus diebus per ſolitudinem; & dicit Text.  
Quod



Quod non inueniebant aquam, scilicet ad sufficientiam, ad eorum sitim totaliter explendam, & animalium: si enim nullam aquam prorsus inuenissent, non potuissent tum homines, tum iumenta hoc sustinere spatio trium dierum: sed in Sacra Scriptura illud quod est modicum, nihil esse dicitur; nam quod modicum est, reputatur quasi nihil, ex 2. *Physic.* Deinde venerunt in *Mara* ubi non poterant bibere aquas eo quod essent amaræ; nam erant falsuginosæ, & sulphureæ: unde populus murmuravit contra Moysen. Isti autem fuerunt homines vulgares, qui non respiciunt nisi præsentia sensibilia. Sapientes verò, qui considerabant Dei beneficia præterita, patienter, & humiliter ferebant aquæ inopiam sperantes de Divino auxilio sibi affuturo. Tunc Moyses clamavit ad Deum, qui ostendit ei Lignum. Et dicunt Doctores quod erat de natura sua amarum, ad hoc ut ibi esset maius miraculum, dum per eius immissionem dulces redderentur aquæ. Deinde Dominus videns Israelitas otiosos, ne ex hoc declinarent ad peccata, constituit illis præcepta, atque iudicia, ut sic illa meditando, occupati remanerent. Fuerunt autem ista Præcepta, & iudicia, secundum DD. respicientia ad communem convictum; ut nimirum scirent qualiter deberent iuste ad invicem conversari; nam alia, fuerunt data in Monte Sinai. De Mara venerunt Israelitæ in Elim, ubi erant duodecim fontes secundum numerum duodecim Tribuum, ut quælibet haberet fontem suum, ne ex haustu communi oriretur dissensio inter illos. Fuerunt etiam ibidem septuaginta Palmæ; tum ut recrearentur Hebræi illarum fructibus; tum in signum quod habituri erant septuaginta Iudices sub Moyse.

CAP.



## CAP. XVI. Reflexio 159.



Osita aquarum provisione, hinc subsequitur præstatio alimenti. Igitur profecti sunt Israelitæ de Elim, & venerunt in Desertum Sin, ubi ut dicitur in Tex. *Omnis congregatio murmuravit*: pauci enim fuerunt qui sperarent in Divino auxilio, ideoque Divina Scriptura loquitur generaliter. Acceperunt autem Hebræi occasionem murmurandi, quia decimaquinta die Mensis secundi ab exitu de Ægypto defecerunt Victualia, quæ secum portaverant: vixerant enim triginta tribus diebus de illis non comedendo ad saturitatem, sed solummodo ad famem temperandam. Prædicta namque provisio erat ut mortem arceret, non ut delicias ministraret; sed iniqua plebs Temperantiæ nescia murmuravit dicens: *Vtinam mortui essemus per manum Domini in terra Ægypti, quando sedebamus super Ollas carniū, & comedebamus panem in saturitate: cur eduxistis nos de Ægypto, ut occideretis omnem multitudinem fame?* Tunc Moyſes de Mandato Domini dixit eis: *Dabit vobis Dominus Vespere carnes edere, & mane Panes in saturitate, eo quod audierit murmuraciones vestras, quibus murmurastis contra eum.* Sed hinc quæritur, quare dedit eis carnes in vespere, & Panes in mane sequenti, cum convenientius videretur dari carnes in mane? Dicendum quod Hebræi conquesti fuerant primo de defectu carniū, & secundo de defectu Panum; & ideo eodem ordine, quo petierunt datus fuit illis cibus. Addunt aliqui DD. hoc fuisse, quia convenientius, & salubrius est comedere magis in nocte quam in meridie, quia in nocte magis uniuntur Spiritus ad stomacum propter antiparitalim, & sic efficitur perfecta digestio. Præterea, in nocte non est anima ita distracta à formis sensibilibus sicut in meridie, ideoque totaliter est intenta concoctioni. Vespere igitur ascenderunt voluntate Divina coturnices in magna abundantia, usque



usque ad castra, & ibi descenderunt, itaut avara plebs posset illas capere libito suo, & sine ulla molestia, vel labore habere id quod tam vehementer optaverat, ad explendam inordinatæ gulositatis suæ appetentiam.

### Reflexio 160.

**P**ost dationem carniū, misit Divina liberalitas panem ad populum; etenim in sequenti mane per circuitum Castrorum iacuit Ros, idest Manna, quæ erat ad modum Roris congelati; habebat enim similitudinem Pruinae, quæ est Ros congelatus. Cumque operuisset superficiem terræ, apparuit in solitudine minutum, & quasi pilosum; videlicet sicut granum frumenti, à quo Cortex est amotus ex percussione Pili, seu Baculi; tunc enim triticum est albi coloris, & huius coloris erat Manna. Vocatur autem Manna, *Minutum*, quantum ad figuram; non enim coniungebatur post casum in unum cumulum; sed erat totaliter divisum in Granula, quæ erant satis dura. Non cadebat autem in Castra inter Tentoria, sed extra, in solitudine, quia loca Castrorum erant immunda propter fæces hominum, & iumentorum, & propter terram pedibus attritam. Dicunt vero Doctores, quod primò cadebat Pruina super terram, & postea Manna desuper; deinde Ros aliquantulum congelatus super ipsum, itaquod Manna erat in medio mundissimè custoditum, utpote repositum inter duo stramenta. Vocatur autem Manna, Panis, quia pro illo tempore erat fundamentum aliorum ciborum, sicut est panis; vel quia ad ignem indurabatur, adeout formarentur inde panes. Naturalis vero gustus Mannæ, erat quasi sapor panis facti de Simila cum mellis Commixtione. Appellavit autem populus Israel ipsum, *Man*, idest cibum paratum à Deo, quia mittebatur de Cœlo quotidie, ut populus continuè sustentaretur, nec indigeret laborare in colenda terra pro pane recipiendo.

Re-



## Reflexio 161.

**C**VM Divina providentia præstitisset populo Iudaico tam singulare beneficium, placuit eidem prescribere aliquos modos in manducatione Mannæ. Et primò iussit ut acciperetur de Manna unum Gomor per singula capita. Gomor autem erat decima pars Ephæ; sed quantitas istorum nobis prorsus incognita est. Sed dices, hanc assignationem fuisse inconvenientem: nam in tanta multitudinē erant personæ diversarum complexionum, quæ plus, & minus indigebant de cibo; non enim est idem medium omnibus sicut dicitur 2. *Ethic*; & ideo illud quod est conveniens uni, alteri plus indigenti est deficiens; & minus indigenti est superabundans. Dicendum, quod sicut iste cibus dabatur Divino miraculo, ita eodem modo fiebat, ut plurimum indigenti Gomor sufficeret; & à minus indigente consumi valeret absque ulla superfluitate, vel nimia repletionē. Ex Divina namque providentia factum est hoc, ne ex cupiditate, & gulositate illi qui fortiores erant, debiliores opprimerent; & sic in populo oriretur seditio. Sed hoc præceptum Dei non fuit ab omnibus observatum: nam aliqui collegerunt plus, alij minus; sed ministerio Angelorum non relinquebatur illi, qui cupiditate, & avaritia plus acceperat, de Manna, nisi unum Gomor; & qui minus acceperat, reperit unum Gomor per singula capita familiæ suæ. Secundum præceptum fuit, ut Manna non relinqueretur in mane. Sed rebellis populus timens sequenti die non invenire Manna, conservavit ex illo quod collegerat; sed computruit, & scatere cepit vermibus. Ratio huius præcepti fuit, ut Hebræi totaliter sperarent in providentia Divina, expectantes certissimè pro qualibet die largitatem Dei; & propter hoc cum incalesceret sol liquefiebat Manna; quæ quidem liquefactio non contingebat naturaliter, nam fuisset similiter facta liquefactio posito æquali calore ignis; sed appposito igne, dum coqueretur in olla non



non liquefiebat, ut patet *Num. 11.* sed indurabatur, adeo ut fierent ex eo Tortulæ; ergo nec naturaliter liquefiebat ad calorem Solis, nec ad ignem naturaliter indurabatur, sed totum erat ex dispositione Divina. Indurabatur namque ad ignem, quia sic expediebat ad cibos formandos; liquefiebat vero ad calorem Solis, ne manens in agro colligeretur pro altera die, quod Dominus nolebat propter prædictam rationem. In die autem Sabbati non cadebat Manna, propter requiem talis diei, in qua debebant Israelitæ manere apud semetipsos cogitantes Divina beneficia, & gratias agere Deo pro illis.

## CAP. XVII. Reflexio 162.



Postquam descripta est provisio alimenti sicci, quod est cibus, hic describitur provisio alimenti humidi, quod est potus. Profecti ergo filij Israel de Deserto Sin, castrametati sunt in Raphidim, ubi non erat aqua. Sed dices, quare Dominus eduxit eos per talem viam, ubi paterentur tot defectus potus? Dicendum quod hoc fuit, ut ex frequenti necessitate oporteret illos recurrere ad Dominum, & sic sub timore Dei retinerentur. Per hoc etiam bonorum patientia, & malorum nequitia declarabatur. Videns vero plebs Iudaica defectum potus, noluit etiam admodicum sustinere penuriam, sed murmuravit contra Moysen. Qui statim clamavit ad Dominum dicens: *Quid faciam populo huic? adhuc paululum, & lapidabit me.* Hoc autem dicebat, tum timore naturali sui ipsius; tum zelo honoris Dei, ne se interfecto populus per idolatriam à vero Deo recederet. Tunc iussit ei Deus, ut tolleret in manu sua Virgam, & percuteret Petram Horeb, ex qua exirent aquæ ad sitim populi explendam. Dicunt autem DD. quod aliqui de populo ita erant maligni, ut dicere auderent, ministerium illius virgæ,



virgæ, solummodo se extendere ad mala infligenda, non ad concedenda bona; & ideo voluit Deus, quod Moyses uteretur Virgæ ministerio in aquarum educatione, ut coram omnibus appareret, quod non solum erat instrumentum Divinæ Iustitiæ in puniendo; sed etiam Misericordiæ in benefaciendo. Porro iste Fons, qui tunc de petra effluxit, usque hodie abundanter fluit; ita quod Vallis tota irrigatur copiosissime; antea vero non erat habitata, propter aquarum penuriam; nunc vero est valde populata, & vocatur vallis Moylis, quia ibi silicem percussit.

### Reflexio 163.

**D**Um Hebraicus populus quietè moratur in Raphidim, venerunt Amalecitæ, ut contra illum pugnarent: invadebat enim iste Populus futuræ exaltationi Israelitarum, & ideo se illis opposuit, ne ad terram sibi promissam perveniret. Audiens autem hoc Moyses, iussit Iosue ut statim eligeret viros, & statim pergeret contra inimicos: non enim voluit expectare hostilem exercitum, ne timida plebs paveret, & ne daretur maior audacia adversarijs. Permisit autem Dominus istud bellum consurgere contra Populum suum, ut ex victoria sequenti, esset audacior de cœtero contra insurgentes hostes, & ut de spolijs Amalech muniretur armis, & spolijs, quæ inimici fugientes reliquerunt. Moyses autem cum Aaron, & Hur ascendit super verticem Collis, cumque levaret manus vincebat Israel. Et per hoc ostendebatur efficacia orationis; nam manus Moylis elevabantur ad orationem, in qua talis modus contingit, ut docet Apostolus. Item hoc fiebat, ut per tale signum attribueretur victoria soli Deo. Si verò paululum remisisset manus, superabat Amalech Israelitas; quæ quidem remissio denotabat lassitudinem in oratione, & diminutionem fervoris Spiritus. Dicitur autem *in tex.* Quod manus Moylis erant graves. Et per hoc designabatur, quod in populo erant aliqui onerati

N

rati



rati peccatis: secundum enim qualitatem subditorum disponuntur acta Regentium. Tandem secuta victoria ex parte Israelitarum, ædificavit Moyſes Altare Domino, ut per oblationem Victimarum redderet Deo gratias de tam singulari beneficio. Licet autem Moyſes non eſſet primogenitus, ad quos, secundum consuetudinem illorum temporum, pertinebat offerre Sacrificia, tamen sacrificabat, quia Deus eum fecerat Principem omnium Sacerdotum.

## CAP. XVIII. Reflexio 164.



Ostquam descripta est provisio alimenti, & repressio adversarij, hic describitur gubernatio populi. Interea audivit Iethro Socer Moyſis, quod Dominus eduxerat Israel de Ægypto, unde venit ad illum cum Sephora, & filijs; audiensque omnia quæ fecerat Deus Pharaoni, totius naturæ creatæ virtutem transcendentia, confessus est Deum Israel verum Deum esse. Altera autem die, sedit Moyſes ut iudicaret populum. Iudicium enim debet fieri in tranquillitate mentis, non in motu passionis, & hoc designatur per Sessionem: propter quod Iudices debent semper dare sententiam sedendo. Iudicabat vero Moyſes de controversijs subditorum, & istæ erant multæ, quia magnus erat populus, ut servaretur in eis æqualitas Iustitiæ commutativæ ad quietem politicam necessariam; hinc *Arist. 3. Polit. ait. Quod distributivum Iustitiæ magis necessarium est in Civitate, quam panis.* Iudicabat autem quotidie, ut negocia facilius expedirentur, ne ex dilatione sumpta, novam inducerent gravitatem. At Iethro cernens labores, quos Moyſes in hoc sustinebat, dedit ei consilium, ut provideret sibi viros potentes, idest iudicare valentes: posse enim sententiam dare, cuilibet facile est; sed posse bene sententiare, difficillimum est. Consistit autem bene



bene sententiare in duobus; videlicet in Intellectu recte determinante per prudentiam; & in voluntate recte eligente, per Iustitiam. Præterea requiritur quædam constantia, & vis animæ, ut Iudex non formidet recte iudicare, & executioni mandare sententiam propter aliquam personam, sed omnes cogat in Virga ferrea. Debent ulterius Iudices valde timere Deum; nam viri magnæ potestatis si Deum non timeant, cum ex potentia proveniente ex auctoritate, homines non paveant, devoluuntur ad omne genus iniuriarum. In hominibus autem vulgaribus, non est hoc tam necessarium: nam licet non multum timeant Deum, tamen quia maiores se pavent, retrahuntur pertimorem humanum ab Innocentium oppressione. Tandem debent Iudices odere avaritiam, quia nihil est quod magis iudicium pervertat, quam munerum receptio.

### Reflexio 165.

**A**vdito prudenti consilio, fecit Moyſes omnia quæ illi ſuggeſſerat Iethro; & licet eſſet Dux tanti populi, tamen aſſumens formam diſcipuli, audivit humiliter ſocerum ſuum ſenem conſulentem. Ex hoc apparet, quod Prophetæ non ſunt abundantiores ſapientia, & conſilio alijs hominibus. Et ratio ea eſt: quia Prophetæ nō cognoscunt ſuper alios aliquid ex aliquo habitu cognoscitivo; ſed ex quadam actuali illuminatione quam Spiritus Sanctus operatur in eis, elevando eorum intellectum ad aliquod cognoscendum; cum autem ceſſat illa illuſtratio, nihil magis cognoscunt quam cognoverint antè. Si vero imprimeretur Prophetis aliquis habitus cognoscitivus; tunc ceſſante illa illuſtratione, maneret ille habitus per quem ſemper cognoscerent, & vere eſſent cœteris ſapientiores, cuius tamen contrarium apparet hîc: nam licet Moyſes eſſet Prophetæ, & multa alia revelata accepiſſet, tamen ordinationem populi Deus illi non revelaverat; & ideo non habebat cognitionem de gubernatione



tione illius. Iethro vero, quia naturaliter perspicacior erat, & in agilibus humanis maiorem experientiam habebat, vel quia Deus ad hoc illum elevaverat, potuit dare prædictum bonum consilium.

## CAP. XIX. Reflexio 166.



Es scripta educatione populi de Ægypto, quæ fuit quædam dispositio remota ad legem recipiendam, hîc ponitur datio ipsius Legis. Igitur cum venissent Israelitæ in solitudinem Sinai, placuit Deo dare illis Legem; & ideo vocavit Moysen in Montem, deditque illi monita, ut referret illa ad populum: quibus auditis recessit Moyses de Monte ad Castra; & convocatis maioribus natu populi, exposuit omnes sermones quos mandaverat illi Dominus. Voluit enim Deus, quod populus observaret aliqua ante susceptionem Legis. Et primo: quod per duos dies sanctificarentur, hoc est purgarentur in mente a mundanis negocijs, quæ possent illos distrahere ab attentione requisita circa receptionem Legis, quam in tertia die audire debebant. Secundo, quod Moyses constitueret terminos, ne Populus irreverenter approximaret ad Montem, cuius radices tangere, prohibitum erat sub pœna mortis; & licet dicatur in tex. *Cum clangere cœperit Buccina, tunc ascendant in Montem.* Tamen per hoc intelligitur solum data facultas transeundi terminos constitutos, & accedere ad illam planitiem, in qua incipiebant radices Montis, quæ erat altior loco Castrorum; & ideo respectu illorum vocatur Mons. Talis autem accessio permittebatur in clangore Buccinæ; quia talis sonus erat signum recessus Deitatis de Monte, quo ad specialem illam preexistentiam: nam Deus non potest recedere, nec ascendere, vel descendere, cum sua substantia ubique de necessitate sit; sed talia prædicata, quæ in Sacra

Scrip-



Scriptura passim reperiuntur, intelligenda sunt de effectu representante ipsum Deum. Tertio, prohibitus fuit Populus accedere ad uxores. Quamvis enim actus matrimonialis licitus sit; tamen habet annexam quamdam turpitudinem, quæ non est de genere culpæ, sed de genere penæ, quam oportet excusare per bona matrimonij. Habet etiam annexam depressionem mentis, propter vehementiam carnalis delectationis: ad susceptionem autem legis, requirebatur magna mundities, & elevatio mentis in Deum ad contemplandam Cellitudinem Divinæ Maiestatis suæ.

### Reflexio 167.

**A**Dvenerat igitur tertius dies, & ecce cæperunt audiri Tonitrua, micare Fulgura, & clangor Buccinæ vehementius perstrepebat. Erat enim sonus terribilis: quæ omnia fiebant ministerio Angelorum. Nubes vero densissima, & caliginosa operuit Montem usque ad radices illius; & ex parte superiori egrediebatur fumus, & ignis de medio nubis. Facta est autem talis apparitio, ne populus ad Idolatriam pronus, haberet occasionem faciendi sibi Imaginem: Nubes enim & Ignis non habent stabilem figuram. Erat vero nubes caliginosa, ad designandum quod in præfenti sæculo non habemus cognitionem de Divinis, nisi ænigmaticam: apparitiones enim fiunt communiter secundum dispositionem illorum quibus fiunt: humanus autem intellectus respectu divinarum rerum caligat; nam ad illa se habet sicut oculus Nocturnæ ad Lucem Solis. Præterea, ista terribilia fiebant ante prolationem legis, ut populus se disponderet ad perseverantem devotionem erga Deum, quæ ex timore confurgit. Intendebat enim Deus, per Legem deducere Israelitas ab bonum: quidam autem homines tenent statum imperfectum, & hos trahi oportet per timorem. Alij sunt in statu aliqualis perfectionis, qui adduci debent per amorem. In lege autem veteri, erant homines imperfecti, quia nullo



iugo legis antè domiti fuerant. In Nova vero Lege homines, quos Christus Dominus traxit, erant aliqualis perfectionis: nam primi eorum fuerunt Iudæi, qui iam iugo legis constricti fuerant; ideoque ad observantiam Novæ Legis trahendi erant per amorem; & ideo data fuit Lex Evangelica cum magna tranquillitate; sedente nimirum in Monte Salvatore Deo, & intuentibus dulciter illum Discipulis, ut patet *Matth. 5.* Hinc *Aug. ait. Brevis differentia Legis, & Evangelij Timor, & Amor.*

## CAP. XX. Reflexio 168.



Disposito Populo ad suscipiendam Legem, hîc agitur de illius promulgatione: & primò ponuntur Præcepta ordinantia in Deum. Et quia homo debet Deo fidelitatem, ideo primò prohibetur infidelitas, dum dicitur: *Non habebis Deos alienos coram me.* Quibus verbis prohibetur generaliter omnis idolatria, quæ alienat à vero Deo. Loquitur autem Divina Scriptura more humano, videlicet secundum opinionem vulgarium; nam secundum rei veritatem, unus solus est Deus, unde impossibile est, aliquem habere Deos; sed quia illi qui sculptilia colunt, putant illa esse Deos, & sic illa denominant; ideo Scriptura vocat *Deos*, & quia non sunt colendi, dicuntur alieni. Prohibuit autem Deus in hoc primo præcepto omne sculptile, quod fit per dolaturam, vel quocumque alio modo, & omnem similitudinem quæ fit per picturam, sive illorum quæ sunt in Cælo, sive in terra, sive in aquis. Aliqui enim idolatræ impendebant cultum Soli, Lunæ, & Sideribus: aliqui colebant bestias terræ, ut *Ægyptij*: Alij Pisces; unde Idololum Dagon, quod adorabant *Phylisthæi*, habebat caput piscis. Vetuit vero Dominus specialiter cultum Luminarium Cæli, quia nihil erat inter res sensibiles, ad quod colendum magis



magis inclinarentur homines, quam corpora Cœlestia, propter eorum pulchritudinem. Est autem adoratio actus Latriæ, pertinens ad reverentiam in actu exteriori; ut cum nos inclinamur coram Deo, orantes, vel audito Divino eius Nominis, vel visa Imagine Christi Domini, inclinamur coram ipsa, tanquam coram ipso Deo effemus: itaut oculi in imaginem, cor vero nostrum ultra imaginem elevetur, nam imago ad Prothotipum, idest ad suum significatum reducenda est. Christianis autem Imagines, & Statuæ permixtæ sunt, tum propter simplices; tum quia non est talis suspicio quod sistant in ipsis, sicut erat in Iudæis, pronis ad idolatriam propter diuturnam conversationem cum Ægyptijs. Debent tamen Parochi accuratè docere Populum, quod Latriæ soli Deo debetur: Hyperdulia vero, quæ est excellens Dulia, debetur Beatissimæ Virgini Deiparæ, & Cruci Domini: omnes enim res, per quas immediatè venit in nos Salus Redemptionis, adorandæ sunt adoratione Hyperdulæ; & ideo Beatissima Virgo, quæ Salvatorem genuit, existens nobis immediata causa ad percipiendum tantum bonum, colitur adoratione Hyperdulæ: & similiter Crux, quæ fuit immediatum instrumentum, in quo Salvator Deus mori dignatus est pro humani generis redemptione. Sancti autem venerantur adoratione Dulæ; quia cum sint in vita beata, habent quamdam connexionem ad Deum.

### Reflexio 169.

**S**equitur secundum præceptum Primæ Tabulæ, pertinens ad Latriam, dum dicitur: *Non assumes Nomen Domini Dei tui in vanum; nec enim habebit in fontem Dominus eum qui assumpserit Nomen Domini Dei sui frustra.* Sciendum est autem, quod nomen Domini potest dupliciter accipi in vanum. Vno modo, frequentando illud in communibus locutionibus. Alio modo frustra, iurando pro aliqua re. Notandum est autem, quod vanum dicitur, nihil ens; vel nihil



habens; & ratio est, quia vanum est quod non habet finem, vel non assequitur illum; quapropter omnes actiones nostræ, quæ finem intentum non consequuntur, vocantur vanæ: VG. si aliquis ambulat ut sanetur; & ex ambulatione non sequatur sanitas, illa ambulatio dicitur vana, idest nihil: nam res totam perfectionem suam sortitur ex fine: nihil autem, & malum, æquiparantur; & ideo sequitur, quod qui accipit sine causa, seu sine Nomen Domini, sicut accidit in prædictis duobus modis, peccat, sicut ille qui accipit illud ad malum finem; ut si assumere tur ad confirmationem falsitatis. Quando vero adest causa; tunc assumptio Divini Nominis licite fit; non enim accipitur tunc nomen Domini in vanum, quia debitum finem habet. In Ægypto mos est, ut si quis per vitam Regis iuraverit, & non impleverit, morte moriatur, à qua liberari nequit, etiam si omne aurum, & lapides pretiosos exhiberet. Pudet hoc exemplo frænare temerarium usum nostri sæculi, in quo tam faciliter nomen Domini in vanum assumitur; adeo ut non videatur optimus discursus, nisi accedat Divini nominis usurpatio.

### Reflexio 170.

**P**ostquam Dominus removet impedimenta Divini cultus, nempe idolatriam per primum præceptum, & irreverentiam Divini nominis: per secundum dat deinde tertium, & ultimum Præceptum primæ Tabulæ, dicens: *Memento ut diem Sabbati sanctifices*. Debet enim homo non solum fidelitatem Deo, sed etiam famulatum in recognitionem sui dominij. Hæc autem sanctificatio, est applicatio diei prædicti totaliter cultui Divino; meditando de Divinis beneficijs, & gratias exhibendo Bonitati Summi Dei. Sciendum est autem, quod hoc præceptum partim est morale, partim ceremoniale. Est morale, in quantum dirigit mores, & insurgit ex iudicio rationis naturalis, ex cuius dictamine homo tenetur vacare Divinis. Est ceremoniale, in quantum  
habet



habet determinationem temporis, quæ nihil refert ad substantiam naturalis obligationis prædictæ: nam quod vacatio fiat in aliqua die ad laudandum Deum, & gratias reddendas, naturaliter inditum est: quod autem fiant ista in die septimo non est naturale, sed ceremoniale: & quia ceremoniæ veteris Legis, cessant adveniente veritate Evangelij; ideo in Nova Lege non observatur dies Sabbati, sed loco illius observatur dies Dominica. Cuius ratio est quia in Sacra Scriptura duo opera præcipuè tractantur; scilicet opus Creationis, & Redemptionis. Opus creationis est præcipuum in Lege Veteri; in Nova autem est opus redemptionis, ideoque dies Divini cultus debuit assignari ille, in quo facta fuit Redemptio, nobisque innotuit: sed redemptio die Veneris facta nobis innotuit in die Dominica, in qua Dei Filius resurrexit à mortuis, tribuens nobis spem resurgendi; ideo Ecclesia, ut tantum beneficium meditaretur a fidelibus, transtulit Sabbatum in Dominicam, in qua vacandum est ab operibus servilibus. Advertendum tamen est, quod in Nova Lege non est necessaria tam rigorosa observatio ab operibus manualibus sicut in Veteri Lege: nam possunt parari cibaria, & aliqua alia fieri in die Dominica, quæ non erant licita in Sabbato, quia illa vacatio erat Figuralis, sicut totus ille status: à Figura autem quantumcunque modicum subtrahatur, tota significatio mutatur: sicut una littera subtracta ab hoc nomine, Lapis, facit mutationem totalem significationis. At circa totum Lapidem possunt aliqua addi, & subtrahi absque mutatione substantiæ.

### Reflexio 171.

**P**ost Præcepta dirigentia hominem in Deum, ponuntur præcepta ordinantia in proximum. Et primum est de honore Parentum, tamquam caput secundæ Tabulæ, quia sicut Deus est principium omnium rerum, ita Parentes habent rationem principij respectu filiorum. Honor autem  
iste



iste non solum intelligitur de reverentia exteriori, sed etiam de provisione necessariorum vitæ si indigeant. Omnia autem quæ dicuntur de Patre, sunt prorsus intelligenda de Matre, quæ pariter communicavit filio esse per generationem: nam Pater, & Mater sunt unum totale generans, & licet Pater magis agat ad generationem filij, (nam virtus formativa corporis est in semine paterno, maternum vero magis se habet per modum passivi temperati) tamen mater sub alia ratione excedit patrem, tanquam determinata ad partus conservationem. Nam per novem menses fovet foetum; sustinet labores, & in edendo partu ad lucem propriam vitam exponit. Præterea filij maius beneficium recipiunt à matribus, respectu continuæ educationis; nam filij magis cum matre, quam cum patre conversantur in tenera eorum ætate, in qua fiunt fortes impressiones. Nam tunc potentiæ susceptivæ multum dispositæ sunt, quia teneræ; ideoque quicquid infigitur, funditus infigitur, cum inveniant potentiam non occupatam. *Hinc Arist.* in fine *pr. Polit* ait: Quod ad reddendum filios bonos, non modicum refert habere curam mulierum. Porro in nullo alio præcepto specialiter ponitur præmium, & retributio nisi in isto; observantibus enim prædicatur vitæ longitudo. Cum enim filius vitam accipiat à parentibus, condecens est ut prolongetur vita recepta, dum bene se habet ad illos qui ei vitam contulerunt. Veruntamen quia bona temporalia ordinantur ad spiritualia, & æterna, aliquando contingit ex Divina ordinatione, nobis prorsus occulta, quod aliqui filij honorantes parentes, parum vivant; aliqui vero contrarium facientes, multum: tamen totum ordinatur ad augmentum præmij bonorum, & pænæ malorum. Maxime quia in prædicta promissione intelliguntur principaliter promissa bona æterna, cum actus honorandi parentes factus in charitate, sit promeritorius vitæ æternæ. Sed quia Deus loquebatur populo rudi promittebat bona sensibilia quæ amabat, cum Cœlestia, & æterna non intelligeret.

Re-



## Reflexio 172.

**S**equitur secundum præceptum secundæ Tabulæ, quo prohibetur homicidium. Adverte autem quod in secunda Tabula ponuntur præcepta ordinantia hominem ad proximum suum, quantum ad vitationem mali: potest autem aliquis se habere ad alterum dupliciter. Vno modo, bona impendendo; alio modo, nocumenta, & damna prorsus cavendo. Quantum ad primum, datum fuit præceptum de honorando parentes. Quantum ad secundū, ponuntur præcepta negativa de non offendendo proximo, quæ quidem præcepta sunt maioris obligationis, & per consequens maioris transgressionis. Nam licet quis teneatur benefacere proximo suo, tamen magis tenetur non ei nocere. Exprimuntur ergo hic sex genera nocumentorum, & primum est de non occidendo: hoc enim est maius nocumentum quod proximo possit inferri, nam mors tollit esse simpliciter, quod est fundamentum aliorum bonorum; in alijs autem nocumentis non tollitur totum esse simpliciter, sed solummodo aliquid, quod manet in ipso esse, tamquam pars in toto, videlicet aliqua perfectio. Sub hoc autem præcepto de non occidendo, intelligitur generaliter prohibitum omne damnum in persona proximi, ut mutilatio, verberatio, sanguinis effusio, & similia.

## Reflexio 173.

**P**ost prohibitionem nocumenti, quod infertur in personam propriam proximi, sequitur illud per quod removetur offensio in persona sibi coniuncta: hæc autem est propria Vxor, cum sit una caro cum viro suo. Igitur hic prohibetur adulterium, cum dicitur: *Non mæchaberis*. Est autē Mæchìa, copula carnalis cum Vxore alterius Viri; quod quidem peccatum, non solum est contra fidelitatem quam habere debemus erga proximum, sed etiam contra prolem ipsam



ipsam, inquantum falsus hæres substituitur, & verus defraudatur. Per hoc præceptum intelliguntur prohibita non solum omnia vitia nefanda, sed etiam ipsam simplicem fornicationem, & omnes concubitus, qui fiunt sine fœdere Matrimonij. Est enim simplex fornicatio naturaliter mala, quia actus efficitur bonus, aut malus ex fine suo; unde si aliquis actus sit ordinatus in finem indebitum, necesse est ut sit malus: sed delectabile quod est in tactu, & gustu non dicuntur eligibilia propter se, sed necessaria, ut ait *Arist.* 7. *Ethic.* itaque si non intenderetur aliquis finis, nunquam deberent eligi: delectabile enim quod est in cibo, & potu est propter conservationem individui: adeo ut si posset animal vivere sine cibo, & potu, non deberet ista sumere. Sic pariter delectabile tactus in actu venereo, est eligibile propter conservationem speciei per generationem; adeo ut si daretur quod species posset conservari sine coitu, tunc nullus deberet hunc eligere, quia talis actus esset malus cum esset propter solam delectationem. Delectabile enim ut prædictum est solum est eligibile propter alterum; & tunc eligeretur propter se.

### Reflexio 174.

**C**um per duo præcepta supradicta, prohibita fuerint nocumenta in personam proximi, prohibetur subsequenter nocumentum per ablationem rerum. Hoc autem accidit in furto; ideoque datur negativum præceptum, quo prohibetur ablatio rei alienæ dum dicitur: *Non furtum facies*. Pertinet autem hoc Præceptum ad directionem concupiscibilis, secundum quam respicimus aliquod utile; nam illa quæ furto subtrahimus, utilia reputamus. Per hoc Præceptum, intelliguntur prohibita sequentia, nempe indebitæ extorsiones quas exercent Domini, vel Superiores à suis subditis. Iniusta Tributa; Fraudes; Vsuræ; Simonia; novæ impositiones Pensionum inconsuetarum, vel indifferetarum. Item omnes contractus per quos aliquis iniuste acqui-



acquirat, vel retinet res alienas contra voluntatem Domini. Similiter si aliquis, non per se, sed consilio sit causa alicuius furti, talis consiliatio vel persuasio pertinet ad furtum, & per consequens est vere transgressor huius præcepti.

## Reflexio 175.

**P**ost furtum sequitur quintum præceptum secundæ Tabulæ dum dicitur: *Non loquēris contra proximum tuum falsum testimonium.* Hoc Præceptum est directivum irascibilis; nam sicut per irascibilem aliquis offendit alium facto, in propria persona eum occidendo; ita per eandem offendit verbo, lædendo famam illius. Hoc autem valde magnum malum est, quia in communicatione politica, nihil magis valet homini quam nomen bonum; nihilque magis nocet, quam malum. Prohibetur vero hic falsum testimonium, tum in Iudicio; tum contra: veruntamen quod in Iudicio fit, cæteris paribus, peius est, quam illud quod profertur extrâ, quia secundum illud fertur sententia, & per consequens manet aliquis de iure infamatus: per illud autem quod est extra Iudicium, non, licet infamia facti possit contingere. Potest autem alicui videri, ex eo quod hic prohibetur falsum testimonium, quod non sit Reus huius præcepti ille, qui contra Proximum suum dicit verum testimonium. Sed sciendum, quod licet verum, secundum se non sit malum; tamen aliquæ veritates sunt, quas dicere peccatum est: ut si aliquis cognoscat de Proximo suo aliqua scelera, eaque proferat in publico. Licet enim verum dicat, tamen mortaliter peccat, quia Christus Dominus mandavit fieri correctionem privatam; & ideo peccat, tum quia transgreditur Dei præceptum, tum quia ex mala intentione agit: nam dicere Proximi peccata in publico, non ex charitate, sed ex odio procedit.



## Reflexio 176.

**T**andem ponuntur duo ultima Præcepta prohibentia inordinatam concupiscentiam. Per unum prohibetur concupiscentia Vxoris alterius; & per aliud concupiscentia rei. Sicut autem priora mandata ordinabant concupiscibilem, & irascibilem, quantum ad actum exteriorem; ita ista duo ordinant eandem vim, quantum ad actum interiorem, videlicet ad solum desiderium. Ratio autem quare duo præcepta ponuntur ad repressionem concupiscentiæ est, quia bonum dividitur per utile, & delectabile; ita quod est alia ratio utilis, & alia delectabilis. Nam contingit aliquem habere pronitatem ad unum, & non ad aliud; immò affectum ad unum, & abominationem ad aliud: sicut apparet in eo, qui concupiscit Vxorem alterius, sed abominatur furtum rerum illius: quapropter, ad reprimendam istam duplicem concupiscentiam debuit assignari duplex præceptum. Hic quæri potest, cur prohibetur expressè desiderium Vxoris alterius, & suarum rerum; non verò desiderium occidendi, vel desiderium colendi Idola, sed solummodo operatio? Dicendum, quod desiderare Vxorem Proximi, & suarum rerum dominium, pertinet ad concupiscibilem, quæ est de delectabilibus, & per consequens multum inclinatur: desiderium autem occidendi, pertinet ad irascibilem: & desiderium colendi Idola pertinet ad rationalem, quæ non sunt de bono delectabili, nisi ex aliqua suppositione, ideoque non tantum inclinatur; & ideo non tam expressè prohibetur eorum desiderium. Vxoris vero alterius, & rerum desiderium, nimis inclinatur; & ideo ut homines arcerentur à tam vehementi passione, ipsum desiderium prohibetur.

CAP.



## CAP. XXI. Reflexio 177.



Es scriptis Præceptis moralibus, agitur consequenter de Iudicialibus. Notandum est autem, quod præcepta sunt quædam regulæ directivæ actuum humanorû in finem suum; & respectu Veteris Testamenti possunt distinguui in quatuor genera. Quædam sunt quæ adhærent ipsi Intellectui practico, de quibus nullo modo dubitari potest: V.G. quod bonum est agendum, & malû fugiendû. Ita tamen magis vocantur prima principia quàm Præcepta; nec datur de istis Lex dirigens, quia esset superflua, cum quilibet sit de talibus sufficienter eruditus, & ad illa facienda determinatus. Secundum genus, sunt illa, quæ insurgunt immediatè ab ipsis primis principijs Intellectus; & talia sût decem præcepta Decalogi: nam sunt quædam conclusiones immediate elicite ex dictamine rationis naturalis; quapropter ista non obligabant solummodo Iudæos, sed etiam omnes Gentes, cum non haberent præcipuam obligationem suam ex datione Legis, sed ex dictamine rationis naturalis; & ideo manent etiam in Nova Lege, quia Ius naturale est immutabile: & Christus Dominus Auctor naturæ, non destruit ipsam naturam, sed perficit. Licet autem Præcepta Decalogi, ut prædictum est, sint de iure naturæ, tamen fuerunt data per Legem positivam; quia humanus intellectus ex consuetudine peccandi offuscatur, & tunc incipit ignorare, adeo ut in practicis non cognoscat bonitatem, vel malitiam eligibilium; ideo propter hoc fuerunt explicita in Lege. Tertium genus erant Præcepta iudicialia, quæ derivantur ex secundo genere Præceptorum; & talia non sunt nota cuilibet, sed solum Sapienti, quia non immediate nascuntur ex principijs Iuris naturalis, sed mediantibus quibusdam magnis illationibus, & partim dependent à Iure naturali, partim verò à voluntate Legislatoris. Quartum ge-  
nus



nus erant Præcepta ceremonialia, quæ non dependent à radice Iuris naturalis, sed à mera voluntate Legislatoris, & ista duo genera Præceptorum prorsus evacuata sunt per Legem Novam: aliter tamen, & aliter: quia ceremonialia sic evacuata sunt, quod ea observare post promulgationem Evangelij, esset mortiferum: cuius ratio est, quia ceremoniæ antiquæ Legis erant quædam Figuræ, & protestationes Christi Domini, tunc futuri, & Novi Testamenti, unde illas observare, esset dicere Christum Dominum non venisse, nec veritatem figurarum impletam, quod impium, & sacrilegum esset. Thurificatio vero, quæ erat de ceremonialibus veteris Testamenti, remanet in Novo, quia non figurabat directè aliquod futurum tempore Novi Testamenti, sed devotionem Populi erga Deum; quæ devotio magis est in Nova Lege, quam in Veteri, cum status Populi colentis Deum sit perfectior. Præcepta vero iudicialia sic sunt evacuata, ut non obligent in Nova Lege; tamen illa observare si instituerentur à Principe Christiano, non esset mortiferum: cuius ratio est, quia ista erant instituta, ad conservandam pacem Populi per opera Iustitiæ commutativæ, non vero figurabant aliquod in Nova Lege; ideoque possent observari in quantum instituta de novo à Legislatore Principe: nam si servarentur tamquam obligatoria ex Lege Veteri, esset mortiferum, quia hoc esset asserere, quod adhuc maneret status Veteris Testamenti. Et si dicas quod quia Deus non potest errare in Lege quam dat, deberent per consequens omnes Populi accipere iudiciales Leges datas Hebræis, non valet illatio: nam licet sit impossibile, quod illa Lex quam Deus dat alicui Populo sit mala illi Populo; tamen bene possibile est, & sic est de facto, quod talis Lex esset pro alijs Populis mala: nam multa ponuntur in istis Præceptis iudicialibus, quæ observata, militarent contra statum Politicæ nostræ. Adde quod Deus dedit Iudæis præcepta iudicialia, quæ non erant simpliciter bona, quia Populus ille erat imperfectus; ideoque aliqua ei permittit ad imperfectionem illorum toleran-



randam. Legislator namque non debet semper dare Leges simpliciter bonas, sed tali populo bonas. Sicut medicus, non dat ægrotanti cibum simpliciter sanum, quia cibi simpliciter sani, conveniunt corpori totaliter sano; sed tribuit cibum, qui est illi ægroto sanus.

### Reflexio 178.

**C**irca Præcepta iudicialia, primò ordinatur homo quantum ad partem irascibilem. Tendit autem irascibilis in bonum sub ratione ardui, & in malum sub ratione vindicativi; nam ira est appetitus vindictæ, & ideo prius regulatur. Irascibilis in dominatione; nam alijs dominare est quid arduum. Statuitur igitur hic de servis, & dicitur, quod servus Hebræus per sex annos servire debebat, in septimo vero liber exire. Ratio huius determinationis erat, quia Dominus redemerat filios Israel de servitute Ægypti, ut essent servi sui; & ideo noluit quod venderentur simpliciter, sed ad tempus modicum: quapropter, non erant proprii servi, sed quasi mercenarii locati ad tempus. Si verò Dominus dedisset servo suo Hebræo in Vxorem Ancillam Gentilem, & hæc peperisset filios, talis mulier non egrediebatur libera cum filijs in anno remissionis, sed remanebat cum ipsis in servitute. Et ratio est, quia Partus sequitur Ventrem: quapropter cum talis mulier esset simpliciter serva, remanebat semper in servitute cum filijs. Quod si prædictus maritus Hebræus noluisse in septimo anno egredi de servitute, inductus amore vxoris, & liberorum ad remanendum, renunciens per hoc iuri suo: tunc Dominus offerebat illum Iudicibus, & perforabatur auris illius Subula, & dabatur ei talis pœna, eo quod noluit uti libertate à Deo sibi concessa: perforabatur vero magis auris quam alia pars corporis, quia per hanc intelligere debebat Legem de libertate. Fiebat autem ista ceremonia, ut non videretur Dominus detinere servum Hebræum ultra septimum annum contra Præceptum Divi-



næ Legis. Remanebat vero talis Hebræus servus in sæculum, idest usque ad annum Iubilæi; nam in illo anno omnes possessiones redibant ad priores Dominos; & ideo omnis servus efficiebatur liber, loquendo tamen de Iudæis.

## Reflexio 179.

**A**Cto de hominibus Hebræis in servitutem existentibus, subsequitur de Ancillis Hebræis; tradebatur enim multoties Puella in servitutem, ut Dominus illam acciperet in uxorem, vel pro se, vel pro filio: tradebatur autem in parva ætate, ad hoc ut Dominus perfectè cognosceret mores illius. Si vero Dominus, adveniente pubertate, non accipiebat puellam in uxorem, vel non tradebat eam filio suo, exhibat puella de servitute, ad hoc ut posset alteri nubere, nulla data pecunia pro redemptione sua. Et ratio ea erat, quia tunc imminebat periculum castitatis; cum enim esset apta ad virum, poterat ab aliquo deflorari; ante tempus autem pubertatis, non imminebat tale periculum. Igitur, adveniente pubertate, statim erat libera; non enim expectabatur annus remissionis septimus, quia quod erat in viris annus remissionis, hoc erat in puellis pubertas, propter periculum perdendæ virginitatis. Quod si fuisset à filio Domini deflorata, debebat pater dare arbitrio Iudicis pretium amissæ pudicitiae, ut sic inveniret aliquem, qui illam in uxorem acciperet. Licet autem puella Hebræa posset vendi Domino Hebræo ob causam prædictam, tamen vendi non poterat Gentili; tum quia erat manifestum periculum perdendi fidem unius veri Dei; tum ne Hebræi facerent multoties tales venditiones, propter lucrum ad quod dediti erant, propter eorum avaritiam: maximè quia talis contractus non fuisset ad tempus, sed simpliciter: quandoquidem præceptum de anno remissionis, obligabat solummodo Hebræos non vero Gentiles.

Re-



## Reflexio 180.

**P**ostquam regulata fuit Irascibilis in dominio, regulatur consequenter in lēſionibus, quæ habent rationem vindicativi, & ſtatuitur pœna mortis in homicidio voluntario. Si autem occiſor non fuiſſet inſidiatus Proximo ſuo, ſed Deus tradidiſſet illum in manus eius, ſalvabatur talis occiſor in Civitate Refugij. Permittit enim Deus, aliquando hominem interfici altiſſima ſua Providentia, quæ nihil iniuſtum patitur; licet nobis cæcutientibus, & in tenebris comedentibus, ex his quæ fiunt, aliqua videantur diſtorta, ſed caſſa imaginatione ſeducimur: nam is, qui talia ſuſtinet, ea promeruit; velei bonum eſt hoc pati. Si verò per inſidias aliquis occidiſſet Proximum ſuum, evellendus erat etiam ab Altare Dei, ut moreretur; quia talis inſidiator indignus erat ut immunitas Sanctuarij ei ſuffragaretur. Similiter, qui furatus fuiſſet hominem, eumque vendidiſſet, pœnam mortis incurrebat, quia homo factus eſt ad imaginem Dei; & ideo ratione tantæ dignitatis, pro eius furto imponebatur pœna mortis. Similiter Dominus, qui ſervum percuſſiſſet Virga, & mortuus fuiſſet, erat reus homicidij, tamquam ſi occidiſſet hominem liberum. Et ratio ea eſt, quia ſervus non debet domino vitam, ſed tantum labores ſuos. Accedit, quod dominus inferebat damnum ſtatu politico: expedit enim Reipublicæ ne quis re ſua malè utatur. Præterea toti naturæ humanæ irrogabat iniuriam. Si autem prædictus Dominus, intendens non occidere, ſed corrigere ſervum ſuum, modum correctionis exceſſiſſet, & ſervus mortuus eſſet, non puniebatur tamquam ſi occidiſſet alium hominem, quia ſervus eſt pecunia Domini ſui: unde perdendo ſervum perdebat Dominus rem ſuam, talisque pœna ſufficiebat. In læſionibus autem, in quibus mors non ſequebatur, erat conſtituta pœna Talionis. Dicunt vero aliqui Doctores, quod er-  
venti oculum Proximo ſuo, non erat ervendus ei oculus, ut


O 2

vide-



videtur sonare hęc litera; sed pretium pro oculo, secundum taxationem Iudicum; idemque erat in alijs lęsionibus. Alij dicunt quod eruendus erat, si exoculatus voluisset; si vero elegisset pecuniam, tunc secundum taxationem Iudicis illam recipiebat.

## CAP. XXII. Reflexio 181.



**I**nsita ordinatione Irascibilis, hęc agitur de directione concupiscibilis, assignando pœnas primò in furto. Et determinatur, quod si quis furatus esset Bovem, aut Ovem teneretur reddere quinque boves pro uno, & quatuor oves pro una. Ratio autem quare præcipiebatur in tali furto tanta restitutio, cum in alijs rebus sufficeret reddere duplum, ea est: quia aliqua peccata debent gravius puniri, non solum propter maiorem gravitatem, sed etiam propter reprimendam pronitatem ad illa, ne subditi nimis ad talia se laxent. Res autem quę custodiuntur in domo, ut aurum, argentum, & similia, non ita de facili possunt subtrahi sicut oves, quę pascuntur in campis, & nemoribus: & quia facilitas accipiendo rem alienam inducit ad commissionem furti; idè in prædictis casibus maior pœna imponitur, quam in alijs. Quia vero boves difficilius custodiuntur quam oves, quia non ita gregatim se tenent in pascuis, & per consequens facilius furari possunt; non quatuor, sicut in furto ovis, sed quinque pro uno præcipiuntur restitui. Si autem inventum fuisset apud furantem animal vivum, tenebatur restituere solummodo duplum. Et ratio diversitatis pœnæ erat, quia poterat haberi aliqua præsumptio, quod vellet restituere, ex eo quod reservabat ipsum animal. Fure effringente de nocte domum, & in tali actu occiso, non erat percussor, reus sanguinis. Si vero orto Sole hoc fecisset, incurrebat pœnam mortis. Ratio primi casus est: quia præsumptio stabat contra furem;



furem; nempe quod non solum venisset ad furandum, sed etiam ad occidendum, si in furando invenisset resistantiam. In secundo vero casu, debebat occisor considerare, cum clara esset dies, quod fur non veniebat ad occidendum, sed solummodò ad furandum.

### Reflexio 182.

**P**ost furtum, reprimatur contrectatio rei alienæ alicui commissæ per depositum; & determinatur quod si res commodata furto fuisset ablata, teneretur depositarius iurare coram Iudicibus, se non extendisse manum in rem Proximi sui ad perpetrandam fraudem, & hoc facto liberabatur. Si autem Iudices iudicassent illum commississe aliquam fraudem, tunc tenebatur duplum restituere sicut fur. In illo autem casu, in quo committebatur res ad custodiendum pro mercede, ut cum tradebatur animal Pastori, & moriebatur, vel debilitabatur, vel capiebatur ab hostibus; non cogebatur Pastor restituere damnum, quia non poterat præcavere morti, vel debilitati, quæ contingunt ex causa naturali; nec poterat resistere violentiæ hostium. Si vero animal furto fuisset sublatum, tenebatur pastor restituere damnum. Et ratio ea erat; quia pro custodia habuit mercedem. Similiter, si quis accepisset à Proximo suo animal mutuò, nempe ad opus illius qui accipit, & tale animal debilitatum, aut mortuum fuisset, tenebatur mutuatarius restituere damnum. Et ratio est, quia tota utilitas animalis in illo opere erat sua. Limitabatur autem hoc in illo casu, in quo Dominus erat præsens: tunc enim poterat videre, an animal nimis gravaretur, & hoc viso impedire. Præterea, quia concupiscibilis multum viget circa delectabilia carnis, specialiter reprimatur, dum determinatur, quod si Virgo seducta fuisset ab aliquo, adeo ut intercederet copula sub spe matrimonium contrahendi, tunc tenebatur seductor dotare illam, & in uxorem accipere. Si vero pater nolisset illi



dare filiam suam, tenebatur dare pecuniam pro dote, quæ erat 500. siclorum argenti. Tandem iubetur, ut malefici occiderentur. Et ponitur talis Lex inter illas, quæ reprimunt concupiscentiam carnalem, quia sortilegia ut plurimum, sunt in his, quæ pertinent ad actus venereos.

## Reflexio 183.

**O**rdinata Irascibili, & concupiscibili, consequenter ordinatur Rationalis; tum erga Deum, tum erga Proximum: erga Deum, dum sub pœna mortis prohibetur, ne immolaretur Dijs. Est enim immolatio actus proprius, & debitus soli Deo Vero; nam alij actus sunt aliquo modo communes Deo, & hominibus, ut adoratio, genuflexio, supplicatio, & similia. Immolatio autem nulli unquam exhibita fuit, nisi ei qui verus Deus erat; aut reputabatur verus Deus. Erga Proximum autem ordinatur ipsa rationalis, dum prohibetur ne Advenæ contristentur, & Viduæ, & Pupilli. Licet autem Lex ista intelligenda sit generaliter de omnibus nostris Proximis; tamen exprimuntur prædictæ personæ, quia frequenter opprimuntur, eoquod non possunt resistere suis oppressoribus: afflictio autem talium nimis aggravat peccatum, & accelerat Divinam vindictam. Deinde datur Præceptum de modo mutuandi pecuniam Proximo, & de pignore. In mutuo autem iubetur, ne repetatur debitum cum nimia austeritate, quando Proximus est impotens ad solvendum. In pignore vero præcipitur, quod si esset vestimentum, redderetur Proximo ante solis occasum. Et dicunt Doctores, quod si vestimentum erat Proximo necessarium de die, debebat reddi in mane, & resumí in vespere. Si vero fuisset necessarium de nocte, debebat reddi vespere, & post resumí in mane: & hoc iubebat Deus ad imprimendam cordibus Israelitarum memoriam Divinæ miserationis, qua quotidie Deus nobis peccantibus relaxat facinora, cum ad ipsum verè poenitentes clamamus.

CAP.



## CAP. XXIII. Reflexio 184.



Atis Præceptis Iudicialibus particulares personas dirigentibus, hic traduntur illa, quæ dirigunt publicas, cuiusmodi sunt Iudices tum Sæculares, tum Ecclesiastici. Istis autem iubetur, ne in iudicando acquiescant iudicio plurimorum; adeo ut si maior pars Iudicum declinet ad sententiam iniustam, non propter hoc debet aliquis de Iudicibus declinare à recto tramite Iustitiæ, sed inconcussè tenere veritatem. Similiter in causa pauperis, non debet Iudex intuitu paupertatis sustinere illius causam si sit iniusta, quia sanctum est præhonore veritatē, ut dicitur *pr. Ethic.* Deinde præcipitur ne Iudex accipiat munera, quod intelligitur etiā pro Iudicio vero, nam tunc venderet Iustitiā, & teneretur ad restitutionem accepti. Iudex enim si sit inferior debet esse contentus de stipendijs suis. Si superior, de eo quod accipit à communitate pro observatione Iustitiæ. Prohibetur etiam, ne Iudex sit molestus peregrinis; tales enim cum sint extra terram suam, sunt destituti omni humano favore; ideoque multum decet Iudicem esse illis benevolum. Subiungitur deinde incidenter Præceptum de reducendo animal inimici ad ipsum inimicum; quia ex litigijs, de quibus Legislator immediatè fuerat locutus, solent homines fieri inimici; ideo posuit Deus hoc Præceptum, ut inter Israelitas amicitia semper esset, & civilia odia prorsus cessarent: etenim per talem reductionem inimicus inclinabatur ad amicitiam, & amorem ipsius reducentis. Obstinatam nanque mentem beneficia ipsa mitescunt, & conceptum adimunt furorem. Alia etiam erat causa, videlicet, ne animal à feris devoraretur: & quia Iudæi erant crudeles, inducebat illos Dominus ad pietatem, iubendo eos esse mites, etiam circa animalia irrationalia, ut sic inclinarentur ad pietatem erga homines.




## Reflexio 185.

**P**ost instructiones Iudicum Sæcularium instruuntur consequenter Sacerdotes, dum agitur de Festis, & solemnitatibus; quæ licet deberent observari à toto Populo, tamen earum directio pertinebat ad Sacerdotes. Primò igitur iubetur, ut septimo anno terra non coleretur ullo modo. Et ratio huius dimissionis erat ad hoc ut Advenæ, Peregrini, & Pauperes, illo septimo anno satiarentur de illis, quæ sponte terra producebat. Secundò præcipitur, ut tribus vicibus per singulos annos, celebrarentur Festivitates, in quibus omnis masculini sexus appareret coram Deo. Primum Festum erat Pascha Azymorum, quod celebrabatur decima quinta die mensis primi; idest Martij, qui dicebatur mensis Novarum Frugum, quia in crastino illius diei fiebat oblatio de novis Fructibus qui ante alios pervenerant ad maturitatem. Vnde si quis intrans campum suum, vidisset ibi aliquas spicas, vel ficum in ficulnea, appropinquantes ad maturitatem, debebat illas colligere, & ad Templum deferre in prædicta solemnitate Paschali. Secundum festum erat Pentecostes, quod celebrabatur quinquagesima die à die Paschæ, in memoriam beneficij Dei in datione Legis; quæ data fuit in Monte Sinai quinquagesima die ab exitu filiorum Israel de Ægypto; & dicebatur mensis primitivorum, quia in tali solemnitate offerebantur Panes de Novis Frugibus; sicut in Paschate Azymorum, primitiva in Spicis. Tertium erat Festum Tabernaculorum, quod celebrabatur in memoriam Beneficij, quo Dominus Deus habitare fecit filios Israel in Tabernaculis in ipso deserto; & de tali loco deduxerat ipsos in terram deliciosam, & fructiferam; ideoque in hoc Festo debebant habere ramos virides, & fructus pulcherrimos arborum.

CAP.



## CAP. XXIV. Reflexio 186.



Ræmissa legislatione, & inductione ad observantiam illius, hîc describitur eius receptio. Venit enim Moyses acceptis à Deo præceptis Iudicialibus, & denunciavit illa populo; quibus auditis, respondit se facturum omnia verba Domini. Tunc Moyses scripsit, ut dicitur in Tex. universos sermones Domini, idest, ut volunt multi DD., non solum prædicta Præcepta Iudicialia, sed etiam omne id quod continetur, à principio Genesis usque ad Præcepta Decalogi. Deinde in mane constructo Altari ad radices Montis, misit Iuvenes, qui fuerunt primogeniti duodecim Principum Israel, & obtulerunt Holocausta; quia Sacerdotium erat tunc temporis annexum primogenituræ, & duravit usque ad institutionem Sacerdotis Aaron. Immolatis igitur Victimis, sumpsit Moyses de sanguine Victimarum, fundens illum super Altare, in signum Fœderis inter Deum, & Populum. Deus autem cum Spiritus sit, non potest sanguine aspergi; ideo loco eius asperxit Altare, deinde Populum: ad denotandum, quod deberet effundi sanguis transgressorum Divinæ Legis. Tunc septuaginta Seniores ascenderunt, erant enim digniores, gerentes totius Populi vicem, adeo ut quod fiebat cum eis, erat quasi fieret cum toto Populo. Ex parte etiam Dei secuta fuit confirmatio Legis per hoc, quod post prædicta, ostendit se gratosè illis; nam ut dicitur in tex. *Israelitæ viderunt Deum; & sub pedibus eius quasi opus Lapidis Sapphirini, & quasi Cælum cum serenum est.* Hæc autem visio non est intelligenda de visione Divinæ essentia, cum ista invisibilis sit humanis oculis; sed intelligeretur de similitudine ipsam Deum representante: sub cuius pedibus erat quasi opus Lapidis, seu Lateris, ut est in Hebræo, Sapphirini; ita quod figura Lateris, reducebat Israelitas ad memoriam laboris, & anxietatis, quam sustinuerant

fa-



faciendo Lateres in *Ægypto*. Color autem *Cœlestis* ipsius lateris, designabat eorum libertatem, quam ex misericordia Dei consecuti fuerant, & spem futuræ Gloriæ in *Cœlo*, transactis laboribus, & miserijs vitæ præsentis. Quod autem sub pedibus Dei esset Lapis, qui est terra, figurabat expressè quod Deus assumpturus erat carnem humanam. Post hanc visionem *Israelitæ* comederunt, & biberunt, ut dicitur in tex. Quod notatur ad exprimendam eorum culpam: quandoquidem, non multum curaverunt de Visione Dei; sed magis delectati rebus temporalibus, conversi sunt ad epulas, præponentes ipsas tali suavissimo Obiecto, quod erat initium, vel saltem Imago perfectæ felicitatis; & ex hoc dispergi meruerunt. Sed Dominus distulit eorum poenam, ne dies tantæ lætitiæ, mortuorum plantu foedaretur.

### Reflexio 187.

**C**onfirmata Legis receptione, iussit Dominus Moyse, ut ascenderet in Montem, ad Tabulas Legis recipiendas. Dicunt autem DD. quod istæ Tabulæ fuerunt à Deo creatæ noviter, ut in eis scriberentur verba Legis, ab Angelo repræsentante ipsum Deum. Angelus enim ministrabat Domino, quantum ad istos effectus Legis promulgandæ: vel Deus creavit Tabulas sic scriptas sicut creare poterat rudes, & impolitas. Addunt aliqui, quod istæ Tabulæ erant de Sapphiro. Igitur ascendente Moyse, operuit nubes Montem, & habitavit gloria Domini super Sinai, tegens illum Nube sex diebus. In septimo autem vocavit Deus Moysen de medio caliginis. Hic adverte quod totus Mons operitus fuerat Nebula, & ista erat aliquantulum rara; sed circa Cæcumen Montis erat densa, quæ vocatur hic caligo. Super caliginem autem erat quasi species Ignis, & videbatur Populo tendere usque in Cœlum; & talis Ignis dicitur Gloria Domini; quia repræsentabat Divinam Maiestatem. Moyse verò licet fuerit sex diebus intra Nebulam, non fuit tamen  
intra.



intrà caliginem, in quam intrare minimè ausus fuisset nisi vocatus à Deo. Ratio autem quare Dominus non statim vocavit Moysem, sed expectavit per sex dies continuos, fuit quia volebat tunc specialius loqui cum eo, quam alijs vicibus; ideoque oportebat illum esse valde elongatum à curis terrenis; fuerat vero Moyfes paulò ante cum popularibus; ideo voluit Deus, ut maneret per aliquos dies procul, ut sic eius Intellectus distraheretur à terrenis, & elevaretur ad contemplanda Divina. Septimo igitur die ascendit Moyfes ad vocem Domini in cacumen Montis, & fuit ibi quadraginta diebus, & quadraginta noctibus, absque cibo, & potu. Visio namque illa ita consolativa, & clara fuit, quod abstulit ab eo omnem appetentiam naturalem cibi, & potus. In his autem diebus Deus docuit Moysem illa, quæ infra ponuntur: nempe fabricationem Tabernaculi, & Vasorum illius. Item multas quæstiones Legis, omnesque ritus Sacrificiorum, qui præscribuntur in Levitico: in fine autem dedit ei duas Tabulas Lapideas, Præcepta Decalogi continentes.

## CAP. XXV. Reflexio 188.



Ortis supra Iudicialibus præceptis, hîc agitur de pertinentibus ad cultum Divinum. Voluit namque Dominus sibi fieri Sanctuarium, ut in eo tribueretur Divinæ suæ Maestati specialis cultus, & quod esset portatile, ut ubicumque Populus esset, haberet statim specialem locum ubi cole-ret Deum suum. Pro fabricatione autem Tabernaculi iussit Dominus Moyse, ut acciperet primitias ab omni homine, qui non coactus, sed spontaneus illas offerret. Non accipiuntur tamen hîc primitiæ sicut accipiuntur ubi mandatur solvi decimas, & primitias; sed intelliguntur de rebus pretiosis, de quibus debebat fieri oblatio, quæ vocantur primitiæ, quia



quia dabantur de optima parte rei possessæ. Hebræi autem habebant aurum, argentum, lapidesque pretiosos, & multa alia: tum quia de mandato Domini expoliaverunt Ægyptios; tum quia, in summersione illorum in Mari Rubro, valdè ditati fuerant, & in victoria Amalecitarum, multa spolia receperant. Iussu est autem fieri Tabernaculum, & omnia ad ipsum pertinentia de auro, argento, & alijs rebus pretiosis, quia Deo deputandum est illud, quod in humanis pretiosissimum inveniri potest. Vnde in Levitico præcipitur, quod Sacerdotes nullam maculam habeant, qui erant specialitèr Deo deputati. Porro Tabernaculum erat longitudinis triginta cubitorum, & decem latitudinis, & dividebatur in duas partes inæquales. Nam prima pars occidentalis continebat decem cubitos per quadrum, & dicebatur *Sanctum*, *Sanctorum*, vel *Tabernaculum interius*. Alia vero pars Orientalis continebat cubitos viginti longitudinis, & decem latitudinis, & dicebatur *Sanctum*, vel *Tabernaculum exterius*; & distinguebantur istæ partes Velo intermedio. Ostendit autem Dominus Moyfi visione imaginaria Tabernaculum, cum omnibus ad ipsum pertinentibus; & secundum istam similitudinem, menti illius clarè & firmiter impressam, explanavit Moyse omnia ipsis Artificibus, ut perfectam facerent operis constructionem.

### Reflexio 189.

**P**rimum & principale quod erat in Tabernaculo, fuit Arca, quia in illa reponendæ erant Tabulæ Legis: unde maior reverentia erat ad ipsam, quam ad omnia alia; & ideo Dominus iussit hanc primò construi de Lignis Setim, quæ erant imputribilia. Porro Arca erat quasi Scrinium sine pedibus, & erat longa duos cubitos, & dimidium: latitudo vero erat cubitum, & dimidium: altitudo similiter cubitum, & semissum. Erat autem vestita Laminis aureis foris & intus, ita ut tota Arca videbatur aurum, super quam erat Corona aurea



aurea quadrata; erat enim quoddam Labrum in circuitu elevatum, quasi spatio quatuor digitorum super Operculum Arcæ, sicut fit in marginibus Scachorum. Erant deinde quatuor circuli aurei in quatuor angulis Arcæ, ut per eos Vectes intrarent, ad hoc ut Sacerdotes illam ferrent, quando Castra movebantur. Super Arcam erat *Propitiatorium* eiusdem longitudinis, & latitudinis; nam erat operculum Arcæ, & dicebatur Propitiatorium, quia de illo loco audiebantur responsa Divinæ Pietatis. Vocabatur etiam *Oraculum*, quia per orationes impetrabantur Divina responsa. Hoc Propitiatorium, non erat sicut Arca de lignis Setim; sed totum de auro mundissimo: & hoc propter excellentiam Summi Dei ibidem sedentis. Decebat enim, ut honorifica sedes, prout erat possibile, pararetur Divinæ Maiestati. Et licet omnia quæ in Tabernaculo erant spectarent ad Dominum; tamen nihil magis pertinebat ad Deum, quam Propitiatorium, quia in hoc specialiter Deus esse dicebatur. Ex utraque autem parte Oraculi erant duo Cherubin de auro purissimo, se mutuo respicientes, & regentes alis suis Propitiatorium; habebant verò similitudinem Puerorum, vel Iuvenum,

### Reflexio 190.

**D**Escriptis illis, quæ erant in Tabernaculo interiori, ponuntur illa, quæ erant in exteriori. Et prima fuit Mensa, quæ habebat longitudinem duorum cubitorum, & latitudinem unius. Licet autem in ea multa ponerentur necessaria ad ministerium Altaris Holocaustorum; tamen præcipuus eius usus erat in locandis panibus propositionis, à quibus recipiebat Mensa denominationem. In ista ponebantur duodecim panes, in recordationem coram Deo duodecim tribus Israel. Per circuitum mensæ erat Labrum aureum, nempe Lamina aurea altitudinis duodecim digitorum, affixa spissitudini tabulæ ipsius mensæ per circuitum, sicut fit in Scacheis, quæ habent Labrum ex utraque parte, quando



quando ex una parte pingitur Ludus scaccorum, & ex altera Ludus alterius rei. De spissitudine autem mensæ non fit mentio in Tex. Tamen dicunt DD., quod erat quatuor digitorum. Cum autē Labrum aureum esset duodecim digitorum, quatuor adhærebant spissitudini mensæ, quatuor remanebant sub tabula, operientes partem superiorem pedum mensæ; & ideò dicitur in Tex. *Ipsi Labro coronam intersatilem, altam quatuor digitis*. Et dicitur intersatilis, hoc est in aliquo loco rara, habens aliquas sculpturas, & spatia intermedia plana; & fortè erant intermixti aliqui flores, aut arbores. Alij verò quatuor digiti elevabantur super mensam in circuitu; & ideò dicitur in Tex. *Et super illam alteram coronam aureolam*. Interviebat autem hæc corona ad hoc, ut nullomodo caderent illa, quæ ponebantur in mensa. Subter hanc coronam erant circuli aurei, ut Vectes mitterentur per eos, ad portandam mensam. Vectes autem erant de lignis setim, sed totaliter cooperti Laminis aureis. Similitèr vasa, quæ hic exprimuntur, erant omnia de auro purissimo. Acetabula verò erant vasa, in quibus examinabatur Incensum, & Simila, de quæ fiebant panes propositionis, ad videndum si essent apti ad oblationem. Dicitur enim acetabulum non ab aceto, sed ab accipiendo illa, quæ in Sacrificijs erant necessaria. Phialæ verò, erant vasa, in quibus examinabatur vinum, & alia liquida. Thurribula erant vasa, in quibus ponebatur incensum, prius examinatum super panes propositionis; nempe unum Thurribulum super sex panes, & aliud super alios sex,


### Reflexio 191.

**S**ecundum principale in Tabernaculo exteriori erat Candelabrum factum per malleationem, non vero opere fusorio, de auro purissimo. Hastile eius nempe stipes procedebat directè in altum, habens inferiùs tres pedes, & sursum sex calamos, egredientes de Hastili; tres ex una parte, & tres ex altera, tendentes sursum obliquè, quousque per-



pertingerent ad altitudinem Hastilis, in quo erant quatuor Scyphi; unde in totum erant viginti duo Scyphi: & non erant de opere plano, sed cum aliquibus figuris, & sic dispositi in candelabro, quasi Calamus transfret per medium Scyphi; erantque multi pomelli, & flores, ad decorem ipsius candelabri, in quo erant septem lucernæ. Ponderus autem Candelabri habebat Talentum auri purissimi; & dicunt aliqui DD. quod tale ponderus erat centum viginti librarum. Verumtamen non est de hoc ulla certitudo, quia pondera auri, & argenti multum variantur secundum diversa tempora. Erant deinde Emunctoria, idest forfices aureæ, quibus amovebatur illud, quod erat combustum de Lychinio, ne foedaret oleum purissimum, quod ardebat. Similiter de auro purissimo erant alia Vasa, ubi extinguebantur illa, quæ emuncta erant, ne facerent fumum: uolebat enim Deus in ministerio suo maximam puritatem, & munditiam, ad hoc ut ipsum ministerium esset magnæ reuerentiæ.

## CAP. XXVI. Reflexio 192.



Ræmissis illis quæ erant intra Tabernaculum, hic describitur ipsum Tabernaculum. Hoc autem erat domus facta de tabulis, ut citò posset erigi, & dissolui. Illius operimentum quadruplex erat. Primum erat de Cortinis quatuor colorum, scilicet Byssu retorta, ut firmitus esset. Hyacintho, quod est sericum habens cœlestem colorem. Purpura, Coccoque bincto; erat enim Sericum, quod ut magis haberet colorem rubeum dupliciter tangebatur; erantque prædictæ Cortinæ uariatę opere plumario, idest opere Acus; in ipsis enim erant figuræ florum, arborum, aliarumque rerum, non tamen hominum, nec animalium. Secundum operimentum erant Saga cilicina facta de pilis caprarum;

Ter-



Tertium erat de pellibus Arietum rubricatis, quod operiebat tectum Tabernaculi; & super hunc erat quartum operimentum de pellibus Hyacinthinis, quæ habebant colorem cœlestem. Operimenta verò de Sagis, & pellibus Arietum erant fortiter affixa terræ, cum funibus, & Paxillis ne à ventis, & imbris moverentur. Tabulæ Tabernaculi erant 48. de lignis Setim; videlicet 20. in latere Meridionali, & 20. in Aquilonari, & octo in latere Occidentali, & ponebatur quælibet Tabula super duas Bases argenteas; unde prædictæ Bases erant 96. Tabulæ autem erant coopertæ laminis aureis, & sic totum Tabernaculum erat interius aurum. Deinde erat Velum de Hyacintho, & Purpura, Coccoque bis tincto, & Byffo retorta, pulchra varietate contextum. Erant enim ibi diversæ figuræ florum, sicut dictum est de Cortinis; & pendeat super quatuor columnas de lignis Setim totaliter coopertas laminis aureis, habentes Capitella aurea, & bases argenteas. Hoc Velum dividebat *Sancta Sanctorum* ab illa parte, quæ dicebatur *Sanctum*. Extrà velum in parte Aquilonari posita erat Mensa propositionis, & in meridionali candelabrum. In introitu verò Tabernaculi, erat aliud velum loco parietis, simile, quantum ad materiam, Velo prædicto, & pendeat à quinque columnis de lignis Setim, totaliter coopertis laminis aureis, & habebant capitella aurea, & Bases æneas. Dicit autem Iosephus, quod Tabernaculum in exteriori parte erat totum coloris cœlestis; nam operiebatur totaliter pellibus Hyacinthinis; unde homines à longè illud aspicientes, & admirantes, putabant esse Cœlum, Voluit enim Deus, ipsum Tabernaculum construi valdè pulchrum, ut Divinus cultus in summa haberetur reverentia.

### Reflexio 193.

**P**Ræmissa descriptione eorum quæ erant, tum in Tabernaculo interiori, quod dicebatur *Sancta Sanctorum*, tum in exteriori, quod vocabatur *Sanctum*, videndæ sunt,  
Deo



Deo concedente, rationes litterales omnium prædictorum. Igitur per partem Tabernaculi interiorem, figurabatur pars Orbis nobis invisibilis, nempe Cælum Empyreum, ubi Deus se manifestat Beatis; & ideo erat ibi vox super Cherubim, qua Dominus se manifestabat, dando orantibus responsa. Per Propitiatorium, quod erat quasi sedes Dei, denotabatur ipse Deus præsidens omnibus rebus; qui licet sit ubique per Essentiam, Præsentiam, & Potentiam, tamen speciali modo est in loco Beatorum per apertam visionem, & fruitionem. In illa sede non erat aliqua Imago representans ipsum Deum; quia Deitas nullomodo est figurabilis: extremæ namque dementiæ esset, velle pingere Divinitatem. Per Cherubim, qui versis vultibus se respiciebant, denotabatur Natura Angelica, & eorum perpetua concordia, & obsequium circa Divinam Maiestatem. Per Arcam, quæ erat totaliter clausa, designabatur, quod rationes omnium effectuum in Creaturis visibilibus, procedunt de Aula sancta Dei; sed sunt nobis prorsus occultæ. In Arca autem tria continebantur, scilicet Manna; Virga Aaron; & Tabulæ Divinæ Legis; ad tria præcipua representanda, quæ nobis sunt cœlitus collata: nempe vitam, quæ per Manna designabatur; nam omnibus naturaliter dulce est vivere. Secundum, est in humanis potestas Regiminis; nam omnis potestas à Deo est, & hoc figurabatur per Virgam Aaron. Tertium, est Sapientia cœlitus data hominibus, per quam dirigitur Potestas Regiminis, & hoc figurabatur per Tabulas, in quibus erat scripta Divina Lex: hæc enim est vera nostra sapientia, per quam solam perfectè dirigimur in agendis.

### Reflexio 194.

**V**iso de significatione partis Tabernaculi, quæ dicebatur *Sancta Sanctorum*, videndum superest de significatione alterius partis, quæ dicebatur *Sanctum*. Igitur per hanc figurabatur alia pars Orbis, quæ est à Cœlo sidero

P

reo



reo usque ad Terram. Nam per Cortinas diverforum colorum, & multipliciter variatas, quæ immediatè tangebant Tabernaculum, figurabatur Cœlum sidereum varijs stellis ornatum. Et quia Firmamentum acceptum in tota sua latitudine, dividit aquas Crystallinas, seu Cœlestes ab Elementaribus; ideo in Tabernaculo erat Velum, quod ponebatur ante *Sancta Sanctorum*, distinguens Tabernaculum interius ab exteriori. Per Septem Lucernas, quæ erant in Candelabro, signabantur septem Planetæ: ideoque Candelabrum, erat positum in parte Australi; quia motus Planetarum ab Oriente in Occidentem in Emispherio nostro, declinat ab Æquinoctiali, vergens ad Austrum. Mensa continens panes, denotabat ubertatem; & ideo ponebatur in parte Aquilonari, quia Panis, & cœtera terræ nascentia, magis abundant in parte Aquilonari, quam in Meridionali; nam ista propter nimium calorem solvitur in siccas arenas; terra vero Aquilonaris magis humida est, ideoque magis fructificat, sicut sunt Climata in quibus nos habitamus; nam terra nimis Septentrionalis æterno frigore congelata, nihil fert. Operimentum de Pellibus Rubricatis figurabat Elementum Ignis. Operimentum de pellibus Hyacinthinis, Elementum Aeris. Operimentum de Sagis, Elementum Aquæ. Tabulæ verò parietum, & Bases, quæ erant de Lignis, & Metallis, denotabant Elementum Terræ, quia Ligna sunt terræ affixa, & Metalla generantur in terræ visceribus. Et sic per Tabernaculum, quod Universum Mundum figurabat, ratione suarum partium, signabatur quod erat deputatum cultui Veri Dei, qui toti Orbi dominatur.

## CAP. XXVII. Reflexio 195.



Descripto Tabernaculo, & illa quæ intrà ipsum erant, hîc describuntur ea, quæ erant extrà Tabernaculum, ad ipsum tamen pertinentia. Præcepit ergo Dominus Moysi, ut faceret Altare de Lignis Setim



tim opertum *Ære*: erat autem quadratum secundum longitudinem, & latitudinem, scilicet quinque Cubitorum: altitudo autem erat trium Cubitorum, carens fundo, & operculo, ita quod habebat superficiem terræ pro Fundo. Interius vero erat totaliter concavum, & vocabatur *Altare Holocausti*; non quia solummodò ponerentur in eo Hostiæ Holocaustorum, nam etiam Victimæ pacificæ, & pro peccato, ponebantur; sed quia Hostia Holocausti dignior erat, cum tota cremaretur ad honorem Divinum. Denominatio autem, fit à digniori. Non erat hoc Altare intra Tabernaculum; tum propter munditiam Sanctuarij: tum quia non potuissent Hostiæ cremari, quia inflammarentur Cortinæ manentes super Tectum, cum non distarent à pavimento nisi decem cubitis. Quia vero Sancta non debent tangi à rebus profanis, fuerunt iussu Dei assignata instrumenta specialiter inservientia in Ministerio Altaris. Et primò *Lebetes*, quos nos Bacinos appellamus, quibus amovebantur Cineres de Altari, & in ipsis Lebetibus portabantur extra Castra in loco mundo. Secundo erant *Forcipes*, & vulgariter dicuntur *Tenacula*, quibus tenebantur Carbones, & movebatur ignis à Sacerdotibus quodcumque vellent. Tertio erant *Fuscinulae*, quæ inserviebant ad extrahendas Carnes de Chaldarijs, & ad ponendum super Altare illa, quæ ibidem cremabantur. Quarto erant *Ignium Receptacula*, idest vasa, in quibus de Altari accipiebantur Carbones vivi, ut portarentur intra Tabernaculum ad cremandum Thymiana mane, & Vespere super Altare Incensi. Quinto erat *Craticula in modum Retis*, videlicet magna Lamina constructa multis foraminibus. Sexta erat *Arula*, quæ ponebatur in concavitate Altaris, & in tali Vase ponebatur ignis consumens Sacrificia. Tandem erant quatuor *Circuli Ænei* per quos ponebantur *Veſtes*, ad ipsum Altare portandum de loco ad locum.



## Reflexio 196.

**P**ost Altare Holocaufti iussit Dominus constructionem Atrij. Hoc autem erat quædam Platea magna sub aperto Cælo, habens centum Cubitos in longitudine ab Oriente in Occidentem: & in latitudine, quinquaginta ab Austro versus Aquilonem; & erat clausa Columnis, in quibus pendebant Cortinæ de Byffo retorta usque ad terram, ubi cum Paxillis, & funibus figebantur, ne à ventis moverentur. In latere Aquilonari erant viginti Columnæ, & totidem in Australi. In latere verò Occidentali decem; & tot in Orientali; unde in totum erant sexaginta Columnæ de Ære, & omnes vestitæ Laminis, & Cælaturis argenteis, quæ circundabant Columnas in modum flosculorum. Similiter Capirella Columnarum erant tota argentea: Bases autem Aenæ. Cortinæ habebant in latitudine quinquæ Cubitos secundum longitudinem Columnarum, & erant factæ cum Acu reticulato opere, ita quod vulgus manens extra Atrium, per foramina Cortinarum poterat videre Sacrificia, & oblationes, quæ fiebant in Altari Holocauftorum per Sacerdotes. Pars verò Orientalis huius Atrij claudebatur Cortina facta de quatuor coloribus, scilicet Hyacintho, Purpura, Coccoque bis tincto, & Byffo retorta; & poterat trahi, & retrahi pro ingressu eorum, qui intrabant Atrium, & exibant. Ratio huius Atrij fuit reverentia Tabernaculo Dei debita: cum enim esset locus eximie Sanctitatis, non solum illicitum erat Vulgo intrare ambitum illius; sed etiam nimis ad illum accedere, magna reputabatur irreverentia. Item ut Sacerdotes, & Levitæ possent liberiùs, & devotius officia sua exercere, Divinasque Ceremonias, existente à longè populari multitudine.

CAP.



## CAP. XXVIII. Reflexio 197.



Esripto Tabernaculo cum suis pertinentijs, consequenter agitur de Ministrorum Ornamentis. Refert autem Iosephus, qui fuit de genere Sacerdotali, decem fuisse Ornamenta Summi Sacerdotis. Primum erant *Femoralia Linea*, ad operiendam turpitudinem carnis suæ. Secundum erat *Tunica de Byssso*, & dupla per totum. Tertium erat *Balteus*, idest Cingulum de diversis coloribus latitudinis quatuor digitorum, cuius extremitates pendebant in parte anteriori Sacerdotis; & habebant fimbrias de auro, alijsque coloribus mira varietate contextis. Quartum erat *Thiara*, sive Mitra de Byssso in capite, tendens superius in acutum; & cum Bindello ligabatur sub mento, ita ut nuditatem Colli tegeret, fortiterque Mitram teneret ne caderet de capite Sacerdotis ministrantis. Quintum erat *Tunica dicta Poderis*, idest talaris, Hyacinthina, habens circa Collum, & in extremitatibus manicarum oras contextas ex diversis coloribus, & Lapidibus pretiosis: in margine autem inferiori, habebat Malogranata facta de Hyacintho, Purpura, & Byssso retorta, & Tintinnabula aurea sic intermixta, quod inter duo Malogranata erat unum Tintinnabulum; & e converso, inter duo Tintinnabula unum Malogranatum. Sextum erat *Superhumerales*, quod ponebatur super dictam Tunica Hyacinthinam; & quantum ad materiam, erat de panno contexto quinque generibus filorum factis de Auro, Hyacintho, Purpura, Byssso retorta, Coccoque bis tincto, cum pulchra varietate; tum propter diversitatem materiae, tum propter Flores ibidem figuratos. Quantum verò ad formam, erat vestis quadrata altera parte longior, habens in medio aperturam, per quam intrabat caput Summi Sacerdotis: Latitudo autem tangebatur humeros. Vna pars longitudinis pen-



debat retrò, operiens dorsum usque ad Renes; altera pende-  
 bat antè, operiens pectus. Latera vero utriusque partis,  
 iungebantur in lateribus Sacerdotis nodulis aureis. Habe-  
 bat hæc Vestis super humeros duos Lapidés Onychinos ma-  
 gnos, in quibus erant sculpta nomina filiorum Israel, sex in  
 uno Lapide, & sex in altero. In medio autem pectoris ha-  
 bebat hæc Vestis foramen quadratum, magnitudinis unius  
 palmi, & in tali loco vacuo ponebatur Septimum Ornamen-  
 tum quod vocabatur *Rationale Iudicij*: quia in ipso quære-  
 batur iudicium illarum rerum, quas Sacerdos scire deside-  
 rabat, præmissa oratione ad Deum. Pannus Rationalis, erat  
 de eadem materia cum superhumerali, in quo erant duode-  
 cim Lapidés pretiosi quatuor ordinibus dispositi; in quibus  
 erant sculpta nomina duodecim filiorum Israel, secundum  
 ordinem nativitatis suæ: habebat autem magnitudinem unius  
 palmi in quadrum, ita ut impleteret præcisè locum dimissum  
 in superhumerali. In quatuor vero Angulis, habebat qua-  
 tuor Anulos aureos, quibus correspondebant alij quatuor  
 Anuli existentes in superhumerali; & per istos stringebatur  
 Rationale, & Superhumerales ligaminibus Hyacinthinis, tran-  
 seuntibus per istos Anulos; & sic Rationale, & Superhume-  
 rale simul iuncta manebant. Quapropter applicando Super-  
 humerale, applicabatur etiam Rationale; quia hoc erat tan-  
 quam pars Superhumeralis; & ideo denominabatur totum  
*Ephod*, sive Superhumerales. Virtus tamen, secundum quam  
 revelabantur illa, quæ requirebantur, erat tantum propter  
 Rationale. Sciendum est autem, quod in Rationali erat  
*Doctrina, & Veritas*; quæquidem secundum Iosephum,  
 erat quidam fulgor procedens de Lapidibus Rationalis, qui  
 designabat Deum placatum, & responsum prosperum, &  
 quod sic impleteretur in effectu, sicut à Pontifice petebatur.  
 Dicit etiam idem Auctor, quod iste splendor, cessavit per  
 ducentos annos antequam scriberet Librum Antiquitatum,  
 quem scripsit tempore Titi, & Vespasiani; & sic constat,  
 quod iste fulgor cessavit apparere 160. annos ante Christi  
 Do-



Domini Nativitatem. Alij dicunt, quod Doctrina, & Veritas, erat Nomen Domini *Tetragrammaton*, positum in Rationali sub Lapidibus prædictis, virtute cuius manifestabatur Veritas à Pontifice in Oratione requisita. Octavum ornamentum erat *Balteus*, sive Cingulum contextum quinque coloribus pulchra varietate sicut Superhumerales, cuius extremitates auro contextæ, pendebant in parte anteriori Sacerdotis. Nonum Ornamentum, erat *Mitra Hyacinthina* posita in capite Summi Pontificis, super aliam Mitram Byssinam, habens in inferiori parte Semicirculum aureum, procedentem à capite, usque ad utramque aurem. Decimum erat *Lamina aurea* pendens in fronte Summi Sacerdotis, ligata cum Mitra filis Hyacinthinis, in qua inscriptum erat Nomen Domini Tetragrammaton.

### Reflexio 198.

**E**xplicatis Pontificalibus ornamentis, restat videre eorum rationes in speciali, quantum ad sensum literalem. Sciendum igitur, quod per ornamenta Summi Sacerdotis figurabatur totus Orbis. Unde Sapientie 18. dicitur *In Veste enim Poderis quam habebat, totus erat Orbis terrarum.* Tunica namque linea figurabat Terram, quia linum de terra nascitur. Balteus illam cingens, denotabat Oceanum terram undique circumdantem. Tunica Hyacinthina, ratione coloris, designabat elementum Aeris, in qua posita erant tintinnabula, quia in Aere generantur tonitrua. Balteus cingens Tunicam Hyacinthinam, signabat Elementum Ignis, qui ambit Aerem. Superhumerales figurabat Cælum Sidereum, erat enim multis coloribus, & picturis adornatum, ad signandam pulchritudinem Stellarum. Duo lapides Onichini positi in Superhumerali, significabant duo Luminaria magna Solem, & Lunam. Duodecim Gemmæ posite in Rationali, denotabant duodecim Signa Zodiaci; & ideo hoc ornamentum dicebatur Rationale; quia rationes terrenorum sunt in Cœ-



lestibus, cum ab ipsis emanent terrestria; & in Zodiaco sunt rationes omnium istorum effectuum naturalium; & ideo ab eo cuncta generabilia, & corruptibilia regulantur. Vnde *Arist. 2. de Generat.* ait: *Quod per accessum, & recessum Solis in Circulo obliquo, nempe in Zodiaco, fiunt generationes, & corruptiones in sublunaribus.* Per Mitram, quæ super omnia Ornamenta ponebatur, denotabatur Cœlum Empyreum. Per Laminam tandem auream positam super Mitram, repræsentabatur ipse Deus, præsidens omnibus Creaturis: propter quod in illa erat insculptum Nomen Domini Tetragrammaton, quod convenit solummodò Deo, Creatori omnium rerum.

## CAP. XXIX. Reflexio 199.



Descriptis vestibus Sacerdotalibus, quæ erant instrumenta sine quibus in Altari non poterant fieri functiones sacræ, hic ponuntur Consecrationes Aaron, & filiorum eius, quæ erant dispositiones magis immediatæ ad exequendum officium Sacerdotale. In tali autem consecratione offerebatur primò Vitulus pro peccato. Et ratio ea erat, quia non est speciosa laus in ore peccatoris; ideo ad hoc ut posteriora Sacrificia accepta essent Deo, oportebat præmitti Sacrificium pro expiatione peccati Sacerdotis. Post Vitulum mactabantur duo Arietes; unus in Holocaustum, in memoriam obedientiæ Abrahæ, qui obtulit Arietem pro filio, cuius obedientiæ Sacerdotes debebant esse imitatores. Alius pro hostia pacifica, in memoriam Agni immolati in exitu de *Ægypto*, cuius sanguine fuerunt Israelitæ liberati ab Angelo exterminatore. Deinde offerebantur panes azymi: ad denotandum, quod Sacerdotes debebant esse absque fermento corruptionis malitiæ, & nequitiae. Deinde offerebatur Crustula, quæ erat panis quasi totus crusta, valde tenuis, & optimus, cum oleo admixto, & Laga-



Laganā pariter linita oleo: ad denotandum, quod Sacerdotes debent, ultra puritatem, habere pinguedinem Charitatis, per oleum designatæ. Post hæc Aaron cum filiis suis accedebant ad Labrum Æneum, quod erat circa ostium Tabernaculi, ibique lavabantur. Deinde Moyses digito suo fundebat oleum unctionis super caput Aaron, & super Vestes Sacerdotales. Reliqui autem Sacerdotes non ungebantur in capite: ad denotandum, quod potestas offerendi derivabatur ab ipso Pontifice ad Sacerdotes inferiores, sicut à Capite diffunduntur Spiritus animales ad reliqua corporis membra. Vocabatur autem hæc Unctio, non simpliciter oleum, sed oleum unctionis, quia erat quasi quoddam unguentum: nam miscebatur oleum illi sanguini, qui erat in Crateris super Altare, & sic fiebat quædam mixtio; ad significandam devotionem Iacob, fundentis oleum super Lapidem; & in recordationem Sanguinis Agni immolati in exitu de Ægypto: & in hac asperitione olei unctionis, terminabatur Consecratio Sacerdotum; licet post hæc sequerentur quædam aliæ ceremoniæ, quæ solummodo erant de solemnitate consecrationis, sed non de substantia illius. Licet autem ista unctio, secundum se esset maculativa, tamen non maculabat Vestes Pontificales, & Sacerdotales, Deo sic iubente.

### Reflexio 200.

**P**ost unctionem Aaron Summi Sacerdotis, & filiorum eius, iussit Deus Moysi, ut applicaret Vitulum prædictum coram Tabernaculo testimonij, super quem imponerent Sacerdotes manus suas. Hoc autem erat, ut tali ceremonia confiterentur, quod ex rigore Divinæ Iustitiæ digni erant morte; sed ex Dei clementia, transferebatur eorum mors in ipsum animal: unde mastato Vitulo, sumebat Moyses de sanguine illius, tingens digito suo Cornua Altaris, ad denotandum, quod per peccatum meretur homo mortem, quia offendit Deum à quo recepit vitam. Sicut autem



tem quando contra aliquem Principem malè actum est, si fundatur sanguis iniuriantis coram eo, statim quiescit ira illius; ita Deus dum sanguis eorum, qui peccaverunt fundetur, placaretur: quia vero Deus misericors est, non vult sanguinem peccatorum fundi: ideoque, si loco humani sanguis fundebatur sanguis pecorum, recipiebat satisfactionem. Sed Deus in Altari specialiter dicebatur esse; ideo cornua Altaris tangebantur sanguine animalis immolati, loco sanguine peccatoris. Hæc autem locum habuerunt antequam Dei filius assumeret carnem nostram; in qua factus obediens usque ad mortem satisfecit pretiosissimo suo sanguine pro omnibus hominum delictis, & reconciliavit nos Deo: unde loco veterum Sacrificiorum imperfectorum, & umbratiliū, subiit perfectissimum Eucharistiæ Sacrificium, in quo recolimus memoriam suæ passionis: ut sicut semel per sanguinem Agni immaculati sufficienter fuimus redempti; ita per continuam huius Sacrificij frequentationem, tanto beneficio gratias exhibentes, fructus effusionis sanguinis Filij Dei participes fieri mereamur. Inexcogitabilis est enim fructus huius Sacrificij, si tamen sanctè tractaretur.

### Reflexio 201.

**I**mmolato Vitulo iussit Deus Moyſi, ut immolaret secundum Arietem, super quem similiter Sacerdotes manus imponent, & sumerent de sanguine illius, poneretque super extremum Auriculæ dexteræ Aaron, & filiorum eius: ad denotandum, quod debent habere aures apertas, & esse obediētes ad Præcepta Domini; quod totum designabatur per extremum Auriculæ quod est molle, & tenerum, non resistens, & in scripturis sanctis pars dextera bonum designat. Deinde ponebatur Sanguis super Pollicem; ad denotandum, quod Sacerdotes debebant esse prompti, & expediti in oblationibus Sacrificiorum. Post hanc Consecrationem præcepit Deus Moyſi, ut tolleretur Carnes istius secundi Arietis.

immo.



immolati pro gratiarum actione; tum oblationes panis azy-  
mi, & Crustulæ conspersæ oleo, & Lagana, poneretque  
omnia super manus Aaron, & filiorum eius. Talis autem im-  
pletio, quæ etiam dicitur initiatio, erat applicatio eorum  
ad officium Sacerdotale. Et dicunt DD. quod Moyles sup-  
ponebat manus suas manibus Aaron, & filiorum tenentium  
prædicta, elevans primò sursum, postea retrahens deorsum,  
deinde deducens versus Orientem, & versus Occidentem, &  
ad Aquilonem, & Meridiem: ad designandum quod illa of-  
ferebantur verò Deo qui ubique dominatur. Patet etiam,  
quod prædicta deductio fiebat in modum Crucis: in quo pul-  
chrè figurabatur, quod Christus Dominus noster, offeren-  
dus erat in Cruce pro totius Mundi salute. De isto Ariete  
comederunt Sacerdotes in sua Consecratione; quia in hostia  
pacifica remanebat una pars spectans ad ipsum offerentem.  
Et quia Sacerdotes tunc erant offerentes, præcipiebat illis  
Deus, ut partem offerentibus spectantem, comederent in  
loco sancto, scilicet in Vestibulo Tabernaculi: fiebat enim  
magnus Ignis intra Atrium, & ibi coquebantur omnes Car-  
nes pacificorum. Per hoc autem denotabatur Deus placatus.  
Sicut in humanis, nihil est quod magis ostendat Dominum  
vere placatum alicui servo, quam admissio illius ad propriam  
suam Mensam. Sciendum est autem, quod istæ operationes  
ceremoniales, non erant de se bonæ, nec malæ; tamen per  
istas placabatur Deus; non ratione earum, sed ex fide, &  
obedientia facientium.

## C A P. XXX. Reflexio 202.



Descripta consecratione Sacerdotum, eorumque  
in Altari Holocaustorum administratione, hæc  
consequenter agitur de Altare Thymiamat-  
um. Duo namque erant Altaria; unum in  
atrio Tabernaculi ad facienda Sacrificia sub  
Divo; aliud intus super quo incendebatur Thymiana; in  
qua



qua crematione erat consumatio Sacrificij : ad denotandum ; quod Sacrificia Veteris Legis , non erant de se accepta , sed tantum ex fide , & devotione offerentium ; quæ quidem devotio , & fides significabatur per Incensum : hinc Apostolus ad Heb. 9. ait : *In priori quidem Tabernaculo , semper intrabant Sacerdotes Sacrificiorum officia consumantes .* Hoc Altare erat de Lignis Setim , & quadratum , habens unum Cubitum longitudinis , & alterum latitudinis ; duosque Cubitos altitudinis : totum coopertum Laminis aureis : & habebat Cornua , idest Labrum in circuitu , aliquantulum supereminens , sicut supra dictum est de Mensa ; eratque situatum contra Velum ante Arcam , ita quod Velum erat medium inter Arcam , & hoc Altare . Habebat insuper Craticulam , quæ erat operimentum suum , coopertam Laminis aureis , & similiter Vestes . Duabus vero vicibus per diem super hoc Altare cremabatur Incensum ; videlicet in Mane , & in Vespere , quando Sacerdos componebat Lucernas . Septem enim Lucernæ Candelabri , ardebant de nocte ; in mane vero extinguebantur quatuor , & tunc primò cremebatur Incensum . In Vespere autem redibat Sacerdos , & incendebat quatuor Lucernas extinctas cremans denuo Thymiana . Super hoc Altari , semel tantum in anno deprecabatur Deum Aaron , innitens super illud , & tingens illud sanguine Victimæ oblatae pro peccato .

### Reflexio 203.

**P**ostquam actum est de Sacrificijs , agitur consequenter de his quæ necessaria erant pro ipsis comparandis . Sciendum est autem , quod Sacrificia quæ offerebantur à singularibus personis , fiebant de expensis eorum proprijs ; sed illa quæ fiebant pro tota Communitate , fiebant de expensis totius populi . Et quia pro istis erat necessaria multa pecunia , ideo Dominus præcepit , ut omnis Israelita qui transibat ad Numerum solveret medium Sicli . Æqualiter



liter autem dabant hic pauperes, & divites, ne reputarentur divites sanctiores pauperibus, vel magis participare de Divinis. Per hoc autem quod singuli ponebant medietatem Sicli, constabat de numero virorum, per computationem dimidiorum Siclorum. Si vero aliter fuissent numerati, erat plaga in Populo, sicut accidit tempore David 2. Reg. 24. Iste medius Siclus solvebatur non ab omnibus Israelitis, sed solummodo ab illis, qui transibant ad Nomen; id est qui habebantur in numero virorum procedentium ad bellum; tales autem erant qui compleverant vigesimum annum; qui vero non compleverant, non nominabantur ac si non essent nati. Porro solutio huius medij Sicli dicebatur dari ab Israelitis pro animabus suis; quia nimirum Sacrificia facta de illis expensis, proficiebant ratione fidei, devotionis, & obedientiæ animabus eorum. Dicebatur etiam prædicta pecunia dari Domino; quia dabatur, non solum ad sumptus Sacrificiorum, sed aliorum necessariorum in ministracionibus Sanctuarij.

### Reflexio 204.

**A**cto de expensis necessarijs pro Sacrificijs, ponuntur consequenter duo alia pro ministracione perfecta. Et primum est Labrum Aeneum quod habebat in lateribus duos Canales, per quos aqua effundebatur, in quâ Sacerdotes lavabant manus, & pedes. Et ex hoc patet, quod Sacerdotes ingrediebantur Tabernaculum nudis pedibus. Ratio autem cur ante Sacram Ministracionem fieret talis lotio, erat quia istæ duæ partes magis contrahunt fordes; pedes ex pulvere; manus autem ex contrectatione diversarum rerum: ad denotandum, quod qui Deo inserviant, & ministrant, debent esse mundi à pravis operationibus, quæ per manus notantur, & puri affectibus, figurati per pedes, ut sic digni accedant ad Altare. Secundum fuit Vnctio pro Sanctuario: præcepit enim Deus, quod pro ista sumeret Moyses

Arch.



Aromata primæ Myrrhæ : Est autem Myrrha nomen Arboris Aromaticæ, ex qua per modum sudoris duplex Gutta procedit ; & ista est prima Myrrha, & melior . Alia fit per incisionem Corticis, & hæc dicitur secunda Myrrha, estque minus efficax ; unde ad differentiam huius, dicitur hic, quod Moyſes ſumeret Aromata primæ Myrrhæ . Hæc igitur, unâ cum alijs Aromatibus, commiscebatur cum oleo, & poſtea ungebatur Tabernaculum in quolibet angulo, intincto digito in unguento, & ſic dicebatur ungi totum Tabernaculum . Sicut modo in Novo Teſtamento in conſecratione Eccleſiarum ſunt quædam Cruces in angulis earum, & hoc ſufficit ad hoc quod dicatur tota Eccleſia conſecrata . Non poterat autem iſto oleo ungi caro Hominis, exceptis Sacerdotibus, & Regibus quando accipiebant poteſtatem regnativam : prædicti enim, quantum ad officium, ſunt ſupra homines ; nam Sacerdotes ſunt medijs inter Deum, & Populum, pro quo tenetur orare : Principes verò, clementer ipſum regere . Præcipitur autem confici Thymiana purum, ex Aromatibus hic enarratis, ut ſic mereretur applicari ad Dei cultum ; nam Deus purus eſt ; ideoque illa quæ Divino cultui mancipantur, debent eſſe in ſe pura . Prohibetur verò ſub pœna mortis, ne quis componeret ſimile Thymiana, ut tali odore perfrueretur : & hoc erat, propter reverentiam Divinæ Maieſtatis, cum enim tale Vnguentum eſſet applicatum Divino cultui, indecens erat, ut inſerviret ad uſum, vel delectationem mortalis hominis .

## CAP. XXXI. Reflexio 205.




Escripta forma Tabernaculi, & conſecratione Sacerdotum, hic agitur de electione Artificum. Dominus namque manifeſtavit Moyſi, quod deputaverat Beſeleel, & Oliab ad extruccionem Tabernaculi, ac cœterorum, quæ prædicta ſunt, dicens: *Ecce vocavi ex nomine Beſeleel, &*

*im-*



implevi eum Spiritu Dei Sapientia, & intelligentia, & Scientia in omni opere, ad excogitandum quicquid fabrè fieri potest; dedique ei socium Oliab, ut faciant cuncta, quæ præcepi tibi. Dicitur autem vocatus Beseleel; quia tunc Deus vocat aliquem, quando præordinat illum ad aliquid faciendum; & dicitur impletus Spiritu Dei Beseleel, quia ultra naturalem Sapientiam acquisitam, recepit tunc à Deo etiam infusam: quicquid autem homo in anima recipit à Deo, dicitur recipere Spiritum Dei; sive illud sit virtus Moralis; sive Theologica; sive habitus Prudentiæ. Impressit ergo Deus in animam Beseleel, & Oliab aliquod spirituale, virtute cuius poterant facere omnia quæ Deus præceperat; nam virtus eorum acquisita, non sufficiebat ad opus tam difficile, & tam mirabile perficiendum. Repetitur deinde Præceptum de observatione Sabbati, ut manifestaretur causa finalis ipsius Tabernaculi: ad hoc enim fiebat, ut deputaretur Divino cultui, qui pro magna parte consistebat in observatione Sabbati. Item quia Iudæi credere poterant, quod licitum esset facere opus Tabernaculi in Sabbato, eo quod ordinabatur ad cultum Divinum, ideo ad hoc excludendum repetitur Præceptum.

## CAP. XXXII. Reflexio 206.



Ost Præceptum de constructione Tabernaculi; hic describitur superveniens impedimentum. Iniquus enim Populus impatiens moræ Moysis in Monte, congregatus adversus Aaron, petivit fabricationem Idoli; qui ut plebem tumultuantem ab insania revocaret, petijt in aures aureas Vxorum, & filiorum; firmiter credens, quod tam Vxores, quam filij nullomodo paterentur à se abstrahi eorum ornamenta, & sic cessaret conatus populi contra seipsum, vel saltem retardaretur plebis audacia usque ad



ad Moyſis adventum, qui illam reprimeret. Igitur prudentiſſima reſolutione coercere voluit importunitatem inſanæ Plebis: ſed prævaluit iniquitas populi temperamento Summi Pontificis: ſtatim namque attulerunt omnia ornamenta pretioſa, dederuntque illa ipſi Aaron, petentes Idoli conſtationem. Videns ergo Aaron ſibi mortem imminere, niſi ſatisfaceret petitioni eorum, formavit opere fuſorio Vitulum: talem enim Iudæi voluerunt, quia erat in ſimilitudinem Apis Bovis venerati ab Ægyptijs. In hoc autem fuit Aaron valde imperfectus; ſi enim conſiſus fuiſſet in Domino, tunc Deus illum liberaſſet ab impetu perversæ plebis; vel ſi non liberaſſet, melius erat ei per Martyrium ex hac vita migrare, quam metu mortis derelinquere Legem Dei. Igitur formato Vitulo, ſtatim dixerunt Hebræi: *Hi ſunt Dii tui Iſrael, qui te eduxerunt de Ægypto*: attribuentes miracula veri Dei ſordidiſſimo Idolo; eique obtulerunt Holocauſta, & hoſtias pacificas, comedentes de immolatis Dæmoni, nihil curantes de Manna, ſibi tam mirabiliter à vero Deo præſtitto. Poſt commexionem ſurrexerunt ludere, ideſt corizare, & canere in venerationem Idoli.

### Reflexio 207.

**S**Ecuta Populi Idolatria, manifeſtavit Dominus Moyſi exiſtenti in Monte, ſcelus Populi, & deinde dixit: *Dimitte me ut irascatur furor meus contra eos, faciamque te ingentem magnam*. Sciendum eſt autem, quod hîc loquitur Deus ad modum alicuius Patris familias, qui offenſus à proprio filio tenet gladium in manu, ſignans velle filium percutere, dicitque aſtantibus: dimittite me verberare: in quo tamen magis notat, non velle percutere. Sic Deus, ab Iſraelitis offenſus, dicebat velle deſtruire illos, quantum ad ea quæ foris monſtrabat; ſed non erat voluntas beneplaciti, quæ ſemper impletur; ſed Signi, qua ſecundum illa quæ perpetraverant, merebantur mortem; tamen hoc non diſpoſuerat  
Deus



Deus, sed volebat quod Moyses pro illis oraret, ut mererentur vitam precibus servi sui; & sua voluntas Signi, non maneret irrita. Tunc enim videtur irriforia voluntas, quæ mota non complet opus suum, dummodo non sit satisfacta aliquo rationabili motivo; sicut accidit in exemplo allegato patris, qui vult quidem parcere filio, sed vult etiam ut aliquis pro ipso intercedat. Hic quæres, quæ gens esset illa super quam Deus dixit velle constituere Moysen, tamquam Ducem? Dico quod non dabatur illa Gens: nam Deus non ordinaverat præficere Moysen alteri genti quam Hebræis; ideo verba Domini intelliguntur conditionaliter, scilicet, quod si Deus deleturus fuisset Hebræos, constituisset Moysen Ducem super aliam gentem; & tunc daretur illa gens.

### Reflexio 208.

**A** Vdiens Moyses peccatum Populi, oravit ad Dominum pro venia; deinde descendit ad Castra, quia ad Prælatum pertinet, manifesta subditorum peccata corrigere, & punire; etenim facilitas veniæ est incentivum delinquendi. Portabat autem duas Tabulas Testimonij in manu sua scriptas ex utraque parte. Et dicunt aliqui DD. quod ibi erat unica scriptura; tamen legibilis indifferenter ex utraque parte, quod totum erat miraculum: nam littera ex una parte formata ordine recto, apparet eius figura in parte opposita, modo etiam opposito. Alij DD. dicunt quod litteræ erant duplices, ita quod Præcepta erant sculpta ex una parte, & similiter ex altera. Appropinquante igitur Moyse ad Castra vidit Vitulum, iratusque vehementer proiecit Tabulas; illasque confregit ad Radices Montis: iustè iudicans Populum Idolatram esse indignum recipere Legem digito Dei scriptam. Porro hæc fractio Tabularum, fuit signum, secundum omnes Doctores, evacuationis legalium in Adventu Christi Domini. Deinde Sanctus Dux, ardens zelo Divini honoris, combussit coram Populo Vitulum, redigens illum

Q

in



in pulverem, quem sparsit in aquam, & dedit ex eo potum filijs Israel. Dicunt autem aliqui DD. quod istæ aquæ erant amaræ, & nociuæ culpabilibus, causando in eis inflationem, & languorem, per quem deinde poterant ab alijs discerni; illis autem qui non peccaverant dulcissimæ erant, & utiles. Alij DD. dicunt quod color auri remansit circa ora illorum, qui idolatrando peccaverant; & per hoc totaliter distinguebantur ab innocentibus. Et si quæras, quare Israelitæ biberunt has aquas cum probabiliter scirent, malum aliquod ex potatione sibi esse futurum? Dicendum quod Moyse, Deo sic disponente, apparuit tam terribilis, ut nullus ausus fuerit ei contradicere. Sicut fuit in Christo Domino, quando facto flagello eiecit ementes, & vendentes de Templo, nullo audente ei resistere. Manifestatis igitur Idolatris per aquæ potationem, ut prædictum est, stetit Moyse in Porta Castrorum, & ait: *Si quis est Domini iungatur mihi*. Statimque congregati sunt ad eum omnes filij Levi, ut patet in Tex. Ex quo deducunt DD. quod nullus de Tribu Levi peccavit in adoratione Vituli. Istis ergo congregatis, iussit illis Moyse ut occiderent omnes peccatores; quibus iussa implentibus, ceciderunt in die illa quasi viginti tria millia hominum.

### Reflexio 209.

**P**ostquam Moyse punivit Idolatras, & induxit totum Populum ad pœnitentiam, ascendit in Montem, & pro remissione perpetrati sceleris sic Deum precatus est: *Obsecro, peccavit Populus iste peccatum maximum; aut dimitte eis hanc noxam, aut si non facis, dele me de libro tuo quem scripsisti*. Pro intelligentia Textus adverte, quod Deus continet in se simplici cognitione sua, omnia quæ sunt, & quia ista non traduntur oblivioni, sicut ea quæ in mentibus nostris sunt per defetionem specierum intelligibilium, vocatur sua cognitio *Liber*; quia sic res ibi immobiliter manent, sicut in Libro. Sed hic occurrit duplex difficultas. Prima est, quo-




quomodo aliqui deleantur de libro Vitæ, cum sit idem quod Divina Prædestinatio, quæ est immobilis? Ad hoc dicendum quod in Libro Vitæ dicuntur aliqui scribi dupliciter. Vno modo, simpliciter, in quantum Prædestinati sunt in notitia Divina, tamquam ordinati ad vitam æternam, ex prædestinatione Dei, & tales nunquam delentur. Alio modo dicuntur scripti, secundum quid, idest secundum dispositionem in eis actu existentem, scilicet secundum præsentem iustitiam: nam existentes in gratia, per hoc sunt digni Vita æterna. Sed quia aliquando cadunt à gratia, ideò dicuntur deleri: tamen ista deletio non refertur ad Divinam notitiam, quasi aliquid ignoret quod prius noverat: sed ad mutationem de gratia ad culpam existentem in homine. Secunda dubitatio est: quomodo potuit Moyses petere deleri de Libro vitæ? Etenim, si accipiat deleri simpliciter, impossibilis est deletio, ut visum est, & Moyses bene sciebat hanc impossibilitatem. Si autem accipiat in secundo casu; videlicet pro casu de gratia in peccatum, tunc elegisset Moyses offendere Deum, quod est inconveniens, cum sit contra charitatem. Dicendū quod Moyses dixit hoc ex impetu passionis, non ex deliberatione perfecta rationis. Alij dicunt quod verbum Moysis, est ipsius rationis proponentis dispositionem partis inferioris animæ, licet hoc non esset in parte superiori. Sicut Christus Dominus, petivit transferri à se Calicem passionis, licet vellet pati. Et hoc modo contingit in humanis communiter: nam aliquis petens ab alio aliquid cum magno desiderio, dicit: aut facies hoc, aut aufer à me vitam; licet magis vellet carere, non solum illo quod petit, sed omnibus alijs quam vità. Exaudivit autem Dominus orationem Moysis pro Populo sibi commisso humiliter exhibitam; præcepitque ei, ut illum duceret ad terram promissionis: protestans tamen, quod in die ultionis visitaret hoc peccatum. Iste vero dies secundum aliquos DD. intelligitur captivitas Babylonica. Alij asserunt fuisse captivitatem per Romanos factam. Alij volunt, fuisse totum illud tempus, in



quo omnes Israelitæ, qui erant in deserto, mortui ibidem sunt.

## CAP. XXXIII. Reflexio 210.



**I**stquam placuit Divinæ Bonitati non delere Populum, sicut meruerat, iussit Dominus Moy-  
si, ut ascenderet ad terram promissionis, dicens.  
*Ascende de loco isto tu, & populus tuus, & mit-  
tam præcursores tui Angelum: non enim ascen-  
dam tecum, quia populus duræ cervicis est, ne for-  
te disperdam te in via.* Sciendum est autem, quod cum Deus  
ubique sit, per ista verba non est intelligendum quod cum  
Israelitis non esset per essentiam; præsentiam, & potentiam;  
sed solummodo, quod non adesset per miraculorum opera-  
tionem, sicut antè. Item non loquitur hic Deus secundum be-  
neplacitum, seu determinationem absolutam, sed secundum  
signum; nam postea consensit ascendere, ut patet in littera.  
Similiter, dum dicit se missurum Angelum præcursores, ne  
forte ipse Deus disperderet populum, non est per hoc intel-  
ligendum, quod Angelus esset proclivior ad misericordiam  
ipso Deo, sed quod si adesset Dei præsentia, per miraculo-  
rum operationem, rebellio populi maior fuisset: aggravata  
verò culpa, maius motivum aderat ad puniendum populum.  
Et ista erat causa, quare Deus puniebat magis Iudæos pec-  
cantes idolatrando, quam alias gentes: recipiebant enim  
Israelitæ continuè a Deo miraculosa beneficia, & speciales  
gratias. Gentiles vero solum universalis, & communia.  
Audiens autem populus hæc verba amarè flevit. Tunc Deus  
dixit: *Depone ornatum tuum, ut sciam quid faciam tibi.* Man-  
davit vero Deus id quod erat illis salubre: depositio nanque  
ornatus convenit pœnitentibus, & se humiliantibus ad im-  
petrationem Veniæ: hic enim erat imponenda pœna pro pec-  
cato, sed ista mitigatur per contritionem, & dolorem, & per  
asperi-



asperitatem voluntariè assumptam. Per illa autem verba: *Uti sciam quid faciam tibi*. Non est intelligendum, quod Deus cognoscat aliquid de novo, sed solum quod ex mutatione populi de superbia in humilitatem, apparebat extrinsece, quid sibi condecens esset fieri à Deo. Porro Ornatus iste, erant Coronæ, quas sibi imposuerant principales de populo in die dationis Legis: tunc enim per illius susceptionem, fuit populus desponsatus cum Deo, & ideo fuerunt coronati ad modum Sponsæ. Sed quia per idolatriam à Deo recesserant, præcepit Deus, ad eorum confusionem, & humiliationem, ut Coronas prædictas deponerent. Sicut si Sponsa, relicto Sponso suo, misceretur alteri viro, deberet perdere dotem, & ornamenta recepta in honorem desponsationis.

### Reflexio 211.

**A**ccepto Moyse mandato pergendi cum populo ad Terram promissionis, oravit prius ad Dominum dicens: *Præcipis ut ducam populum istum, & non indicas mihi, quem missurus es mecum? si ergo inveni gratiam in conspectu tuo ostende mihi faciem tuam*. Adverte autem, quod per ista verba petivit Moyse, ut Deus esset sibi, & populo ita familiaris sicut ante fabricationem Vituli. Sciendum est autem, quod licet Dominus dixisset Moyse, se missurum Angelum antecedentem populum; tamen hoc non satisfaciebat intentioni Sancti Ducis: nam optabat aliquem præcedere, qui miracula operaretur in necessitatibus. Angelus autem, non poterat operari miracula, cum solus Deus ista faciat; ideoque dicebat, nullum fuisse sibi indicatum: unde Deus volens etiam in hoc servum suum consolare, respondit: *Facies mea præcedet te*. Id est, ego deducam te sicut petis. Videns autem Moyse petitionem suam exauditam, accepit sanctam audaciam petendi visionem Divinæ Essentiæ dicens: *Ostende mihi gloriam tuam*. Id est Te ipsum, sicut videris in Gloria tua. In hoc autem non fuit Moyse exauditus; nam




respondit illi Deus: *Non poteris videre faciem meam: non enim videbit me homo, & vivet.* Talis namque visio, non conceditur in presenti vita, ubi est locus pugnae, & meriti, sed in futuro, cum sit merces, & praeium. Ad aliqualem tamen consolationem Sancti Ducis, causavit Deus quoddam Corpus lucidissimum, & pulchrum, quale numquam fuit, nec erit, in quo poterat esse summa quietatio, non Intellectus, qui in sola Dei visione quiescit, sed potentiae visivae, tamquam in perfectissimo suo obiecto visibili in hac vita. Ordinaverat autem Dominus istud Corpus sic: ut in parte anteriori, quae dicitur hic *facies*, essent radij intensissimae lucis, & maximae gratitudinis; itaut nullus mortalis oculus, secundum affectionem quam habet in corpore corruptibili, eam posset intueri, & si forte illam intueretur, ita erat excessiva, ut occidisset hominem: sicut fit quando videmus aliqua terribilia; ideoque Dominus noluit monstrare istam partem anteriorem Moyfi. Pars vero posterior hebebat radios lucis multum quidem intensae, & gratiae; tamen oculi humani poterant ferre ipsam lucem, & quiescere in ea, tamquam in perfectissimo, & adaequato suo obiecto. Placuit enim Deo perficere Moysem, monstrando ei bonum, quod esset perfectissimum secundum corpus: potissima autem perfectio corporalis, est secundum potentiam perfectiorem, haec autem est potentia visiva; ait *Arist. in proemio Metaph. Sensum visus plus diligimus, quia plures rerum differentias nobis ostendit.* Ab ista Luce corporis praedicti quam conspexit Moyses, tantum mutatus fuit, quod eius vultus, radios induit luminosos, itaut non possent intendere in eum filij Israel. Per hoc vero quod Moyses non vidit faciem praedicti corporis, intellexit quod non concederetur sibi visio clara, & perfecta Dei: tales namque apparitiones sensibiles, vel imaginariae fiunt communiter ad denotandum illud quod fit, vel fieri debet cognitioni intellectivae.

CAP.



## CAP. XXXIV. Reflexio 212.



Supra posita fuit responsio Dei de directione itineris, hic ponitur reparatio violatæ Legis. Igitur cum primæ Tabulæ fractæ fuissent, iussit Dominus Moyse, ut præcideret alias duas sicut priores, & quod esset paratus mane ut ascenderet Montem Sinai: talis enim hora est convenientior ad loquendum cum Deo: nullusque videretur per totum Montem; tum ob reverentiam Divinæ Maiestatis ibidem descendente in signo visibili: tum ne Moyses distraheretur à contemplatione Divina, quæ specialissime requirebatur circa imminente visionem. Ascenso ergo Moyse in Montem, descendit Dominus per Nubem: erat enim Nubes gloriæ elevata in Aere supra verticem Montis in aliquali altitudine, & tunc declinavit ad Cacumen Montis, ut Deus loqueretur per Angelum ipsi Moyse. Repetivit autem Deus omnia quæ prius dixerat, ut magis filiis Israel imprimerentur, & precipuè, quod non inirent amicitias cum habitatoribus terræ Chanaam, ne per ipsos traherentur ad Idolatriam, sed subverterent Aras eorum. Deinde repetivit, quod omnis Masculini Sexus, tribus anni temporibus appareret in conspectu Dei, promittens quod nullus insidiaretur terræ eorum. Licet enim in alijs temporibus, hostes Hebræorum invaderent illos, tamen tunc non invadebant. Deus enim immittebat in corda eorum quemdam terrorem, vel voluntatem hostium ad alia distrahebat, ita quod nihil cogitarent de tam facili invasione. Mansit autem Moyses in Monte quadraginta dies, & quadraginta noctes sine ullo cibo: refocillabatur enim sola Dei præsentia; adeo ut per abstinentiam cibi, licet tam longam, nulla fieret in eo substantiæ deperditio. Transactis autem prædictis diebus, descendit de Monte ad Castra, portans secum duas Tabulas scriptas

Q 4

à Deo



à Deo sicut priores, & ignorabat quod Cornuta esset facies sua; idest quod mitteret radios. Sicut enim Cornua procedunt de facie animalis, ita de facie Moysis procedebant radij miri fulgoris in altum, quos Apostolus 2. ad *Corinth.* vocat gloriam vultus Moysis. Erant autem ita splendidi, ut offenderent oculos intuentium; quapropter hoc cognito, posuit Velamen super faciem suam, providens per hoc infirmitati aspicientium ipsum.

## CAP. XXXV. Reflexio 213.




Descripta cessatione impediementi constructionis Tabernaculi per combustionem Vituli fabricati à populo, & data iustissima punitione Idolatrantium, hic describitur operis executio. Et primo reperitur Præceptum de observatione Sabbati, ut constaret, quod observatio talis diei, tenenda erat etiam tempore quo fabricabatur ipsum Sanctuarium. Vocatur autem Sabbatum *requies Domini*; tum quia Deus in isto die ab omni opere requievit; tum quia talis dies in qua cessamus à negocijs, & laboribus nostris, non debet applicari ad Ludos, Crapulas, & corporalem desidiam; sed ad Dei laudes, & ad iugem considerationem Divinæ suæ Maiestatis, & ad recordationem beneficiorum Dei. Deinde iussit Moyses, ut separarentur Domino primitiæ ab omni qui voluntariè, & pròptò animo vellet illas offerre. Deus enim non recipit munera coacta, quia magis ei voluntas placet, quam res ipsa exhibita. Accipiuntur vero hic primitiæ pro melioribus partibus rei; nempe Auri, Argenti, & Aeris, quæ omnia portaverant Israelitæ de Ægypto. Licet autem de auro, & argento non sit mirandum, tamen de quibusdam alijs rebus, ut de ære, & de pellibus, tam Arietinis, quam Hyacinthinis, & de Lignis Setim, valde mirandum est quomodo Hebræi secum ea detu-



detulerint, cum vix possent deducere secum Vxores, & filios. Sed Deus fecit quod omnia ista haberent, & movit eorum animum ad ista congreganda, & ferenda, ut deinde construeretur Divino suo Nomini Sanctuarium.

## CAP. XXXVI. Reflexio 214.



Acto de dispositione Sanctuarij, agitur hic de devota, & prompta Populi exhibitione in necessarijs ad prædictam executionem. Sciendum est autem, quod principales Artifices erant Beseleel, & Oliab; sub istis verò erant multi alij subordinati, quibus dederat Dominus Sapienciam, sicut dicitur in textu: Et accipitur Sapiencia improprie; nam Sapiencia proprie accepta, pertinet ad habitus speculativos, & est primus, & perfectior: hic autem accipitur pro habitu factivo, qui est habitus artis. Cum igitur Artifices quotidie instarent operi, offerebat populus in mane vota sua, & hoc erat in Aurora, quia tunc populus vacabat Orationi, eratque intentus laudibus Divinis; prima enim pars diei debet offerri Deo. In alijs autem diei partibus, possumus, immo debemus divertere ad opera nostra peragenda, quæ bene nobis, Deo iubente, evenient, cum optimum habuerint principium. Oblatio autem populi, tam copiosa fuit, ut non solum sufficeret, sed etiam valde excederet necessitatem operis: quapropter ipsi Artifices dixerunt Moyfi: *Plus offert Populus quam necessarium est.* Et in hac confessione, manifestè apparuit puritas, & fidelitas eorum: cum enim commissæ fuissent illis omnia donaria totius populi, proculdubio poterant surripere quicquid vellent, cum nullus esset, qui notaret quantitatem rerum exhibitarum, nec earum qualitatem, & ideo multæ res pretiosæ poterant verti in particularem utilitatem, sed quia timebant Deum, non elegerunt sibi lucrum, nec passi sunt bona populi



puli per continuam, & non necessariam oblationem frustra diminui.

## CAP. XXXVII. Reflexio 215.



Escrip̃ta fabricatione illarum rerũ, quæ erant partes Tabernaculi, h̃c ponitur executio operis, quantum ad illa, quæ erant intra ipsum Tabernaculum. Et primò illa, quæ erant intra *Sancta Sanctorum*, ut *Arca*, *Propitiatorium*, & *Cherubin*, quæ omnia totalitèr clausa manebant, propter eorum sanctitatem; adeout non possent à nemine videri. Secundò ponitur executio illarum partium, quæ erant quidem in Tabernaculo, sed extra *Sancta Sanctorum*; & talia fuerunt *Mensa*, *Candelabrum*, & *Altare Thymiamatis*. De *Arca* autem dicitur in Text. Quod erat vestita intus, & foris auro: erat enim hoc speciale in ea, propter dignitatem eorum, quæ intus servabantur: nam quod esset extra cooperta Laminis aureis, generale erat in omnibus rebus, quæ ad Tabernaculum pertinebant: quandoquidẽ omnes, aut totaliter aurum erant, aut auro mundissimo tegebantur. *Arca* verò propter dignitatem eorũ, quæ in ipsa continebantur, cooperienda erat etiam intus Laminis aureis, ut illa quæ reponebantur ad ibidem semper manendũ, non essent super lignum nudum, sed vestitum laminis aureis, ut res Sacræ à solo auro purissimo, & mundissimo tangerentur: de talibus autem videnda sunt illa, quæ diximus suprà suis locis specialibus.

## CAP. XXXVIII. Reflexio 216.



Escrip̃ta fabricatione Tabernaculi, & illarum rerum, quæ intra ipsum continebantur, h̃c agitur de constructione earum, quæ erant extra ipsum Tabernaculum, inter quæ primum locum obtinuit



nuit *Altare Holocaustorum*; in hoc enim offerenda erant Deo Sacrificia. Secundo loco fuit *Atrium*, quod erat spatium magnum, seu Platea, extra quam Populus manere debebat, ne approximando ad Altare Holocaustorum, impediret ministeria Sacerdotum, & Levitarum. Tertium fuit *Labrum Æneum* cum Basi sua, factum de Speculis Mulierum. Dicunt autem DD. quod istæ erant Mulieres devotæ, quæ frequenter veniebant ad orandum Deum, ad Ostium Tabernaculi: ut autem darent signum, quod nolebant amplius intendere ornatui exteriori, & vanitatibus, & pompis Sæculi, obtulerunt Deo Specula sua, quarum Capsæ erant Æneæ, & de istis fabricatum fuit prædictum Vas. Alij DD. asserunt, quod circa Labrum Æneum erant Specula affixa, ad hoc ut Sacerdotes ingredienti Sanctuarium, antequam accederent ad ipsum Altare, pro Victimis Deo immolandis, possent aspicere maculas suas, si aliquas haberent, easque tergere; quæquidem specula fuerunt quidem oblata à Mulieribus prædictis, sed non fuerunt redacta per fusionem in Labrum Æneum: quapropter dum dicitur hic in Textu, quod Beseleel fecit & Labrum Æneum de speculis Mulierum, accipitur facere pro aptare, vel ornare iuxta consuetudinem sermonis hebraici.

## CAP. XXXIX. Reflexio 217.



Escripto vario apparatu Vasorum, hinc agitur de Vestibus Sacerdotalibus pro ministracione fienda in Sanctuario, dum Sacerdos Sacras functiones corâ Deo exercere debebat. Iussit ergo Deus quod Ornamenta, tam Pontificalia propria Summi Sacerdotis, quam vestes pro minoribus Sacerdotibus, essent summæ venerationis, ut sic Populus magis elevaretur in Deum, & præstaret debitum obsequium



quum, & reverentiam Dei Ministris. Deinde formata fuit *Lamina Sacra venerationis*: idest Lamina Sancta, quæ denominatur Sacre venerationis, quia nimirum erat insculptum in ea Nomen Domini *Tetragrammaton*, & ponebatur in fronte Summi Sacerdotis, ubi naturaliter apparet verecundia: ad denotandum per hoc, quod Sacerdotes, non debent erubescere confiteri Sanctitatem Dei, & illius magnitudinem, nec timere sæcularem potentiam, ubi agitur de servitio Dei; de utilitate spirituali populi; de propagatione, & dilatatione fidei, sed constanter se exponere etiam morti, si opus sit, pro tuenda gloria Dei, & pro conservanda Religione in sua perfectione. Completis tandem omnibus Ornamentis ab ipsis Artificibus, benedixit Moyse illis: quæ quidem benedictio, secundum omnes Doctores, fuit imprecatio boni spiritualis; videlicet quod Deus dignaretur conservare omnia ad suam puram gloriam, & honorem, & quod omnia ministeria in illis facta, essent accepta Divinæ suæ Maiestati: maximè quia, omnia dirigebantur per Sacerdotes ministrantes, ad honorem Divinum, & ædificationem Populi; qui intendebat laudes Divinas dare Deo suo, in ipsis sacerdotalibus administrationibus.

## CAP. XXXX. Reflexio 218.



Ompleto opere Tabernaculi, & omnium rerum quæ ad ipsum pertinebant, hîc describitur eius erectio, quæ accidit primo Mense, & iste erat Martius; nam, ex institutione Divina, talis Mensis erat constitutus primus in mensibus anni, ob singulare beneficium acceptum ab Hebræis à Divina clementia, dum illos eduxit de durissima servitute Ægypti, de qua exierunt in tali mense. Erecto autem Tabernaculo, Nubes operuit illud, Populo hoc à longè spectante: quod quidem fuit expressum signum acceptæ



ceptionis Divinæ, & præsentia particularis, ut populus firmiter crederet, quod orantibus in Sanctuario; orabant ubi Deus præsens erat, & in loco electo à Deo, ad hoc ut condescenderet postulationibus populi sui. Dicitur autem in Text. Quod Moyles *non poterat ingredi tectum fœderis*: hoc autem erat, propter reverentiam Divinæ præsentia: & simile habetur 3. Reg. cap. 8. Vbi dicitur, quod *non poterant Sacerdotes ministrare propter nebulam*: non quod obscuraret eorum aspectum, sed quia erat Divinæ præsentia signum; ideoque non poterant appropinquare, propter reverentiam Deo debita n. Sic Moyles prohibitus fuit appropinquare Rubro, in quo Deus loquebatur, propter reverentiam, quam mortalis homo debet habere Deo, sibi specialitèr præsentem. Postquam autem Nubes operuit Sanctuarium, recessit de medio Tabernaculi, stans aliquantulò elevata super ipsum, & tunc signum fuit, quod Moyles poterat ingredi Sanctuarium ad ministrandum Deo.







*Via homo ordinatur ad Deum per debitum Patriæ cultum, qui licet principaliter consistat in actu interiori mentis, nam ut ait Augustinus, Fide, Spe, & Charitate colitur Deus; tamen secundo consistit in quibusdam actibus exterioribus, qui sunt quedam protestationes interioris cultus; ideo de talibus tractatur in hoc Libro, idest de Sacrificijs, & oblationibus, quæ debebant fieri ab Israelitis in recognitionem fidei, & dilectionis ad ipsum Deum: propter quod vocatur iste Liber Leviticus, quia talia offerre pertinebat ad Sacerdotes Levitici generis.*

CAP.



## CAP. I. Reflexio 219.



Vltia Sacrificia iussa fuerunt à Deo in Veteri Lege, propter triplicem rationem. Prima fuit, ad revocandum Iudæos ab idolatria, ad quam proni erant, ut multitudine Sacrificiorum occupati, non possent vacare cultui Idolorum. Secunda fuit, ut per frequens Sacrificij exercitium generaretur in eis habitus, quousque ad Dei cultum delectabiliter adducerentur. Tertia fuit, quia Sacrificia Veteris Legis erant Figuræ unius veri Sacrificij Novæ Legis, nempe Christi Domini, tunc in Ara Crucis Immolandi: illud autem quod est perfectum, non potest per unum, vel pauca imperfecta repræsentari: quapropter sicut perfectio Divina unica existens, variè, & multipliciter repræsentatur in perfectionibus Creaturarum; ita decens fuit, ut nostrum perfectissimum Sacrificium figuraretur per varia Sacrificia imperfecta Veteris Legis. Primum autem Sacrificium erat *Holocaustum*, quod totum incendebatur ad honorem Divinum, & dicitur ab *Holon*, quod est totum, & *Cauma*, quod est incendium: & per hoc designabatur, quod Anima debebat totaliter inflammari, & referri ad amorem, & honorem Dei. In Holocausto debebat animal esse masculinum, non foemina; hæc enim est quid imperfectum, respectu masculi. Debebat esse immaculatum, id est absque defectu membrorum: unde antequam animalia introducerentur in Atrium, probabantur per Sacerdotes in quadam Esdra remota, utrum essent apta ad immolandum. Intestina vero, & pedes lavabantur antequam incenderentur; quia intestina continent Sordes. Et similiter pedes, quia calcant lutum.

Pellis



Pellis etiam detrahebatur, quia reputabatur immunda: in Dei autem Sacrificijs necessaria est totalis munditia. Non solum autem de Bobus, Ovibus, & Capris iussit Dominus sibi offerri Holocausta, sed etiam de Avibus: nempe Turturibus, & Pullis Columbæ, ut sic provideret devotioni pauperum, ut qui non haberent Animalia maiora, possent offerre minora: prædicta autem Volatilia, sunt in maxima multitudine in Palestina, & ideo ab omnibus capi poterant, vel parvo pretio emi. Porro mandavit Deus sibi offerri Turtures, & non filios earum, & vice versa non Columbas, sed filios illarum, quia Turtures sunt meliores quam filij, & pulli Columbarum pinguioribus quam Matres; Deo autem sunt offrenda meliora, & perfectiora.


### Reflexio 220.

**Q**uia in Sacrificijs Domini recensentur species quorundam animalium, meritò quæri potest: quare fiebat Deo Sacrificium de tribus tantum speciebus, scilicet Bovis, Ovis, & Capræ: et de duabus speciebus Avium, nempe Turturis, & Columbæ? Ad cuius quæsitæ resolutionem notandum est: quod sicut Sacrificia Veteris Legis fuerunt instituta ad tria supradicta, scilicet ad revocandum Hebræos ab idolatria. secundò ad inducendos illos ad cultum veri Dei. Tertiò ad figurandum perfectissimum Sacrificium Novæ Legis; ita ex hac triplici ratione conveniens fuit, assignare prædictas species Animalium. Propter primam: quia Ægyptij, inter quos Iudæi conversati fuerant, colebant prædicta animalia, Agnum videlicet, & Arietem, quia tali forma, quantum ad aliquid, ipsum Iovem representabant; pingebant enim ipsum cum capite Arietis. Bovem vero, quia Apis, quod Ægyptij maximum Numen credebant, in specie Tauris apparebat. Hircum verò, quia Dæmon aliquando apparebat eis in tali forma. Quapropter, apud Ægyptios nefas reputabatur mactare talia animalia, & ideo



ideo per oppositum, præcepit Deus sola sibi immolari ista animalia, ut retraheret Israelitas ab errore Aegyptiorum. Similiter propter secundam rationem: tunc enim homo debet Deum colit, quando bona quæ habet recognoscit se illa habere à Deo, eique de ipsis facit oblationem. Ideo convenienter ordinavit Dominus, sibi fieri Sacrificia de prædictis tribus speciebus animalium, quia talia communius veniunt in usum hominum; reliqua autem, vel sunt Silvestria, quibus homines communiter non utuntur, vel si domestica, sunt immunda. Similiter propter tertiam rationem, nam Bos significabat Christi Domini fortitudinem; Ovis eius Innocentiam; Capra autem, & Hircus quæ fœtent, similitudinem carnis peccati. De Turturibus, & Columbibus similiter fiebat Sacrificium, quia frequenter cadunt in usum hominum, & sunt mundi nutrimenti. Coeteræ verò Aves, vel sunt magis silvestres, vel si sunt domesticæ, vescuntur ut plurimum, cibo immundo, ut Gallinæ, & Anatres, & similes. Item quia Turtur significabat Christi Domini Castitatem; Columba, quæ felle caret, eius mitem dulcedinem. De piscibus autem non fiebat Sacrificium, quia cum habitent in aquis, non sunt ita præparati ad usum hominum. Item quia extracti de aqua, citò moriuntur; & ideo non poterant vivi deferri ad Templum: Sacrificium autem propriè fit de viventibus.

## CAP. II. Reflexio 221.



Acto de Sacrificio rerum viventium, hinc agitur de oblationibus rerum non viventium. Et primò ponitur Simila, quæ erat farina tritici purgatissima, & conspersa oleo. De ista tollebat Sacerdos solummodò pugillum, & cremabat super Altare: ad denotandum, quod omne id quod habebat offerens, à solo Deo habebat. Cum

R

Simila



Simila offerebatur Thus, quod totum comburebatur, quia hoc directè pertinebat ad Deum. Signabat enim devotionem, & honorem erga Deum exhibitum ab offerente. Simila autem non specialiter ad Deum magis, quam aliæ res pertinebat; ideo aliquid de illa, post cremationem pugilli, remanebat Sacerdoti, non verò de Thure. Tertia oblatio erant Panes absque fermento conspersi Oleo; & Lagana azyrna similiter Oleo commixta. Quarta erat oblatio de Sartagine, cocta in patella cum Oleo. Quinta erat pasta cocta in craticula: cum istis autem semper ponebatur sal. Cuius ratio erat, quia sal præservat à corruptione, quæ semper debet esse remota à Sacrificijs Dei. Præterea sal signat discretionem, quam Philosophi appellant Prudentiam, sine qua nulla Virtus moralis esse potest, & cum ea omnes virtutes morales esse necesse est, ut patet ex *Arist. 6. Ethic.* Et ideo per Sal denotabatur, quod nullum Sacrificium Deo placet, nisi fuerit factum cum discretionem. Ratio verò reliquarum prædictarum oblationum ea est: quia oblatio debet fieri Deo de his, quæ communiter veniunt in usum hominis ad sustentationem Vitæ: de Terræ autem nascentibus, aliqua communius veniunt in sustentationem hominis per modum nutrimenti, ut panis, & vinum quod infra iubetur offerri; aliqua veniunt per modum condimenti, cuiusmodi sunt sal, & oleum; aliqua per modum medicamenti, & quantum ad hoc ponebatur Thus, quod est Aromaticum, & solidativum. Ratio verò specialis Thuris, erat quia per hoc significatur Devotio; & ideo ponebatur in omnibus oblationibus: ad significandum, quod Sacrificia Veteris Legis, non erant accepta Deo de se, sed tantum ex fide, & devotione offerentium. Ab oblatione fienda in Altari removebatur semper fermentatum: ut Israelitæ quotidie recordarentur de beneficio educationis de Ægypto, in qua panes non fermentatos, sed azymos comederunt. Similiter excludebatur ab Altari Mel; ut semper haberent in memoriam amaritudinem Ægyptiacam, à qua Deus mirabiliter illos liberaverat. Item quia  
fer-



fermentum significat corruptionem; Dulcedo verò mellis, denotat carnis Lasciviam: ista autem debent esse procul à Sacrificijs Domini. Licet autem non possent ista duo offerri in Altari; tamen de ipsis debebant dari primitiæ Sacerdotibus. Et idèò quando Iudæi coquebant panes fermentatos in domibus suis ad proprios usus, mittebant ad Sacerdotes unum panem, antequam ullus de domo comederet. Similiter de melle, mittendo primam partem Sacerdoti.

## CAP. III. Reflexio 222.



Vm actum sit de Holocausto, & oblationibus requisitis in illo, hic redit Divina Scriptura ad proseguendum de Sacrificijs carniū, & agitur de Hostia pacifica, quæ offerebatur pro impetratione beneficij: & si illud erat obtentum, habebat rationem gratiarum actionis: si autem esset obtinendum, habebat rationem postulationis, & ideo vocabatur Hostia pacifica, quia quando Deus confert beneficium homini, videtur ei pacificatus. Similiter homo recipiens illud, pacificatur in animo, quia completur suum desiderium. Hoc Sacrificium, non erat ita perfectum, sicut Holocaustum, & idèò etiam femella poterat offerri, & fiebant de illo tres partes. Vna incendebatur ad honorem Dei, videlicet tota pinguedo partium interiorum cum Renunculis, Alia, cedebat in usus Sacerdotum; nempe Armus dexter, & Pectusculum. Alia erat offerentium, & ideo Hostia pacifica fiebat solum de Bobus, Ovibus, & Capris, non vero de Avibus, quia istæ non dividebantur. Sanguis autem Victimæ effundebatur per circuitum Altaris, ubi specialiter repræsentabatur Deus; ut per hanc sanguinis effusionem, signaretur coram Deo remissum peccatum, quod reddebat hominem reum mortis, pro qua acceptabat Dominus mortem Pecoris. Similiter totus Adeps comburebatur ad honorem



norem Dei. Et ratio erat, quia sicut supra dictum est, de illis potissimè debebat fieri oblatio Domino, quibus vita humana maximè sustentatur: Sanguis autem est, in quo consistit vita animalium; Adeps verò causatur ex abundantia nutrimenti, quo vita reparatur. Et ideo ut homines recognoscerent se habere vitam, & sustentationem à Deo, Adeps totus cremabatur ad honorem Dei; Sanguis autem ad cupidinem Altaris effundebatur. Sub pœna autem mortis prohibitus erat, tum Adeps, tum Sanguis; quia ista duo erant specialitèr dicata Deo, ut dictum est supra.

## CAP. IV. Reflexio 223.



Iso de duobus generibus Sacrificiorum, hìc agitur de tertio, quod erat hostia pro peccato: & primò ponitur de Sacrificio, quod fiebat pro peccato Summi Sacerdotis, in quo offerebatur Vitulus, in memoriam Vituli Conflatis, quem fecit Aaron timore mortis in deserto, & ponebat manus suas super caput Hostiæ, ad protestandum, quod sicut Vitulus erat occidendus, ita ipse Summus Sacerdos, erat morte dignus pro transgressione Præcepti, nisi accepta esset eius oblatio ex misericordia Dei. Deinde hauriebat de sanguine Vituli, & aspergebat septies coram Domino: ad designandam perfectam expiationem, quæ designatur per septennarium numerum, qui universitatem denotat: Nam omnia quæ à Deo facta sunt, in die septimo completa fuerunt, & tota nostra vita, per septem dierum circulum agitur. Pellem verò, & omnes carnes Victimæ immolatæ efferebat extra Castra; ad denotandam gravitatem peccati, cuius Sacrificium non erat dignum comburi in Sanctuario Dei, nec in Castris, sed extra illa. Maiora namque peccata, plus debent detestari quam minora: nulum autem peccatum ita magnum est, quam peccatum Summi



mi Pontificis, tum intensivè, tum extensivè. Intensivè quidem, quia in supremo statu constituitur, unde tenetur honestius se habere quam cœteri. Adde quod hîc agitur de peccato propter ignorantiam; in Summo autem Sacerdote, ignorantia nimis detestanda est, cum teneatur scire Legem, & ad eius quæstiones respondere. Extensivè verò, quia peccante Summo Pontifice ad totam plebem extenditur occasio peccandi; cum enim Pastor per abrupta graditur, consequens est, ut Grex ad præcipitium sequatur.

### Reflexio 224.

**P**ost Sacrificium pro peccato Summi Sacerdotis, sequitur de Sacrificio pro peccato Populi, & dicitur: quod si omnis Turba ignoraverit, & per imperitiam fecerit quod contra mandatum Domini est, deberet offerre Vitulum. Peccabat autem tota Turba, quando aliqua ceremonia omittebatur, quæ à toto Populo erat observanda; vel tota Turba dicebatur errare, quando illi, qui principaliores erant in Populo, peccabant ignorando Legem quam scire tenebantur; in istis enim totus Populus eminenter continebatur. Adverte autem quod hîc non intelligitur de peccatis contra Decalogum; quia in his numquam contingeret totum Populum, aut omnes maiores delinquere, aut si contingeret, non esset hoc per ignorantiam, quia talia sunt de dictamine rationis naturalis: sed intelligitur de mandatis ceremonialibus, in quibus ex ignorantia, vel inadvertentia poterat totus Populus, vel maiores de illo errare. In hoc autem Sacrificio offerebatur Vitulus, in memoriam Vituli conflatis in Deserto, in quo ipse Populus idolatrando deliquerat. Sacerdos autem magnus portabat ipsum Vitulum extra Castra, ibique illum comburebat. Per hanc autem cremationem, extra Castra Vituli immolati, pro peccato totius Populi, expresse significabatur, teste Apostolo ad *Hebræ*: 13.

R 3

Christus



Christus Dominus, qui pro peccatis totius humani generis passurus, & moriturus erat extra Civitatem Ierusalem. Et hæc erat præcipua causa litteralis.

### Reflexio 225.

**A**cto de Sacrificio pro peccato totius Populi, agitur deinde de Sacrificio pro peccato Principis, pro quo offerebatur Hircus. Et per hoc designabatur eius Principatus; quia Princeps est Dux Populi, sicut Hircus Dux Caprarum. Per tale autem animal designabatur etiam gravitas sui peccati: nam Hircus est animal foetidum. Præterea peccatum Principis, est magnum extensivè, quia contaminat Populum valde: nam ignara Plebs, putat esse licitum quicquid Princeps facit. Nobiles vero ipsum sequuntur; tum ratione adulationis; tum ne incurrant eius indignationem, & lucra perdant. Carnes huius Sacrificij non cremabantur extra Castra; quia peccatum Principis, non reputabatur ita detestabile, sicut Peccatum Summi Pontificis, & totius Populi; & ideo de Sanguine hostiæ immolatæ tingebantur solummodo Cornua Altaris Holucausti; reliquus autem Sanguis, fundebatur ad Basim illius: hoc erat enim generale in omnibus Sacrificijs, propter significationes superius adductas: sed non inferebatur sanguis intra Tabernaculum sicut in duobus sacrificijs prædictis ob rationem iam dictam.


### Reflexio 226.

**D**icto de peccato Principis, sequitur de Sacrificio pro peccato privatæ personæ, in quo offerebatur Capra; ad denotandam ignorantiam peccatoris; quia Capra signat stoliditatem, quæ fuerat causa sui peccati; nam ut ait Philosophus: *Omnis peccans est ignorans*. Adverte autem, quod cum dicitur hic in testu: quod orante Sacerdote pro ipso offerente, remitteretur illi peccatum, non intelligitur



tur quod remitteretur ei ex conditione Sacrificiorum, dicente Apostolo ad Hebræ: decimo: *Impossibile est sanguine Hircorum, aut Vitulorum auferri peccata*, sed remittebatur peccatum ex fide, & obedientia, & contritione ipsius offerentis. Vnde si aliquis, existens in peccato mortali, obtulisset Sacrificium, non erat hoc placabile Deo, sed abominabile; ideoque offerens debebat prius conteri, & dolere de peccatis, ut suæ Victimæ essent Deo acceptæ. Igitur, id quod per Sacrificium expiabatur, non erat culpa, cum ablatio culpæ non fieret nisi per actionem contriti cordis: nec ista Sacrificia de se, sufficiebant ad deletionem pænæ debitæ pro peccatis; sed Offerentes merebantur ex sua fide, & devotione, ut tolleretur pœna debita peccato in parte, vel in toto, si devotio magna fuisset. Hinc patet, quod Lex Mosaica per observationem suam non inducebat directè aliquam utilitatem; & per violationem suam inducebat mortem.

## CAP. V. Reflexio 226.



Vpra actum est de Sacrificio exhibendo pro peccato ignorantie: hinc agitur de Sacrificijs pro peccato passionis, & negligentie. Primum contingebat ex inordinata affectione amoris, vel odij: videlicet quando requirebatur ab aliquo Iuramentum de veritate dicenda; & hanc tacebat ex inordinato amore ad illum qui puniretur, vel damnificaretur, si ipse detulisset testimonium veritatis: vel è contrario, quando tacebat veritatem ex odio; ut quando aliquis fuisset liberatus a calumnia, si veritatem dixisset. Peccatum vero per negligentiam erat, quando ex tactu rei immundæ aliquis polluebatur, & negligebat recurrere ad purificationem, oblitusque suæ immunditiæ intrabat Atrium Tabernaculi; vel comedebat de sanctificatis, quæ non erant licita nisi hominibus mundis. Item peccatum ex negligentia erat, quâdo aliquis iurabat se facturum aliquod,

R 4

&amp; ne-



& negligebat adimplere, & ex ista negligentia dabatur res oblivioni; postea vero recordabatur: tunc ergo debebat prius agere, ut dicitur in *Tex.* pœnitentiam, & postea offerre Sacrificium. Et per hoc patet, id quod supra diximus, scilicet: quod Sacrificia Veteris Legis, non proficiebant ex seipsis, sed ex devotione offerentium; sine pœnitentia autem, nulla est devotio; ideoque sine pœnitentia, non poterat prodesse Sacrificium. Pro peccato igitur negligentiae, & ex passione offerebatur Agnus, sive Capra; & si peccans non potuisset propter paupertatem offerre ista animalia, offerebat duos Turtures, vel duos Pullos Columbæ: quod si nec ista potuisset invenire, tenebatur offerre decimam partem Ephæ Similæ, sed non ponebatur in ea Oleum aut Thus. Causa erat, quia per Oleum designabatur misericordia Dei; per Thus vero, quod est odoriferum, signabatur acceptatio Divina; & ideo in oblatione pro peccato, non ponebatur Oleum nec Thus; quia peccator non debet seipsum asscurare, quod sibi sit dimissum; vel munus suum Deo acceptum; sed semper debet timere.

### Reflexio 227.

**P**onitur post prædicta, Sacrificium pro peccato commissio in abusu Sacrorum; hoc enim pertinebat ad negligentiam. Circa quod sciendum, quod aliqua fuerunt Sacra, quibus non erat licitum uti, sicut Thymiamate pro delectatione odoris, & oleo unctionis pro medicamine infirmitatis, ut supra dictum est in *Exod. Refl.* 204. Alia erant, quæ non poterant quidem venire in usus hominum modo prædicto: attamen peccabant, qui illa tangebant, nisi essent deputati ad illud officium. Alia erant Sacra, quæ debebantur Ministris Dei, ut Decimæ, & Primitiæ, & de abusu talium, per errorem factum, tenebatur quis offerre Arietem, & insuper si convertisset decimas in usus suos, debebat dare rem ablatam ipsi Sacerdoti, & ulterius, quintam partem ipsius rei. Dicitur autem hic in *Tex.* in fine. *Dimittetur ei, quia per errorem*



*rorem deliquit in Domino*: Ex quibus verbis, non inferitur quod peccata, quæ sunt per malitiam, non remittantur à Deo: nam quæcumque facinora perpetrata fuerint, ad unum gemitum animæ vere pœnitentis possunt deleri: peccata tamen quæ sunt per ignorantiam, facilius remittuntur, cum non habeant in se tantam gravitatem. Nec obstant verba Salvatoris Dei *Matth. 12.* ubi dicitur: *Quod peccatum in Spiritum Sanctum, non remittetur, neque in hoc Sæculo, neque in futuro.* Nam dico, quod peccatum in Spiritum Sanctum, si propriissimè accipiatur, excludit omnem contritionem, & dolorem de peccatis; & istud peccatum est unicum, videlicet Finalis Impœnitentia; tunc enim impossibile est, quod remittatur, quia sine dolore nulla fit remissio, & de tali peccato loquitur Salvator Deus. Alij dicunt, quod si aliquis peccet per puram malitiam, tunc dicitur peccare in Spiritum Sanctum; utpote si desperet de Divina misericordia, iudicando non esse in Deo tantam Bonitatem, ut pœnitentibus gratis remittere velit. Sed dicendum, quod adhuc istud peccatum non est consumatum, nisi per totam vitam teneat peccator hanc positionem, & in ea diem claudat. Super hanc autem maior malitia esse non potest, cum directè repugnet Bonitati Divinæ, quæ Spiritui Sancto attribuitur. Unde dicendum, quod tale peccatum non remittitur in hoc Sæculo, neque in futuro; quia peccator tenuit illam malitiam per totam vitam in hoc Sæculo; & in futuro dolere fructuosè non potest, cum non sit amplius in Via, sed in Terminò, in quo cessat posse mereri, vel demereri.

## CAP. VI. Reflexio 228.



Vpra descripta fuerunt Sacrificia, quæ interpollatè fiebant, hìc describitur illud, quod fiebat omni die; ideoque vocabatur *Iuge Sacrificium*, idest continuum, sivè assiduum, & fiebat de publicis sumptibus. Erat autem duplex



duplex. Vnum fiebat in mane, aliud in vespere. Post Sacrificium autem matutinum, quod erat in aurora, fiebant omnia alia Sacrificia, quæ Populus offerre volebat, quæ poterant durare usque ad vespem: tunc enim offerebatur Sacrificium vespertinum, post quod nullum aliud fieri poterat, & durabat per totam noctem, usque ad auroram. Sacerdos namque ministrans debebat successivè ponere partes Sacrificij super Altare, & per totam noctem vigilare in Sanctuario, ut continue cremarentur partes Hostiæ, in vespere immolatæ, & durarent usque ad Auroram, in qua incipiebat Sacrificium matutinum. Porrò Sacerdotes quotidie accipiebant Cineres de Altari, & portabant illos extra castra in loco mundo, & hoc erat ad reverentiam Divini cultus; nam omnia quæ ad Deum colendum pertinuerant, debebant haberi in magno honore, & separari à rebus profanis, nè istis admixtis, in contemptum haberentur. Comburebantur autem predicti cineres usque ad favillam, ne ibidem remaneret aliqua res Sacra, puta, pars ossis non combusti Victimæ immolatæ; aut aliqua pars Ligni non resoluti, quæ quidem erat Sacra, cum res Sacras tetigisset. Dum autem fieret resolutio usque ad favillam, non poterat dici, quod ibi esset res Sacra. Portando autem Sacerdotes cineres prædictos, deponebant vestes Sacras, & accipiebant vulgares, quibus semper uti solebant; quia extrà Sanctuarium non licebat eis uti vestibus Sacris.

### Reflexio 229.

**D**eterminato de Sacrificiorum ritu, ponitur subsequenter de illorum usu: scilicet à quibus, ubi, & qualiter deberent comedi. Simila igitur, quæ post pugilli cremationem remanebar, spectabat ad Sacerdotes, qui illam comedebant in Loco Sancto, non sub divo, sed in quadam Esdra ad hoc parata. Ibi enim Sacerdotes faciebant



ciebant panes ex ea, non fermentatos, sed Azymos; quia nimirum talis simila erat pars illius quæ oblata fuerat Domino; quapropter sequi debebat rationem totius: totum autem non erat fermentatum; ideo nec pars proveniens Sacerdotibus fermentari debebat. Isti panes non poterant educi extra Sanctuarium, sed comedi in eo à solis filiis masculis Sacerdotum. Similiter de carnibus Hostiæ immolatæ pro peccato, propter sanctitatem Sacrificij, non erat licitum comedi à Filiabus Sacerdotum, vel Mulieribus de domo, nec à Servis; sed solum filij masculi comedere poterant, exceptis Sacrificijs exhibitis pro peccato Summi Pontificis, & totius Populi: in istis enim, totum quod erat in ipso animali, præter Adeps, cremabatur extra Castra; & differebant à cæteris, quia pro istis inferebatur sanguis intra Tabernaculum, & aspergebatur septies contra Velum Sancti Sanctorum, & tingebantur cornua Altaris Thymiamatum; in cæteris autem solummodo effundebatur Sanguis ad Basim Altaris Holocausti. Porro, si de Sanguine Hostiæ pro peccato, Vestis fuisset aspersa, lavabatur in loco Sancto, non verò extra ipsum, ne humor sanguineus ibi existens, humori aqueo cōmixtus, deflueret in loco immundo. Vas autem fictile in quo caro Sacrificij cocta fuerat, confringebatur. Si vero fuisset Æneum defricabatur solummodo, & postea lavabatur aqua. Ratio erat, quia per contactum aliquæ partes terreæ ipsarum carniū, resolutæ in humores, adhæserant vasis fictilibus, quæ habent multas partes porosās, à quibus non poterat auferri prædictus humor intrusus per actionem ignis; ideò confringebantur, ne amplius humanis ministrationibus deservirent; deinde extra castra in Loco mundo deferebantur, ne inter res immundas conculcarentur. Vasa autem Ænea non habent ullam porositatem, cum sint ex materia solidissima, & terfa; ideo sufficiebat quod defricarentur, & lavarentur.



## CAP. VII. Reflexio 230.



Vpra actum est de Sacrificio pro peccato, hic agitur de Ritu Hostiæ pro delicto. Differt autem peccatum à delicto, quia peccatum consistit in commissione, siue voluntaria, siue per ignorantiam. Delictum verò in ommissione. Vnde peccatum est, cum aliquis agit contra aliquam Legem positam; delictum verò, cum aliquis omittit facere quod Lex fieri præcipit. Vtriusque tamen Hostiæ una Lex erat quo ad usum; nam carnes Sacrificij pro peccato commissionis, vel ommissionis erant Sacerdotis offerentis, exceptis his, quæ offerebantur Deo: illi autem pro quibus offerebatur Sacrificium, non habebant de illo aliquam partem: ad denotandum quod debebant elongari à peccato perpetrato, & cavere à recidiuo. Prædicta autem quæ cedebant in usum Sacerdotis offerentis, æqualiter dividebantur cunctis filiis Aaron; quæ quidem æqualitas sic servabatur: quod quilibet Sacerdos habebat diem deputatum ad offerendum; & oblationes illius diei pertinebant ad ipsum pro se, & domo sua. Similiter in Holocausto, pellis Victimæ erat Sacerdotis offerentis.


## Reflexio 231.

**A**cto de Ritu, & usu sacrificiorum pro peccato, subsequitur de usu Hostiæ Pacificæ, in quo terminabatur totus Ritus Sacrificiorum: & dicitur quod in Hostia pro gratiarum actione debebant Carnes comedi eadem die; & si quid remaneret, in crastinum cremandum erat. Ratio præcepti erat, ne putresceret, vel à bestiis comederetur illa Caro quæ fuerat Deo oblata. Si verò Voto, vel sponte quispiam obtulisset Hostiam, comedebantur similiter eadem die eius carnes; & si quid in crastinum remansisset, licitum erat



erat vesci de illis carnibus, non autem in die tertio; adeo, si offerens tertia die de illis comedisset, irrita fiebat eius oblatio; ita quod redderetur indignus divina gratia. Ratio verò quare in Hostia pro gratiarum actione Carnes debebant comedi eadem die; Carnes verò Hostiæ votivæ, vel spontè oblatæ, comedi poterant etiam secunda die, ea erat: Quia Hostia pacifica, ut supra diximus, dupliciter offerebatur: Vno modo pro beneficio iam adepto; alio modo, habendo. Prima vocabatur Hostia laudativa. Secunda dicebatur Hostia spontanea, quæ non habebat ita rationem debiti, sicut prima; nam pro beneficio accepto, magis tenetur homo ad serviendum Deo, quam pro beneficio sperato, & ideo prima Hostia solemnior iudicabatur, & propter hoc non poterant servari eius carnes in crastinum. In secunda vero Hostia, ex indulgentia permittebatur carnum esus in crastinum; sed non die tertia, ne putrescerent, vel appropinquarent corruptioni. Pectusculum autem, & armus dexter de omni Hostia pacifica, cedebant in usus Sacerdotum; cæteræ verò partes in usus offerentium, exceptis ijs, quæ pertinebant ad Deum. Ratio autem cur Dominus levavit istas duas partes filijs Israel, tradens illas Sacerdotibus, fuit ad removendam in populo quandam speciem Divinationis, quæ vocabatur Spatulomania, qua utebantur Idolatræ: etenim in Spatula, & osse pectoris in suis Sacrificijs superstitiosè divinabant de futuris. Adeps verò, & Sanguis Hostiæ immolatæ nō poterat comedi sub pœna mortis, quia ista specialiter pertinebant ad cultū Dei; & ideo abstinere à prædictis erat ratione reverentiæ Domino debite.

## CAP. VIII. Reflexio 232.



Ostquam actum est de Sacrificijs, & oblationibus, hic agitur de ipsis offerentibus ratione officij, cuiusmodi erant Sacerdotes, qui cum deberent consecrari, iussit Dominus Moyse, ut congregaret omnem Populi multitudinem



nem ad Ostium Tabernaculi, ut omnes viderent, quod Aaron non se ingessit ad procurandam dignitatem; sed illam suscepit ex præcepto Dei. Sacerdotium namque, dicit quandam magnam dignitatem; ideò non decebat petere illam, ne Aaron videretur ambitiosus honoris, vel cupidus reddituum qui erant annexi dignitati Pontificiæ. Manente igitur Aaron cum filiis ad Ostium Tabernaculi, videntibus omnibus, lavit illos Moyses: quæ lotio designabat absterfionem sordium. Sacerdotes enim debent esse mundi Corde, & ab omnibus conversationibus, & inquinamentis veteris vitæ totalitèr purgati. Ista lotio fiebat in manibus, & pedibus tantum; quia Sacerdotes debebant manibus Hostias immolare; pelles detrahare; adipem in Altari ponere; pedibus verò nudis tangere Sacrum Tabernaculi Pavimentum; ideò istæ partes debebant esse totalitèr mundæ. Deindè vestivit Aaron, & filios eius Tunicis Sacris, & fudit oleum super caput Aaron, filios autem solummodo asperxit; quia sicut summus Sacerdos differebat à Sacerdotibus Minoribus in gradu; ita oportebat differre in modo Consecrationis. Deindè Moyses, sumens de Sanguine Arietis immolati, tetigit extremum Auriculæ dexteræ, & Pollices manus, ac pedis dexteri singulorum. Ratio ea est, quia homo applicatur ad cultum Dei per duo, scilicet obediendo mandatis Divinis, & illa opere implendo: obedire autem in voluntate est; sed hæc tangi non potest, cum non sit aliquid corporeum; ideò tingeatur pars corporis, quæ maiorem habet approximationem ad Intellectum, & ad ipsam voluntatem qualis est Auris. Complere autem mandata Divina, pertinet ad partes executivas; & istæ sunt duæ: nempe manus, quibus aliquid operamur, & pedes quibus tendimus ad operandum; & ideò manus, & pedes sanguine tangebantur. Fiebat verò tinctio in aure dextera, & manu, ac pede dextero, propter maiorem reverentiam eorum, quæ ad Deum ordinata sunt. Dexterum verò in omnibus animantibus perfectius est; & à parte dextera motus causatur. Et similiter pollices manus, ac pedis dexteri ungebantur;



tur; quia talis digitus est perfectior cæteris, & robustior, in quo est principium motus omnium digitorum.

### Reflexio 233.

**T**Erminata Sacerdotum Consecratione, præcepit illis Moyſes, ne per ſeptem dies, & ſeptem noctes diſcederent de Oſtio Tabernaculi. Ratio præcepti fuit, ne implicarentur negocijs ſecularibus, donec completa eſſet eorum conſecratio, quæ durabat ſeptem diebus. Vnde nec pro cômefſione poterant exire Atrium Sacerdotum; ſed comedebant intra ipſum de Hoſtijs pacificis Deo exhibitis pro gratiarum acſione, eo quod Dominus promoverat Aaron, & filios eius ad Sacerdotalem Dignitatem. Sed dices quomodo Moyſes conſecravit Aaron in ſummum Sacerdotem, cum ipſe non eſſet Sacerdos? Dicendum quod hoc fecit ex ſpeciali mandato Domini, qui per quemcumque poterat conſecrare Pontificem. Et ſi quæras, quomodo poſtea conſecrati fuerint Pontifices decedentes ab Aaron? Dicunt aliqui DD. quod hoc fuit per induitionem Veſtimentorum Pontificalium poſt mortem Prædeceſſoris; nec aliquod aliud requirebatur, ut videtur in Eleazaro fuiſſe obſervatum, *Num.* 20. Alij dicunt, quod talis conſecratio fiebat per Sacerdotes inferiores: ſicut nunc in Eccleſia Dei conſecratur Papa per inferiores ſe.

### C A P. I X. Reflexio 234.



**D**Esſcripta Sacerdotum Conſecratione, hîc deſcribitur executio ſui officiij, quæ fuit in octavo die; per Conſecrationem namque completam, receperant poteſtatem miniſtrandi. Acceſſit ergo Aaron ad Altare, & immolavit Vitulum pro peccato, in memoriam Vituli ab eo fabricati  
in



in deserto ; & Arietem, in memoriam Arietis immolati pro Isaac, & Hircum pro peccato Populi, eo quod Hircus est animal foetidum, ad denotandam gravitatem culpæ multitudinis : quia sicut bonum commune est divinius ; ita peccatum commune omni alio peius. Deinde obtulit Vitulum pro Vitulo conflatili, in quo peccavit omnis Populus in deserto. Postea obtulit Agnum in memoriam Agni Paschalis, pro cuius immolatione, fuerunt Israelitæ salvati ab Angelo percutiente. Tandem obtulit Bovem, & Arietem in Hostias pacificas, quod erat tertium genus Sacrificij: voluit enim Deus, quod omnia Sacrificia exhiberentur, quia erat prima oblatio. Completis Hostijs, ingressi sunt Moyles, & Aaron Tabernaculum; ut nimirum Moyles ostenderet ei modum offerendi Thymiana super Altare Thymiamatis: licet enim Sacrificia essent completa quantum ad illa, quæ fiebant in Altari Holocaustorum, tamen non erant omnino consummata, donec Sacerdos intraret ad offerendum incensum. Egressi vero de Tabernaculo benedixerunt Populo, quæ benedictio fuit impretatio boni futuri. Tunc egressus ignis à Domino devoravit Holocaustum, & Adipem, in signum manifestæ acceptionis Divinæ; sicut *Gen. 4.* patuit de Sacrificio Abel, & de Sacrificio Eliæ in Monte Carmelo *3. Reg. 18.* Porro iste ignis, absque extinctione, fuit conservatus à tempore quo missus fuit à Deo, scilicet à secundo anno egressionis de Ægypto, usque ad captivitatem Babylonicam, in qua fuit absconditus per Sacerdotes illius temporis in Puteo profundo, & tempore Noemiæ iterum inventus, ut habetur *2. Machabæorum cap. pr.* Iste ignis non poterat extinguere aquis, nec indigebat nutrimento, quia miraculosè servabatur. Volebat tamen Dominus, quod Sacerdotes nutrent illum, subijcentes ligna per singulos dies.

CAP.



## CAP. X. Reflexio 235.



Icto de executione officij Sacerdotum, hîc agitur de illorum casu. Etenim Nadab, & Abiû filij maiores Aaron, acceperunt duo Thurribula, quæ pendebant de cornibus Altaris Holocausti, & in illis posuerunt Ignem profanum: in Atrio namque Tabernaculi erat talis Ignis, qui inserviebat ad coquendas carnes Sacrificiorum pro peccato, & pro Hostijs pacificis: non enim accipiebatur ignis de Altari, quia Sacer ille ignis debebat solummodo inservire ad cremandum illa, quæ ponebantur super Altare ad honorem Dei. Hoc igitur perpetrato, dum intraturi erant per ostium Tabernaculi, ad ponendum Thurribula super Altare Thymiamatis, egressus est ignis à Domino, idest ab Altari Holocaustorum, in quo speciali modo erat Deus, & devoravit illos, interficiendo videlicet eos, quia corpora illorum nullo modo fuerunt consumpta, nec vestes succensæ, nam cum vestibus prorsus intactis sepulti fuerunt. Et ex hoc inolevit laudabilis consuetudo, quod Sacerdotes Novæ Legis sepeliantur cum vestibus Sacerdotalibus. Dicunt autem aliqui DD. quod Nadab, & Abiû, moti fuerunt ad hoc faciendum ex contemptu Divinarum Ceremoniarum; nihil curantes, an de Sacro, vel de profano igne offerrent. Alij dicunt quod fuerunt ebrij: & hoc videtur ex litera præcedenti, cum dicitur: *Arreptisque Thurribulis*. Arripere enim, denotat quandam impetuositatem. Ebrietas vero, turbolento motu, atque incomposito homines trahit. Similiter hoc deducitur ex litera sequenti, nam immediate dixit Deus Aaron: *Vinum, & omne quod inebriare potest non bibes tu, & filij tui, quando intratis in Tabernaculum Testimonij*.


S

Re-



**M**ortuis prædictis Sacerdotibus, iussit Moyſes ut eorum Cadavera portarentur extra Caſtra, quod ſtatim fuit executioni mandatum, tulentes eoſ ſicut iacebant veſtitos Tunicis lineis. Deinde præcepit Sacerdotibus omnibus, ne nudarent Capita ſua, nec veſtimenta ſcinderent. Iſtæ namque erant Ceremoniæ plangentium funera charorum. Sacerdotibus autem, non convenit monſtrare ſigna magni doloris in morte ſuorum; quia iſtis certior debet eſſe ſpes Reſurrectionis, quam Sæcularibus, cum clariùs cognoscant veritatem Sacræ Scripturæ. Item Moyſes prohibuit illis ne egrederentur extra Sanctuarium: erant enim noviter conſecrati; quapropter non decebat illos pergere ad talem luſtum, ob prædictæ conſecrationis reverentiam. Porro multum decuit, ut pro iſto peccato in errore Sacræ Adminiſtrationis, Nadab, & Abiù morerentur, quia Deus noviter tradiderat Legem Ceremoniarum; unde ſi à principio non puniſſet contemptores, lex in poſterum non fuiſſet obſervata. Semper enim parvus contemptus in principio mandati, eſt occasio maioris prævaricationis, quam magnus contemptus in proſecutione rerum. Hinc Deus in cuiuſlibet rei principio obſervavit ultionem: nam in prima Mundi ætate, cum homines univerſaliter declinaſſent ad malum, induxit ſuper terram Diluvium. Et in exordio naſcentis Eccleſiæ ſeverè delicta punita ſunt, ut patet de Anania, & Saphira, ut poſteris eſſet exemplum non mentiri: poſtea verò, quamquam multa mendacia in fidelibus ſint, non tamen vindicantur, quia non expedit illa punire, ſicut in exordio novæ legis.

## CAP. XI. Reflexio 237.



Postquam actum est de offerentibus ratione officij, hic agitur de offerentibus ex professione fidei, cuiusmodi erant Sæculares. Iſti autem debebant eſſe mundi: ideo decuit, ſtatim ac Aaron fuit  
con-



consecratus, ut immediatè darentur Regulæ de munditia, & immunditia, ut sciretur quid offerentes deberent vitare, ut eorum Hostiæ essent acceptæ. Recensentur igitur in hoc capitulo Animalia munda ad esum, & immunda. Et dicitur, quod de cunctis animalibus terræ, omne quod habet divisam Vngulam, & ruminat in pecoribus, licebat comedi. Scissio namque pedis signum est temperatæ complexionis: etenim Vngula ostendit quod carnes animalis non sunt nimis humidæ; nam animalia quæ sunt magnæ humiditatis, non habent Vngulas, sed carnes quasdam papulosas loco Vngularum. Item scissio Vngulæ denotat, quod carnes non sunt nimis terrestres, & siccæ: quandoquidem divisio fit propter quandam teneritudinem. Similiter Ruminatio, signum est temperatæ complexionis, eo quod alimentum benè digeritur, cum in parvas particulas reducatur. De animalibus verò aquaticis, poterant comedi illa, quæ habebant Pinnulas, & Squamas: Pinnulæ autem dicuntur Alæ piscium quibus natant, & sunt in cauda, & lateribus. Squamæ verò, sunt quædam crustæ lucentes, & extensæ super cutem piscium, tegentes totum corpus. Sunt autem pisces communiter nocivi, propter superabundantiam humiditatis; illi autem qui habent squamas, & pinnulas sunt siccioris complexionis, & magis temperatæ; quia pinnulæ, & squamæ, cum sint duræ, & lucidæ, attestantur in piscibus siccitatem; nam durum ex magna compactione partium densatarum, exclusis partibus teneris, resultat. Luciditas verò in eis non esset, si illa corpora non essent terfa, & densa: tersum enim, & densitas proveniunt ex quadam duritie, & siccitate.

### Reflexio 238.

**S**equitur de immunditia animalium, quæ comedi non poterant. Sciendum est autem, quod immunditia in lege veteri duplex erat: videlicet Spiritualis, & Corporalis. Immunditia Spiritualis, quæ idem est ac peccatum;

S 2

non



non poterat esse in Brutis, cum ratione careant, & voluntate. Corporalis verò poterat esse in Brutis, & hoc dupliciter. Vno modo subiectivè, sicut animalia venenosa, & abominabilia, & quæ vescuntur nutrimento immundo, ut Porcus; vel in loco immundo, nempè sub terra habitant; ut Mures, Talpæ, & huiusmodi; ex tali enim loco foetorem contrahunt. Alio modo effectivè, inquantum accepta in cibum faciunt malum nutrimentum; & hoc ex nimia humiditate, vel siccitate, seu alijs circumstantijs, & ideò talia fuerunt reputata immunda, & prohibita Iudeis: undè generalitèr prohibebantur Volucres rapaces, quia rapacitas in eis est signum magnæ caliditatis, & siccitatis; quod ex eo patet, quia habent substantiam multum nervosam, & fit in eis paucitas carniū, ex magno calore omnia devorante, & per consequens, non sunt boni nutrimenti, nam optima, & temperata complexio mediocritatem requirit inter calidum, & frigidum, siccum, & humidum. Proibentur deindè hîc multæ aliæ Aves: ut Vultures, quia nutriuntur Cadaveribus; Noctuæ, quæ sunt abominabiles, non solum hominibus, sed etiam alis avibus; Bubones qui sunt aves nocturnæ, non ferentes splendorem diurnum; estque animal manens inter immunditias; cuius Vox, secundum opinionem Gentilium, in augurijs dirum denotabat Omen; unde quidam cecinit

- Ovid. lib. *Eumenides stravere Thorum, Tectoque profanus*  
 6. metam. *Incumbit Bubo, Thalamoque in culmine sedit.*  
 Idem lib. *Fædaque fit Volucris, venturi nuncia Luctus*  
 5. metam. *Infamis Bubo, dirum mortalibus Omen.*

Demum hîc generalitèr dicitur, quod quicquid ambulat de Volucris super quatuor pedes, immundum est; talia enim non sunt bonæ complexionis, cum mixta sint ex natura quadrupedum, & volatiliū; quæ commixtio, non patitur mediocritatem complexionis. Excipiuntur tamen ab hac generalitate illa animalia, quæ habent Crura longiora, per quæ saliant: ut sunt Bruchus, Atacus, & Locusta; & talibus vespcebatur Sanctus Ioannes Baptista in deserto; sunt enim boni, & sani



& sani nutrimenti . Non solum antem fuerunt prohibita animalia, quæ hic recensentur, propter immunditiam, & malam complexionem ; sed etiam quia Idolatræ eis utebantur in Sacrificijs , & maleficijs suis . Item per aliqua ex prædictis animalibus figurabantur vitia, quæ sunt ab hominibus fugienda . Sicut Porcus significabat Luxuriam ; Lepus timiditatem ignaviæ ; Camelus propter Gibbum quem habet in dorso, tumorem superbiæ , & sic de alijs .

### Reflexio 239.

**P**ost prohibitionem eius Animalium immundorum , sequitur prohibitio tactus : determinatur enim , quod quicumque morticina eorum tetigisset , immundus esset usque ad Vesperam . Si verò portasset ipsum Morticinium , debebat lavare vestimenta sua , eratque immundus usque ad occasum Solis . Hæc autem lotio , non erat nisi quædam asperio ex aqua , in qua commixti erant cineres Vaccæ Rufæ . Sciendum verò quod istæ immunditiæ non erant nisi quædam irregularitates , per quas homo reddebatur ineptus ad intrandum Atrium , ubi erat locus Sacrificij ; & ad comedendum de sanctificatis , donec esset purgatus per prædictam ablutionem ; vel per supradictum lapsum temporis . Et ratio ea erat : quia istæ Ceremoniæ erant quædam observationes , in quibus non respiciebatur quid secundum naturam esset ; sed quid appareret honestum secundum opinionem hominum : non videbatur autem honestum , ut aliquis modo incurrisset immunditiā , & immediatè esset mundus per aquam Lustrationis : ideò datum fuit tempus intermedium , parvum tamen , scilicet usque ad vesperam ; ne homines per distantiam temporis nimis elongarentur à cultu divino . Quod autem homo esset immundus usque ad Occasum Solis , non vacabat mysterio : per hoc enim significabatur , quod nullus in hac mortali vita est , qui totalitè devitet immunditiam peccati , nisi in morte , quæ per Occasum Solis denotabatur ;


S 3

nam



nam quandiu vivimus instabiles sumus; cum autem Sol occiderit; idest præsens vita elapsa fuerit, tunc efficiemur mundi, quia ulterius peccare nequimus.

## CAP. XII. Reflexio 240.




Vpra actum est de immunditia, quæ causabatur ab extra, hîc agitur de illa, quæ erat ab intrinseco: & primo ponitur de immunditia Mulieris parientis, dum dicitur: Quod si Mulier suscepto semine pepererit masculum, immunda erat septem diebus iuxta dies separationis menstruæ: videlicet, quod in illis septem diebus observare debebat omne id quod observabat Mulier menstruata; scilicet quod nullus ad illam accederet, & qui eam tangebatur erat immundus, & omnia quæ ipsa tangebatur fiebant immunda. Triginta verò tribus diebus manebat in sanguine purificationis suæ: idest in sanguine suo aliquantulum purificato, non tamen perfectè; & ideo in illis triginta tribus diebus poterat communicare cum alijs in cibo; non autem in Lecto. Illud tamen, quod tangebatur, non fiebat per hoc immundum. Non poterat vero ingredi Atrium Sanctuarij, donec totaliter complerentur dies purgationis suæ; videlicet septem maioris immunditiæ, & triginta tres minoris; erant enim in totum quadraginta dies. Si autem peperisset foeminam, erat immunda octuaginta diebus: videlicet quatuordecim maioris immunditiæ, & sexaginta sex minoris. Causa diversitatis dierum erat: quia formatio seminis in utero, & materiæ digestio, fit à calore seminali agente; in conceptu autem foeminæ est minor caliditas, & ideo tardius purificatur ipsa materia immunda. Expletis autem diebus purificationis offerebat Mulier Sacrificium, & pro ea Sacerdos orabat, & sic mundabatur à culpa, quæ non contrahabatur in Partu, sed in conceptu, in quo de communi cursu, est aliqua inordinata libido. Licet enim actus matrimonialis



lis possit exerceri sine peccato, tamen ibi frequenter contingit inordinatio: Dicitur autem *in Tex. Et sic mundabitur à profluvio Sanguinis sui*. Quod quidem non intelligitur consecutivè, quasi ad orationem Sacerdotis oriretur munditia in Muliere, quia sequeretur inconveniens: nempe quod Mulier immunda ingressa fuisset Sanctuarium; sed intelligitur de illa immunditia, quæ ratione reverentiæ durabat, & est sensus: quod Sacerdote orante tollebatur impedimentum Mulieri accedendi ad res Sacras; & quod declarabatur prorsus munda. Adverte autem quod cum hic dicitur: *Mulier si suscepto semine pepererit masculum*: manifestè patet, hanc particulam fuisse à Spiritu Sancto positam, propter Beatissimam Virginem Dei Matrem, quæ peperit Christum Dominum sola virtute Spiritus Sancti; & per consequens exempta fuit ab hac lege, quam tamèn ex humilitate observavit ad tollendum scandalum plebis. Nam, si vidissent Iudæi, quod Domina Nostra non observasset hanc Legem, existimassent illam tamquam profanam, ignorantes ineffabile Mysterium Incarnationis Filij Dei in Vterum Immaculatæ Virginis.

## CAP. XIII. Reflexio 241.



Postquam actum est de immunditia foeminae patientis, hic agitur de immunditia hominis Lepam patientis, & dicitur: Quod si in Cute hominis ortus fuisset diversus color; idest notabiliter variatus à Colore naturali pristino; sive Pustula, quæ est quædam collectio putredinis super Cutem; vel lucens quippiam, idest transparens sicut Pergamena: tunc talis homo debebat adduci ad Sacerdotem: qui si aspexisset Lepam in cute; idest similitudinem Lepræ; & pilos mutatos in colorem album, ipsamque speciem Lepræ, idest locum cutis, & carnis ubi apparet aliquod signum Lepræ humiliorem; tunc Cute, tunc reliqua

S 4

carne;



carne ; debbat separare talem hominem à cæteris. Tribus enim signis concurrentibus, iudicandus erat homo Leprosus. Primum erat, mutatio coloris naturalis pilorum in album, cum prius essent Nigri, vel Crocei. Et ratio ea est, quia pili oriuntur ex cute ; & ideò cum habeant ortum à Carne infecta, & mutata in aliam qualitatem, ipsi quoque Pili in alterum colorem mutantur;qua propter erat sufficiens signum ad ipsam Lepram iudicandam. Non accipitur autem hic color albus propriè, quia Albedo est color Vividus, & naturalis, sed accipitur pro candore causato ex corruptione, qui vocatur Albor. Secundum erat, mutatio naturalis coloris ipsius carnis in colorem album, habentem quandam transparentiam, & lucem, & ratio est: quia talis lux causatur ab aliqua interna corruptione; sicut patet in pomis, in quorum superficie apparet quædam lux, intus autem est putredo; adeò ut quantò magis ipsæ res putridiores fiunt, tanto magis apparet ista Lux. Tertium erat, quando Caro, & cutis in qua erat species Lepræ, humilior videbatur alijs partibus corporis, & ratio est: quia Lepra est corrosiva, consumens carnem in qua manet; & ideò ipsa caro est inferior, ac profundior alijs partibus. Si verò species Lepræ non unam solummodò partem corporis, sed totam cutem operuisset, à capite usque ad pedes; tunc Sacerdos debbat iudicare talem hominem teneri Lepra mundissima, ut dicitur *in tex.* Accipitur autem Lepra hic æquivoce, pro eo quod videbatur esse Lepra à vulgo; ideoque vocatur Lepra mundissima. Erat enim universalis scabies, quæ trahit putredinem humorum ab interiori ad cutem; & sic per illam mundatur caro: ex bonitate namque naturæ, expellentis omnia inquinamenta à partibus interioribus ad superficiem, causatur. Si verò vivens caro rubea, vel sanguinolenta apparuisset, debbat Sacerdos iudicare talem hominem immundum, quia talis corrosio erat effectus Lepræ. Vndè ille candor effusus per totum corpus, non proveniebat ex bonitate naturæ expellentis putredinem à parte interiori ad superficiem; sed à corruptione, quæ erat  
in



in carne. Iudicium autem Lepre pertinebat solummodo ad Sacerdotes propter duas rationes principales. Prima: quia prædicta immunditia arcebat hominē ab ingressu Sanctuarij; quia propter tale iudicium pertinere debebat ad Ministrum rerum sacrarum. Secunda erat: quia clavis, vel potestas ligandi, & solvendi, consequitur clavē discernendi. Sacerdos autē, habebat potestatem solvendi aliquem, recipiendo illum ad ingressum Sanctuarij, & repellendi illum; ideoque ad ipsum solū pertinere debebat iudicare quis mundus, vel immundus esset. Secuto autem iudicio Sacerdotis, quo iudicabatur aliquis Leprosus, statim mittebatur extra Gastra in loco totalitè remoto à populo, & habebat vestimenta dissuta, videlicet in lateribus aperta. Vestis etiam erat scissa circa cor, in signum magni doloris: etenim apud antiquos consuetudo fuit, quod vestes scinderentur ad significandam afflictionem animi. Habebat caput nudum, in signum humiliationis, & subiectionis. Os eius erat veste contectum, propter aeris respirationem, ne inficeret aerem propinquum, & deindè aliquos astantes in aliqua distantia. Leprosi namque, non solum in superficie cutis; sed etiam ab interiori sunt infecti, ideoque aer ab illis respiratus inficitur, cum tangat eorum præcordia. Tandem debebat semper clamare, confitendo se esse contaminatum ac sordidum, ut sic ab omnibus vitaretur:


### Reflexio 242.

**P**ostquam actum est de Lepra, quæ erat in homine, sequitur de illa, quæ reperiebatur in veste; hæc tamen habebat originem ab homine, nam Lepra habet pro causa naturali impropotionem humorum, quæ quidem impropotio est in vivente: ideoque si erat in veste, contingebat ratione contactus. Lepra enim est morbus contagiosus, & cum sit virtutis corrosivæ, consumptivæ, & resolutivæ corroditur Caro, ex qua deinde elevantur aliquæ particule infectæ, quæ postea inhærent vesti, ipsamque inficiunt, idemque evenit in domibus. Igitur ponitur in text. signum talis



talīs Lepræ, dum dicitur: Quod Sacerdos recludere debebat vestem per septem dies, & si in septimo deprehendisset crevisse Lepram, hoc est maculam, iudicare debebat esse Lepram perseverantem, & ratio ea erat: quia si fuisset aliqua alia macula non infectiva, non habuisset aliquam virtutem, per quam cresceret. Lepra autem cum sit virtutis corrosivæ se diffundit. Si autem non crevisset pars illa, in qua erat macula, lavabatur, & recludebatur per alios septem dies, quibus elapsis, si videbat Sacerdos partem illam non reversam ad pristinum colorem, debebat declarare vestimentum immundum, quia manifeste patebat, quod macula oriebatur, non ab exterioribus, sed ab interioribus, ex eo quod per lotionem non recessit macula. Si verò, postquam vestis fuerat lota, obscurior apparuisset locus Lepræ, ut dicitur in *Tex.* & accipitur hinc *Lepra* pro signo Lepræ, sicut & in alijs locis frequenter; tunc vestis iudicabatur munda, quia color obscurus non pertinet ad Lepram. Auferebatur tamen pars illa à tota veste, & alius pannus apponebatur, quia illa macula deformabat totum vestimentum.

## CAP. XIV. Reflexio 243.



Actum est in superioribus de cognitione Lepræ, hinc agitur de mundatione leprosi; quando scilicet apparebat illum esse liberum à tali morbo. Igitur Sacerdos exhibat in hoc casu aliquantulum extra castra, & tunc leprosus veniebat ad eum, cui Sacerdos præcipiebat, ut offerret duos Passeres vivos, & Lignum Cedrinum; Vermiculumque, & Hyssopum. Ratio huius oblationis erat: quia Lepra aufert vivacitatem sensuum, & ideò qui declarandus erat mundus, offerebat Passeres vivos, ad denotandam in se vivacitatem sui corporis. Item Lepra affert putredinem; ideo offerebatur per oppositum, lignum cedrinum, quod est imputribile; ad denotandam in se ipso exclusionem

pu-



putredinis. Et quia Lepra aufert colorem carnis, ideo per op-  
positum offerebat Leprosus filum Rubeum; nam color rubeus  
est vividus. Demum quia Lepra secum fert fetorem, offerebat  
homo sanatus Hyssopum, quæ est herba odorifera; ut signaret  
se reversum ad statum naturalem. Vnus autem de passeribus  
immolabatur in Vase fictili super aquas viventes. Sunt au-  
tem aquæ viventes illæ, quæ habent in se principium suæ ori-  
ginis, & motus; sicuti Fontales, Fluviales, & Puteales.  
Ratio ea erat, quia istæ aquæ erant ad purificationem; ideo-  
que debebant esse puræ: aquæ autem mortuæ non sunt puræ,  
nam propter quietem contrahunt quandam grossitiem, &  
immunditiam, ut patet in stagnis, & Paludibus. Per hoc  
autem designabatur quod caro quæ prius videbatur, ratione  
Lepræ, mortua, erat restituta vitæ. Deindè fiebat quoddam  
Aspersorium ex ligno cedrino oblato, cui alligabatur Hyssop-  
pus, & Passer vivus cum filo Coccineo; & ista duo sic alligata,  
tingebantur in aqua viva, posita in vase fictili, cui mix-  
tus erat sanguis Passeris immolati, & aspergebatur septies  
homo; ad denotandum in eo perfectam munditiem: Septe-  
narius enim numerus perfectus est. Deindè Sacerdos dimit-  
tebat passarem vivum ut in Agrum avolaret: ad designandum  
quod homo sic purgatus, cum prius esset ligatus vinculo le-  
gis, ne posset libere communicare cum alijs, restituebatur  
cohabitationi hominum; sicut Passer prius ligatus, ne posset  
volare ubi vellet, solvebatur, ut cum alijs Passeribus liberè  
maneret. Istis ceremonijs peractis, radebat mundatus omnes  
pilos carnis suæ ad tollendas omnes sordes. Die autem octa-  
vo offerebat Sacrificium, & olei sextarium; tùm ad designan-  
dam suam sanitatem, quia oleum habet vim sanativam Pu-  
stularum, & Apostematum; tùm quia in scripturis Sanctis,  
Oleum significat Divinam Misericordiam, per quam Lepro-  
sus sanabatur. Deindè, Sanguine Hostiæ immolatæ tinge-  
bantur manus, pedes, & extremum auriculæ dexteræ illius.  
Et ratio huius Ceremoniæ erat: quia sanguis est ad expiationem;  
expiatio autem debet esse in illis partibus in quibus  
est



est actus peccati: istæ autem sunt tres, nempe Auris quo debemus audire præcepta; manus, & pedes quibus operamur; ideò in istis fiebat purificatio, ut constaret, remitti quicquid homo iste peccaverat. Fundebatur autem Oleum super sanguinem qui effusus erat pro delicto; ad designandum Deum propitiari sanguini illius qui mundabatur.

## CAP. XV. Reflexio 244.



**D**ICTO de mundatione Leprosi, hic agitur de fluxu seminis. Igitur Vir, qui patiebatur fluxum seminis erat immundus. Notandum est autem, quod aliquis dicitur pati fluxum seminis, & efficere fluxum seminis: cum enim homo voluntariè id agit, non dicitur pati fluxum seminis, sed efficere, quia principia agendi in ipso sunt. Pati verò, non est in potestate patientis, cum fluat semen etiam ipso repugnante. Principium vero naturale, causans in homine, præter suam voluntatem hunc fluxum, est phantasia. Ista namque potentia dominatur toti naturæ corporali, & maximè in somno: nam quia tunc operatur homo per solam phantasiam, operationes eius fortiores sunt, quam in vigilia, in qua homo per rationem, tamquam per primum principium, multa operatur. Igitur, cum in somnijs fiat motus in phantasia super aliquas species rerum delectabilium, tanta ex hac apprehensione fit mutatio in corpore, ut seminis effusio sequatur. Talis ergo homo erat immundus, adeò, Stratum in quo iacebat, & Sella in qua manebat, immunda erant; quia supponebatur humorem fætidum cecidisse super prædicta. Item omnes qui carnem illius tangebant; & locus in quo manserat, efficiebantur immundi usque ad Vesperam. Post curationem autem huius fluxus, elapsis septem diebus, lavabatur in aquis viventibus; quia istæ sunt mundiores, propter propinquitatem ad suam originem; & salubriores, propter continuum motum. Die autem octavo offerebat quos Turtures; aut duos pullos Columbæ:  
unum



unum pro peccato, & alterum in Holocaustum. Licet autem dicatur in *Tex.* quod tunc Sacerdos rogaret pro eo Dominum, ut mundaretur à fluxu feminis; tamèn talis homo iam erat mundatus, alioquin non potuisset ingredi Sanctuarium; ideoque debet intelligi, quod mundabatur respectu vulgaris estimationis. Similitèr homo coeundo cum fœmina, contrahabat immunditiam; nec fit differentia an pollueretur cum uxore, vel cum extranea, quia in hoc nulla erat differentia; nam ita prohibitus erat ab ingressu Sanctuarij ille qui pollutus erat cum uxore, sicut cum adultera: non enim ponebatur immunditia quasi in opere esset peccatum; sed quia ibi erat pollutio corporalis in effusione feminis. Vir igitur iste lavare debebat corpus suum, & vestimenta; similiter & Mulier, si voluissent ingredi Sanctuarium; si verò noluisent intrare, per elapsum temporis mundabantur.

### Reflexio 245.

**P**ost immunditias hominum sequitur de immunditia feminarum. Sciendum est autem quod Mulieres, à tempore quo incipiunt esse aptæ ad concipiendum, usque ad tempus quo concipere desinunt, quolibet mense habent hanc passionem, quæ vocatur fluxus sanguinis menstrui, nisi impediuntur per infirmitatem, vel per conceptum. Et bene dicitur passio, quia talis fluxus non venit voluntarius, sed ex necessitate naturæ. Per talem igitur passionem Mulier separabatur septem diebus; nec ullis communicabat cum ea in cibo, & Lecto. Omne id in quo dormiebat, vel sedebat, immundum efficiebat, quia super illa supponebatur cecidisse aliquod de fluxu menstruali, quod valdè fœtidum est atque pestiferum; adeoût si Canis de illo gustet, in rabiem vertitur; & si cadat super arbores, siccantur. Homo verò qui illam tetigisset, immundus erat usque ad vesperam, si tamèn ignorantèr hoc fecisset, & factum esset occultum: nam si scientèr ad illam accessisset, & mulier scientèr consensisset, & de hoc con-



convincerentur in iudicio, pœnam mortis incurrerant, ut pater infra *cap. 20.* Prohibebatur verò accessio ad mulierem menstruatam, non solum propter immunditiam prædictam excludendam; sed etiam quia ex tali coitu, ut plurimum, solent generari partus monstruosi; vel saltè patientes aliquam notabilè infirmitatè, in aliqua parte corporis cōtrahunt, vel in toto, cū fiat generatio de illa materia pestifera quæ excluderatur ad naturæ purificationem. Si verò Mulier pateretur multis diebus fluxum sanguinis, sed non in tempore menstruali, erat immunda sicut in menstruis. Cessata verò fluxione debebat stare per septem dies, à cessatione sanguinis; & in die oétavo offerre duos Turtures, aut duos pullos columbarum; unus pro peccato; alter in Holocaustum, ad reddendas gratias Domino, qui illam sanaverat. In menstruada autem non fiebat oblatio, quia ista immunditia erat purè naturalis, & ideò non videbatur aliquod motivum offerendi, tamquam ista Mulier ab aliqua ægritudine liberaretur.

## CAP. XVI. Reflexio 246.



**S**uperius actum est de purgatione ab immunditia, in quantum tangebatur personas particulares; hìc agitur de purgatione generali, quæ respiciebat totum populum, & fiebat decima die Mensis Septimi, cui correspondet noster September, & vocabatur festum Expiationis, seu Propitiationis. Duplici autem de causa fiebat hoc festum. Vna erat, quia in tali die, fuit per Moysen denunciatum peccatum remissum de condatione Vituli in deserto. Alia erat, quia Iudæi frequenter, & ex multis causis contrahebant immunditias; & quia aliqui propter negligentiam, vel ignorantiam omittebant emundari; ideò semel in anno fiebat generalis purgatio; & propter hoc vocabatur *Dies expiationis*. In ista die poterat, & debebat Summus Sacerdos



cerdos ingredi in Sancta Sanctorum: antequam tamen intraret ibidem, ponebat Thymiana super Prunas, ut exhalaret nebula, & ferebat in manu sua aliud Thymiana, ut si deficeret nebula, de novo oriretur ex combustione novi Thymiamatis; adeo ut non contingeret Sacerdotem esse sine nebula accendente, nam tunc vidisset id quod erat super Propitiatorium, nempe Angelum, ibidem loquentem, quod sub pœna mortis erat illi interdictum. Moyses autem, cum intrabat in Sancta Sanctorum nihil ferebat in manu de Thymiamate, quia dignus erat visione Angeli, ex speciali gratia Dei. Summus autem Sacerdos, dignus habebatur solummodo audire vocem; sed non videre illam formam. Post hæc Summus Sacerdos offerebat Vitulum pro peccato suo; quia ad hoc quod Deus acceptaret preces illius, orantis pro populo, oportebat ut ipse esset mundus. Post hanc immolationem, accipiebat ab universa multitudine duos Hircos; mittebatque super utrumque sortem, ut determinaretur per hoc, quis eorum mittendus esset in desertum, ad portandas iniquitates filiorum Israel, & quis esset immolandus. Hoc autem monstrabat Deus per signum sortium: nam si Iudæi pro arbitrio suo unum illorum accepissent, fortè putassent, quod tale animal non portasset suas iniquitates: cum ignorarent an Dominus ipsum elegisset. Considerandum tamen est, quod tales sortes permittebantur, ex parvitate fidei illorum quibus dabantur. Et simile est in sortibus, quæ datæ sunt ad eligendum unum Apostolum, quando sors cecidit super Matthiam. Nam adhuc Apostoli erant infirmi in Fide. Quando verò fuerunt confirmati per Spiritum Sanctum cælitus missi, iam non fecerunt aliquid per sortes, sed per electionem; & sic modo observat Ecclesia Dei, ut nunquam sortibus utatur, nisi in quibusdam casibus, in quibus alias discerni non posset.

Re-



## Reflexio 247.

**P**ostquam igitur per sortes apparuit quis esset Hircus qui debebat offerri Domino in Sacrificium, mactabat Sacerdos illum; & de sanguine eius inferebat in Sancta Sanctorum, ut expiaret Sanctuarium ab immunditijs filiorum Israel. Non est tamen intelligendum, quod Sanctuarium haberet in se aliquod peccatum, cum esset res inanimata; sed dicebatur quodammodo pollui ex peccatis Sacerdotum, & populi. Deindè, Sanguine prædicti animalis, aspergebat directè contra Oraculum: ad designandum, quod aliquo modo offerebat satisfactionem Deo. Nam sicut si aliquis offendisset alium; tunc offensus iudicaret sibi esse satisfactum, si offensor occideretur coram eo: ita hìc, ut videretur Deo satisfieri, fundebatur sanguis animalis coram Propitiatorio, ubi Deus principalitèr esse dicebatur. Post expiationem Sancta Sanctorum, expiabat Pontifex reliquam partem Tabernaculi, quæ dicitur *Sancta*; tingens sanguine Altare Thymiatis; & dum faciebat hanc functionem, nullus hominum manere poterat in Tabernaculo, ne distraheretur Sacerdos à Ministerio, quia tunc debebat esse maximè elevatus in Deum. Expiato Sanctuario exhibat Summus Sacerdos ad offerendum Hircum Emissarium coram Domino; & posita utraque manu super caput Victimæ, confitebatur omnes iniquitates filiorum Israel, & peccata in generali; rogans Deum, ut poenam debitam vellet transferre in Hircum: qui statim mittebatur in desertum Feris devorandus, pro omnibus morte dignis ratione peccatorum. Sed dices istam ceremoniam confitendi peccata Hirco fuisse irrationabilem, cum nihil audiret de illis quæ dicebantur à Sacerdote; undè melius fuisset confiteri aliquo alio Sacerdoti, secundum quod nunc fit in Ecclesia Dei. Dicendum, quod confessio quæ fit Sacerdotibus, non conveniebat aliquo modo tempore Legis antiquæ; quia tunc lex non fuisset umbra futurorum bonorum, sed imago præ-



presentium. Adde, quod confessio habet efficaciam à passione Christi Domini, qui statuit, ut quicumque confiteretur peccata sua, particeps esset redemptionis ab ipso causatæ; contulitque Sacerdotibus novæ legis potestatem clavium, ut solverent, vel ligarent: tempore autem veteris legis, non fuerat exhibita passio filij Dei, & ideò Sacerdotes non habebant claves ad solvendum, vel ligandum; unde confessio illis facta, nihil poterat proficere, quapropter convenientius fuit confiteri, ut dictum est suprâ; omnis enim, qui hoc videbat, satis intelligebat, istam confessionem fieri, non propter aliquem profectum, quem haberet in se; sed propter aliquam significationem, quod pertinet ad rationem umbræ.

## CAP. XVII. Reflexio 248.



Ostquam actum est de purgatione generali, quæ fiebat per quædam Sacrificia, hic agitur de loco Sacrificij. Et sub pœna mortis prohibetur, ne aliquis occideret Bovem, aut Ovem in Castris, vel extra, ut intelligitur de occisione per modum Sacrificij. Hoc autem fuit à Deo prohibitum, ad vitandam Idolatriam in populo; ad hanc enim erant Iudæi proni: quapropter, si cuilibet licitum fuisset immolare ubi voluisset, sicut faciebant Gentiles, citò ad Gentilem ritum Israelitæ declinassent; & quilibet sibi usurpasset officium Sacerdotale. Dum verò legitur aliquos Sanctos in veteri lege obtulisse Sacrificia extra Tabernaculum, sicut patet de Manue *Judic. 13.* & de Elia *3. Reg. cap. 18.* Hoc fuit per Dei revelationem, & instinctu Spiritus Sancti; quod patet ex subsequenti miraculo. Nam ignis descendit de Cœlo, & consumpsit eorum Sacrificia, in signum Divinæ acceptionis. Secundò, prohibetur pariter sub pœna mortis esus Sanguinis, propter duas rationes in Textu allegatas. Prima erat, quia anima in sanguine est. Et ad intelligentiam adverte, quod in tantum ani-

T

ma



ma existit in corpore, in quantum sunt in ipso corpore aliqua dispositiones requisitæ ad hoc ut anima informet corpus, inter quas sunt duæ principales: nempe humidum radicale, & calidum naturale, in quibus fundatur vita animalis: istæ vero magis reperiuntur in sanguine, quam in alio humore; nam in sanguine est humidum, & calidum temperatum; & ideo anima magis fundatur in proportionem sanguinis, quam in alijs humoribus; ideoque dicitur, quod anima est in sanguine. Hunc autem comedere, videbatur quodammodo comedi vita animalis, quod erat nimis crudele. Deus autem intendebat retrahere Iudæos à crudelitate, ad quam erant multum dediti. Secunda ratio erat, quia Dominus dederat sanguinem animalium ipsis Israelitis, ut illum offerrent super Altare, ad peccata ipsorum expianda: quod ergo assignatum erat in peccatorum remedium, non erat licitum sumi in corporis alimentum.

## CAP. XVIII. Reflexio 249.



Raditis præceptis quibus amovebatur immunditia, hîc ponuntur præcepta ordinativa vitæ: & inducuntur Iudæi ad ipsa adimplenda ex auctoritate præcipientis, cum dicitur: *Ego sum Dominus Deus vester*. In quibus verbis, sunt duo inductiva ad suscipiendum, & adimplendam Legem, nempe Timor, & Amor, quæ in omnibus affectibus movent hominem ad aliquod agendum. Amor autem notatur cum exprimitur Nomen Dei; nam Deus nomen amoris est, & propter reverentiam suam, deberent homines facere omnia quæ mandat. Timor verò notatur cum dicitur *Dominus*, nam Dominus, Nomen timoris est. In observantia autem præceptorum, proponitur præmium cum dicitur, *Custodite leges meas, atque Iudicia, qua faciens homo vivet in eis*. Etenim observantes Legem primò vivebant vita Naturæ in prosperitate; nam secundum decursum



sum veteris Testamenti, patet quod quando filij Israel servaverunt Dei mandata, fuerunt etiam in quiete, & prosperitate; quandò verò declinaverunt ab ea, in captivitatem, in famem, & in gladium dati fuerunt. Secundò, vita Gratiæ: licet enim opera legis, secundum se accepta, non iustificarent, tamen in quantum fiebant ex obediencia ad Deum, & in fide Mediatoris tunc venturi, iustificabant; talis verò iustificatio in scripturis Sanctis attribuitur fidei, & obedienciae ad Deum. Tertiò, vita Gloriæ, quia illa opera, modo prædicto, erant meritoria vitæ eternæ; non tamen habendæ statim, sed amoto impedimento generali, per mortem Christi Domini.

### Reflexio 250.

**P**ost præcepta ordinativa vitæ, ponitur explicatio præceptorum, ordinantium hominem prout est principium propagationis. Debita autem propagatio impeditur ex illegittimatione personarum; ideoque prohibentur gradus Coniugij illiciti. Et primò prohibentur accipi in matrimonium Descendentes; nam turpitudine Filix, & Neptis, omniumque Descendentium, est turpitudine patris, à quo descenderunt, quia omnes sunt de substantia illius, nam aliquo modo habuerunt identitatem in illo; cum aliquando fuerint particulæ illius, & ab illo decisæ, ut ait *Arist. 3. Ethic.* turpe igitur esset, quod aliquis turpitudinem istarum personarum revelaret, quoniam turpitudine sua est. Secundò prohibentur accipi Ascendentes, quia hoc est contra ordinem naturæ. Etenim natura semper vult propagationem, & dilationem: si autem Descendentes unirentur Ascendentibus in matrimonium, non fieret dilatatio, sed conversio ad suum principium. Tertiò interdicatur, ne aliquis ducat in matrimonium Sororem; sive domi genitam, sive foris. Dicitur autem genita in domo, quādo gignitur ex fœdere matrimoniali; foris verò, quando gignitur ex Concubina; nam intra domum sunt illa quæ domum constituunt, scilicet Vir, & Vxor, Servus, &

T 2

Bos,



Bos, ut ait *Arist. pr. Polit.* idèò genita ex Vxore, dicitur genita in domo; quæ autem ex Concubina, vel ex adultera, non; quia Concubina, & Mœcus, non constituunt unam æconomiam. Similitèr prohibetur, ne aliquis revelet turpitudinem Vxoris fratris sui: intelligitur tamen exceptus casus, quando frater moriebatur sine liberis; tunc enim frater superstes, non solum poterat eam accipere in Vxorem, sed tenebatur, ut suscitaret semen fratri suo defuncto, ut patet *Deut. cap. 25.*

## CAP. XIX. Reflexio 251.



Dis itis Præceptis ordinativis vitæ humanæ, in quantum est principium generationis, hic ponuntur Præcepta ordinativa vitæ, pro ut homo est principium suæ operationis, & recapitulantur aliqua Præcepta pertinentia ad Ius Naturæ, & ad Sacrificia peragenda. Deinde ordinatur naturalis affectus erga pauperes, dum præcipitur non secari omnes fruges, sed relinqui aliquod in extremitate, vel Angulo; idemque erat iussum in vinea, & Olivetis, quo pauperes, & peregrini alerentur. Secundò prohibetur defraudatio mercedis operariorum; tales enim sunt pauperes, de quotidiano labore viventes, ideoque non possunt expectare dilationem solutionis, absque notabili suo detrimento. Tertiò instruuntur Iudices, ne considerent personam pauperis, quando Iustitia per hoc læderetur; nec honorent vultum potentis. Quartò præcipitur dilectio amicorum, dum dicitur: *Diliges amicum tuum sicut teipsum.* Per ista autem verba non significatur æqualitas; nam nullus homo hoc facere posset, cum bonum nostrum magis, quam aliorum, naturalitèr intendamus, sed solum denotatur similitudo quædam, scilicèt, quod sicut aliquis sibi benefacit, & pro utilitate sua laborat; ita amico suo aliquoqualiter benefaciat, & pro sublevandis illius necessitatibus intendat.

Quin-



Quintò prohibetur, ne quis faceret coire Iumentum suum cum animali alterius generis; tum quia talis coitus esset contra ordinem naturæ; tum quia, ex aspectu talium, possent homines induci ad vitium peccati brutalis. Præcipiebatur etiam hoc in detestationem idolatriæ, nam Idolatræ colentes Cœli militiam, faciebant in coniunctionibus Planetarum coire diversa specie animalia. Et eadem ratione diversa semina in eodem agro coniunctim seminabant; & vestibus ex pluribus contextis, utpotè ex lana, & lino, vel ex diversis coloribus utebantur, in venerationem Siderum. Sextò iubetur, quod cum ingressi fuissent Iudæi in terram Chanaam, auferrent præputia arborum. Accipitur autem præputium in arboribus, pro eo quod primò nascitur. Quod autem primo erumpit, sunt Gemmæ, quæ abscindi debebant. Et ratio erat, quia postea arbores sunt minus utiles, quando nimis cito faciunt fructum, nam substantiale nutrimentum, natum ad magnitudinem, & confortationem arboris, transit in fructus, & ideo efficiuntur parvæ altitudinis, & modicæ durationis: sicut accidit in pueris, qui in tenera ætate coire incipiunt: in istis enim statura, & robur corporis, & pulchritudo deperditur, & cum pervenerint ad virilem ætatem, nequeunt gignere proles perfectas. Poma verò quæ germinabant tribus primis annis (nam aliquando non auferiebantur perfectè flores, vel gemmæ ex negligentia, vel oblivione, & ideo arbores edebant fructus) erant immunda. Causa erat propter sanitatem fructuum ad cibos humanos: nam isti in primo triennio sunt multum terrei, & aquosi; quia ibi est parva caliditas pro digerenda terrestrietas, & aquositate fructus, ideoque nocivi sunt. Cum autem ad quartum annum pervenerint, sunt perfectè digestibiles, cum arbor sit perfecta in vigore suo: quapropter fructus quarti anni, utpote perfecti, offerebantur Domino, & cedebant in usus Sacerdotum. Septimò prohibentur auguria, & Divinationes; nam velle scire res futuras per auguria, & superstitiones, est subtrahere Deo honorem; præscire enim futura, Deitatis Ius est.



## CAP. XX. Reflexio 252.




Vm posita fuerint Præcepta ordinativa vitæ, absque determinatione poenæ in eorum transgressione; hîc aliqua replicantur assignando debitam punctionem. Et ratio huius ordinis est; quia intentio Legislatoris est facere ciues bonos, & virtuosos; hoc autem est quando bene operantur ex amore Iustitiæ; & ideo Dominus præmisit Præcepta, absque determinatione poenæ; per hoc insinuans, quod essent adimplenda ex amore boni: sed quia pauci respectivè sunt virtuosus, ideò replicavit Præcepta cum determinatione poenæ. Et primò dicitur: quod qui daret de semine suo Idolo Moloch, morte moreretur; quod dupliciter exponitur. Vno modo accipiendo semen pro Spermate: nam sicut aliqui Idolatræ sacrificabant Idolis de proprio sanguine, ut patet de Sacerdotibus Baal, qui incidebant se culttris, & lanceolis, 3. Reg. cap. 18. ita alij faciebant Sacrificia de proprio semine, quia est sanguis magis digestus. Alio modo exponitur de Pueron nato: nam aliqui idolatræ, sacrificabant de pueris suis Idolo predicto. Erat autem tale Idolum cupreum, ad formam hominis factum, interius concavum; & in illa concavitate ponebatur ignis, quousque Idolum esset quasi ignitum, & tunc ponebatur puer in manus Idoli. Postea impius Sacerdos, percutiens Tympana, tantum sonum edebat, quod vox pueri morientis nullo modo audiri poterat. Hoc autem fiebat, ne parentes ad compassionem excitarentur propriæ prolis morientis; sed magis crederent fuisse animam pueri receptam à Dijs in quiete, & sine dolore. Iudæi vero ad hoc faciendum erant multum inclinati, credentes, quod ex tali puerorum suorum oblatione, consequerentur postea quicquid peterent de bonis temporalibus. Secundò assignantur poenæ quantum ad concupiscibilem; tum  
in



in adulteris, tum in incestuosis, & in peccato bestialitatis, in quo non solum statuitur mors pro illo, qui cum iumento coiret, sed etiam iubetur interfici ipsum animal, & hoc in detestationem nefandissimi criminis, & ne ex aspectu talis iumenti, aliqui homines inclinarentur ad tale scelus patrandum.

## CAP. XXI. Reflexio 253.



Ositis Præceptis, quibus ordinabatur vita quantum ad communem statum: hic ponuntur Præcepta, quantum ad cultum Divinum respectu Ministrorum. Et primò inhibetur Sacerdotibus minoribus, ne intersint funeribus mortuorum, nisi in casibus aliquarum personarum, qui in littera exprimuntur. Causa prohibitionis duplex erat. Prima, quia ex hoc contrahebant quandam immunditiam, seu irregularitatem, impediens illos ad tempus, à ministerio Tabernaculi. Secunda, quia cum essent periti in Lege Divina, habebant consequenter cognitionem de Resurrectione, maiorem quam Laici, & ideo non debebant lugere inconsolabiliter mortuos suos, sicut faciebat ignarus vulgus, sensibilia tantum attendens. Pontifici autem Maximo prohibebatur ne ad ullum mortuum accederet, etiam si fuisset pater, vel mater, & ratio huius prohibitionis erat: quia Summus Sacerdos semper debebat esse paratus ad ministrandum coram Domino: poterat vero in quolibet temporis momento accidere, ut castra essent movenda; ipse autem solus debebat ingredi *Sancta Sanctorum* ad velandam Arcam, & cetera, quæ ibi erant; ideoque magis arcebat à loco, ubi erat mortuus, quam minores Sacerdotes, ne immunditiam contraheret, & perconsequens redderetur incapax ingredi Sanctuarium. Domus enim, in qua erat mortuus, immunda erat, & perconsequens, omnes

T 4

illi



illi qui ingrediebantur illam, efficiebantur immundi. Præterea fuit Summo Sacerdoti præceptum, ut Virginem duceret in Vxorem de Tribu sua. Tamen fuit ei postea concessum, ut posset accipere Vxorem de stirpe Regia; tum propter nobilitatem generis; tum ut Summus Pontifex, & Rex essent magis concordēs. Hoc enim redundabat in bonum, & perfectum regimen Reipublicæ, etenim Sacerdotes per hoc habebant maiorem venerationem, cum essent affines Regibus, maioremque potentiam ad corrigendos delinquentes, adiuti per Regalem: nam teste *Arist.* *potentia est organum ad felicitatem.* Demum statutum fuit, ne homo de semine Aaron, habens notabilem maculam, offerret panes Deo; nec accederet ullo modo ad ministerium Domini, ne ex hoc vilesceret officium Sacerdotale; deformitas enim in homine, reddit illum contemptibilem in vulgo.

## CAP. XXII. Reflexio 254.



**P**rofitis Præceptis ordinativis Divini cultus quantum ad ministrantes; hic ponuntur quantum ad ministrata, & dicitur: quod Sacerdotes caverent ab ijs, quæ consecrata, idest oblata sunt à filiis Israel, ut non irreverenter ad comedendum se ingererent, nam polluerent Nomen sanctum Dei, si auderent immundi comedere de carnibus sanctificatis: tunc enim est vera Dei contemptio, cum negliguntur ceremoniæ ab eo imperatæ. Et magis nomen Domini polluitur in Sacerdotum contemptu, quam popularium, quia Sacerdotes pertinent ad eius ministerium; magis autem quis despectui esse videtur, cum à suis despicitur, quam si ab alienis parvipendatur. Deinde prohibentur offerri illa animalia, quæ habebant notabilem deformitatem, ne ex hoc vile-



vilefceret cultus Divinus. Poterat tamen offerri animal aure, vel cauda amputatis, non in Sacrificium, sed ut de pretio illorum animalium fierent aliqua necessaria in Tabernaculo; nempe reparationes cortinarum, vel aliorum utensilium. Similiter de manu Gentilium non poterat aliquod accipi ad offerendū in Altari quia talia reputabantur corrupta, & maculata. Sacrificia enim, & oblationes veteris Legis non erant, ut sæpe dictum est, accepta secundum se, sed ex fide offerentium. Gentiles autem, cum non haberent circumcisionem, quæ erat signaculum fidei, reputabantur infideles, & per consequens indigni ad offerenda dona Deo. Item quia Sacrificia antiqua erant protestationes futuri Messie, quæ protestatio in Gentibus non poterat reperiri, cum non haberent Legem annunciantem, & prædicentē Messiam Sanctissimum. Poterat tamen accipi pecunia, vel alia dona, ex quorum pretio emerentur illa, quæ essent offerenda. Et hoc modo dicitur 2. *Machab. cap. 3.* quod Seleucus Rex Asiæ, ex sumptibus suis præstabat illa, quæ pertinebant ad Sacrificia. Et ratio ea est, quia talis pecunia non efficiebatur directè Sacra; nec dicebatur directè oblata Deo: unde emendo ex illa aliquod animal pro Sacrificio, non iudicabatur tale animal datum à Gentibus, quia emebatur ad voluntatem Sacerdotum ministrantium; quod quidem sufficiebat ad hoc, ut vere dici non posset, quod acciperetur Hostia de manu Gentilium ad offerendam Deo.

## CAP. XXIII. Reflexio 255.



**I**N superioribus actum est de Sacrificijs, & qualitate offerendorum; nec non de dispositione offerentium; hic ponitur de temporibus solemnitatum, quæ quidem tempora vocantur Feriæ Domini Sanctæ: videlicet, ad Divinum cultum totaliter applicatæ; Homines enim magis debent colere Deum in solemnitatibus, quam in alijs



alijs diebus; nam de lure naturæ est, quod vacemus Deo, separantes aliquam temporis partem, ad supremum nostrum Benefactorem specialiter colendum. Deus enim est fons ille indeficiens, ex quo omnia, & continua beneficia nobis proveniant: ad ista autem recolenda institutæ sunt festivitates. Advertendum est autem, quod Festivitates, Solemnitates, & Feriæ idem sunt, quo ad vacandum Divinis; tamen Festivitates, & Solemnitates dicunt aliquam excellentiam factam in talibus diebus. Feriæ autem dicunt solummodo cessationem ab operibus servilibus. Antequam verò præscribantur Festivitates, quæ debebant celebrari temporibus suis, ponitur Festivitas regularis, quæ erat dies Sabbati, & vocatur *Sanctus*, idest totaliter applicitus ad cultum Domini, in quo Iudæi debebant esse intenti orationibus, & meditationibus sanctis. Ex quo bene deducitur, quod magis peccat quis, si malum agat in die solemni, quam si peccaret in alijs: nam dies solemnis debita est Deo; unde cum homo eam pravis occupationibus applicat, subtrahit illam Deo. In alijs autem diebus, non subtrahit homo tempus Deo, quia sibi ipsi specialiter competit, ad peragenda illa, quæ sunt necessaria pro sustentatione sui status, vel aliorum si sit Superior. Hinc Deus dixit, *sex diebus operaberis, & in septimo requiesces*. Advertendum est autem, quod licet in veteri Testamento multæ festivitates institutæ fuerint; tamen in Nova Lege nulla festivitas instituta est à Christo Domino. Et ratio differentiæ ea est: quia in veteri Lege homines incipiebant Deum colere, & erant valde rudes; adeo ut si nullæ festivitates eis præscriptæ fuissent, nullas observassent. Data autem Nova Lege, iam erant eruditi, scientes debere assignare in colendo Deum, aliquas speciales solemnitates; ideoque non fuit necesse, quod Dei Filius illas institueret, sed quod solummodo relinqueret dispositioni Ecclesiæ suæ.

Re-



## Reflexio 256.

**I**Nter Festivitates igitur, quæ semel in anno fiebant, prima erat *Solemnitas Paschalis*, quæ celebrabatur in memoriam eductionis filiorum Israel de Ægypto, quæ accidit decima quinta die mensis primi, idest Martij. Incipiebat autem talis Solemnitas à Vespere præcedentis diei, idest inclinata iam die; nam immediate post meridiem, Iudæi Vesperum vocant. Et tunc auferebatur à domo omnis panis fermentatus, ut posset immolari Agnus Paschalis: talis vero immolatio dicebatur *Phase*, idest Transitus, quia Angelus in tali nocte, percutiens primogenita Ægyptiorum, transibat domos Hebræorum, in quorum superliminaribus erat de sanguine agni immolati, salvans eos. Per septem autem dies comedebantur panes azymi: in memoriam quod filij Israel, imminente exitu, non poterant fermentare, Ægyptijs cogentibus eos exire. Secunda vero die azymorum, quæ erat decima sexta Martij fiebat oblatio Spicarum: quilibet enim Iudæus, qui erat devotus, offerebat unum manipulum; deinde Sacerdos accipiebat unum de oblatis, elevans illum coram Domino; reliquos vero cedebant in usus Sacerdotum. Ante hanc oblationem, nemini licebat comedere quicquam de suis segetibus. Secunda Festivitas erat dies *Pentecostes*, & celebrabatur in memoriam Legis datæ in Monte Sinai: hæc autem data fuit quinquagesima die ab egressu de Ægypto, excluso die egressionis, & ideo celebrabatur quinquagesima die à prima die Festi Paschalis exclusivè. Accipiebantur enim septem Hebdomodæ post diem Paschalem, quæ faciunt dies quadraginta novem, & sequens dies erat Pentecostes. Dicitur enim Pentecostes à *Penta*, quod est quinque, & *Coste* quod est decem. In ista solemnitate, quilibet offerebat duos panes fermentatos, & in quolibet erat una decima Simile, qui omnes dabantur Sacerdotibus; nihil enim de his proveniebat Deo, quia fermentatum non poterat offerri super Altare.

Ter-




Tertia Solemnitas, erat *Festum Tubarum*, quæ fiebat in mense septimo, qui apud nos vocatur September; & in prima die Mensis, Hebræi clangebant in cornibus Pecorum, in memoriam liberationis Isaac ab immolatione, pro quo fuit immolatus Aries, qui inter fruteta cornibus hærebat. Miseri autem & cæci Iudæi, etiam nunc observant in hac die sonitum clangoris, quia hoc festum non determinabat locum. Quarta Festivitas, erat *Festum Propitiationis*, seu *Expiationis*; nam in tali die dicebantur peccata remitti, quod est expiari. Etenim expiatio dicit purgationem, & absterfionem macularum; peccata autem sunt quædam sordes animæ, & valde magnæ. Celebrabatur hoc festum in memoriam illius beneficii, quo Dominus indulgit Israelitis peccatum de fabricatione Vituli in Deserto; & ideo celebrabatur decima die Mensis septimi, quia tunc descendit Moyses de Monte, portans secundas Tabulas in signum Divinæ propitiationis. In hac igitur die debebant Iudæi affligi vigilijs, ieiunijs, & orationibus. Quinta festivitas, erat *Festum Tabernaculorum*; quod celebrabatur in memoriam illius beneficii, quo Dominus filios Israel, per quadraginta annos sustentavit in Deserto, faciens illos habitare in Tabernaculis. Vocabatur etiam hæc festivitas alio nomine *Scenophegia*, quod idem est ac *comestio in loco publico*, dicta a *Cenon* quod est commune, & *phagia*, quod est comedere, quasi in communi, vel in publico epulari; in tali namque festo Iudæi publicè agebant Epulas. Die autem octava fiebant Collectæ, nam colligebatur pecunia pro Sacrificijs fiendis per totum annum, & alijs necessitatibus Templi: non enim habebat Sanctuarium aliquos redditus. Etenim de his, quæ vovebantur nihil pertinebat ad Sanctuarium, sed ad Sacerdotes. Similiter Redemptiones Primogenitorum, Dona, Primitiæ, Decimæ, & generalitèr quicquid Domino offerebatur, pertinebat ad Sacerdotes, & Levitas.

CAP.



## CAP. XXIV. Reflexio 257.




Es scriptis solemnitatibus pertinentibus ratione religionis erga Deum ad totum populum; hic ponuntur quædam observationes, vel ministeria, quæ ad solos Sacerdotes, tamquam Dei Ministros pertinebant; & ideò iussit Dominus, ut exhiberetur Sacerdotibus à toto populo Oleum de olivis purissimum, ad componendas Lucernas, quæ die ac nocte debebant ardere in Sanctuario. Similiter iussit, ut offerrent Laici ipsis Sacerdotibus pro tota communitate Similam, quæ est farina tritici purissima, pro Panibus propositionis; hæc enim omnia ministranda erant de sumptibus totius populi. Ad officium verò Sacerdotum pertinebat prædictas Lucernas accendere, & coquere Panes propositionis, qui semper erant duodecim super mensam coram Deo; & fiebant duo ordines. In summitate autem cuiuslibet ordinis, erat Vas aureum plenum Thure lucidissimo; & vocabantur *Panes propositionis*, quia ponebantur coram Domino ante Velum Sancti Sanctorum, in Mensa tecta Laminis aureis. Isti panes, postquam erant sublati de Mensa, ut alij supponerentur, cedebant in usus Sacerdotum, & in Atrio Tabernaculi in una Esdra, ad hoc parata, comedebantur; nam erant multum sanctificati, quia per septem dies steterant coram Domino. Alij autem panes oblati Sacerdotibus, poterant extra Sanctuarium comedi, quia non reputabantur habere tantam Sanctitatem, cum non fuissent positi super mensam, nec per prædictum spatium temporis coram Deo mansissent. Habebant autem isti panes singuli duas decimas Simile; ex quo apparet valdè magnos fuisse; nam una decima simile est quantum potest regularitèr homo comedere per unam diem; & sic quilibet panis, cum contineret duas decimas simile, sufficiebat ad sustentandum hominem per duos dies, manducando etiam ad sufficientem satietatem.

CAP.



## CAP. XXV. Reflexio 258.



Superius actum est de solemnitatibus quæ durabant per unum, vel per paucos dies; in hoc autem capitulo agitur de solemnitatibus per annum durantibus. Prima igitur erat *Annus septimus*, in quo non poterat terra seminari, nec Vineæ putari; sed debebat prorsus dimitti quiescere; & Israelitæ debebant vivere de fructibus quos sponte terra producebat. In anno tamèn sexto, ipsa terra ferebat fructus in tanta abundantia, quod sufficiebant ad sustentationem hominum, usque ad tempus quo novi fructus haberentur de seminato in octavo anno. Non licebat Dominis in septimo anno colligere fructus agrorum suorum quasi messem, vel vindemiam; sed solummodò ad alimentum suum, & familiæ. Alij autem dimittebantur pro peregrinis, & miserabilibus personis, quia in hoc anno, nihil magis iuris erat Domino fundi, quam alijs. Accedit, quod cum Dominus fundi, nihil in eo colendo laborasset, non debebat plus habere quam alijs; quia fructus debent provenire propter labores: quod est valdè magnum argumentum contra illos, qui multos redditus ex pluribus Ecclesijs, vel beneficijs recipiunt, licèt in eis nihil laborent. Et plerumque accidit, quod in Vineâ Domini laborantes, vix ea quæ ad rusticanum victum necessaria sunt habeant: non laborantes autem, non solum ea quæ ad decentiam status sui conveniunt, sed quæ ad Luxum, prodigalitatem, & superbiam inserviunt, recipiant; quod quidem dum contingit, sine universali scandalo non transit. Porrò in hoc anno, dabantur quidem primitiæ Sacerdotibus, sed non solvebantur Decimæ; quia istæ solvuntur quando fructus sunt determinati; in hoc autem anno patronus fundi, non poterat determinatè scire fructus, quia omnes, tam pauperes, quam peregrini perceperant de illis, ideoque decimæ non erant solvendæ.

Re-



## Reflexio 259.

**S**ecunda festivitas annualis erat *Annus Iubilæi*. Sciendum est autem, quod post annum septimum accipiebantur septem Hebdomadæ annorum, quæ faciunt annos quadraginta novem; & in sequenti anno qui erat quinquagesimus, erat Iubilæus: unde erant duo anni sibi immediatè succedentes, in quibus terra quiescebat. Applicabatur verò totus Iubilæi annus ad Divinum cultum, & remittebantur servitutes, & debita; & mittebantur Exules redire ad terram suam. In Mense autem septimo anni præcedentis Iubilæum, decima die mensis, qui erat dies Propitiationis, clangebatur Buccina; undè ab isto clangore, & iubilo dictus est Iubilæus. Causa huius clangoris, qui fiebat in die propitiationis, erat quia in tali die propitiabatur Deus Israelitis, dimittens omnia eorum peccata; ideoque iustissimum erat, ut & ipsi remitterent in alterutrum omnia debita. Hinc nos etiam in Nova lege dicimus esse annum Iubilæi, quando est annus plenariæ indulgentiæ. Sciendum est autem, quod si aliquis Hebræus vendebat possessionem suam, & postea potuisset dare pretium acceptum, redibat ad illam, computatis tamèn fructibus ab emptore susceptis, in sortem. Si verò non potuisset solvere pecuniam, revertebatur ad suam possessionem in anno Iubilæi, nullo pretio dato. Adverte autem, quod hoc procedebat in rebus immobilibus tantum, nam res mobiles non redimebatur soluta pecunia, nisi emptor hoc gratis concessisset; nec in Iubilæo redibant ad priorem Dominum, sed remanebant apud emptorem, & eas trans mittebat ad hæredes tãquam legitimus Dominus. Ex hoc patet quod inter Iudæos regulariter, non poterant esse aliqui excellenter divites super alios, cum bona immobilia redirent liberè in Iubilæo ad venditores. Poterat tamèn ex huiusmodi venditione esse lucrum per hoc, quod si venditor non redemisset ante Iubilæum, poterant fructus esse maiores quam sors prin-



principalis; quo casu emptor non tenebatur illos restituere, sed erant sui; & hoc expectabant omnes emptores. Si verò venditor redemisset fundum ante Iubilæum; tunc emptor nihil utilitatis consequabatur, quia non faciebat fructus suos, sed computabantur in sortem, deductis laboribus. Ratio huius determinationis fuit, quia Terra promissionis dicebatur esse speciali modo ipsius Dei. Iudæi autem habitantes in illa, erant sicut Coloni, & ideò Dominus noluit, quod transferrent simpliciter dominium in emptorem; sed ad tempus, & quod fructus computarentur in sortem, in favorem venditorum. Item hoc fuit ad sublevandos pauperes: voluit enim Deus, ut postquam eguissent per annos quadraginta novem, redirent in quinquagesimo ad pinguiorem fortunam. Tertia, & principalior ratio fuit, ne confunderentur Tribus, & Familiæ, quæ per sortes distinguebantur, & possessiones; adeo ut cognita sorte, vel possessione, cognoscebatur Tribus, & Familia. Licet autem per prædictam venditionem fieret aliqua confusio Familiarum; tamèn hoc erat ad parvum tempus, quinquaginta scilicet annorum; adeo ut poterant homines recordari de possessionibus ad quas familias pertinerent; undè Iubilæus tollebat omnem confusionem. Ratio verò quare voluit Deus observari distinctionem Tribuum, & Familiarum, fuit propter Christum Dominum tunc nasciturum de semine, & familia David. De ipso autem per Prophetas dictum fuerat, quod futurus erat de Tribu Iuda, & de semine David; ideò debebat esse Tribus Iuda distincta ab alijs; & in ea, Familiæ distinctæ per possessiones ad verificanda oracula prophetarum; ideò Deus voluit quod omnis Iudæus haberet aliquam hæreditatem à suis progenitoribus, per quam cognosceretur de qua Tribu, & Familia esset.

Re:



## Reflexio 260.

**P**ost venditionem, & redemptionem agrorum agitur de venditione domorum. Et determinatur, quod domus illæ quæ essent intra Civitates, vel Villas muratas, possent quidem redimi infra annum à venditione; sed hoc tempore elapso, non poterant de cætero redimi etiam in anno Iubilæi. Ratio autem huius determinationis erat, ut Civitates, & Terræ muratæ remanerent magis populatæ: stante namque tali præcepto, pauci erant qui venderent domum propriam positam in Civitate, timentes ne amplius possent illam redimere. In Ruribus autem, non manebat idem motivum; ideò semper redimi poterant. Excipiebantur tamèn ab hac lege domus Levitarum, quæ erant in Urbibus muratis; nam venditæ poterant semper redimi. Et ratio disparitatis erat, quia Levitæ non habebant aliquam possessionem agrorum sicut aliæ tribus, exceptis suburbanis, quæ vocabantur Possessiones sempiternæ, quia erant communia. Communitas autem non moritur, sed solum singulares personæ; ideoque nullus Levita poterat vendere aliquod de Suburbanis, cum nullum haberet ibi Ius proprium. Insuper non habebant Levitæ ista Suburbana ad colendas vineas, & ad fruges recipiendas, sed solummodò ad pascenda eorum pecora: ideò manifestum erat, quod non habebant de proprio nisi domos in quibus cum suis familijs habitabant; ideoque domus eorum, quæ erant in Urbibus, reputabantur illis pro hæreditate agrorum; undè poterant semper redimi, sicut hæreditas Laicorum redimebatur ad voluntatem vendētium.

## Reflexio 261.

**A**cto de venditione, & redemptione rerum, agitur consequentèr de venditione, & redemptione Personarum. Et determinatur, quod si aliquis Hebræus esset emptus in servum, vel Hebræa in Ancillam, hoc enim


V

Deus



Deus illis permittebat ad sublevandas eorum necessitates, debebant tractari amicabiliter. Si verò Iudæus fuisset venditus in servum alicui Gentili, converso ad Iudaismum, qui vocatur hîc in litera *Advena*, dum dicitur: *Si invaluerit apud vos manus Advenæ*: hoc est, si factus fuerit potens ille, qui de terra aliena venit ad Iudaismum (manus enim potentiam significat) in hoc casu talis Iudæus poterat statim redimi per seipsum, si pinguior fortuna sibi occurrisset, vel per propinquos suos; facta tamen defalcatione de pretio redemptionis, quantum eius servitus valuerat ipsi emptori. Tractabatur namque iste Servus tamquam Mercenarius; nam dum fiebat liber, dabantur ei mercedes pro quolibet anno servitutis. Si verò prædictis modis non potuisset redimi, egrediebatur liber cum filiis suis in Iubilæo. Hoc autem privilegium redimendi statim post venditionem dabatur propter duo: Primo, quia isti servi magis affligebantur ab Advenis quam à Iudæis, eo quod Hebræi erant exosi Advenis; ideò rationabilius erat servos liberari de manu illorum, quam de manu fratrum suorum. Secundò, propter magnitudinem temporis: nam quando Iudæus vendebat se Iudæo, ista servitus durabat solummodò usque ad annum septimum; cum verò vendebat se Gentili converso ad Iudaismum, durabat usque ad Iubilæum; undè pro maiori tempore servitutis, maius subsidium liberationis dandum erat. Ratio verò, quare Dominus nolebat Iudæos posse vendi simpliciter, & ad semper, erat, quia Hebræi erant immediatè Servi ipsius Dei, eo quod redimerat illos de servitute Ægyptiaca; ideoque nolebat aliter vendi, quam prædicto modo.

## CAP. XXVI. Reflexio 262.



Postquam actum est de solemnitatibus, quæ pertinebant ad Cultum Divinum, in hoc capitulo inducitur consequenter populus ad illorum observantiam, per promissiones bonorum temporalium.



lium. Erant enim Israelitæ imperfecti, solaque terrena bona desiderantes; ideo Dominus loquitur eis secundum eorum dispositionem, promittens bona temporalia pro actu virtutis, & religionis: tamèn per hoc non est intelligendum, quod Dominus sola bona temporalia tribuat pro bona operatione. Et ratio ea est, quia Deus Iustissimus est; ideò oportet, ut tantum conferat pro operatione virtuosa, quantum ipsa meretur: & quia est liberalissimus, confert etiam aliquod ultrà condignum. Omnis autem operatio bona directà in Deum, fit secundum Charitatem; sed charitas est excellentior omnibus virtutibus moralibus, cum sit forma ipsarum, secundum quā gratæ sunt Deo. Morales autem virtutes sunt excellentiores omnibus bonis temporalibus, quæ possidentur: undè *Arist. 7. Ethic.* ponit ipsam virtutem de pulcherrimis secundum naturam, quia ita bona est, ut nullo modo possit esse mala, quapropter non esset iusta retributio, si Deus daret pro virtute morali, ex charitate procedente, solummodò bona temporalia: & ideò in scripturis Sanctis, sub nomine bonorum temporalium, semper intelliguntur principalitèr promissa Æterna. Proponuntur autem hic in Textu bona temporalia, cum dicitur: *Apprehendet messum tritura Vindemiam; & Vindemia occupabit sementem.* In quo significatur maxima ubertas frugum, dum non possent propter multitudinem triturrari tempore suo, sed remanerent usque ad principium Vindemiæ, cum tamèn communiter, etiam in annis fertilissimis, sit tempus medium inter trituram Messum, & principium Vindemiæ. Deindè promisit Deus pacem in finibus eorum; quæ quidem pax potest intelligi cum hostibus, vel cum civibus ad invicem. Prima, opponitur bello. Secunda, seditioni. Sive tamèn hostes pugnent; sive Cives contra se insurgant, angustia magna fit in Republica: maior tamèn, si Cives inter se dissideant, quia tunc minor securitas est.




## Reflexio 263.

**S**icut promissa fuerunt bona observantibus præcepta Dei, ita pronunciantur mala transgressoribus, dum inter alia dicitur in Tex. *Dabo vobis Cælum de super, sicut ferrum, & terram Æneam; corripiam vos septem plagis, ita ut comedatis carnes filiorum vestrorum.* Advertendum est autem, quod abundantia frugum, & omnium terræ nascentium, provenit principaliter ex influxu Corporum Cœlestium, & ex dispositione Terræ ipsum recipientis; quapropter cessatio utriusque, significatur per Cælum ferreum: etenim ferrum fortissimum Retinaculum est: & ideo per hoc designatur retentio influxus. Terra verò Ænea valdè dura est; sed dura difficillimè patiuntur iuxta *Arist. in præd. qualit.* undè licet Cælum influat, tamèn actio sua nihil proficit, dum terra propter duritiam suam non est disposita; nam ut ait *Arist. 2. de anima. Actus activorum sunt in patiente benè dispositio*; adeo ut, si patiens non obediat agenti, nullus sequitur effectus. Deindè contestatur illis Deus, quod si per flagella non resipiscerent, sed multiplicarent transgressiones, corripere eos septem plagis: per quæ designatur perfecta poenalitas, cum septenarius numerus denotet Univerſitatem: peccata namque frequentata, & per replicationem multiplicata, faciunt maiorem gravitatem; & semper posteriora, ratione ingratitude erga Deum qui prima indulſit, sunt graviora. Hinc Dominus in poenam scelerum replicatorum prædicit Israelitis, quod comederent carnes filiorum suorum. Hoc autem fuit impletum in obsidione Samariæ, ut habetur 4. Reg. cap. 6. & in obsidione Ierusalem per Titum, sicut refert *Iosephus libro de Iudaico bello*: hæc autem maxima miseria est; nam filii cum sint partes decisæ de substantia parentum, sequitur quod isti comedant particulas carnis suæ.

CAP.



## CAP. XXVII. Reflexio 264.



Vpra actum est de oblationibus generalibus; hinc agitur consequenter de redemptionibus Votorum, quæ erant quædam Oblationes speciales. Igitur si aliquis vovisset Deo animam suam, videlicet seipsum, tale votum non erat per immolationem solvendum, sed per redemptionem, quia homo non erat animal immolabile. Persona autem humana, secundum diversas ætates, est maioris, vel minoris valoris; ideò secundum quatuor ætates taxatur hinc pretium. Sunt autem homines secundum varias ætates magis, vel minus utiles ad famulatum; nam in iuventute magis valet homo, quam in alijs ætatibus; quandoquidem aliæ, vel priores, vel posteriores deficiunt robore in potentijs motivis, & operativis. Hinc Levitæ portabant onera à trigesimo anno usque ad quinquagesimum, & deinde non amplius ministrabant, sed efficiebantur Vasorum Custodes: ut per hanc occupationem excluderetur otium, omnium malorum origo. Maior etiam pretium constituebatur in Masculis quam in Fæminis; quia Viri secundum naturam, sunt præstantiores, atque robustiores Fæminis. Licet autem pueri quinque annorum, & unius mensis, pro quorum redemptione solvebatur pecunia, non possent vovere, cum non haberent usum rationis, tamèn poterant obligari voto parentum. Hinc Anna mater Samuelis, fecit votum de ipso, etiam antequam nasceretur. Si verò quis vovisset animal, non poterat mutari, dando melius malo, vel peius bono: quia tale animal iam erat applicatum Deo; unde non erat decens, quod rebus profanis inserviret. Et si mutatum fuisset, utrumque erat consecratum Domino. Si autem quis vovisset animal immundum, ratione atque maculæ, propter quam offerri Deo non possent, taxabatur pretium à Sacerdote; quod pretium, si vovens solvere voluisset ut reciperet animal, addebat super extimatione m.




quintam partem . Ratio autem quare carius vendebatur voventi, quam alteri, erat, ne voventes haberent oculos ad recuperandum id quod semel voverant, & per hoc esset votum minus gratum Deo .

### Reflexio 265.

**A**Cto de Voto rei animatæ, sequitur videre de voto rei inanimatæ . Igitur si quis vovisset domum, cum ista non esset immolatio, vendebatur, & pretium receptum applicabatur ad usus Sacerdotum . Sciendum tamen est, quod hæc extimatio facta per Sacerdotem, non erat valde magna : etenim ad negotiatores, qui sola lucra intendunt, pertinet facere in rebus excessivas extimationes . Viri autem Ecclesiastici, non debent de his curare : habentes enim alimenta, & quibus tegantur, his debent esse contenti . Et hic nota, quod Sacerdotes non poterant sibi retinere res immobiles quas per votum accipiebant, sed tenebantur eas vendere ipsi voventi, vel alijs de illa Tribu . Et ratio erat, ne remaneret fors, & hæreditas sæcularium nimis diminuta ; & Sacerdotes in progressu temporis, plus haberent quam omnes Israelitæ . Sciendum est autem, quod si quis vovisset agrum, in Redemptione taxabatur pretium secundum quantitatem sementis ; & secundum distantiam à Iubilæo : adeo ut quanto plures erant anni ab obligatione voti usque ad Iubilæum ; tanto maius erat pretium redemptionis . Si verò vovens nolisset redimere ipsum agrum, tunc pertinebat ad Deum, ideoque non poterat vovens, ad prædictum fundum redire in Iubilæo ; quia res quæ consecratæ sunt Deo, non transeunt in proprietatem Laicorum . Adverte autem, quod quando aliquis vovebat rem suam, si voluisset illam redimere, non solum dabat pretium quod taxabatur per Sacerdotem ; sed insuper quintam partem ; & in tali casu manebat apud ipsum possessio rei in æternum ; quia non erat amplius sanctificata Deo, cum illi subrogata fuisset pecunia . Si verò  
alius



alius redemisset fundum, redibat possessio in Iubilæo ad Levitas, & iterum taxabatur pretium rei, & vendebatur: Et hoc modo habebant Levitæ possessiones agrorum pertinentes ad iura ipsorum; attamen non possidebant illos agros, nec eos colebant, sed solummodò in Iubilæo vendebant illos; quapropter tales Agri erant semper censuales, vel quasi censuales: non enim poterant Sacerdotes, & Levitæ colligere fructus, ne remanerent impedi per Agriculturam, ad exercenda Divina Ministeria. Si verò ager emptus esset, & non fuisset de possessione maiorum, idest, parentum illius qui emebat agrum, tunc si vovens voluisset illum redimere, considerabatur distantia à tempore redemptionis usque ad Iubilæum, secundum quam erat maius vel minus pretium. In Iubilæo autem redibat ad priorem Dominum, à quo iste vovens emerat, non verò ad Sacerdotes; quia talis vovens, non poterat obligare fundum, nisi usque ad Iubilæum: quandoquidem nihil iuris ultrà habebat in eo: secus autem erat de Agro, quem habebat ex hæreditaria successione.







*Am Dominus Deus tradiderat Leges, quæ  
specificant ordinationem populi, respectu  
Divini cultus: consequenter in hoc Libro  
adduntur illa, quæ specificant ordina-  
tionem populi, respectu mutui conven-  
tus: imminebat enim tunc populo pro-  
gressus ad terram sibi promissam; & ideo  
ponuntur hic illa, quæ pertinebant ad  
ordinationem populi proficisci debentis:  
populo autem in tali statu constituto, necessario requirebatur  
quod aliqui essent subditi, & obedientes; alij Superiores, & Im-  
perantes; quia ubi non est Gubernator, corruebat populus; ideo po-  
nitur ordinatio Reſtorum, & Subditorum; & ad hanc faciendam  
numeratur Israelitica multitudo; qua propter Liber iste vocatur  
Liber Numeri,*



## CAP. I. Reflexio 266.



Ræcepit igitur Dominus Moyfi, ut tol-  
 leret summam universæ Congregationis  
 filiorum Israel, per Cognationes, &  
 Domos suas; & nomina singulorum à  
 vigesimo anno, & suprâ: ab ista enim  
 Ætate incipiunt homines pugnare con-  
 tra insurgentia vitia; & ideò ne ab il-  
 lis superentur, exercere se debent con-  
 tinuè in aliqua arte, vel scientia suo  
 statui proportionata. Labor enim est distractio ab iniquis con-  
 cupiscentijs: præter quam quod, in prædicta ætate est in ho-  
 mine robur ad operandum. Fuerunt autem filij Israel, qui  
 ad bella procedere debebant sexcenta tria millia quingenti  
 quinquaginta; in qua numeratione, non fuerunt numerati  
 Levitæ: isti enim, cum essent appliciti ministracionibus Sac-  
 cris, non poterant, nec debebant vacare bellicis operationi-  
 bus, sed Rempublicam defendere precibus ad Deum pro  
 consequendis victorijs humiliter porrectis. Sciendum est au-  
 tem, quod Levitæ aliquando veniunt sub nomine Israelita-  
 rum, aliquando non. Si enim filij Israel nominantur quan-  
 tum ad aliquod spirituale, tunc nomine Israelitarum veniunt  
 etiam Levitæ: undè inter Lapidés Rationalis, erat etiam *Levi*:  
 quia hoc pertinebat ad aliquod spirituale. Et Ioannes Apo-  
 stolus in Apocalypsi, referens convertendos ad Christum  
 Dominum, computavit sub nomine filiorum Israel etiam *Levi*,  
 quando verò agitur de aliquo merè temporali ut hîc in *Textu*,  
 ubi agitur de processu ad bellum; tunc sub nomine Israelita-  
 rum non veniunt Levitæ. Similitèr in prædicta summa non  
 fuerunt computati illi Ægyptij, qui ascenderunt cum Iudeis;  
 quiquidem erant valdè multi, ut patet *Exod. cap. 12.* ubi di-  
 citur, quod vulgus promiscuum infinitæ multitudinis, ascen-  
 dit



dit cum Hebræis: quod manifestè patet, quia accepta est Summa cuiuslibet Tribus per domos, & familias; Egyptij autem non pertinebant ad Tribus vel familias Israelitarum.

## CAP. II. Reflexio 267.




Vprà actum est de numeratione Israelitarum; hìc agitur de eorum Castrametatione. In bello namquè iste est ordo, ut primò sciatur quot sint bellatores, & sub quibus Principibus; deindè qualiter ordinari debeant in suis Aciebus, & Castrorum fixione. Sciendum est autem, quod Castra filiorum Israel erant disposita in quadrum: nam ut ait *Vegetius Lib. de Re milit. Optima dispositio bellica, & perfectus situs Castrorum est figura quadrata; & sic semper debent situari, nisi loci dispositio impediat*. In parte Orientali erant tres Tribus, videlicèt: *Iudas, Zabulon, & Isachar*, qui omnes erant 186400. Ab Occidente aliæ tres scilicèt: *Ephraim, Benjamin, & Manasse*; & isti erant 108100. A meridie, aliæ tres, nempè: *Ruben, Simeon, & Gad*, quorum numerus erat 151450. Ab Aquilone aliæ tres, videlicèt: *Neptalim, Dan, & Aser*, eorumque numerus erat 157600. Distinguebantur deindè filij Israel singuli per Turmas suas, & per signa, atque Vexilla. Est autem Turma multitudo triginta bellatorum, & sic vocatur, quia est parata, & disposita ad turbandum Adversarios magis quam reliqui milites, qui formant corpus totius Exerciti, & manent firmi ad resistendum inimicis, si insurgerent, vel occupantur in aliqua alia operatione militari. Turma verò, si est Equitum, dicitur propriè Ala. Si verò sit peditum vocatur Turma. Signa autem propriè sunt in vestibus, & Scutis, quibus bellatores mutuò se cognoscunt; & ponuntur in exercitu talia Signa, ut milites possint distinguere suos ab adversarijs, ne in pugna occiderent fratres putantes trucidare Hostes. Vexilla autem sunt quædam serica, quæ elevantur in hastis, ut ad eorum aspectum statim bella-



bellatores uniantur ad invadendum, vel ad resistendum inimicis. Dicunt vero DD. quod vexillum cuiuslibet Tribus, erat simile in colore Lapidis posito in Rationali, in quo erat sculptum nomen sui Patriarchæ; ut sic quilibet miles, dum necessitas occurreret, posset uniri suis fratribus; nec oriretur confusio unius Tribus cum reliquis.

## CAP. III. Reflexio 268.




**N**umeratis Secularibus, agitur hinc de numeratione Levitarum: iussit enim Dominus, ut numerarentur filij Levi ab uno mense, & suprâ; quia in tali ætate primogeniti offerebantur Domino. Numeratio autem prædicta fiebat ad commutandum Levitas, pro primogenitis aliarum Tribuum. Ante Legem enim scriptam pertinebat ad primogenitos offerre Sacrificia; sed quia filij Levi non peccaverunt in adoratione Vituli, reliqui autem peccaverunt; ideò soli Levitæ fuerunt electi ad ministrandum Deo in officio Sacerdotali, cæteris alijs expulsis. Secunda ratio fuit, quia Tribus Levi erat valdè minor quam quælibet alia; ideò talis electio fuit multum conveniens; tum quia Ministri Altaris debebant esse pauci, cum pauci sufficerent; tum quia Israelitæ illos erant sustentaturi sumptibus suis; ideoque ne nimis populus graveretur; & ut possent Sacerdotes vivere secundum decentiam sui status, debuerunt esse pauci; quia quantò fuissent plures, tanto essent pauperiores, & impotentes ad sustentandam dignitatem suam sicut decebat; & sic extimationem populi, debitam Dei Ministris, non habuissent. Sciendum est autem, quod primogeniti Israelitarum, pro quibus Deus accepit Levitas, dicuntur esse ipsius Dei: hoc est, specialitèr obligati quam omnes alijs; & hoc non fuit ex semper, sed solum ex tempore quo percussit Dominus primogenita Ægyptiorum. Et quantum ad hoc non pertinebant ad Deum, in quantum est Deus; sed magis de Iure Gentium; nam



nam quando aliquis eripit alterum à morte, ut si accipiat illum in bello, & servet eius vitam, efficitur servus illius. Deus autem eruerat primogenita Israelitarum à morte in Ægypto, salvans eos ab Angelo percutiente; ideò tenebantur sibi ad servitutem; & sub hac formalitate dicebantur sui. In novo verò Testamento, non sunt primogeniti magis obligati quam cæteri; quia in nobis non fuit aliqua liberatio secundum carnem; nec fuerunt aliqui, qui haberent maiorem obligationem ad Christum Dominum Redemptorem, quam alij; ideò non fuit assignata aliqua Gens determinata, de qua eligerentur Ministri Sacri Altaris; sed de omnibus nationibus eliguntur ad serviendum Deo, nisi habeant aliquam indignitatis notam, propter quam Iura repellant eos à Ministerio Divino.

#### CAP. IV. Reflexio 269.



Assumptis Levitis in ministerium Tabernaculi; hic assignatur modus cuilibet familiæ exequendi officium suum, tempore motionis castrorum in portandis oneribus. Erant autem tres, familiæ Levitarum, scilicet: *Caathitæ*, *Gersonitæ*, & *Meraritæ*; & ideò singulis præscribitur officium proprium: nam *Caathitis* commissum fuit, ut in motione castrorum portarent Arcam, Mensam, Altare Thymiamatis, & Altare Holocausti, omniaque vasa Sanctuarij, involuta sericis Hyacinthinis, excepto Altare Holocausti, quod involvebatur purpureo vestimento; ad significandum, quod ibi erat Ignis latens. Pallium autem non comburebatur, & hoc Divino miraculo. Omnia tamen prædicta involvebantur prius per Sacerdotes, nam Levitis non licebat tangere illa, nec nuda videre sub pœna mortis. Officium *Gersonitarum* erat, ut portarent cortinas Tabernaculi, & Tectum Fœderis, quod erat operimentum de Sagis. Officium *Meraritarum* erat portare tabulas Tabernaculi, & vectes



vestes, & columnas, ac bases earum. Item Columnas Atrij, cum basibus, & paxillis, & funibus suis. Iussit autem Deus, quod prædicti Levites numerarentur à trigésimo anno & suprâ, usque ad quinquagesimum; infra verò *cap. 8.* iussi sunt numerari, à vigésimo quinto anno, & suprâ. Pro quo sciendum, quod à vigésimo quinto anno ponebantur ad discendum ministerium Levitarum; sed in trigésimo, instituebantur Ministri, illi qui per experientiam videbantur apti, & repellebantur inepti. Non instituebantur autem ante annum trigésimum; quia usque tunc non perficitur robur hominis corpore, & mente; expleto vero quinquagesimo anno, statim absolvebantur à Ministerio, quia iam deficit robur ad magna onera, & labores; & ideo non ministrabant, sed efficiebantur custodes vasorum, ne otio torperent, & ut constaret, esse Dei Ministros. Fuerunt autem omnes Levitæ qui inserviebant actualitèr in Ministerio Tabernaculi, à trigésimo anno usque ad quinquagesimum, in quo cessabant ferre onera, 8580. quandoquidem Caathitæ fuerunt 2750. Gersonitæ autem fuerunt 2630. Meraritæ verò fuerunt 3200. & sic omnes Levitæ, qui actualitèr inserviebant in Ministerio Sanctuarij, fuerunt 8580.

## CAP. V. Reflexio 270.



Descripta dispositione Populi ad recedendum hic tolluntur quædam infectiva multitudinis. Ideoque iubetur Israelitis, ut eijcerent de castris omnem leprosum, & omnem fluentem semine, & quemcumque qui pollutus fuisset super mortuum; ista namque Populum inficiebant. Deinde removetur aliud impedimentum, quod est iniustitia. Hæc enim turbat pacem Communitatis; & maximè dum retinetur res aliena. Dicitur ergò, quod si aliquis defraudasset Proximum suum, surripien-



piendo illi aliquam rem; postea verò, pœnitentia ductus, voluisset facere restitutionem, debebat reddere ipsam rem principalem, & insuper quintam partem Proximo suo quem damnificaverat; tum propter damnum, quod habuit ex detentione rei suæ; tum ut homines retraherentur à rebus alienis sibi retinendis. Si verò non inveniretur dominus rei; tunc ipsa res debebat dari Deo, & cedebat in utilitatem Sacerdotum: quandoquidem in restitutione vaga, debent de illa sustentari Dei Ministri, vel pauperes. Debebat præterea defraudans offerre Arietem in Sacrificium; quia non solum peccaverat contra Proximum ipsum defraudando, sed etiam contra Deum, transgrediendo mandatum ipsius, & ideo sicut per restitutionem rei fiebat satisfactio homini; ita per oblationem Arietis fiebat satisfactio ipsi Deo, ratione offensæ.


### Reflexio 271.

**P**ost remotionem impedimentorum, turbantium totam Communitatem, agitur de remotione impedimenti turbantis familiam; hoc autem est suspicio adulterij, in quo præscribitur forma quomodo Vir deberet crimen Vxoris cognoscere: Iudaica namque Gens, erat imperfectissima, ideoque nisi datus fuisset Hebræis modus experienti de Vxoribus suis, occidissent illas. Tenebatur autem Mulier subire hanc purgationem, quæ hic ponitur: adeout, si recusasset coram Iudicibus, habebatur tamquam convicta de scelere; ideò Mulieres subibant hanc purgationem. Advertendum est autem, quod Zelotypia vocatur spiritus, quia secundum communem locutionem Sacræ Scripturæ, omne principium activum, & motivum, vel compulsivum, dicitur Spiritus; Zelotypia verò, est quidam instinctus, & ægritudo animi qua timemus, ne quis possideat id, quod soli optamus possidere, & ideò impellimur, seu concitamur contra aliquem. In tali igitur casu, Vir offerebat decimam partem Sati



Sati farinæ Ordeacæ, non vero Similæ, quæ est farina tritici purgatissima, sicut in alis Sacrificijs. Et ratio erat, quia istud Sacrificium erat vile; ideoque farina de Ordeo, & non de Tritico offerebatur. Non fundebatur super eam oleum; quia oleum signat Divinam misericordiam, quæ in hoc Sacrificio non implorabatur. Non offerebatur Thus; quia Thus significat devotionem; hoc autem Sacrificium non offerebatur ex devotione, sed ex sola suspitione adulterij. Deinde Sacerdos sumebat Aquam sanctam sic vocatam, eo quod diluebatur ibi Nomen Domini *Tetragrammaton* scriptum in Cedula; & accipiebat paululum de terræ pavimento Tabernaculi, ponens in aquam: ad denotandum quod tale Sacrificium fiebat pro vili crimine; terra namque pedibus conculcatur. Tenebat deinde aquas amarissimas, non formalitèr, sed effectivè, quia nimirum causabant effectum amaritudinis, propter imprecationem maledictionum super illas. Mulier autem, antequam tales aquas biberet, dicebat *Amen, Amen*; recipiens per hoc super se prædictam adiurationem. Dicebat vero bis *Amen*, semel pro parte innocentie, & semel pro parte culpæ. Sumptis autem aquis prædictis, si fuisset rea perpetrati adulterij, inflato ventre computrescebat femur illius: si verò innocens fuisset; tunc aquæ prædictæ non ei nocebant, sed proficiebant; nam si fuisset sterilis pro tempore præterito, fiebat divino miraculo fœcunda in futurum.

## CAP. VI. Reflexio 272.



Escrip̃ta ordinatione Populi, quantum ad legem communem; hîc ponitur ordinatio specialis, nempe Nazaræorum. Sciendum est autem, quod votum Nazaræorum in aliquibus erat perpetuum, ut in Sampsonè, & Samuele, & alijs in quibus præcessit figura Religiosorum Novi Testamenti; in aliquibus autem erat ad tempus. Cum ergo quis se consecrabat in Nazaræum, applicabat




cabat se per votum ad statum strictiorem vivendi; quapropter dicebantur *Nazarei*, idest segregati ab alijs. Tenebatur autem primò talis vovens abstinere à vino, & ab omni potu inebriativo; quia debebat vacare Orationi, & Contemplationi Divinæ: hæc autem est actus mentis elevatæ in Deum; vinum verò deprimit intellectum; undè abstinentes à vino sunt acutiores ingenij, quia eorum Phantasia semper est temperata. Prohibebantur etiam Nazaræis Vvæ recentes, ne illis daretur occasio bibendi vinum, capti dulcedine fructus. Secundò, præcipiebatur, ut non abscinderetur aliquid de capillis Nazaræi, & dicebatur *Sanctus*; idest Deo applicitus crescente Cefarie capitis sui. Tertiò, non poterat Nazaræus ingredi ad mortuos etiam si fuisset Pater, Mater, vel fratres. Causa erat, ne per affectionem ad propinquos, mens eius impediretur à Contemplatione Dei, cui specialitèr inserviebat. Quod si mortuus fuisset quispiam subitò in eodem Tabernaculo, dicebatur pollutum Caput eius, quia non proficiebat Consecratio præterita; ideò debebat eadem die radi Caput, quia illa Capillatura, cum iam esset polluta, non proficiebat ad continuandum Votum; adeò quicquid fieret, ipsa manente, non computabatur in observatione Voti, quia ad hanc computationem debebat esse Nazaræus semper incontaminatus. Elapso verò tempore Voti, debebat accedere ad Tabernaculum ut offerret Deo oblationem, quæ consistebat in Sacrificijs, de omni genere, scilicèt pro peccato; & Holocaustum, & hostia pacifica. Deindè radebatur eius Cefaries, quia crescentia Capillorum erat signum durationis Voti; undè isto expleto radebatur, in signum quod licitum erat ei redire ad communem modum vivendi. Capilli verò cremabantur coram Domino; ne illud quod fuerat Deo consecratum, conculcaretur, vel ad humanos usus applicaretur. Causa autem quare Deus posuit in Veteri Testamento hanc observantiam fuit, ut applicaret aliquos homines, sibi specialitèr inservientes in aliqua strictiori observantia ultra generalia præcepta Legis: non posuit tamèn hoc sub præcepto



cepto, sed reliquit tanquam Consilium omnibus sequi vo-  
 entibus. Sic paritèr Lex Evangelica, licet sit Lex perfe-  
 ctionis, & data toti Mundo; tamèn non obligavit omnem  
 hominem ad perfectionem, quia omnes homines non pote-  
 rant esse perfecti, vel non erant dispositi ad perfectionem.  
 Vocatur verò Lex perfectionis, non quod iubeat omnibus  
 omnem perfectionem, sed quia prohibet omnem imperfe-  
 ctionem, hoc est omne peccatum.

## CAP. VII. Reflexio 273.



Descripta ordinatione quantum ad communem  
 populum; hìc agitur de ordinatione, &  
 oblatione Principum. Licet autem erectio  
 Tabernaculi, & consecratio Sacerdotum, &  
 oblatio Principum eodem tempore facta fue-  
 rit; tamèn omnia ista describuntur in diver-  
 sis locis, quia non pertinent ad eandem materiam. Obrule-  
 runt igitur Principes Tribuum Sacrificia, & munera Domi-  
 no; & quia eorum oblationes erant excellentiores, & valdè  
 magnæ, fuerunt etiam eis assignati dies ad offerendum pro  
 singulis. Primò igitur obtulerunt sex Plaustra tecta; vide-  
 licet, sex Quadrigas opertas aliquibus velamentis. Cum  
 enim Sanctuarium esset Domus portatilis, nec posset por-  
 tare humeris hominum propter magnitudinem Tabularum,  
 & Columnarum, necessaria erant Plaustra. Et quia res sa-  
 cræ decentius feruntur de loco ad locum velatæ, quam nudæ,  
 idè duodecim Principes obtulerunt cum Plaustris etiam  
 Velamenta, ut nihil deesset ornatui eorum. Tunc Moyses  
 dedit duo Plaustra, & quatuor Boves Gersonitis, quorum  
 officium erat portare Cortinas Atrij, & omnia operimenta  
 Sanctuarij. Meraritis verò consignavit quatuor Plaustra, &  
 octo Boves; quia istorum necessitas erat duplo maior, & onera  
 illorum plura, & maioris ponderis; debebant enim ferre

X

Tabu-



Tabulas, & Columnas totius Sanctuarij. Caathitis autem non dedit Plaustra quia isti tenebantur proprijs humeris portare Vasa Sacra. Post hanc oblationem factam ab omnibus duodecim Principibus simul, fecerunt singuli in die sibi specialitèr deputato, oblationem particularem. Et primus fuit Nahasson, filius Aminadab Princeps Tribus Iuda, cui Tribui debebatur prælatio inter alias, quia erat tribus Regia; quam dignitatem assecuta fuerat, quando cæteris Tribubus formidantibus introire Mare Rubrum, Tribus Iuda prima fiducialitèr, & generosè ingressa est illud. Obtulit igitur iste Princeps Acetabulum Argenteum; quod erat Instrumentum ubi probabatur Incensum, & Simila, ut videretur an esset apta ad offerendum. Item obtulit Phialam argenteam eratque Bacinus in quo probabantur liquida; deindè Mortariolum, & in hoc terebatur Incensum. Obtulit deindè Bovem de armento, in memoriam ipsius Ioseph, qui vocatur primogenitus Tauri, *Deut. 33*. Obtulit Arietem, in memoriam Isaac, pro quo fuit Aries immolatus. Obtulit Agnum anniculum, in recordationem Agni Paschalis. Obtulit Hircum pro peccato, ad expiandum peccatum venditionis Ioseph, in qua fuit Hædus occisus. Obtulit duos Boves, ad significandum duas Tabulas Testimonij. Obtulit Arietes quinque, & Hircos quinque, ad denotandum decem præcepta Decalogi. Obtulit Agnos anniculos quinque, ad significandum quinque Libros Legis, & eodem modo exponendæ sunt oblationes duodecim Principum subsequentium.

## CAP. VIII. Reflexio 274.



Icto de oblatione Principum; hinc agitur, tum de officio Pontificis in construendo Candelabro, & Lucernas in parte Australi Tabernaculi; tum de Consecratione Levitarum. Sicut enim erant necessarij Sacerdotes, ad Sacrificiorum exhibitionem, & ad reliquas  
San-



Sanctuarij administrationes, quæ intra ipsum erant; ita erant necessarij Levitæ pro exterioribus administrationibus: quapropter iussit Dominus Moyfi, ut illos purificaret aspergendo eos aqua Lustrationis. Levitæ enim ante fuerant in medio populi, ubi videbantur contraxisse aliquas fordes; nunc verò efficiebantur Ministri Dei, ideò purificandi erant. Nam ad serviendum Deo, nullus accedere debet nisi totalitèr mundus. Applicabantur autem coram Tabernaculo, convocata omni multitudine filiorum Israel, qui ponebant manus super illos, ut per hoc significaretur, quod renuntiabant proprietatem ipsorum; tradebantur enim Domino pro primogenitis aliarum Tribuum; ideoque erat quædam oblatio facta Deo à tota multitudine, & dabantur in vigesimo quinto anno, non ad ministrandum; sed ad officia addiscenda per quinque annos. In trigesimo verò instituebantur Ministri, si erant idonei, & apti; repellebantur autem si fuissent insufficientes, & inepti. In quinquagesimo vero completo, cessabant servire in portandis oneribus, & solummodò tenebantur custodire portas Sanctuarij, & Vasa; tùm ne otiosi remanerent; tùm quia, cum haberent de Sanctuario victum sicut alij, iustum erat, ut Sanctuario, modo sibi possibili, inservirent. Hoc autem debet esse singulare motivum Episcopis, cæterisque Ecclesiæ Dei Præpositis, ut non dent bona Ecclesiæ illis, qui in ea nihil laborant.

## CAP. IX. Reflexio 275.



**N** superiori Capitulo dictum est de consecratione Levitarum, & de officio Sacerdotis in componendis Lucernis; hîc describitur Pontificis officium, quantum ad celebrationem Phasæ, quia debebat docere populum de modo, & tempore celebrandi. Accidit autem ut in die Paschatis venirent quidam, qui sepeliebant



mortuum ; & cum essent immundi , non poterant celebrare Phasē , comedendo de Sacrificio Victimæ Paschalis . Sicut enim irregularitas in Novo Testamento causatur aliquando ex bono actu , ut ex occisione Malefactoris per sententiam Iudicis ; ita in Veteri Testamento , ex actu Sepulturæ meritorio , impediēbatur ad tempus celebratio Phasæ . Isti autem durè ferebant , se impediri à prædicta celebratione ex bona operatione ; & dicebant se defraudari iure suo : putabant enim se privari multis bonis , dum non offerrent oblationem Agni Paschalis : tunc Moyses , quia casus videbatur dubius , recursum habuit ad Deum . Qui respondit , quod prædicti Immundi , facerent Phasē in Mense secundo : noluit enim Dominus , quod isti accederent ad celebrandam festivitatem , & voluit quod sua devotio haberet intentum tempore congruo , maximè quia , voluntas Dei erat , ut Iudæi haberent in memoriam liberationem ex durissima servitute Ægyptiaca , cuius Phasē erat rememorativum , ut sic continuè Deum tanquam suum Liberatorem recognoscerent , & grati essent Divinæ clementiæ . Porro in die quo erectum est Tabernaculum , operuit illud Nubes , nam elevata sedit super illud . Et dum Sol occumberet apparebat Columna in figura ignis usque mane . In Aurora verò incipiebat apparere in specie Columnæ albæ . Ipsa autem dirigente , manebant filij Israel , vel proficiscebantur .

## CAP. X. Reflexio 276.



Vperiùs actum est de directione populi ministerio Angeli moventis Nubem ; hìc agitur de ministerio humano , videlicet sonitu Tubarum . Istæ autem fuerunt Argenteæ ; tum quia maiorem pulchritudinem exhibebant ; tum quia Argentum est metallum valdè sonorum . Volebat enim Deus quod filij Israel distincti procederent , & ordinatè ; & ideò iussit ,  
ut



ut distinguerentur per quatuor Vexilla, & sub quolibet eorum essent tres Tribus. In primo autem Tubæ clangore proximiori, movebantur illi qui erant ad Orientalem plagam, & hi erant filij Iuda. Deindè ad secundum, & tertium clangorem sequebantur aliæ Tribus. Ante progressionem verò accedebant ad ostium Tabernaculi, ut ante discessum adorarent Deum Exercituum. Post elevationem autem Nubis, Sacerdotes intrabant Tabernaculum, ut involuerent Sericis Hyacinthinis Sacra Vasa; quibus egressis Gersonitæ, & Meraritæ deponebant Tabernaculum, & Atrium per circuitum; dispositisque oneribus arripiebant iter post exercitum Iudæ, cum duabus Tribubus sibi adiunctis. Post prædictos Levitas sequebantur filij Ruben cum filiis Simeon, & filijs Gab sibi unitis; post quos veniebant Caathitæ, qui portabant Arcam, & Sacra alia Vasa; quæ quidem cum sanctiora essent, meritò ponebantur in medio totius Exercitus, tamquam in locotiori. Licèt autem dicatur hic *in Tex*: quod Arca fœderis præcedebat eos; tamen secundum Doctores intelligitur hoc de quadam alia Arca in qua servabantur primæ Tabulæ fractæ, eo quod fuissent scriptæ digito Dei. Arca verò in qua erant secundæ Tabulæ, & quæ propriè vocabatur Arca, stabat in medio Castrorum ob rationem prædictam. Et nubes, licèt esset extensa super totum Exercitum ad refrigerium æstus, tamen specialitèr, per modum cuiusdam Columnæ, erat super Arcam istam tempore quietis; tempore autem motionis Castrorum, erat super Vexillum Iudæ quod præcedebat omnes, ut prædictum est. Supradictis autem Tubis Argenteis, non solum disponebatur Exercitus, sed etiam erant ad convocandam multitudinem, & ad Festivitates, & ad Epulas, & Sacrificia: nam istis clangebatur super Holocausta, & super hostias pacificas non tamèn super hostias pro peccato: quia clangor est ad exultationem, hostia verò pro peccato regulariter erat ad mærorem.



## CAP. XI. Reflexio 277.



Icto de multitudine progrediente; agitur hîc de Casu impediēte progressum: scilicet de murmuratione orta ex labore itineris tantum trium dierum; in quibus Iudæi, vel nihil laboraverunt, vel parvus labor fuit; & tamen, contra ipsum Deum moventem Nubem, murmuraverunt, ad cuius motum debebant etiam ipsi moveri. Tunc divino Imperio Ignis erupit de terra, & devoravit extremam partem Castrorum. Dicitur autem extremum dupliciter, scilicet Pars inferior, & tunc intelliguntur hîc vulgares de populo. Et Pars superior, & tunc intelliguntur Maiores de populo, qui absorti fuerunt ab igne devorante, quia fuerunt negligentes in reprimenda murmuratione suorum subditorum; unde per hoc mortem meruerunt. Hîc autem quæri potest. Cum Israelitæ murmuraverint etiam contra Dominum, quando defuit illis panis, & aqua, ut patet *Exod. cap. 16. & 17.* quare Deus non dedit illis pœnam hanc cum fuerit ibi idem peccatum, sicut hîc? Dicunt aliqui Doctores, quod Iudæi non viderunt tunc tanta Miracula; nec adhuc receperant tanta Divina beneficia sicut modò; quæ omnia magis culpam augment, ratione ingratitudinis; & quia obligant recipientem ad serviendum magis Deo tam multipliciter benefacienti. Igitur quia hîc fuerunt Hebræi magis ingrati, ideò acriter fuerunt puniti. Alij Doctores dicunt, quod Dominus Deus secundum altissimam suam dispositionem, non punit semper peccatorem statim ac committit peccatum; sed reservat pœnam ad alia tempora, ut cum deindè semel homo peccaverit, omnium præteritorum scelerum simul pœnas luat. Devoratis igitur peccatoribus, ad orationem Moyſis ignis absortus est, ait *textus*; idest, consumptus, quia non fuit ampliùs visus.

Re-



**P**ost murmurationem prædictam secuta est nova Dei offensio; Nam vulgus promiscuum, nempe Ægyptij conversi ad Iudaismum, iunctis sibi pariter filiis Israel, & flentes desideraverunt Carnes, Cocumeres, & Pepones. Per quæ intelliguntur omnia delectabilia Ægypti; spreveruntque Manna, quod tamen habebat in se omnis saporis suavitatem; & sic directè contemnebant Deum: nam qui contemnit munus, contemnit etiam muneris largitorem. Dedit autem Dominus in Manna varietatem saporum in privilegium bonis; quia natura nostra sicut mutabilis est, & composita, ita mutationem desiderat. Hinc *Arist.* ait, quod quia natura Dei simplex est, eadem etiam actio delectabilissima sibi est: nobis autem transmutatio omnium dulcissimum est. Audiens autem Moyses flentem populum, & petentem Carnes, deprecatus est Deum, ut morte sua intercedente, liberaretur de tantis malis, asserens, se esse insufficientem ad regendam tantam populi multitudinem. Timebat enim Sanctus Dux, ne malitia populi esset sibi occasio ruendi in peccatum impatientiæ. Mortem verò non petijt deliberatè; sed ex magna afflictione, non verò quasi recusaret subire omnes labores pro servitio, & gloria Dei sui. Igitur post hanc humilem petitionem, iussit illi Dominus, ut congregaret ad Ostium Tabernaculi septuaginta senes, dicens, quod auferret de Spiritu Moysis, traderetque illis, ut secum sustinerent onus populi, ne solus gravaretur. Per hoc autem non est intelligendum, quod aliquid fuerit ablatum Moyli, & traditum alijs; sed quod prædicti Senes fuerunt illuminati, absq; diminutione gratiæ Moysis. Deus namque dedit illis similem spiritum in specie, ut regerent populum, sicut regebat Moyses: sicut à lumine unius Candelæ illuminantur plures, absque diminutione sui luminis. Ista tamèn similitudo non tenet quantum ad causam effectivam, quasi donum gratiæ existens in Moyse causaret gratiam in alijs; quia hoc spectat ad Deum; sed tantum meritoriè,



## Reflexio 279.

**P**ostquam Populus murmuravit, & indebitè Carnes appetijt, desiderans magis velle esse in Ægypto, quam in deserto, quod erat directè contra beneficium Divinæ, & miraculosæ liberationis, dixit Dominus ad Moysen, se esse daturum populo carnes, non per unum tantum diem, sed per unum integrum Mensem; & ideò diceret omnibus, quod sanctificarentur, hoc est præpararent se ad recipiendum id quod petierant. In Sacra enim Scriptura frequentè accipitur Sanctificatio, pro præparatione. Hoc audito dixit Moyses: *Sexcenta millia peditum sunt, & tu dicis dabo eis esum Carnium mense integro? nunquid Ovium, & Bovum multitudo cederet, ut possit sufficere ad cibum?* Advertendum est autem, quod ista verba ex se ipsis, videntur aliquatitè dura, & significare diffidentiam de impletione Divini promissi: undè Hebræi dicunt, quod Moyses desperavit de impletione Divini promissi, ideoque peccavit, sicut ad Aquas contradictionis. Non fuit tamen punitus hìc sicut ibi: quia ad prædictas aquas peccatum fuit publicum coram tota multitudine, & ideò statim fuit determinata pœna. Hìc autem solum coram Deo fuit peccatum Moysis, non verò coram populo: ideoque non fuit ei data punitio; quia alitèr sunt punienda peccata publica, alitèr verò secreta. Doctores autem Catholici dicunt, quod Moyses hìc minimè dubitavit de impletione verbi Dei; sed quæsit de modo. Sicut Beatissima Virgo Dei Mater, petivit ab Angelo de modo Incarnationis Verbi Æterni, dicens *Quomodo fiet istud?* Interea ventus egrediens à Domino, arreptas trans Mare Coturnices detulit, & dimisit in Castra, itinere quantum uno die confici potest, ex omni parte Castrorum per circuitum; volabantq; in Aere duobus Cubitis in altitudine super terram: erat autem tanta multitudo Coturnicum, quia valdè multus erat populus, nam erant sexcenta millia peditum procedentium ad



ad bellum, & insuper Senes & parvuli, & Mulieres; adeo ut omnes erant plusquam tres Miliones; & Dominus promiserat dare illis saturitatem Carnium mense integro: quapropter probabiliter dicendum est, Deum de novo creasse hanc multitudinem Coturnicum; vel ministerio Angelorum adduxisse Coturnices ex omnibus Mundi partibus. In fine autem Mensis furor Domini cepit ardere contra populum, inferendo videlicet illi poenam, quæ fuit subitanea Pestilentia. Disposuerat enim Deus dare illis Carnes, sicut petierant, sed tamen eos punire, quia nimis peccaverant, tum in cupiendo esse in Ægypto; tum in appetendo inordinatè Carnes; tum in contemnendo Manna.

## C A P. XII. Reflexio 280.



Dicto de murmuratione Populi contra Deum; hic agitur de murmuratione contra Moysen servum suum: Nam locuta est Maria, & Aaron contra illum, propter Æthiopissam. Circa hoc autem variè dicunt Expositores, tam Catholici, quam Hebræi. Nam Iosephus, & plures expositores nostri, in hoc ipsum sequentes, dicunt, quod ista Vxor Moysis fuit filia Regis Æthiopum. Istis enim rebellantibus Ægyptijs, Moyses, qui erat iam adultus, & elegantis formæ missus fuit Dux exercitus ad ipsos domandos; quibus in campo debellatis, & Rege eorum occiso, obsedit fugientes in Civitate Regia: cuius probitatem admirans filia Regis, misit ad illum Nuncios pro Matrimonio contrahendo; cui petitioni consensit Moyses, illamque accepit sibi in Vxorem. Dicunt igitur prædicti Doctores: quod Maria, & Aaron obiurgaverunt Moysen, eo quod accepisset Mulierem alienigenam. Sed hoc non videtur sufficienter adductum; quia eadem ratione obiurgassent Moysen de Sephora, quæ pariter erat Gentilis. Alij Doctores dicunt, quod ista Vxor fuit Sephora, quæ vocatur



catur hîc Æthiopissa, quia Madianita antiquitus dicebantur Æthiopes. Causa autem obiurgationis fuit, quia Sephora, & Maria rixatæ fuerant ad invicem, sicut accidere sæpissime solet mulieribus in eadem domo manentibus. Maria autem super hoc conquesta fuit cum Aaron; unde ambo detulerunt quærimoniam ad Moysen, & ipse sustinuit partes Vxoris suæ: propter quod Maria, & Aaron indignati proruperunt in verba contra Moysen. Tunc Dominus Deus indignatus de offensa facta servo suo, dixit ad istos tres: *Egredimini vos tantum tres ad Tabernaculum fœderis*. Nolebat enim Dominus fatuitatem Aaron ostendere coram populo, propter scandalum multitudinis vitandum. Et eadem ratione non fuit lepra percussus, sicut Maria; erat enim Summus Pontifex. Hinc est quod hodie in Ecclesia Dei, non imponitur Sacerdotibus poenitentia publica, ne vituperetur semper venerabile eorum ministerium.

### Reflexio 281.

**A**D mandatum igitur Domini, prædicti tres ingressi sunt Tabernaculum fœderis, quibus sic Deus locutus est: *Si quis fuerit inter vos Propheta, in visione apparebo ei; vel per somnium loquar ad illum. At non talis servus meus Moyses: ore enim ad os loquar ei, & palam, & non per anigmata, & figuras Dominum videt*. Pro intelligentia autem Textus sciendum est: quod cognitio prophetica fit tribus modis. Primo per abstractionem à sensibus exterioribus, ut in somno, vel extasi. Alio modo sine tali abstractione, & hoc dupliciter contingit: Vno modo, quando in imaginatione fiunt aliquæ formæ virtute Divina, quibus intellectus à Deo illustratus, inspicit veritatem supernaturalem. Alio modo, quando sine tali visione imaginaria cognovit eandem intelligibilem veritatem supernaturalem. Secundus gradus est altior primo, & tertius est altior secundo, cuius ratio est: quia per occupationem sensuum exteriorum distrahi-




strahitur intellectus in actibus suis, ut minus capere possit cognitionem supernaturalem: & ideo quando existente tali occupatione apprehenditur supernaturalis veritas, est altior gradus: sicut in cognitione naturali, ille iudicatur melioris ingenij, qui curis distractus apprehendit veritatem intelligibilem, quam ille, qui non potest apprehendere, nisi sit ab omni distractione purgatus. Similiter tertius gradus est altior secundo. Sicut in cognitione naturali, ille est melioris ingenij, qui veritatem intelligibilem capit absque manuductione per exempla sensibilia, quam ille, qui indiget talibus. His suppositis, dum dicitur in textu: *In visione apparebo ei, vel per somnia loquar ad illum.* Per locutionem in somno, intelligitur primus gradus prophetiæ; per visionem autem intelligitur secundus gradus: quasi diceret Deus: Aaron, & Maria, non attingitis vos, nisi ad inferiores gradus prophetiæ: Moyses autem attingit gradum superiorem, ore enim, ad os loquor ei palam: & per hoc quod dicitur, *palam*, intelligitur tertius gradus prophetiæ; in quo non requiritur aliqua visio imaginaria: per hoc vero quod dicitur: *Ore enim ad os loquor ei*: intelligitur quædam specialitas, & dignitas in isto tertio gradu prophetiæ; quia quanto frequentius, & familiariter Deus revelat alicui supernaturalem veritatem, tanto ille gradus est dignior, & iste erat in Moyse, cui Deus loquebatur magis clarè, quam alijs Prophetis. Attamen secundum Doctores Catholicos, & Hebræos, non vidit Moyses Divinam essentiam: nam dictum fuit ei *Exod. 33. Non videbit me homo, & vivet.* Sanctus autem Augustinus dicit: quod concessum fuit Moyse in præsentī vita videre Dei essentiam; quod probat ex hoc, quod dicitur hic: *Palam, & non per ænigmata Deum videt.* Omnis autem cognitio Dei, citra visionem Divinæ essentiæ, ænigmatica est, dicente Apostolo *pr. ad Corinth. cap. 13. Videmus nunc per speculum, & in ænigmate: tunc autem facie ad faciem.* Vbi autem fuerit, & quando illi concessa, non determinatur. Doctores autem communiter explicant litteram dicentes: quod Moyses, non videbat



bat Deum per ænigmata, idest per quasdam obscuras imagines; sed per quandam effigiem, quæ specialissimè representabat Deum, quæ quidem nulli alteri apparebat, licet esset Propheta.

### CAP. XIII. Reflexio 282.




Osito impedimento itineris propter verba murmurantium; hinc ponitur nova retardatio propter verba exploratorum. Sciendum est autem, quod Populus Iudaicus, ferè semper Divinæ promissioni incredulus, incitabat continuè Moysem ad mittendum exploratores, qui considerarent terram ante illorum ingressum; quam quidem instantiam non approbabat Moyse, eo quod Dominus Deus dixerat illi, quod esset eorum Ductor: nihilominus, propter importunitatem populi consuluit super hoc Dominum. Qui respondit ei, ut mitteret Viros, qui considerarent terram Chanaam de singulis Tribubus; ita quod fuit permissio ad malum populi, malè petentis, & increduli ad Divinas promissiones. Fecit ergo Moyse id quod Dominus imperaverat, mittens principes viros de deserto Pharam ad terram promissionis; qui redeuntes post quadraginta dies, dixerunt ad populum: *Venimus in terram, quæ re vera fluit lacte, & melle, ut ex his fructibus cognosci potest; sed terra devorat habitatores suos.* Inceperunt autem narrationem à commendatione terræ, ut sic populus magis illis crederet in detrahendo de illa. Communiter enim detractor incipit à commendatione personæ, cui postea vult detrachere, ut inclinet corda audientium ad iudicandum, quod non moveatur odio, se amore puræ veritatis: sic isti perversi, confessata fertilitate terræ, statim dixerunt habere fortissimos cultores; & Amalech habitare in meridie, ut sic magis terrerent populum,



pulum, cui Amalech molestus fuerat alio tempore, ut patet *Exod. 17*. Deinde dixerunt terram devorare suos habitatores; per hoc inferentes, illam esse pestiferam ratione aeris, & habere monstra, idest homines ultra quantitatem naturalem alios mirabiliter excedentes; quapropter ex ista perversa relatione fuit Populus valde perterritus.

## CAP. XIV. Reflexio 283.



**P**osita transgressione Exploratorum; hic agitur de totius populi murmuratione: desperavit enim de consecutione terræ sibi à Deo promissæ, & optavit magis esse in Ægypto, quam in Deserto; cum tamen melius fuisset illis mori in solitudine: quandoquidem hic erant liberi, in Ægypto autem magna premebantur servitute: quilibet autem generosus animus super omne humanum bonum desiderat libertatem: sed isti erant pusillanimes, & nunquam in virilem animositatem eruperant. Et ista fuit una de causis, quare Deus voluit, ut tota illa gens periret in Deserto: nam omnes in servitute Ægyptiaca fuerant nutriti. Servi autem, quia sub iugo dominorum sunt, semper timent, & nunquam magna audent, quia propter imperium dominorum franguntur in illis animositates. Igitur Hebræi eligentes reverti in Ægyptum, dixerunt: *Constituamus nobis Ducem, & revertamur in Ægyptum*: Cumque clamaret omnis multitudo, & vellet lapidibus opprimere Moysen, & Aaron, apparuit Gloria Domini super tectum Fœderis: hæc autem fuit columna Nubis, quæ licet staret super tectum Fœderis, tamen apparuit plus solito fulgens; & in ea fuerunt monstrata aliqua signa terribilia, ad reprimendam temeritatem tumultuantis populi. Deinde Dominus dixit: *In solitudine hac iacebunt Cadavera vestra, omnes qui numerati estis à viginti annis, & supra*: Ex quo patet, quod illi qui erant  
minoris



minoris ætatis, non fuerunt condemnati per hanc sententiam. Similiter nec Levitæ, quia isti non erant computati à viginti annis, sed ab uno mense. Licet autem filij blasphematorum non fuerint mortui in deserto, tamen per quadraginta annos retardati sunt ab ingressu terræ promissionis; quæ quidem poena, licet fuerit pro peccato parentum, tamen resultavit in bonum ipsorum parvulorum: nam per varios labores facti sunt fortiores ad bella exercenda, & promptiores, ad sustinendum adversa in toto decursu vitæ suæ: est enim inexco- gitabilis effectus Divinæ pietatis, nam licet interdum Deus puniat peccantes, tamen in ipsa punitione, non deficit eius misericordia, ut hîc manifeste patet; dum poena quadra- ginta annorum, proficiebat pro acquirenda bellica virtute, & fortitudine in adversitatibus futuris tolerandis.


### Reflexio 284.

**S**Ecuta Domini sententia, locutus est Moyses universa verba Domini ad populum, manifestando illi Divinam sententiam, de morte omnium murmuratorum in deser- to: licet enim iam data fuisset, tamen Moyses, & Aaron soli eam audierant; statimque exploratores, qui fuerunt causa peccati multitudinis, mortui sunt in conspectu Domini ad ostium Tabernaculi coram toto populo, per pestem im- missam in eos. Et dicunt Doctores, quod linguæ eorum horribiliter inflatæ fluebant veneno. Licet autem Dominus, post murmurationem prædictam prohibuisset Israelitis per- gere ad terram promissionis, tamen isti ascenderunt in ma- ne verticem montis, dicentes, se esse paratos transire ad prædictam terram: hoc enim faciebant ne viderentur repu- gnare mandato Dei, sicut prius repugnauerant. Sed cum iam Dominus interdixisset illis transitum, iubens, quod re- verterentur versus mare rubrum, transgrediebantur de novo Divinum præceptum. Transibat enim populus iste irratio- nabilis, ab extremo in extremum: prius enim in terram Cha-



Chanaam ad mandatum Dei ire noluerat; nunc autem contra expressam inhibitionem ad illam pergere volebat: quod cernens Moyſes, dixit illis, ut non ascenderent, quia non erat cum eis Deus, per specialem videlicet protectionem; & per consequens, non poterant debellare Chananeos. At illi obtenebrati, non recipientes sanum consilium, nihilque curantes de verbis Sancti Ducis, ascenderunt verticem montis; sed percussi fuerunt ab adversarijs. Ista autem cœcitas, seu obtenebratio, provenit ex peccato antecedenti; merentur enim homines incidere, propter perpetrata scelera, in aliquam inconsiderationem, vel ignorantiam, per quam deinde multa damna, & varias calamitates incurrunt: undè plerumque sapientissimi etiam Viri, erraverunt in aliquo, in quo etiam imprudentissimus non errasset; quia nihil bene agere possumus, nisi Deus per suam gratiam nos specialitèr illuminet, & dirigat in agendis.

## CAP. XV. Reflexio 285.



Onitur in hoc Capitulo quoddam incidens de colligente ligna in Sabbato. Inven-  
runt enim filij Israel hominem colligen-  
tem ligna in Sabbato, & recluserunt eum  
in carcerem, nescientes quid super eo  
facere deberent. Licet enim scirent,  
ipsum debere interfici; tamen nesciebant  
quam mortem subire deberet, quia modus mortis non fue-  
rat determinatus *Exod.* 31. & ideo ipsum recluserunt quo-  
usque per revelationem Divinam hoc scirent. Tunc Domi-  
nus iussit, ut talis lapidaretur extra castra à tota multitudine;  
quod statim fuit executioni mandatum. Deinde præ-  
cepit Dominus Israelitis ut facerent sibi Fimbrias, ponentes  
in eis Virtas Hyacinthinas. Sicut enim ille populus erat spe-  
cialiter electus à Deo, eoquod ex eo nasciturus erat, secun-  
dum



dum carnem, Christus Dominus: ita voluit Deus, illos distinguere in habitu ab alijs gentibus. Porro istæ Fimbriæ erant quatuor partes vestimenti, divisæ in anteriori, & posteriori parte; unde necesse erat quod in duabus divisionibus, vel aperitionibus, essent quatuor fimbriæ. In extremitatibus autem fimbriarum erant Vittæ, idest parvi fusciculi, ex multis nodis complexi, & coloris Hyacinthini: in signum, quod deberent habere conversationem Cœlestem, respectu aliarum Gentium: nam color Hyacinthinus est similis colori Cœli quando serenum est. Item ponebatur de hoc colore super eos, ut memorarentur mandatorum Dei: quapropter in confirmatione Legis talis color apparuit; & in vestimentis Sacerdotalibus multum erat de tali colore. Similiter cortinæ Tabernaculi, & Tentoria habebant magis de Hyacintho, quam de alijs filis; & omnia velamina Vasorum Sanctuarij, præter velamen Altaris Holocaustorum, erant Hyacinthina: unde visio talis coloris debebat inducere Israelitas ad observantiam mandatorum Dei, ut sic faciendo certam haberent spem Regni Cœlestis.

## CAP. XVI. Reflexio 286.



**H**ic ponitur aliud impedimentum itineris, insurgens ex ambitione Core tumultuantis pro usurpando Sacerdotio. Sciendum est autem quod Caath, filius Levi, habuit quatuor filios: nempe *Amram* primogenitum; *Isaar* secundò genitum; *Hebron* tertium filium; & *Oziel* quartum. Cum autem Moyses, & Aaron promoti essent in populo, dum unus erat Dux, alter verò Summus Sacerdos, videbatur ipsi Core, quod post eos deberet ipse habere prælationem in populo, eo quod esset filius secundi filij Caath: & ideò quando vidit quod *Elisaphã*, qui erat filius *Oziel* quarti filij Caath, fuit factus Princeps sub *Eleazaro* filio Aaron, ut habetur supra *Cap. 3.* cepit ardere invidia; concepitque



cepitque indignationem, eo quod filius iunioris filij Caath factus fuerat eius superior, & aliorum Caathitarum; & ideò movit seditionem, ut Moyses perderet Ducatum, & Aaron Sacerdotium. Et ut ad hoc posset pertingere, habuit consilium cum Dathan, & Abiron, qui erant magni Principes de Tribu Ruben primogeniti Iacob, ut ipse haberet Sacerdotium, & illi Ducatum: undè per totam noctem, & partem diei, Core & sibi adhærentes discurrerunt per Castra, persuadentes populo, quod non erat communis utilitas Aaron esse Summum Sacerdotem, & Moysen Ducem. Deindè donis, & promissis coacervaverunt sibi multitudinem, quæ semper desiderat novitatem; odit enim præsentia, commendat præterita, & expectat futura. Commota igitur plebe, Core, & sui sequaces surrexerunt contrà Moysen, & Aaron, imponentes illis, quod sibi arrogassent præposituras in Populo. Tunc Moyses videns talem seditionem, pronus in faciem se humilians coram Deo, imploravit Divinam protectionem: deinde dixit, quod Core, & sui adhærentes acciperent Thurribula, in quibus ponerent Thymiana coram Domino, ut sic appareret per signum à Deo immissum, cui spectaret officium Sacerdotale. Contendebatur namque hìc de Sacerdotio; ideo fuit conveniens dari experimentum in aliqua operatione Sacerdotali.

### Reflexio 287.

**P**ost prædictam electionem, misit Moyses, & vocavit Dathan, & Abiron, qui noluerunt venire. Et iste fuit primus actus directus ad sibi vindicandum Principatum, dum recusarunt superiorem recognoscere. Tunc Moyses iussit Core, ut in crastinum accederet unà cum suis, habentibus Thurribula ad offerendum Domino Thymiana simul cum Aaron: qui cum venissent ad ostium Tabernaculi dixit Dominus Moyli, & Aaron, quod separarentur de medio illius congregationis; & quod præciperent universo populo, ut procul itaret à Tabernaculis Core, & Dathan, &

Y

Abi-



Abiron; quare Moyses statim abiit ad Dathan, & Abiron, qui stabant in introitu Papilionum suorum cum Vxoribus, & liberis, pertinaciter parati ad resistendum Moyfi; & ut demonstrarent, se nihil timere de verbis Sancti Ducis. Et ecce terra dirupta est sub pedibus eorum, & devoravit illos cum Tabernaculis suis, descenderuntque in infernum: prius tamen mortui sunt morte corporali, antequam pervenirent ad pœnas æternas; quia omnibus hominibus statutum est semel mori, ad solvendum debitum Naturæ lapsæ. Deinde Divina Iustitia suam exercuit vindictam contra ducentos quinquaginta viros, qui ausi fuerant offerre incensum, ad usurpandum sibi Sacerdotium. Ignis enim egressus de Thurribulis, vel de Altari Holocaustorum, illos interfecit. Tunc Dominus Deus præcepit Eleazaro, ut produceret in laminas dicta Thurribula, & affigeret in Altari, ad reprimendam in posterum temerariam Sacerdotij usurpationem. Post hæc murmuravit universa multitudo altera die contra Moysen, & Aaron dicentes, ipsos interfecisse populum Dei; cumque oriretur seditio, tulerunt Moyses, & Aaron ad Tabernaculum foederis: quibus ingressis, Nubes quæ semper stabat in altum super Tabernaculum, descendit, ambiens circumquaque ipsum, ut nullus posset accedere. Et volens Dominus delere iniquam multitudinem, Moyses, & Aaron proni rogaverunt Deum pro populo. Dantes per hoc exemplum Prælati, quod non debent subtrahere spiritualia beneficia subditis propter iniuriam ab illis sibi illatam. Quia vero iam plaga erat sæviens in populo (nam ignis, vel è Cœlo descendens, vel de terra erumpens, occidebat rebelles) tulit Aaron Thurribulum cum incenso, pergens in medio multitudinis, quam vastabat incendium, obtulitque Thymiamam; & stans inter mortuos, & viventes deprecatus est pro populo Dominum, ad cuius orationem plaga à Deo immissa cessavit. Fuerunt autem qui percussi sunt in incendio prædicto quatuordecim millia, & septingenti hominum absque illis, qui perierant in seditione Core.

CAP.



## CAP. XVII. Reflexio 288.



**D**ico de seditione Core pro vindicando sibi Sacerdotio; hic ponitur determinatio eiusdem dignitatis per floritionem Virgæ. Voluit enim Deus declarare per hoc ad quem vellet pertinere tale officium; ut sic cessaret ambitio, cupiditas, & avaritia desiderantium talem dignitatem. Pontificale namque officium magna res erat, & redditus abundantissimi; ideo quilibet optabat talem dignitatem: maximè quia Israelitæ erant imperfecti, sola lucra temporalia quærentes. In Novo autem Testamento, non ad redditus Episcopalis dignitatis attenditur à Prælati; sed tantum ad lucra animarum, ad aquas regendas posuit illos Spiritus Sanctus. Igitur de mandato Dei omnes Principes Tribuum dederunt virgas inscriptas nomine suo: quæ omnes fuerunt repositæ per Moysen in Tabernaculo coram Domino, ut dignaretur ostendere sensibili signo voluntatem suam. Sequenti ergo die ingressus Moyses Tabernaculum, invenit virgam Aaron germinasse; turgentibus enim gemmis flores eruperant, qui dilatatis folijs, in Amygdalas deformati sunt. Primo enim natæ fuerunt quædam gemmæ, & de gemmis facti sunt flores; & ultimò gemmæ deformatæ sunt in Amygdalas. Totum enim, quod in gemmis continebatur, conversum est in Amygdalas: proprie namque deformari est, unius rei materia effici materiam alterius; in qua mutatione prima res deformatur, quia perdit formam substantialem, vel saltem accidentalem, utpotè figuram quam prius habebat. Dicunt autem Doctores, quod ideo virga illa protulit Amygdalas; quia sicut Amygdalus inter arbores emittit primò flores, & fructus; ita per hoc signum ius primogenituræ, nempe Sacerdotium, demonstrabatur provenire ad Aaron. Man-

Y 2

sit



sit vero ista virga florens miraculosè, & reposita fuit in Arca; & sic erant ibi tria, in testimonium rerum gestarum, videlicèt, *Tabula* in testimonium Legis datæ. *Manna* cum *Vrna* in recordationem, quod Dominus aluisset Israelitas tali cibo in deserto. Et *Virga Aaron*, in testimonium, quod Deus elegisset Tribum Leviticam ad officium Sacerdotale.

## CAP. XVIII. Reflexio 289.



**D**eterminato Sacerdotio, ponitur hìc oneris impositio; & dicitur quod Sacerdotes portarent iniquitatem Sanctuarij. Pro intelligentia autem Textus sciendum, quod non erat aliqua iniquitas Sanctuarij, nisi illa quæ irreverenter fiebant in ipso Sanctuario: puta dum ab aliquo seculari tangebatur; vel dum officia Divina usurpabantur ab illis, qui non erant destinati ad Sacra facienda, & hanc iniquitatem portabant Sacerdotes, & Levitæ: nam Vulgares puniebantur de transgressione, & audacia; Sacerdotes autem, & Levitæ de ommissione, & negligentia. Assignavit deinde Deus Sacerdotibus pro illorum officio, & laboribus omnia quæ sanctificabantur; idest, promittebantur Domino per votum. Secundò, omnes primitias, quæ vocantur nomine *medullæ*; quia debebant dari de melioribus: medulla namque est optimum ipsius rei. Tertiò, quicquid primum erumpebat de vulva, sive de hominibus, sive de pecoribus. Pro primogenito tamen hominis dabatur pretium, quia homo non est animal immolatorium, & cedebat in ius omnium Sacerdotum. Levitis verò assignavit Deus decimas omnes, & ideo noluit quod in terra promissionis haberent hæreditatem; si enim fuisset illis assignata hæreditas, nimis gravatæ remansissent aliæ Tribus: etenim Sacerdotes, & Levitæ recipiebant quasi duplum unius sortis; nam Levitæ recipiebant decimas fructuum terræ, & pecorum, & sic percipiebant plus, quam



quam unam sortem: nam tota terra Chanaam erat divisa in duodecim sortes. Sacerdotes autem recipiebant multa alia iura, quæ supra enarrata sunt; adeout redditus omnium Levitarum erant plures quolibet anno quam fructus duorum sortium: quapropter si Dominus dedisset illis terram sicut cæteris, fuisset populus nimis depauperatus. Quia vero Levitæ habebant pecora, & iumenta, quæ illis proveniebant de decimis, indigebant locis pascualibus, ideò Dominus Deus dedit cuilibet Vrbi Levitarum spatium duorum millium cubitorum in circuitu, ad ibi pascenda pecora; non tamen faciebant in his locis agros, & vineas, ut sic magis vacarent officio suo, cum essent liberi à curis secularibus, & occupationibus terrenis. Summus vero Sacerdos habebat iura duplicia. Quædam enim erant ei communia cum alijs Sacerdotibus; nempe omnia quæ supra posita sunt; alia vero erant ei propria, nempe decimæ quas recipiebat à Levitis. De decimis namque receptis à populo, dabant isti decimam Summo Pontifici, antequam de illis quicquam assumerent in proprios usus. Per hanc autem decimam recipiebat Summus Sacerdos centesimam partem omnium fructuum totius populi Israelitici; ideoque erat ditissimus, eiusque familia nimis magna; adeout excepto Rege, non erat in toto Regno aliquis ita potens, sicut Summus Pontifex.

## CAP. XIX. Reflexio 290.



**I**dem est suprà quomodo se haberet Sacerdos ad Deum ei ministrando, & ab eo iura recipiendo; hinc agitur quomodo se debeat habere ad populum purificandum: est enim mediator Dei ad populum, & hoc propriè respicit purificationem, quæ à Deo derivatur ad populum, per officium ipsius Sacerdotis. Sciendum est autem, quod in veteri Lege erant duæ

Y 3

purifi-



purificationes. Vna erat ab immunditia spiritali, quæ con-  
tingebat ex peccatis, & ista, quia erat gravior purificabatur  
per oblationes, & Sacrificia, accedente tamen fide, & con-  
tritione; non verò per sanguinem solummodo Hircorum, &  
Taurorum. Et sic patet quod Lex Mosaica, per observantiam  
suam non inducebat directè aliquam utilitatem, & per  
inobservantiam inducebat mortem. Alia erat ab immundi-  
tia corporali, per quam efficiebatur homo ineptus ad ingre-  
diendum locum Divini cultus, & tales immundi purifica-  
bantur per asperisionem aquæ lustralis, in qua commisceban-  
tur cineres Vaccæ combustæ, quæ hîc vocatur *Religio victi-  
mæ*, quia immolabatur pro purificatione totius populi, ut  
posset accedere ad cultum Dei: qui cultus in Sacra Scriptura  
dicitur Religio, & ideò hæc Victima vocatur specialiter no-  
mine Religionis. Exhibebatur autem à toto populo, quia  
fiebat pro purgatione multitudinis, & immolabatur pro pec-  
cato idolatriæ Vituli fabricati in deserto: ideoque dicitur  
magis Vacca, quam Vitulus. Debebat esse Rufa, vel ut di-  
citur in Hebræo, *Rubea*, quia Idolum prædictum fuit aureum;  
ut sic melius exprimeretur prædictum Idolum. Non debebat  
esse iugo domita; ad significandum, quod filij Israel in ado-  
ratione Vituli, abiecerunt à se iugum Divinæ Legis. Immo-  
labatur ab Eleazaro, non verò ab Aaron; quia Eleazar non  
peccavit in conflatione Vituli: Aaron verò aliquo modo  
peccavit, dum timore populi tumultuantis, fabricavit Ido-  
lum. Immolabatur extrà castra: ad denotandum, quod ido-  
latria debebat prorsus elongari à toto populo. Deinde Sa-  
cerdos tincto digito in sanguine victimæ convertebat se ver-  
sus illam partem, ubi erat Tabernaculum, aspergens ver-  
sus illam plagam septem vicibus: ad denotandum quod  
idolatria equipollet omnibus alijs peccatis, eoquod impor-  
tat totalem recessum à Deo. Univerſitas enim designatur  
septennario numero. Deinde combustis carnibus, poneba-  
tur Lignum Cedrinum, & Hyssopum, & Coccum bis tinctum,  
talis enim color servat diu colorem; ad denotandum quod  
cineres



cineres debebant servari per totum annum ad purificationem populi, qui aspergebatur hyssopo, quod est herba odorifera: ad denotandum, quod per talem asperisionem amovebatur immunditia contracta. Lignum verò cedrinum ponebatur, ad reprimendum foetorem exhalantem ex combustionem pellis, & fimi Victimæ immolatæ.

### Reflexio 291.

**T**Erminata immolatione prædicta, tam ille qui portabat cineres, quam ille qui aspergebat aquas, immundi erant usque ad vesperam; adeo ut Sacerdos aspergens non poterat in tota illa die ministrare in Sanctuario, vel comedere de sanctificatis. Pro quo sciendum, quod immunditia dupliciter contrahebatur in veteri lege. Vno modo ex immunditia rei tactæ, & sic tangens mortuum efficiebatur immundus, quia ex cadavere mortui exeunt humores corrupti, & foetidi; ideoque tangentes fiebant inepti ad accedendum ad Sacra. Alio modo ex indignitate tangentis rem sacram: sicuti modo in Ecclesia, si Laicus tangeret Calicem consecratum, peccaret. Sic pariter redigens Vaccam in cineres, ut erat Sacerdos, & ille qui colligebat ipsos cineres, efficiebantur immundi, quia isti cineres erant multum sacri, cum ordinarentur ad purificationem totius populi: quapropter reputabantur indigni ad tangendas res tam sacras, & per consequens contraxisse aliquam maculam, qua posita, indigerent purgatione, quæ quidem purgatio, non fiebat per asperisionem Aquæ lustrationis, sed per ablutionem corporis, & vestium. Nam Sacerdos si aspergeret prædicta aqua seipsum, contraheret maculam, sicut contrahebat aspergens alium; cum in utroque casu tangeret rem sacram, quam tangere, indignus propriè reputabatur. Si verò aspergeretur ab alio Sacerdote, eadem ratione iste aspergens indigeret aspergi per alium, & sic in infinitum; ideo talis purgatio, non per asperisionem aquæ lustrationis, sed per solam ablutionem corporis, & vestium fiebat.

Y 4

CAP.



## CAP. XX. Reflexio 292.



Gitur in hoc Capitulo de alio impedimento, retardante ingressum in terram promissionis, proveniente ex nova murmuratione populi. Venerunt enim filij Israel in desertum Sin, & manserunt in Cades; mortuaque est ibi Maria, & in eodem loco sepulta: cumque populus indigeret aqua, versus est in seditionem contra Moysen, & Aaron: qui ingressi Tabernaculum foederis, roga-  
verunt Deum, ut dignaretur dare populo aquas. Tunc Dominus dixit illis, ut congregarent populum, & in praesentia totius multitudinis loquerentur ad Petram, quæ deinde daret aquas. Congregato igitur populo, elevavit Moyses manum, & percussit virgà bis silicem, egressæque sunt aquæ largissimæ. Dicunt autem DD. quod aquæ primo ictu non exierunt, propter dubitationem Moysis; in secundo verò exierunt, propter impletionem Divini promissi. Percussa igitur Petra, & aquis egressis de illa, dixit Dominus ad Moysen, & Aaron: *Quia non credidistis mihi, ut sanctificaretis me coram filiis Israel, non introducetis hos populos in terram quam dabo eis.* Sciendum est autem quod Moyses, & Aaron peccaverunt in hoc, quod non fecerunt sicut præceperat illis Deus; nam dixerat: *Loquimini ad petram, & illa dabit aquas.* Moyses autem, & Aaron voluerunt facere, sicut in Raphidin, ubi virgà percusserunt petram, & statim egressæ sunt aquæ. Sed hic non percutiendo, sed loquendo debebat fieri miraculum; & ista locutio erat, ut manifestaretur populo gloria Dei, dum prolato Nomine illius, statim petra dividebatur, & abundantissimè dabat aquas; quod erat novum signum Divinæ potentiae. Vnde populus hoc videns, glorificasset Dominum. Stante igitur prædicta transgressione, fuit eis assignata pœna: nimirum, quod  
non



non introducerent populum in terram Chanaan; quod quidem erat ipsis valdè amarum, cum tam diù laborassent, & in fine carerent intento, tam vehementer expectato.


### Reflexio 293.

**M**Overunt interea Israelitæ castra de Cades, & venerunt in Montem Hor, ubi Dominus locutus est ad Moysen dicens: *Pergat Aaron ad populos suos*. Iste autem modus loquendi magis accipitur in viris bonis, qui dicuntur pergere ad populos suos, nempè ad populos Sanctorum, quibus sociandi sunt. Et dicitur *ad populos*, quia qui moritur vadit ad multitudinem maiorem illà, quam relinquit in Mundo. Igitur ad Domini Præceptum, ascendit Moyses cum Aaron, & Eleazaro in Montem Hor, vidente omni multitudine. Et credendum est, quod nunciatum fuerit toti populo, quod ascendebat Summus Pontifex in montem ad moriendum; qui licèt sciret se ibi moriturum, tamen promptissimè, & constanter pergebat, ut Deo suo humiliter obediret. Dicunt autem Doctores, quod cum supradicti tres in montis verticem pervenissent, viderunt ibi speluncam à Deo paratam, & in ea Lectum stratum, & Lampadem antè ipsum ardentem, & sic cognoverunt quod locus ille, erat pro Sepultura Aaron. Quapropter Moyses spoliavit ipsum Aaron Pontificalibus vestibus, induitque Eleazarum filium eius, ut pater ante mortem aspiceret filium sibi in Pontificali honore succedentem, & ad demonstrandum, quod Eleazar, non appetebat Summum Sacerdotium se ingerens, sed solo iussu Dei; ideo non per seipsum, sed per Moysen, tamquam Dei ministrum, fuit pontificalibus vestibus indutus. Tunc Aaron statim posuit se in lecto illo, extendens manus, & pedes, & claudens os, & oculos; nulloque præveniente languore, animam in pace emisit. Videns autem Moyses tranquillam mortem fratris sui, desideravit sibi similem, & obtinuit à Domino, ut patet infra. Populus verò audita



audita morte Summi Pontificis amarè flevit triginta diebus ;  
tùm quia ipsum valde diligebat , tùm propter singulares vir-  
tutes, quæ in ipso erant ; tùm propter reverentiam, quæ de-  
beretur Pontificali dignitati. Ex hoc autem quod populus  
per triginta dies celebravit exequias Aaron , cepit Ecclesia  
Dei consuetudinem celebrandi memoriam defunctorum die  
trigesima sepulturæ.

## CAP. XXI. Reflexio 294.



Osito impedimento itineris versus terram pro-  
missam , proveniente ex aquis contradictio-  
nis; hîc ponitur impedimentum ex parte ho-  
stis Chananæi persequentis populum Dei :  
quandoquidem Rex Arad , audiens appro-  
ximasse populum Israel, parato exercitu suo  
pugnavit contra illum , & victor existens , duxit ex eo præ-  
dam . Tunc Israel voto facto promisit , si Deus concederet ei  
victoriam , quod deleteret Vrbes Regis Arad . Hoc autem  
votum consistebat in hoc , quod populus non acciperet ali-  
quid de bello pro se, sed omnia Deo traderet, tamquam non  
pro seipsis, sed pro sola gloria Dei pugnaretur . Sciendum  
est autem , quod non erat aliquis modus applicationis rerum  
istarum , nisi per destructionem Civitatum , nè cederent  
amplius ad usum hominum, qui in illis exercebant idolatrias,  
quod totum videbatur tendere ad honorem Divinum , ma-  
ximè quia hoc Deus iubebat: ideoque votum erat acceptum  
ipsi Deo . Igitur , emisso voto , tradidit Dominus Chana-  
næum in manus Israel . Post acceptam autem victoriam , po-  
pulus semper rebellis , non egit gratias Deo , sed laboris , &  
itineris impatiens, locutus est contrà Dominum , & Moysen  
dicens : *Cur eduxisti nos de Egypto, ut moremur in solitudine ?*  
Quamobrem misit Dominus Deus in populum , ignitos ser-  
pentes . Et dicunt aliqui Doctores , quod sic vocantur , eo-  
quod



quod per aerem volantes emittebant scintillas ardentes. Alij dicunt sic vocari, quia per morsus eorum calefaciebat Caro, ac si igniretur. Et addunt, quod Dominus creavit istos serpentes ad pœnam murmurantium. Alij dicunt quod non fuerunt de novo creati, sed ministerio Angelorum adducti de partibus Libiæ, ubi plures sunt, quam in toto Orbe. Igitur ad mortem plurimorum venerunt Israelitæ ad Moysen, confitentes peccatum suum: qui immemor iniuriæ, & memor clementiæ, oravit pro populo, & Dominus præcepit ei dicens: *Fac Serpentem aneum, & pone eum pro signo: qui percussus aspexerit eum, vivet.* Considerandum est autem, quod in Serpente non erat virtus sanandi, sed aspicientes illum, statim recognoscebant afflictionem sibi à Deo iuste illatam, petentes misericordiam, & tunc Dominus sanabat illos: & quia Iudæi, utpotè imperfecti, movebantur per sensibilia, decuit dari illis aliquod signum materiale, ut recognoscerent se esse sanatos à Deo: & quia à serpentibus percussi fuerant, decensius fuit ponere magis serpentem in signum, quam aliquam aliam rem. Porro iste serpens expressa figura fuit Christi Domini qui passurus erat in Cruce, ut habetur *Io. cap. 3.* per cuius intuitum, & fidem sanamur à morsibus diaboli, serpentis antiqui. Et quod Serpens Æneus fuerit expressa figura Christi Domini, patet: quia sicut talis serpens fuit similis animali venenoso, nihil tamen habuit de veneno: Sic Christus Dominus, habuit quidem carnem similem peccatrici, sed nihil habuit, nec habere potuit de veneno peccati.

## CAP. XXII. Reflexio 295.



Iso de impedimento ingressus terræ promissionis per Regem Arad procurato; hic ponitur de novo obstaculo per Balaam, ad suggestionem Regis Moabitarum posito. Sed quia in *Tex.* Vocatur Balaam *Magus, & Ariolus,* & tamen eius prophetiæ, tamquam veræ habentur in auctoritatem,



tatem, videndum est, an tales fuerint à Deo, vel à Dæmone. Pro quo sciendum, quod Propheta dicitur, quasi *procul fans*, quia denunciat illa, quæ procul sunt ab humana cognitione secundum viam naturæ. Item considerandum, quod quanto aliquis est subtilioris intellectus, tanto eius cognitio se extendit ad altiora, ad quæ non potest attingere cognitio intellectus magis rudis, qui capere non potest nisi sensibilia, & grossa. Et si hoc est verum in diversis intellectibus eiusdem speciei, multo magis verum erit in intellectibus diversarum specierum, cuiusmodi sunt intellectus Angelicus, & humanus: ideoque cum Angelus sit sublimioris naturæ, eius cognitio ad multa se extendit, ad quæ non potest attingere humana cognitio. Naturalia autem in dæmonibus integra remanserunt, & ideo eorum cognitio naturalis ad plura se extendit, quam humana. Bonorum autem Angelorum cognitio adhuc ad plura se extendit, in quantum sunt illuminati lumine gratiæ, & Divinis revelationibus. Patet igitur quod dæmones, permisi à Deo, possunt révelare hominibus aliquas veritates illis incognitas, & tunc tales homines dicuntur prophetae dæmonum. Quando autem revelatio fit hominibus immediatè à Deo, vel mediantibus Angelis sanctis, dicuntur Prophetae Dei. Hæc autem revelatio, aliquando fit hominibus iustis; aliquando iniustis, ut patet *Matth. 7. & 3. Reg. cap. 13.* de Propheta idolorum, qui reduxit Prophetam Domini, & postea facta fuit sibi revelatio Divina de morte illius Prophetae, eo quod non obedierit voci Domini. Hoc autem cedit ad commendationem veritatis revelatæ, ut ipsa habeat testimonium etiam ab adversarijs. His suppositis dicendum est: Quod Balaam fuit Propheta dæmonum, in quantum erat Ariolus, & Magus, quærens revelationes à dæmone. In quantum vero fuerunt ei revelatæ à Domino aliquæ veritates futuræ, fuit Propheta Domini, licet à Deo illas non quæreret; fuitque compulsus pronunciare, quod nolebat, videlicet sanctitatem, & prosperitatem populi Israel. Quod totum factum est principaliter ad gloriam Dei, qui erat ductor



ductor illius populi; deinde ad terrorem adversariorum, & tandem ad salutem Gentium, quæ ex Prophetis ipsius Balaam motæ fuerunt postea ad quærendum Christum natum, ut habetur *Matth. cap. 2.* ideoque propter hæc & similia, eius prophetiæ in Canonica Scriptura receptæ sunt.

## Reflexio 296.

**I**gitur Balac Rex Moabitarum, timens Israelitas, misit Nuntios ad Balaam, suppliciter rogans, ut ad se statim veniret, dicens: *Veni, & maledic populo huic: si quomodo possim percutere, & eijcere eum; novi enim quod benedictus sit cui benedixeris, & maledictus in quem maledicta congesseris.* Dicunt autem multi Doctores, quod Balaam erat magnus Astrologus in iudicialibus, prædicens ex Astris multa futura. Illa verò quæ per Astra cognoscere non poterat, Dæmonum familiaritate scire nitebatur. Cum autem Populi rudes illius sæculi viderent aliquando res evenire sicut iste prædixerat, putabant quod ex maledictione sua, vel benedictione infortunia, vel prosperitates hominibus advenirent. Et maximè hoc credebat prædictus Rex, quia antequam obtineret principatum Moabitarum, prædixerat illi Balaam dominationem, & Regnum. Pervenerunt ergo Seniores Moab missi à Rege ad Balaam, habentes divinationis pretium in manibus suis, ut sic cupidus Ariolus promptius ad Regem suum accederet: quibus visis gratiosè eos accepit, & oblata munera arripiens dixit illis: *Manete hic nocte, & respondebo quicquid dixerit mihi Dominus.* Impius enim magus, licet quæreret responsum à Dæmone, tamen dixit nuntijs, se illis revelaturum illa, quæ Deus sibi respondisset: quia modus magorum maxime cupidorum, qualis erat iste scelestus, est fingere coram hominibus, quod revelationes sibi fiant à Deo vero, ut sic magis illis credatur, & maius lucrum reportent.

Re-



## Reflexio 297.

**D**Vm ergo in nocte Balaam quærit responsum à dæmone, venit Deus ad illum: videlicet Angelus bonus loquens in persona Dei, & ideo aliquando Deus, aliquando Angelus nominatur. Hoc autem fuit, ut arceret dæmonem à dando responso, & ad ponendam legem, & frænum ipsi Balaam, ne faceret aliquod, vel diceret contra populum Israeliticum; & ne iret cum ipsis nuntijs. Quapropter mane confurgens dixit eis: *Ite in terram vestram, quia prohibuit me Dominus venire vobiscum.* Fuit enim coactus protestari virtutem Dei, ut nihil posset agere, vel dicere, nisi quod placeret Domino. Sed dices, quare Deus prohibuit Balaam proferre maledictionem super Israelitas? non enim videbatur necessarium: quia illius verba, & magicæ observationes non habebant aliquam efficaciam bonorum, vel malorum inferendorum; ideoque etiam si Iudæi non fuissent specialitèr benedicti à Deo, tamen nihil potuisset nocere illis maledictio Balaam. Dicendum, quod istud fiebat principaliter ad utilitatem, & conservationem Moabitarum. Deus enim meritis Loth nolebat pro tunc punire Moabitas. Si vero Dominus permisisset Balaam maledicere Israelitis, tunc Moabitæ confidentes superstitiosè in tali maledictione prolata, quam putabant efficacem ad victoriam consequendam, inijsent prælium adversus Israelitas, putantes illos totaliter delere, & sic multi Moabitarum, vel forte omnes in bello cecidissent; prohibuit ergo Deus maledictionem Balaam, licèt secundum se inefficacem ad malum inducendum, ut tolleret occasionem mortis ipsorum Moabitarum.

## Reflexio 298.

**A**Vdita responsione Balaam, recesserunt Nuntij, & pervenientes ad Principem suum dixerunt, quod Balaam non poterat venire. Tunc Rex, moræ impatiens,



ens, misit ad eos alios Nuntios, instans ut veniret, quia volebat eum honorare, & ditare; quibus auditis dixit illis Balaam: *Obsecro ut hic maneatis etiam hac nocte*: Quamvis enim impius Magus fuisset prius prohibitus pergere ad Regem Moabitarum; tamen cupiditate honoris, & avaritia illectus, adhuc quærebat quomodo cum illis pergere posset ut si forte permetteretur Dæmon, dare sibi responsum de contrario. Venit autem Angelus Dei ad Balaam eadem nocte, & ait illi: *Si vocare te venerunt homines isti, surge, & vade cum eis; ita dumtaxat, ut quod tibi præcepero facias*. Adverte autem quod ideò prohibuit Deus Balaam pergere cum Moabitis, ut patet supra in textu, ut intelligeret, quod nolebat ipsum maledicere Israelitis: in ista autem secunda vice permisit Deus illum ire, quia non erat amplius hoc motivum, cum iam suam voluntatem manifestasset. Præterea verbum Angeli de concessione progressus non fuit præceptum, nec concessio simpliciter, sed sola permissio, quæ aliquando fit à Deo de malis, ut eliciantur bona, sicut hic: nam Dominus permisit Balaam ire, satisfaciens cupiditati illius; sed illud iter quod faciebat Magus intentione nocendi, convertit Deus tum ad gloriam suam; tum in commendationem populi sui Israel. Per illa autem verba: *Ita dumtaxat, ut quod tibi præcepero facias*: Non est intelligendum, quod Dominus apposuerit hunc modum, tamquam sine eius appositione non cogeretur Balaam facere quod Deus iubeat: nam contra voluntatem Dei nullo modo poterat Magus venire; sed hoc apposuit Deus ad gloriam Nominis sui, & manifestam declarationem suæ Potestatis; ne Balaam videns se impotentem ad maledicendum putaret se ab aliquo naturali casu, vel ab aliquo Spiritu, à parte adversa invocato, impediri; sed sciret hoc contingere à solo Deo secundum propositum voluntatis suæ; & sic cogeretur dare laudes Deo, confitendo, quod ipse solus impediēbat eum maledicere.

Re-



## Reflexio 299.

**M**Ane igitur facto surrexit Balaam, & strata Asina sua profectus est cum Nuntijs: iratusque est Deus, quia nimirum impius Ariolus ibat perversa intentione maledicendi populo Dei, quæ sola mala erat, non verò itineratio; nam ista redundabat in Dei gloriam, ut dictum est supra. In itinere autem stetit Angelus Dei inter duas macerias, ut ibi collideretur pes Magi itinerantis voluntate perversa. Cernens autem Asina Angelum stantem, avertit se de itinere recto, & ibat per agrum. Sumpserat enim Angelus Corpus aereum, ut sic visibilis esset; quem tamen Balaam non vidit: est enim in potestate Angeli sic apparentis, facere quod videatur ab uno, & non ab alio. Etenim secundum ordinem naturæ, inferiora sunt in potestate superiorum: & ideò materialia cum sint inferiora Angelis, sunt etiam in eorum potestate; ideo potuit Angelus eodem tempore ostendere corpus assumptum uni, & illud alteri abscondere. Sicut autem hoc fit ordine naturæ, ita fiet ordine gloriæ: ut nimirum animæ in corporibus beatificatis, videantur ipsa corpora, à quibus voluerint; alteri vero ibidem esistenti non ostendantur. Hoc autem ex dotibus gloriæ, & non ex natura fit. Post hæc stetit Angelus in angustijs duarum viarum; quem videns asina iunxit se parieti, & attrivit pedem ipsius Balaam, qui iratus cedebat fuste latera eius; aperuitque Dominus os asinæ, & dixit: *Quid fecit tibi? cur percutis me ecce iam tertio?* Non est autem putandum, quod asina intelligeret, vel formaret verba, cum non haberet intellectum, sed fuerunt formata virtute Angeli moventis linguam asinæ ad prolationem ipsorum verborum, ut sic præsumptio Balaam confutaretur etiam per animal brutum. Ad vocem autem iumenti non expavit magus, nec admiratus fuit; quia erat assuetus videre dæmones sibi apparentes, & in specie animalium secum loquentes. Deinde Dominus  
aperuit



aperuit oculos Balaam: licet enim essent iam aperti ad videndum alia, non tamen erant aperti ad visionem Angeli ratione prædicta.

## Reflexio 300.

**T**Andem, permittente Deo, pervenit Balaam in Urbem, ubi Rex Moabitum manebat, in cuius adventu fecit magna convivia. Deinde duxit illum ad excelsa Baal; nempe ad montem ubi tale Idolum colebatur. Fuit enim modus antiquorum Gentilium, Deos suos in excelsis, & nemorosis locis venerari, quia loca illa putabant esse sacratiora unde Romani dicebant, quædam loca esse naturaliter determinata ad cultum Deorum. Hinc Seneca ait;

*Capita fluviorum veneramur*

*Et ubi Fons est, Numinis Ara fuit.*

Hoc patet etiam observatum à Iudæis idolatris; nam colebant idola in excelsis. Et alij Iudæi licet colerent verum Deum, tamen colebant illum in montibus, ut patet in Libris Regum. Sciendum autem, quod Baal fuit idolum multarum Gentium, diversimodè tamen nominatum. Nam Assyrij vocaverunt illud *Belum*; Babylonij autem *Bel*: alij *Baalim*: alij *Astaroth*: alij *Beelphegor*; Iudæi vero vocaverunt *Beelzebu*. Cultus autem Deorum sine imagine, incoatus fuit à Nemrod, qui docuit Chaldæos colere ignem; cuius filius fuit Belus, qui genuit Ninum. Mortuo vero Belo fecit Ninus imaginem ad recordationem sui Patris, quam tenebat in magna reverentia. Servi autem illius, propter adulationem, cœperunt exhibere simulacro illi Divinos honores; quod quidem placens Nino, versa est adulatio in præceptum. Et ex hoc posterij Reges coegerunt subditos ad adorationem maiorum suorum defunctorum. Procedente verò tempore, in tantum hominum ambitio prævaluit, ut etiam viventes honores Divinos appetere. Hinc Nabuchodonosor se Deum nominavit. Et Alexander, solum


Z

ho-



hominem esse fastidiens, iussit se Deum dici. Philotam autem militem suum, filium Parmenionis, quia in hoc illum redarguerat, fecit à tota multitudine lapidare, obiectis quibusdam falsis criminibus. Et Herodes qui Sanctum Iacobum occidit, passus est sibi deferri Divinos honores. At subito scaturientibus vermibus de carne eius, percussus ab Angelo, mortuus est, ut patet *Actibus*: 12. Fuit præterea alius modus introducendi multitudinem Deorum, quam tangit *Ar. 3. Polit.* Homines namque, licet Gentiles à principio per hoc nomen Deus, intelligebant id, quod inter omnia entia optimum, & perfectissimum est. Et cum rudes essent, videntes aliquos viros excellentes, sibi que multum beneficos, volentes de illis prædicare magnam illorum bonitatem, nescientesque gradus distinguere, summum gradum, nempe Deum, pro inferioribus assignabant; quapropter generaliter omnes viri fortissimi, & benefactores, inter Deos computati sunt; ut satis declarat S. *Augustinus* 18. *de Civitate Dei*.

### CAP. XXIII. Reflexio 301.



Disito adventu Balaam; hic ponitur maligna eius dispositio, & conatus, ad maledicendum; & hoc per sacrificia oblata Dæmonibus. Dixit ergo Regi quod in monte ædificaret sibi septem Aras, & pararet totidem Vitulos, & tot Arietes. Hoc autem fecit Magus; tum ut in Venis, & Præcordijs animalium inquireret iudicium de quæsitis; tum in venerationem septem Planetarum. Nam quia tota vita animalium, per motum Planetarum sub Zodiaco conservatur, antiqui Gentiles illos præcipue colebant. Extructis igitur Aris, & præparatis Victimis, dixit Balaam ad Regem, quod staret iuxta Holocaustum, donec iret in occursum Domini. Sciendum est autem, quod licet Balaam assumat hic nomen Domini; tamen intendebat habere revelationem à Dæmone quærebat enim augurium, ut habetur in principio sequentis capituli: augurium autem, non est revelatio à Deo, sed à

Dæ-



Dæmone. Et licet Balaam sciret, Deum benedixisse definitivè populum, tamen corrupta eius voluntas, & perversitas, tantum in eo incaluerat, ut absolutam determinationem Divinam immutare conaretur. Presentia enim Dei, solum eius intellectum speculativum illustrabat, ut necessarium est in omnibus Prophetis; voluntatem autem illius, nullo modo gratia sua gratum faciente, tangebatur: ideoque nullatenus proficiebat, etiam si Deus continue sibi mirabilia loqueretur. Sunt enim ista multum distantia: scilicet intellectus speculativus, & voluntas; ideoque potest unum sine altero perfici. Sciendum est etiam, quod Balaam quærens augurium recedebat à societate hominum: quia apparitiones, quibus apparent dæmones cultoribus suis, fiunt communiter per abstractionem à sensibus, & cum aliqua horribili passione corporis, & hoc accidit permittente Deo, ut Prophetæ dæmonum à Prophetis Domini, etiam per exteriora signa distinguantur, in quibus apparitio Divina suavis, & dulcissima est. Recedebat ergo Ariolus scelestus à consortio hominum, ne per talem passionem sibi contingentem contemneretur. Elongato igitur ab humano consortio, apparuit illi Angelus Dei, impediens responsum dæmonis, & ponens in ore Balaam benedictionem; unde invitus populum benedixit, optans in fine Parabolæ mortem Iustorum. Licet enim mali nolint vivere vita bonorum, appetunt tamen illorum mortem. Hinc nostris temporibus quidam Lutheranus dixit: Optare vivere Lutheranus, sed mori Catholicus.

### Reflexio 302.

**C**ernens autem Rex Moab, quod Balaam non poterat male dicere populo Israel, dixit ei: *Veni mecum in alterum locum, ut partem Israel videas, & totum videre non possis, inde maledicito.* Credebat enim, Balaam videndo totum populum, extimuisse; ideoque non fuisse ausum illi male-

Z 2

male-




maledicere : vel quia sciebat maius meritum esse in toto populo, quam in parte ; unde putabat quod si Balaam fuisset prohibitus maledicere toti populo, non prohiberetur à maledictione partis ; & per consequens eius adversarij debilitarentur . Vel hoc fecit, quia erat aliquo modo Astrologus : qui verò in iudicando sequuntur Astrorum regulam , respiciunt Orizontes locorum : quilibet enim punctus assignatus in terra , mutat Orizontem ; ad cuius mutationem sequitur diversitas Ascendentis , & diversitas Planetarum , & Signorum in Domibus Cœli : istis autem variatis, fit notabilis variatio influentiæ ; & ideo Balac alium locum requirebat. Hoc autem verum est, quantum ad illa , in quibus Corpora Cœlestia habent causalitatem ; sed quia maledicere Israelitis dependebat solummodo à voluntate Divina , nihil proderat loci mutatio . Duxit igitur Balac Magum in locum sublimem, de quo videbat solummodo partem populi . Sed Dominus occurrens Balaam , posuit benedictionem in ore eius ; quapropter rediens ad Regem, dixit ei : *Non est Deus ut filius hominis, ut mutetur* : Per hoc insinuans, quod semper idem vellet. Sed contrarium videtur haberi *Ierem* 18. ubi dicitur : *Si pœnitentiam egerit Gens illa à malo suo, quod locutus sum adversus eam, agam & ego pœnitentiam super malo, quod cogitavi, ut facerem ei* . Dicendum quod Deus est omnino immutabilis ; tamen facit, & dicit mutabilia per immutabilem voluntatem suam . Ad cuius intellectum considerandum, quod aliqua Dei verba sunt significativa futurorum, secundum quod sunt in Dei præsentia , & illa immutabiliter eveniunt ; quia præscentia Dei est immutabilis . Alio modo sunt significativa futurorum, prout sunt in causis secundis, quæ sunt merita, & demerita hominum, & talia frequenter mutantur, sicut & causæ eorum : & hoc modo dicitur *Ionæ* 3. *Adbuc quadraginta dies, & Ninive subvertetur* . Hoc enim exigebant demerita illius populi pro tunc ; sed quia egerunt pœnitentiam, non est adimpletum verbum illud : Hoc autem non arguit in Deo mutabilitatem, sed in libero arbitrio hominis.

CAP.



## CAP. XXIV. Reflexio 303.



IN superioribus fuit Balaam prohibitus maledicere populo Israel, sed tamen fuit permiffus ire, & quærere augurium ad maledicendum; hic autem non, sed statim post mutationem loci, & oblationem Sacrificij fuit compulsus benedicere: hoc autem factum est, ad ostendendum quod absque Dei permissione, nec dæmones possunt dare responsa, nec homines illa quærere. Igitur Balaam, Deo sic iubente, prophetat prospera de Israel, & primo nunciat illius doctrinam, dicens: *Fluet aqua de Situla eius.* Per Situlam namque, quæ est instrumentum hauriendi aquam de puteo, & effundendi ad usum humanum, intelligitur studium Legis, & Prophetarum, quod vixit in Ierusalem, per quod hauriebantur aquæ sapientiæ de puteo Sacræ Scripturæ, & effundebantur docendo populum. Secundo prophetat de Rege illius, qui fuit Saul, dicens: *Tolletur propter Agag, Rex eius, & auferetur Regnum illius.* Saul enim non implevit præceptum Domini de deletione populi Amalec; sed cœpit Agag Regem Amalecitarum vivum, & de spolijs, meliora sibi reservavit; cum tamen iuxta imperium Domini, deberet omnia delere; ideo fuit reprobatus à Regno, quod translatus fuit ad David. Tertio prædicat quietem populi in terra promissionis dicens: *Accubans dormiuit ut Leo, & quasi Leona, quam suscitare nullus audebit.* Ex decursu namque totius Sacræ Scripturæ patet, quod quandiu Israelitæ in vero cultu Dei perstiterunt, habitaverunt etiam in terra confidenter. Aequiparatur autem populus Israeliticus Leoni, & Leoni, quia ista animalia propter eorum fortitudinem, super omnia animantia securè dormiunt, nullum malum sibi futurum timentes. Ponitur vero hic præteritum pro futuro dum dicitur: *Dormiuit*, propter certitudinem prophetiæ: in Prophetis namque mutantur tempora, ad si-



dam, respectu nostri, maiorem certitudinem; nam futurum secundum se incertum est; præterita autem certissima sunt, cum impossibile sit illa se aliter habere. Et ideo prophetia loquens in præterito, signat ex natura verborum, maiorem firmitatem.

## Reflexio 304.

**P**ostquam prophetavit Balaam de futura quiete populi Israelitici, & de illius Regno: prophetat deinde de Messia Sanctissimo, Christo Domino, qui nasciturus erat de populo illo; quod quidem pertinebat ad magnam gloriam Israelitarum, dicens: *Videbo eum, sed non modo: intuebor illum, sed non prope. Orietur stella ex Iacob, & consurget virga ex Israel, & percutiet Duces Moab, vastabitque omnes filios Seth. De Iacob erit qui dominetur, & perdat reliquias Civitatis.* Dicitur Christus *Stella*, quia actus *Stellæ* illi competit: scilicet illuminare caliginosam noctem sæculi; detestit enim cœcitatem Gentium, & Iudæorum, ut patet Isaia 9. ubi dicitur de eo, *Populus qui ambulabat in tenebris, vidit Lucem magnam, habitantibus in regione umbrae mortis lux orta est eis:* Dicitur *Virga*, quia habuit Regiam potestatem, sed non de hoc mundo: nam potestas eius, est potestas æterna ut patet Daniel 9. Prophetæ tamen vocant eum Regem, quia secundum carnem erat de Regali semine David; & regnaturus erat spiritualiter in omnes Gentes: nam de omnibus gentibus aliqui ad Christum Dominum conversi sunt, auditis per Apostolos, & per eorum Successores verbis vitæ æternæ: adeo ut humiliter se subijcerent Christo Domino, pro cuius fide mori non timuerant, & usque ad finem Mundi durabit ista conversio. Percussit autem Christus Duces Moab, nempe Idolatras, qui per Moabitas intelliguntur, cum isti essent idolatræ; loquitur enim hic Balaam parabolicè. Per prædicationem namque fidei conversæ sunt Gentes ad Deum, relictis idolis suis. Vastavit autem Christus Dominus omnes filios



filios Seth, idest omnes populos: nam de Seth, egressi sunt omnes populi; nam Abel mortuus est sine filiis; filij vero Cain deleti sunt in diluvio. Ista tamen vastatio fuit per conversionem ad fidem, quæ conversio dicitur vastatio, seu destructio; quia per conversionem non manet homo secundum id, quod erat ante; nam prius erat peccator, postea efficitur iustus, exuens veterem hominem, & novum induens secundum Deum, ut ait Apostolus. Perdidit tandem reliquias Civitatis, nempe Romanæ, dum fecit illam sedem sui Vicarij, subijciens eam Evangelicæ Legi, ut quæ erat magistra erroris, fieret disciplina veritatis. De Christo autem Domino dixit Balaam: *Videbo eum, sed non modo*: Quia omnes iniqui visuri sunt Christum oculis corporeis, quando in forma humana apparebit ad iudicandum. Alij exponunt de adventu in carne passibili: et dicunt quod licet Balaam non viderit filium Dei in propria persona, tamen vidit illum in posteris suis: nam Magi, qui venerunt adorare Christum natum, fuerunt de stirpe Balaam.

### Reflexio 305.

**D**Enunciato adventu Christi Domini, prophetavit deinde Balaam de multis Gentibus. Et primo de Amalecitis dicens: *Principium Gentium Amalech, cuius extrema perdentur*. Hoc autem fuit tempore Regis Saul, qui omne vulgus Amalecitarum interfecit in ore gladij, ut patet *pr. Reg. cap. 15*. Dicitur autem Amalec principium gentium, quia iste populus insurrexit primus contra filios Israel, post exitum de Ægypto. Secundò prophetat de Cineis, qui erant descendentes de Iethro cognato Moysis, & habitabant iuxta Amalec, prædicens eorum ruinam: fortitudo enim loci non potuit eos salvare, quin captivarentur cum decem Tribubus Israel, per Regem Assur, ut patet *4. Reg. cap. 17*. Tercio prophetat de Romanis dicens: *Venient in trieribus de Italia, superabunt Assyrios, vastabuntque Hebræos, & ad extremum etiam ipsi peribunt*. Ista autem bella fuerunt facta per:

Z. 4.

Rom.



Pompeum. Primò in Piratico bello, in quo omnes Piratas celevit tribus tantum mensibus; deinde terrestri bello, de Mithridate triumphavit. Tigranem Armeniæ Regem, ei ad genua procumbentem, in Regnum restituit. Inde Iberos, Albanos, & Iudæos debellavit, cepto eorum Rege Aristobulo. Felicissimus quidem Dux, si potentia temporalis, & mundanus honor habent aliquod vestigium admirandæ, & veræ felicitatis. Condolendæ autem calamitatis suæ origo fuit, quia intravit in Templum Domini, & in *Sancta Sanctorum*: omniaque vasa Dei, & ceremonias contempsit; nihil tamen, cupiditate ductus, abstulit. Equos suos in porticu Salomonis stabulavit, & inde recedens Pharsalica pugna à Cesare copijs longe inferiore, superatus est, & in Ægyptum fugiens decapitatus est ab illo, quem ipse in Regem exaltaverat. Post bella contra Assyrios, defunctis Machabœis, Romani in terram Iudæorum dominantes, instituebant Reges, & Pontifices, quos volebant, & sic fuerunt instituti Aristobolus, Alexander, & Ioannes. Postea vero, magna seditione orta inter eos, qui erant de genere Regio, transfulerunt ad Alienigenas Regnum divisum per Tetrarchias. Vastatio igitur Hebræorum inchoata fuit tempore Pompei, sed consummata tempore Titi, in vindictam mortis Salvatoris Dei. Romani vero per bella intestina, inter eos orta, perierunt: nam multæ Provinciæ à Romano discesserunt Imperio; adeo ut hodie, respectu antiquæ dominationis, non remaneat nisi solum Imperij nomen. Sicut enim in principio nil fortius fuit Romano Imperio, aut durius, ut patet *Daniel* 2. ita in fine nihil debilius.

## CAP. XXV. Reflexio 306.



Postquam Balaam benedixit, licet invitus, populum Israel, reversus est in terram suam; dato tamen prius Regi Moab impio consilio, videlicet: ut mitteret puellas pulchras, nobiles, & orna-



ornatas prope exercitum Israelitarum, quæ allicerent iuvenes ad se venientes, sed non permetterent se cognosci ab eis, nisi prius comederent de idolotitis, & insuper adorarent ipsa Idola, quæ secum ferebant. Sciebat enim impius Magus, quod quousque populus Israel maneret in observantia Divinæ Legis, nullus inimicus poterat contra eum prævalere. Si vero per idolatriam recederet à Deo suo; putabat quod statim in manus hostium traderetur, utpote privatus Divino patrocinio. Et quia sciebat hebræos esse valde luxuriosos, consuluit ut Virgines pulchræ mitterentur prope Castra, ut blanditijs suis inflammarent proclivem concupiscentiam Israeliticæ iuventutis. Manebat autem exercitus Hebræus in Setim, qui est locus in planioribus locis Moabitarum, & ista fuit ultima mansio, quam habuerunt Israelitæ in toto deserto; nam post istam non fecerunt aliam mansionem usque ad transitum Iordanis. Igitur hinc manente exercitu, de mandato Regis accesserunt prope castra nobiliores, & pulchriores Virgines Moabitæ; quæ vocaverunt Hebræos ad sua Sacrificia, & statim populus accessit ad eas, & fornicatus est, non solum corporaliter per luxuriam cum filiabus Moab; sed etiam per idolatriam, adorando Deos earum, & comedendo de sanctificatis Idolis suis.

## Reflexio 307.

**S**Ecuta fornicatione populi, statim Dominus paravit ultionem: præcepit enim Moyti, ut tolleret cunctos Principes Populi, qui erant Principes duodecim Tribuum, & suspenderet illos in patibulis contra Solem; videlicet ad partem orientalem, ut sic melius posset mors eorum videri à toto populo. Aliqui enim istorum erant culpabiles, quia idolatraverant. Aliqui vero neglexerant retrahere subditos suos à perpetratis sceleribus; unde quia peccatum erat publicum, etiam pœna debebat esse publica, ad terrorem plebis. Deinde dixit Moyses ad Iudices: *occidat unusquisque pro-*



*proximos suos, qui initiati sunt Beelphegor: idest applicati cultui Idoli prædicti ipsum adorando, vel se illi consecrando. Initiari enim signat ritum consecrationis. Dum igitur Iudices inquirunt reos, unus de filiis Israel intravit, vidente Moyse, & tota multitudine, ad scortum Madianitidem; fuit enim magis effrons, & audax quam alij, dum peccatum suum coram omnibus perpetrare non erubuit; quod semper est signum voluntatis nimis depravatæ, à qua mensuratur meritum, vel demeritum in operatione. Tunc Phinees, non sustinens universale scandalum in populo, sufficiens ad contaminandam totam plebem, arrepto pugione ingressus est post effrontem Israelitam in Lupanar, videlicet in parvo quodam tentorio, ubi mulier Madianitis permanebat: singulæ namque mulieres Moabitides, & Madianitides, de Præcepto Regis Moab, habebant Tentoriola ad hoc disposita, ne cunctis pateret earum turpitudine, & ut iuventus liberè posset ad illas accedere, & perfodit Virum, & Mulierem in locis genitalibus: hoc Iustitia Divina disponente; ut sicut in vitio simul erant, ita et mors esset illis simultanea, & punirentur in illis partibus, cum quibus peccabant. Per hunc autem zelum, quo Phinees non timuit occidere Principem unius Tribus, fuit Dominus placatus; cessavitque Plaga, quæ erat pestis, vel subitanea mors, in qua perierunt usque ad vigintiquatuor millia hominum.*

## CAP. XXVI. Reflexio 308.




Cum est supra de perditione iniquorum per varias clades; hic agitur de numeratione, & ordinatione manentium. Fuerat enim populus deordinatus per peccatum idolatriæ. Et quia potissima ratio communicationis humanæ, est abundantia in necessarijs ad vitam, cum ista ponatur tamquam quidam finis politicæ, ut patet 3.





& 7. *Polit.* ideo iussit Dominus fieri divisionem possessionum; tum quia communia negliguntur, propria autem diligenter curantur; tum quia per hoc multa litigia, & contentiones cessant, eoquod quilibet suum proprium recognoscit. Divisio autem possessionum debet fieri secundum numerum personarum, & ideo Dominus præcepit Moyse, ut numeraret omnem summam filiorum Israel, per domos, & cognationes suas: quibus deinde recensitis divideret terram, dando pluribus maiorem partem, & paucioribus minorem; ita tamen ut hoc esset per sortem, ad excludendas nimirum contentiones, quæ possent oriri in ipsa divisione, si fuisset simpliciter facta ex humana assignatione. Dicunt tamen Doctores, quod providentia Divina, cadebat sors cuiuslibet Tribui super partem terræ sibi proportionatæ, secundum pluralitatem, vel paucitatem familiarum in ea contentarum. In numeratione autem Tribus Ruben, facit Divina Scriptura mentionem de Dathan, & Abiron, qui surrexerunt contra Moysen, & Aaron in seditione Core, deinde subiungit: *Et factum est grande miraculum, ut Core pereunte filij eius non perirent.* Hoc autem fuit, quia terra aperta est, & absorbit Core: filij autem illius, qui simul erant cum patre, manserunt pendentes in aere quousque terra ipsa, devorato Core, iterum unita, & consolidata fuit sub pedibus eorum. Erant enim iusti, & sancti, & inter Levitas effecti sunt Cantores, & multos Psalmos composuerunt, qui intuluntur Psalmi filiorum Core. Pro gratiarum vero actione supradicti beneficij, fecerunt illum Psalmum: *Deus noster, Refugium, & Virtus adiutor in tribulationibus, &c.*

## CAP. XXVII. Reflexio 309.

 Osta regula de divisione terræ promissionis, hinc ponitur casus specialis circa illud, quod sub illa non videbatur comprehendi, videlicet: An liceret dare sortem in aliquo casu feminis sicut viris: accesserunt enim filia



filia Selphaad, steteruntque coram Moyse, & Eleazaro, & cunctis principibus populi ad ostium Tabernaculi, & dixerunt: *Pater noster mortuus est in Deserto, nec fuit in seditione Core, sed in peccato suo mortuus est: hic non habuit mares filios: cur tollitur nomen illius de familia sua, quia non habuit filium? date nobis possessionem inter cognatos patris nostri.* Per hoc autem quod dixerunt prædictæ filia patrem suum fuisse mortuum in deserto, dicunt DD. aliqui, quod fuit ille, qui lapidatus est in deserto colligans ligna in Sabbato. Alij dicunt quod fuit unus de murmurantibus, & mortuus est cum alijs, propter peccatum murmurationis contra Deum. Dixerunt vero istæ mulieres, patrem suum non fuisse in seditione Core, ne illis diceretur, quod essent privatae iure hereditatis, sicut fit in filijs illorum, qui sunt rei læsæ Maiestatis; nam tales privantur successione paterna. Igitur occasione istarum filiarum determinatum fuit, quod quando pater non habebat filios, succederet filia; quod si nec filiam habuisset, succedebat frater, & isto non extante, succedebat patruus: quod si nec iste fuisset, succedebat propinquior de eius genere. Sciendum est autem, quod primus filius istarum mulierum accipiebat nomen familiae Avunculi sui prædefuncti sine filijs; reliqui vero filij transibant in nomen familiae patrum suorum, alioquin eorum familiae deletæ fuissent, quod erat inconveniens.

### Reflexio 310.


**P**ostquam actum est de assignatione terræ fienda, dum populus fuisset in illam ingressus, dixit Dominus ad Moysen: *Ascende in Montem istum Abarim, & contem-  
plare inde terram: cumque videris eam,abis & tu ad populum  
tuum.* Voluit enim Dominus Deus, præbere Moyli quod-  
dam gaudium ante illius mortem, ideoque elevavit super-  
naturaliter potentiam illius visivam, ut posset distinctè co-  
gnoscere omnes partes terræ promissionis, quibus visis gau-  
deret.



deret. Tunc Moyſes acceptans humiliter Divinam diſpoſitionem, oravit ad Deum, non pro dilatione mortis ſuæ, ſed pro ſalute populi ſibi commiſſi, dicens: *provideat Dominus Deus hominem, qui ſit ſuper multitudinem hanc; ne ſit populus Domini ſicut oves abſque paſtore*: Verus quippe Paſtor erat, ideoque etiam in limine mortis exiſtens, curam gerebat ovium ſuarum. Licet autem eſſent in populo multi Iudices, tamen petijt unum tantum Principem, quia bella de proximo imminebant: quamvis autem ad regendum populum, dum paſcifice in Civitate manet, conveniens ſit Principatus Ariſtocraticus, vel Democraticus, tamen pro bello nullus convenit, niſi Monarchicus. Hoc autem experti ſunt Romani in ſe: nam propter multiplices Duces, in bello Cannenſi in quo pugnaverunt contra Annibalem, ibique erant duo Conſules, nempe Marcus Æmilius, & Terentius Varo ſimul diſcordantes de die belli, totus exercitus deletus eſt. Igitur orante Moyſe pro communi populi utilitate, dixit Dominus ad eum: *Tolle Iofue virum in quo eſt ſpiritus, & pone manum tuam ſuper eum*: Iſte autem Spiritus, erat fortitudo contra adverſitates neceſſaria; nullum enim Principem decet eſſe puſillanimen in adverſis; alioquin ſubijceret populum ſuum inimicis. Ponebatur vero manus ſuper Iofue, ut legitimè inſtitueretur in Ducem; & ne videretur intruſus; vel per ambitionem, regimen populi occupaffe. Erat igitur prædicta impoſitio quædam cæremonia collationis Principatus, in qua fuit collata Iofue quædam gratia à Deo ſpecialiter apta, ad perfectè populum regendum. Deinde Moyſes coram tota multitudine honoravit Iofue: recognoſcens, & declarans illum futurum Ducem populi poſt mortem ſuam. Hoc autem erat dare illi partem gloriæ ſuæ, ut dicitur in *Tex.*



## CAP. XXVIII. Reflexio 311.



Osita ordinatione multitudinis ad Principem temporalem, cui parere debebat; ponitur deinde ordinatio ad Deum. Cuius cultus licet principaliter consistat in anima, tamen manifestari debet per oblationes, & Sacrificia, & festa solemnia, in quibus homo debet vacare Divinis. Populus autem Israeliticus intraturus terram promissionis, fortè poterat credere se non obligari ad Ritus Sacrificiorum in ipsa terra; quia nimirum in deserto per spatium quadraginta annorum, non observaverat illa; ideo voluit Deus repetere ipsa Sacrificia, ut scirent Israelitæ, se teneri ad illa facienda, sicut fecerant in Monte Sinai in consecratione Sacerdotum. In deserto autem fuerunt dispensati ab immolatione, quia non habebant illa, quæ necessaria erant ad Sacrificium, nempe, Farinam, Oleum, & Vinum. Deinde assignantur Festa principalia, ut populus magis haberet illa impressa pro observatione illarum. Et primum est festum *Neomeniæ*, quod fiebat in novilunio, propter recolendum beneficium Divinæ gubernationis, & propter hoc fiebat in novilunio, quia mutatio in istis inferioribus magis apparet secundum innovationem Lunæ communiter, quam alijs temporibus. Secunda solemnitas erat *Phase*, idest immolatio Agni Paschalis, quæ fiebat in memoriam beneficij educationis filiorum Israel de durissima servitute *Ægyptiaca*, à qua mirabiliter fuerunt liberati à Deo. Tertia solemnitas erat *Pentecostes*, & fiebat in memoriam dationis Divinæ egis, quæ fuit data in Monte Sinai, quinquagesimo die ab exitu de *Ægypto* exclusivè, & ideo celebrabatur post deursum quadraginta novem dierum à Paschate Azymorum. In Pentecoste autem offerebantur primitiva de novis frugibus; nempe duos panes de novo frumento, sicut in Paschate offerebantur primitiva de granis, Et hoc in recognitionem  
bene-



beneficij Dei, qui prestat omnia alimenta creaturis suis; ideo-  
que non erat licitum Hebræis comedere de novis panibus,  
nisi prius offerrent Deo panes primitiarum: nec metere de  
Spicis pro suis usibus, nisi prius saltem unum manipulum  
offerrent Deo.

## CAP. XXIX. Reflexio 312.




**D**ico de festivitatis primi, & tertij Mensis,  
quæ fiebant in Vere; hic agitur de solemnita-  
tibus Mensis septimi, quæ fiebant in Au-  
tumno, nempe in principio Septembris, &  
talis mensis erat quasi totus festivus, nam in  
illo fiebant quatuor festa. Primum erat fes-  
tum Tubarum; & celebrabatur in memoriam  
liberationis Isaac à morte, pro quo Abraam, ut redderet  
Deo gratias de liberatione filij sui, immolavit Arietem,  
quem vidit post tergum inter vepres, hærentem cornibus;  
rogans Deum, ut dignaretur acceptare Holocaustum Arietis,  
sicut acceptasset Holocaustum proprii filij; maxime quia  
promptissime se obtulerat, ut obediret Deo, ad vere immo-  
landum filium suum Isaac. Secundum erat festum Expiatio-  
nis, quod celebrabatur in memoriam singularis illius bene-  
ficij, quo Dominus placatus fuit super fabricationem Vituli,  
quem erexit populus, & adoravit in Deserto. Remissio au-  
tem talis peccati, fuit decima die Septembris, in qua Moy-  
ses descendit de Monte portans secundas Tabulas, in signum  
Divinæ placationis, & ideo hunc diem debebant Israelitæ  
sanctissimum reputare, & affligere animas suas in signum  
doloris sceleris perpetrati, & reddere gratias Deo pro illius  
condonatione. Tertium erat festum Tabernaculorum, quod  
fiebat decima quinta die eiusdem Mensis, in memoriam be-  
neficij, quo Deus fecit habitare Israelitas per quadraginta  
annos in deserto sterilissimo; & tamen in tam longo tempore,  
con-



Convenientissimè providit de necessarijs pro sustentatione totius populi, non solum quo ad cibos, sed etiam contra Solis æstum; protegens eos continue per Nubis umbraculum; deduxitque illos ad terram delectabilem, & omnibus bonis repletam: in cuius signum, habebant in tali festo fructus arboris pulcherrimæ in manibus suis. Quartum erat festum Cetus, seu Collectæ, quod celebrabatur immediate post festum Tabernaculorum: & in tali die colligebatur pecunia pro Sacrificijs fiendis; ista enim fiebant de sumptibus totius communitatis, loquendo de sacrificijs, quæ offerebantur Deo pro salute totius populi. Et ista erant in lege præscripta, ita ut non possent ullo modo præteriri. Cum igitur talia Sacrificia fierent pro tota communitate, iustum erat, ut totus populus concurreret pro expensis in illis faciendis. Spontanea vero Sacrificia fiebant de sumptibus particularibus ipsorum offerentium. Notandum est autem, quod in prædictis omnibus solemnitatibus, inter multa Sacrificia præscripta, offerebatur Hircus pro peccato. Et ratio ea erat, quia semper aliqua peccata erant in Israel; sive in personis privatis, sive in toto populo: ideoque conveniens erat in illis accipi Sacrificium expiativum, ut sic meritorie festa celebrarentur.

### CAP. XXX. Reflexio 313.



Vprà dictum fuit de ordinatione populi ad Deum, per ea quæ erant de communi lege; hîc autem ordinatur populus ad ipsum Deum, per ea quæ sunt in propria voluntate; cuiusmodi sunt Vota, & iuramenta, per quæ astringimur Deo; quia licet vovere sit voluntarium, tamen reddere votum iam factum, & iuramentum, est necessarium, quia utrumque est obligatorium: Votum tamen magis, cuius ratio est, quia obligatio Voti causatur ex fidelitate quam Deo debemus, ad quam requiritur, quod solvamus ei promissum; Obligatio autem Iuramenti, causa-  
tur




tur ex reverentia, quam ipsi Deo debemus, ex qua tenemur verificare id quod per nomen illius promittimus: omnis autem infidelitas irreverentiam continet; sed non est contra, omnis irreverentia continet infidelitatem; ideo votum ex sua ratione magis obligatorium est quam iuramentum, & ideo Dominus præcipit hinc, ut adimpleantur. De Votis tamen Puellarum, & Vxorum proceditur cum tali distinctione in littera. Nam si pater cognovit id, quod filia pollicita est, & tacuerit, tenet votum, vel iuramentum Puellæ. Si vero, ut audivit votum filiæ, contradixit, tunc votum, vel iuramentum irritum est. Similiter, si vir audiens votum Vxoris, contradixerit, Votum irritatur; Si vero taceat, tenet. Causa huius est, quia Pater, vel Maritus, per taciturnitatem suam arguitur consentire: nam quandocumque agitur de præiudicio alicuius, si taceat consentire videtur. Si autem agatur de favore alicuius, ex taciturnitate sua non præsumitur consensus. Et ratio diversitatis est; quia quod aliquis iura sua perdat, dependet à propria voluntate; ideoque per taciturnitatem præsumitur consentire: nam contradicendo poterat se tueri: quod autem bonum mihi detur, vel ad honorem promovear, non dependet ex mea voluntate, sed à voluntate dantis, vel promoventis. Cum igitur per meum consensum nullum ius mihi acquiratur contra dantem, vel Promoventem, tacendo, non arguor consentire. Sed si de malo, vel præiudicio meo agatur, quia ex consensu meo ius alteri contra me acquiratur, lex præsumit, quod si non consentirem, manifestè repugnarem, & sic est ibi consensus interpretativus, qui sufficit ad obligandum. Sciendum est autem, quod in Novo Testamento, ad ampliandum cultum Divinum liberior est potestas vovendi, quam esset in lege antiqua. Nam filius, & filia in potestate patris existentes, possunt vovere religionem, vel alium statum perfectionis, etiam patre invito, & contradicente. Similiter possunt contrahere matrimonium, licet patris consensus non accedat; quia in his, quæ pertinent ad propriam personam, filij familias sunt sui iuris.

A a.

CAP.



## CAP. XXXI. Reflexio 314.




Vpra in capitulo vigesimo quinto fuit posita admonitio bellandi contra Madianitas, qui populum Israel induxerunt ad idolatriam; hinc subditur eius executio; nam Dominus dixit ad Moysen: *Vlciscere prius de Madianitis, & sic colligeris ad populum tuum.* Audiens autem Moyses Divinum præceptum, convertens se statim ad populum, ait: *Armate ex vobis vires ad pugnam, qui possint ultionem Domini expetere de Medianitis.* In hoc vero apparuit obedientia, & fidelitas Moysis erga Deum, & eius generositas in contemnendo mortem: audierat enim ex viva voce Domini dilationem mortis suæ, usque ad interfectionem Madianitarum; & tamen; non propter hoc distulit pugnam, ut diutius viveret, sed illam acceleravit, ut Dei voluntas adimpleretur. Misit ergo duodecim millia expeditorum virorum ad pugnam, iubens illis ut percuterent Madianitas in ore gladij. Et constituit Ducem eorum Phinees; quia iste zelabat toto corde honorem Divinum: & cum ageretur hinc de ulciscenda iniuria Divina, nullus alius apparebat, ita idoneus, sicut Phinees, qui iam dederat signum Zelus sui erga honorem Divinum, dum occidit Principem unius Tribus, publicè peccantem. Deinde Moyses, antequam milites prædicti pergerent ad pugnam, tradidit ipsi Phinees Vasa Sancta, & Tubas argenteas ad clangendum, in signum futuræ victoriæ obtinendæ per speciale Dei auxilium. Dicunt autem DD. quod elevata Lamina Sancta in altum, in qua erat sculptum nomen Domini *Tetragrammaton*, statim exercitus Madianitarum fuit excecatus, & timore mortis percussus, cadebat ad terram coram filiis Israel, non audentes contra eos arma sua elevare, & sic omnis eorum exercitus partim dedit se fugæ; reliqui vero occisi sunt cum Regibus eorum, in qua pugna occisus etiam fuit Balaam. Scelestus enim



enim Magus perrexerat quidem post datam benedictionem Israeli, licet invitam, in patriam suam; sed quia audivit, quod multi de Iudæis post fornicationem perierant, rediit ad Madianitas, ut acciperet mercedem iniqui sui consilij, sed recepit mortem, tum temporalem, tum æternam. Igitur trucidatis Madianitis, reservarunt Israelitæ fœminas earum, ducentes illas captivas ad castra, sed Moyſes iussit eas, quæ noverant Viros, iugulari, cum istæ fecissent prævaricari filios Israel; Virgines autem reservari. Et si quæras, quomodo cognoscebantur, quæ essent virgines, & quæ non? Respondent communiter Doctores, quod ista cognitio fiebat per Arcam fœderis: presentabantur enim omnes fœminæ coram Arca, & illæ, quæ erant virgines, pertransibant prorsus illesæ; quæ vero erant corruptæ non poterant transire Arcam, sed ad illius præsentiam statim cadebant, & istæ occidebantur. Quia vero non poterant distingui illæ, quæ fuissent cognitæ ab Israelitis, occidebantur omnes, ut sic perirent illæ, per quas fuerat perpetrata fornicatio, & secuta idolatria.

## CAP. XXXII. Reflexio 315.



Osito bello contra Madianitas, subditur de divisione terræ, quam Israelitæ habuerunt ante ingressum terræ promissionis. Etenim filij Ruben, & Gad, & dimidia Tribus Manasse, cum haberent pecora multa, & iumenta, quia de præda Madianitarum emerant magnam partem animalium ab alijs suis fratribus; videntes terram Galaad esse multum pascualem, & perconsequens aptam pro suis gregibus alendis, accesserunt ad Moysem petentes, ut pro eorum portione assignaret terram prædictam sibi ipsis; promittentes pergere ad prælium ante filios Israel, donec eos introducerent in terram

Aa 2

pro-




promissionis: unde Moyſes ſub prædicta conditione dedit illis Regnum ſchon Regis Amorrhæi, & Regnum Og Regis Baſam, cum urbibus ſuis per circuitum. Tunc ædificaverunt dictæ Tribus Civitates, reſtaurando videlicet illas, & fortificando propter inſidias inimicorum, in circuitu manentium. Sed dices hoc fuiſſe ſuperfluum; nam Deus prohibuiſſet hoſtes accedere ad nocendum illis. Dicendum, quod prædictæ Tribus, non debebant exponere ſe huic periculo; ſed ſecundum dictamen prudentiæ debebant agere ad illud removendum; quia ſemper homines debent agere ſecundum humanam prudentiam in periculis imminentibus, & non committere ſe totaliter Divino regimini, niſi in illis rebus, in quibus Deus iuſſit, quod nos totaliter ſuo regimini committamus. Et ratio huius eſt: quia Deus dedit homini intellectum, tamquam primum principium motivum, & regulativum ſuarum operationum, & ideo vult, quod per illud homo dirigatur in agendis, eligendo media, per quæ evadat pericula. Cum autem homo totaliter ſe committit Divinæ diſpoſitioni, tunc non vult regi per intellectum, ſed per aliud principium ſuperius, non humanum, & ideo peccat; tum quia contra rationem agit; tum quia non obſervat Dei diſpoſitionem, nec utitur illo lumine naturali, quod impreſſit Deus ſuo intellectui, in quo caſu tentat Deum, quia cum nolit agere ſecundum dictamen rationis, nec media eligere pro ſublevanda ſua miſeria, tacitè videtur velle obligare Deum ad ſe liberandum; vel facere miraculum, ad hoc, ut ſequatur id, de quo ipſe indiget. Si vero humanum iudicium non ſufficiat, vel non poſſint conſequi media pro conſequendo fine; tunc debemus nos committere totaliter Divinæ providentiæ, alioquin diſſidimus de bonitate ipſius Dei.

CAP.



## CAP. XXXIII. Reflexio 316.



IN præcedentibus actum est de processu filiorum Israel ab exitu de Ægypto, usque ad Iordanem, qui erat terminus *ad quem* sui processus; incipiebat namque terra promissionis ab ipso flumine; hinc autem breviter computantur, & epilogantur seriatim loca suarum mansionum. Et quia in superioribus non fuerunt notata nisi loca illa, in quibus facta fuerant aliqua notabilia, ideo hinc ponitur numerus, & ordo mansionum ab exitu de Ægypto usque ad Iordanem. Sciendum autem, quod prædictæ Mansiones in universum fuerunt 42. Primo autem anno egressionis de Ægypto, & in principio secundi anni usque ad locum unde missi fuerunt exploratores, fecerunt Israelitæ 14. Mansiones. Erat autem Mansio fixio, seu depositio castrorum in aliquo loco determinato ad ibidem quiescendum, donec Dominus Deus contrarium iuberet; quod præceptum dabatur per signum sensibile, nempe motionis Nubis dirigentis exercitum; tunc enim movebantur Israelitæ, & sequebantur motum Nubis. Quadragesimo autem anno fecerunt octo mansiones; videlicet à monte Or exclusivè, usque ad Iordanem: & sic patet, quod tempore intermedio quod fuit fere 38. annorum, fecerunt Israelitæ 20. mansiones. Ex quo sequitur, quod licet dicatur in Sacra Scriptura, quod filij Israel fuerunt vagi per desertum toto tempore quadraginta annorum; non tamen est intelligendum ipsos fuisse in continuo motu de loco ad locum, sed solum quod erant semper obligati ad proficiendum quotiescumque hoc Deus iuberet, vel per Moysen mandata Dei pronunciantem, vel per ipsam Nubem se moventem.



## CAP. XXXIV. Reflexio 317.



N superioribus actum est de mansionibus, per quas devenerunt Israelitæ in terram promissionis; hic consequenter ponuntur termini illius, cuius ratio fuit: Quia in Lege erant aliqua præcepta, quæ obligabant solummodo in terra illa, & aliqua, quæ non poterant fieri extra ipsam, sicut erat edificatio Templi, & oblatio Sacrificij; ideoque debuerunt determinari fines illius. Dicitur ergo, quod pars meridiana inciperet à solitudine Sin, & haberet terminos contra Orientem mare salissimum, idest mare mortuum, quod salsum est, ac spissum: adeo ut non sit navigabile, quia illa aqua est magis lutum. Igitur hoc mare erat in angulo coniungente partem Orientalem terræ promissionis, & Meridionalem. Plaga vero Australis terminabat ad Torrentem Ægypti, & magni maris littore, scilicet maris mediterranei, quod vocatur mare magnum respectu maris mortui, & mari Galilææ. Pars Occidentalis claudebatur toto tractu prædicti magni maris. Plagæ vero Septentrionalis termini, incipiebant à mari magno, pervenientes usque ad Libanum. Demum Orientalis latus transibat à Libano, & se extendebat contra Orientem ad mare Genesareth, tendens deinde usque ad Iordanem, & ad ultimum claudebatur mari mortuo. Est autem Genesaret lacus magnus in Galilæa, per quem transit Iordanis, & vocatur mare, secundum morem Hebraici sermonis, quo omnis congregatio notabilis aquarum dicitur mare, ut patet *Gen. pr.* ubi dicitur. quod Deus appellavit congregationes aquarum maria. Hoc mare vocatur in Evangelio mare Galilææ, quia transit per ipsam Galilæam; vocatur etiam mare Tiberiadis à Tiberiade, quæ est Civitas sita in eius ripa; dicitur etiam Genesaret, quasi generans auram; nam circa ripas prædicti maris, ventus valde refrigerans spirat.

CAP.



## CAP. XXXV. Reflexio 318.



Icto de divisione terræ, hîc agitur de ipsius particulari datione; tum extra Iordanem; tum intra ipsum; cuius causa duplex fuit. Vna pro Levitarum habitaculo; altera pro fugitivorum refugio. Iussit igitur Dominus, quod filij Israel assignarent quadraginta octo Civitates Levitis, cum suburbanis, quæ tendebant forinsecus per circuitum, mille passuum, & erant pro alendis pecoribus. Vnde, licet ibi essent agri, & vineæ; tamen quando assignabantur Levitis redigebantur ad pascua tantum. Ex prædictis Civitatibus sex fuerunt determinatæ pro fugitivis. Scilicet, tres trans Iordanem, & tres in terram Chanaam. Licet autem trans Iordanem habitarent solummodo duæ Tribus cum dimidia; tamen tot Civitates refugij erant ibi, quot erant ubi manebant novem Tribus, cum dimidia: cuius ratio fuit. Quia terra trans Iordanem erat longiqua à Templo Dei; ideoque multiplicabantur in illa Civitates refugij, ut effusores sanguinis elongarentur à Templo. Porro istæ Civitates erant privilegiatæ, ita quod homicidæ ad illas confugientes non possent inde educi, usque ad cognitionem causæ. Sciendum autem, quod homicida à casu debebat manere in Civitate refugij, usque ad mortem Summi Sacerdotis. Et ratio erat, quia licet esset innocens, & puniretur sine sua culpa, in hoc quod erat profugus à Patria sua, non tamen hoc erat sine iustissimo motivo: videlicet, quia ex mora ipsius inter amicos defuncti, poterant seditiones, & homicida oriri, & per consequens pax communis turbari; ideoque expediebat Reipublicæ, ut talis maneret esul ad tempus, quia detrahendum est bono particulari propter conservationem boni communis. Poterat vero reverti in morte Summi Pontificis, quia pro tali morte erat afflictio, & luctus in toto populo: quo tempore, respectu huius communis afflictionis solebant Iræ par-

A a 4

ticu-



ticulares sedari. Si verò occisor à casu ante mortem Summi Pontificis exisset terminos Civitatis refugij, poterat impune occidi à propinquo interfecti, si fuisset inventus extra portam Civitatis. Causa huius concessionis fuit, quia Israelitæ erant duri corde; unde si Deus non permisisset, quod occiderent hostes suos, sed hoc prohibuisset, cum essent crudeles, non observassent legem, sed prævaricatores illius extitissent; ideo melius fuit, quod daretur eis lex ista, etiam si esset remissa, quam quod infringerent legem bonam. Sicut de Libello repudij permissum est, ut patet *Matthei* 19. Porro iudicium de homicidio perpetrato utrum fuisset à casu, vel à proposito deliberato, non fiebat in Civitate refugij, sed in illa, in cuius territorio fuerat perpetratum delictum, quia ibi magis poterat haberi veritas. Cognito autem, quod homicidium fuisset voluntarium, occidebatur reus: erat enim solummodo securus tempore ventilationis causæ, sed cognito, quod illud per insidias perpetrasset, mittebatur per Iudices Civitatis refugij ad locum perpetrati delicti, ut interficeretur. Deus enim dicebatur habitare inter filios Israel, per veram fidem, & specialem cultum Latriæ; ideoque terra Divinæ habitationis, debebat præ cæteris servari munda per purgationem peccatorum, & maxime homicidij voluntarij, quia sanguis innocens effusus super terram, propter horrorem criminis, dicitur clamare coram Deo, ut patet *Gen.* 4.

## CAP. XXXVI. Reflexio 319.



Ortis Legibus de Civitatibus fugitivorum, hinc agitur de quodam dubio incidenti: dictum namque fuit supra *cap.* 27. quod filia Salphaad succederent patri in hæreditate, eo quod non habebat filium masculum: quapropter si nubarent filijs alterius Tribus sequeretur, quod hæreditas patris transiret ad aliam Tribum; quia filius natus ex illa muliere, quæ debebat terram



ram illam hæreditare, non erat computandus in Tribu Matris, sed Patris; quia genealogia hominum, non accipitur per Matres, sed per Patres. Et ex hoc sequebatur, quod in anno Iubilæi prædicta hæreditas non revertebatur ad primos Dominos. Vnde ex tali translatione fieret confusio sortium, quod erat contra Domini præceptum *Levit. 27.* Quare Moyses de præcepto Domini respondit: quod filix Salphaad non possent contrahere matrimonium, nisi cum hominibus suæ Tribus, dicens; *Omnes viri ducant uxores de Tribu & cognatione sua.* Et per hoc pater, quod non solum quando filia succedebat de hæreditate paterna; sed indifferenter nullus poterat accipere uxorem, nisi de Tribu sua; nec mulieres contrahere cum viris alterius Tribus, licet non succederent in hæreditate patris. Dispensatum tamen fuit, quod Tribus Sacerdotalis, & Regia, possent ad invicem contrahere matrimonia; tum propter nobilitatem utriusque Tribus; tum ut Reges, per familiaritatem cum Sacerdotibus, magis tenerentur in culto unius veri Dei; tum denique, ut pax in populo maximè servaretur, propter unionem Principis Secularis cum Ecclesiastico.



DEVE





*Via Moyses, morte sua relicturus erat  
populum sibi commissum, decuit in vite  
termino illum imbuere salubri admoni-  
tione. Vltimum ergo vale faciens, in-  
geminat præcepta totius Legis. Et quia  
multa in alijs Libris ponuntur dispersa,  
& multa permixta historijs: ideo brevi-  
ter coniunguntur omnia, ut arctius tene-  
antur in memoria. Quapropter Liber iste  
aliorum quatuor est summa; & satis consone, dicitur a Græcis  
Deuteronomium, idest nova Lex: Deuteronom. etenim, signifi-  
cat secundum, vel nouum. Nomas vero Regula vel Lex.*

CAP.



## CAP. I. Reflexio 320.



Multa in hoc primo capitulo recolit Moyses; & præcipue de electione Iudicum de omnibus Tribubus, quos elegit Sapientes, & Nobiles. Sapientes, quia non poterant dari in Lege Regulæ circa omnia agibilia, ut habetur 2. *Ethic.* Vir autem sapiens, videns casum contingentem, potest bene secundum subiectam materiam dirigere, eo modo quo iudicasset Legislator. Nobiles vero, quia nobilitas quandam necessitatem videtur importare hominibus, ut strenuos mores sui generis imitentur. Item quia facilius Cives tolerant Nobilem eis dominari, quàm plebeum; & maius obsequium ei præstant, quod requiritur erga personam Principis; tum quia, cum homines parvæ conditionis magnæ multitudini dominantur, Cives nobiles nolentes imperio illorum subici, dissensiones faciunt, legesque eorum violant, nisi ille qui parvæ conditionis est, ita virtute excellat, ut omnibus de Politia complaceat, quod rarissime contingit. Prædictis autem Iudicibus iussit Moyses, ne acciperent cuiuspiam personam: hoc enim opponitur Iustitiæ distributiæ, cuius Iudex debet esse Custos integerrimus. Ad sciendum autem quando persona accipitur, supponendum est, conditiones personarum, aliquæ esse pertinentes ad meritum rei quæ datur. Ut si Episcopus det beneficium Clerico Sapienti, & bonæ conversationis. Aliæ sunt impertinentes, quia nihil faciunt ad meritum rei, ut si det beneficium alicui, quia est consanguineus, vel amicus, & tunc distribuens est acceptor personarum, & per consequens iniustus. Sciendum autem quod acceptio personarum fit regulariter duobus modis. Primus est, quando potestas distribu-

entis



entis est ligata per aliquam legem taxantem: ut si Lex determinet tale beneficium deberi dari homini habenti talem conditionem, & Superior conferat alicui, qui tali conditione est privatus; tunc enim est acceptor personarum, quia distribuit beneficium propter solam personam. Secundus est, quando distributio beneficij superabundans in uno, præiudicat alteri. Vt si Superior distribuatur uni personæ plura beneficia quam necesse sit sustentationi illius: tunc enim est iniustus, quia gravat multos Clericos dignos, dum iuri illorum subtrahit id, quod alteri tam profuse, & impudenter supererogat. In bonis autem proprijs non potest intervenire acceptio personarum; quia nullus istorum modorum intercedit, ut per se patet.

## CAP. II. Reflexio 321.




**I**N superiori capitulo narravit Moyſes pœnas inflictas à Deo irato; hîc demonſtrat beneficia populo collata à Domino placato; ut ſic induceret ipſum ad reverentiam Legis, ei- que imprimeret iugem recordationem beneficiorum Dei, ut ſemper in gratiarum actione maneret; eaque confiteretur, ut nova reciperet. Etenim ſi aliquis à Magnanimo, beneficium recipere velit, perſuadere illi debet dicendo: ſe ab illo multa alia beneficia recepiffe. ut patet 4. *Ethic.*; Deus autem magnanimus, & Magnus eſt. Narrat ergo Moyſes primò ſingulare beneficium à Deo præſtitum, per quadraginta annos, in quibus in Deſerto ſteriliſſimo nihil defuit populo pro convenienti ſuſtentatione. Et licet aliquando defuerint aquæ, hoc tamen erat pro parvò tempore, & ad probationem populi: quapropter non deficiebant ſimpliciter; quia cum inciperent eſſe neceſſariæ, Deus dabat illas miraculoſè. Secundò narrat victorias à Deo conceſſas, & maxime de Rege Schon, occurren-  
rente



rente Israelitis cum omni populo suo. Et licet esset vicinus Regi Og, cum quo poterat fœdus inire, tamen non vocavit illum in auxilium suum; tum quia fortissimum se reputabat, & Israelitas contemnebat; tum quia speratam victoriam solus habere cupiebat. Sed Dominus tradidit illum, cum filiis suis, & toto exercitu in manus Israelis, qui omnes urbes prædicti Regis cepit, interfectis habitatoribus earum, & acceptis spolijs universæ terræ illius: in signum, quod idem facturi erant populis Chananaeorum, ad quorum terram de mandato Domini pergere debebant.

## CAP. III. Reflexio 322.



Isto de pugna contra Schon, subiungitur de prælio contra Regem Og, quem percussit Moyſes, ne ut percusserat Schon. Erat autem Og Gigas valde terribilis, adeo ut ab omnibus timeretur; sed Moyſes illum prostravit. Ex hoc autem quod ex Dei adiutorio superaverat duos Reges, terramque eorum distribuerat, opinatus fuit quod verbum Domini sibi dictum *Numer. 20.* scilicet quod non intraret terram promissionis, non esset verbum sententiæ definitivæ; sed solummodo comminationis, quæ frequenter retractatur, ut patet *Iona 2.* Ideo Sanctus Dux fateatur se precasse Dominum, ut posset transire Iordanem, & ingredi terram promissam; sed Dominus respondit ei, quod nequaquam ultra loqueretur de hac re: ab æterno enim Deus disposuerat, propter peccatum ad aquas contradictionis, dare Moyſi hanc penam, ut non ingrederetur terram promissam. Et talis sententia non fuit data solum secundum exigentiam demeriti, sed definitivè, secundum quod erat in mente Dei determinatum. Moyſes autem nō cognovit hoc, ideo oravit hanc penam sibi remitti. Si enim scivisset, sententiā prædictam fuisse latam ex Divina determinatione, nullomodo rogasset, quia magnum peccatum esset, obſistere, rogando, divinæ voluntati cognitæ.

CAP.



## CAP. IV. Reflexio 323.



Ostquam Moyſes induxit populum ad Dei reverentiam, & Legis obſervantiam; hîc incipit explicare eminentiam Legis. Eminentia autem Legis primo ostenditur ex effectu, qui erat prolongare vitam, & multiplicare, si obſervaretur, bona temporalia; ideo dicit: *Israel audi præcepta, & iudicia, quæ ego doceo te, ut faciens ea vivas, & ingrediens possideas terram*: Et quia ad eminentiam Legis spectat, ut nulla fiat additio, vel diminutio; ideo utrumque prohibetur. Quia omnis Scriptura Sacra, Spiritu Sancto dictante, qui est infallibilis veritas, conscripta est. Vnde non debet argui veritas Scripturæ ex veritate rei; sed magis veritas rei, ex veritate Scripturæ. Valet enim hæc consequentia. Dicitur hoc in Scriptura, ergo sic est. Hinc beatus Petrus *Epist. 2. Cap. pr.* confitetur se vidisse Christum Dominum transfiguratum in Monte Tabor; sed dicit, quod firmior est sermo Propheticus; anteponeſs Sacram Scripturarum veritati ab eo manifeste visæ. Adverte autem, quod solum prohibetur additio depravans intellectum Legis, non autem declarans, vel dilucidans, Vocatur deinde Lex Divina, *Sapientia*, est enim talis; unde inter quinque habitus intellectus, quos *Arist.* ponit 6. *Ethic.* Sapientia perfectior est cæteris, cum sit de altissimis Causis. Sacra autem Scriptura de Altissima Causa est, nempe de Deo, & per Altissimam causam: scilicet per reductionem ad ipsum Deum, dirigendo actus humanos, secundum quod Deo placent, vel displicent. Sic in artificialibus, ille Sapiens dicitur, qui disponit res secundum regulationem ad supremam Causam, quæ est forma totalis: unde *Ædicator Domus*, qui parietes sic, vel sic disponit ut convenient formæ ultimatae, Sapiens dicitur, quia inferiores particulas materiæ, dirigit per altissimam causam, id est per conformationem ista-



istarum ad formam ultimam, quæ est altissima causa, cum finis sit principaliter intentus in tota operatione. Artifices vero inferiores, non dicuntur sapientes; quia non attendunt formam ultimam ædificij, sed mandatum magistri. Dicitur etiam Sacra Scriptura *Intellectus*: quia intellectus est habitus principiorum, quæ naturali lumine cognoscuntur, & quæ certissima sunt, cum non habeantur per discursum; sed ex solo lumine naturali concreato: illa autem quæ per syllogisticum discursum habentur, non sunt certa, quia potest errari in deductione. Sic Lex divina certissima est, quia sine aliqua deductione, ex sola illustratione cælitus missa, per fidem habetur: estque certissima certitudine adhæſionis, licet non certitudine evidentie.

### Reflexio 324.

**O**stenſa Legis Eminentia, inducit conſequenter Moyses populum ad illius observantiam; referendo illa terribilia, quæ in eius datione ostendit Dominus in Monte Sinai, dicens: *Accessistis ad radices Montis, qui ardebat usque ad Cælum, erantque in eo Tenebræ, & Nubes, & Caligo*: Ignis enim ille erat obscurus, & fumans; quia confirmatio antiquæ legis oportebat differre a confirmatione novæ Legis, quæ in linguis igneis lucentibus data est. Tunc enim erat veritas revelata, quæ figuris, & tegumentis in Veteri lege manebat, cum ista esset umbra futurorum bonorum. Deinde dicit Sanctus Dux, quod in datione legis, non apparuit figura alicuius Creature expressiva: Et per hoc prohibuit Deus populo omnem Imaginem; & ideo dicit, quod caverent ab idolatria, quia Deus ignis consumens est; idest acriter puniens, sicut ignis inter elementa est magis actius: prædicens illis, si adorarent idola, quod Deus disperderet eos in omnes Gentes, ut sic magis tristarentur. Si enim omnes ad eandem terram expulsi fuissent, non tantum angustiatii essent, lenientes exilij tristitiam gaudio ſodalitatis. Omnis enim



enim homo naturaliter est animal politicum, optans vivere in politia, quia ibi delectatur. Non afficitur autem ad quamcunque, sed ad hanc, vel ad illam, in quibus natus, aut multo tempore conversatus est. Cum igitur sit pars alicuius politiæ, habens unitatem ad illam, tamquam pars ad totum, separatio ab ea valde dolerosa est, quia omnia naturaliter unitatem desiderant, cum esse in unitate seruetur. Porro dum dicitur hic, quod ignis ardebat usque ad Cœlum, est hyperbole. Vel hoc dicitur, quia sic apparebat Israelitis. Videtur enim Cœlum continuari istis inferioribus Nubibus, quia distantiam intermediam non percipimus; ideoque etiam distantissima coniuncta reputamus, ut habetur in *pr. Com. Prospectivæ*. Etenim si aliquis respiciat per lineam rectam versus Cœli partem, quæ capiti nostro imminet; licet inter Nubes, & Cœlum sint spatia nobis quasi incomprehensibilia, tamen Nubes Cœlo iunctæ esse videntur. Et eodem modo, Luna videtur esse immediatè coniuncta Astris fixis; licet inter ipsam, & Astra sint sex Orbes Cœlestes spatiorum incredibilium. Similiter si respiciamus per lineam iacentem versus Orientem, vel Occidentem, vel aliam Mundi partem, videtur Cœlum coniungi monti, qui medius est inter Cœlum, & oculum nostrum, ob prædictam rationem: quia nimirum spatium intercedens inter Cœlum, & montem, non percipitur à nobis.

### Reflexio 225.

**P**ost prædictionem pœnæ, ne Iudæi post peccatum desperarent, promittit Legillator populo in captivitate posito, si verè pœniteret, misericordiam. Nam manus Domini semper suspicit redeuntes ad se, dicens: *Cumque quaesieris ibi Dominum Deum tuum invenies eum; si tamen toto corde quaesieris, & tota tribulatione animæ tuæ*. Hoc autem dupliciter potest intelligi, videlicet: Aut quantum ad relaxationem culpæ, & appositionem gratiæ; aut quantum ad condonationem pœnæ. Quoad primum, generale erat tam Iudæis-



daïs, quam Gentilibus; quandoquidem contritio de peccatis semper fuit, & est huius virtutis, quod delere possit facinora. Quantum vero ad secundum, distinguendum est. Nam aut peccatum, pro quo Iudæi ducebantur captivi, erat totaliter consummatum, aut non. Quando non erat consummatum reducebat illos Deus in terram suam, si converterentur in toto corde suo, ut patet de captivitate Babylonica, in quam de sceleribus doluissent, liberati fuerunt post septuaginta annos. Si vero peccatum totaliter fuisset consummatum, non erant reducendi. Patet hoc in captivitate decem Tribuum, quæ adhuc sunt in terra Medorum, inter Aylam, & Gozam, à qua numquam liberandæ sunt, ut reducantur in Ierusalem, sicut sepissimè Prophetæ prædixerunt. Et in duabus Tribubus Iuda, & Benjamin, quæ sunt dispersæ in Christiana Republica, quæ numquam redibunt in terram suam, quia consummaverunt peccatum in morte Christi Domini. Quapropter in omnibus locis Divinæ Scripturæ, in quibus dicitur, quod Deus reducet Iudæos dispersos, etiam si ad Cardines Cœli dissipati fuissent, intelligendum est de solis captivitatibus, ad quas ducti sunt propter peccata non consummata. Quando autem peccatum sit consummatum, ita ut pœna mutabilis non sit, non est nobis notum, sed Divinæ sententiæ reservatur, ideoque semper pro mutatione pœnæ orare possumus, & debemus, tamquam incerti de prædicta consumatione.

## C A P. V. Reflexio 326.



Posito mandato de cavenda idolatria, hic ponitur explanatio Legis, dicens Moyses: quod populus non solum disceret legem, sed etiam opere compleret. Etenim legalis consideratio, non est speculativa, sed practica: finis autem practicæ non est veritas, sed operatio, vel bonum, quod est obiectum movens

B b

ope-



operantem, ex 2. *Metaph.* Sicut ergo vana esset speculativa scientia, per quam nulla veritas haberetur; ita vana est consideratio practica, si nulla actio sequitur ex *Arist.* 2. *Ethic.* Deinde Legislator repetit praecepta Decalogi, explanans illa, & dicens: Quod nullam imaginem facerent cuiuscunque rei, ad ipsam colendam. Secundo prohibet usurpare Nomen Dei frustra: non enim parva talis usurpationis imminet ultio, cum per hoc contemnatur Divina Maestas. Tertio praecipit observationem Sabbati, quam diem vocat requiem Domini; quia nimirum debet esse tota applicata ad servitutem Dei, & ideo dicit: *Non facies in eo quicquam operis, tu, & filius tuus, servus, & ancilla, bos, & asinus, ut requiescat servus tuus, & ancilla tua, sicut & tu.* Hoc autem erat ad magnum honorem, & reverentiam Dei, ut non solum nos, sed etiam omnes res nostrae Deum laudare viderentur. Sciendum vero, quod in hoc praecepto aliquid morale est, aliquod vero ceremoniale. Quod enim aliquo tempore Deo vacare debeamus, ut recordemur beneficiorum eius, & cogitando de Deo, ascendamus in cognitionem, & amorem Aeternorum, morale est. Quod vero supradicta fiant, hoc, vel illo tempore, ceremoniale est: & ideo in Ecclesia Dei hoc mutatum est; nam quod fiebat in Sabbato ad memoriam beneficii Creationis, nunc in Lege Nova observamus die Dominica, ad memoriam Resurrectionis; quia nimirum, magis opera Recreationis attendimus, quam Creationis.

## CAP. VI. Reflexio 327.



Tradita doctrina fidei, quam de Deo credere debemus, sequitur qualiter ipsum amare debeamus. Sicut autem in illis, quae naturaliter amamus, semper cognitio praecedit amorem; ita in his, quae supernaturaliter diligimus, supernaturalis cognitio, quae est fides revelata ex auditu Legis, praecedit Charitatem, quae est habitus



bitus dilectionis supernaturaliter infusus. Dicitur ergo hic: *Diliges Dominum Deum tuum ex toto corde tuo, & ex tota anima tua, & ex tota fortitudine tua.* Dicitur *ex toto corde*, idest ex toto motu voluntatis, quæ designatur nomine cordis; quia sicut cor movet alia membra corporis, sic voluntas movet omnes potentias animæ ad actus suos. Dicitur *ex tota anima*, idest ex toto intellectu, & appetitu sensitivo, ita ut intellectus sit Deo subditus, maxime in his, quæ pertinent ad fidem; ut vires animæ sensitivæ regulentur per imperium voluntatis, ad observantiam legis à Deo datæ, quod est ferri in amorem Dei. Dicitur *ex tota fortitudine tua*. Itaut, quantum vires nostræ possunt, tantum pro Deo faciamus. Et hic consumatur vera dilectio, quæ facit perfecte inherere Deo. Pro maiori tamen prædictæ dilectionis intelligentia sciendum est: quod eorum quæ diliguntur, quædam diliguntur ut finis, quædam ut ea quæ sunt ad finem; finis autem ratione maioris boni magis diligitur, ut patet ex *primo Ethic.* Quandocumque ergo aliqua res propter alteram diligitur, minus diligitur, quam illa propter quam diligitur. Si ergo aliquis diligat Deum, ut ipsum faciat divitem, vel ab aliquo malo liberet; tunc diligit Deum amore concupiscentiæ, & pervertit ordinem diligendi; quia per se, & ut finem intendit divitem esse. Deum vero diligit, non quidem secundum se, sed secundum alterum, in quantum ei proficit ad esse divitem; unde non diligit Deum, ut finem; sed ut id quod est ad finem. Aliquando autem amamus Deum amore concupiscentiæ, ut nos beatificet, & tunc nulla perversitas ordinis est, quia tunc Deus diligitur ut finis architectonicus, & ut summum bonum; beatitudo namque obiectiva est summum bonum, & finis. Nec mutatur gradus bonitatis Divinæ, quia nihil ei præponitur. Amamus vero Deum alio amore qui dicitur amor amicitæ; cum videlicet illum diligimus, non tamquam facientem nobis aliquod bonum; sed ut ipsi Deo bonum sit: utpote, quia volumus quod Deo dentur multæ laudes, & quod in omni terra celebretur eius nomen. Et talis



amor incomparabiliter maior est, quam amor concupiscentiæ; ex quo sequitur, quod ad actum Contritionis, non sufficit quod aliquis desideret vitam æternam, sed quod diligat Deum ex charitate, id est amore amicitiae. Patent autem prædicta: quia nullus potest diligere Deum amore amicitiae, quin sit in charitate; quia vel ante stabat in charitate, vel per istum actum reducitur ad charitatem. Possumus vero amare Deum amore concupiscentiæ, existentes in peccato mortali: Latro namque, vel homicida precatur Deum, ut sibi det vitam æternam, non tamen habet charitatem.

### Reflexio 328.

**P**roposita Divina dilectione, tradit Legislator varios modos, quibus in Deum feramur; inter quos principem locum tenet meditatio Divinorum præceptorum, ideo dicit *meditaberis in eis dormiens, atque confurgens*: In Hebræo autem habetur: *Cubans atque confurgens*, quia in ingressu lecti ad dormiendum, & in egressu ad vigilandum, debet homo cor suum reducere per dilectionem in Deum. Potest etiam intelligi de dormire. Licet enim in dormiendo nullus meditari possit præcepta Dei, quia tunc cessant potentiae rationales, & intenduntur animales; tamen possumus in mente habere, si velimus illa in vigilia efficaciter meditari: & tunc esset sensus, quod ita in die assuefaciamus nos ipsos in meditatione præceptorum Dei, ut etiam in nocte nobis veniant in somnijs. Et isto modo decepit quidam Servus Dominum suum. Consueverat enim illa mala, quæ faciebat per diem dicere etiam in somnijs: quapropter Dominus illius sciebat omnes iniquitates, quas servus perpetrabat. Videns igitur servus omnia mala sua palam fieri, prudenti consilio ductus, qualibet nocte ante accubitus, orationes quasdam, cum vehementissima attentione recitabat; ex quo fiebat, ut in somnijs illa repeteret, ob fortem impressionem causatam in Phantasia. Quare Dominus audiens orationes Servi, iudicavit illum



illum iustum ; nec illi licentiam, sicut disposuerat, dedit, sed apud se tanquam Sanctum retinuit, pia namque fraude deceptus est. Dicitur deinde in *Tex: Ligabis ea quasi signum in manu tua, & movebuntur ante oculos tuos* : Id est, nullo modo erunt tibi in oblivionem ; sicut homo non obliviscitur rei, quæ ante oculos suos appenditur. Et quia manus est ad operationem : tunc dicuntur præcepta Divina esse in manu nostra, quando operationi applicantur. Nihil enim refert mandata scire, & ea mente retinere, nisi secundum illa operemur : quandoquidem doctrina moralis inanis est, nisi reducat ad opus, ut patet ex secundo *Ethic.* Advertendum est autem, quod omnia prædicta, non sic præcipiuntur quasi debeant esse semper in actu. Nam si aliquis vellet continue meditari Deum, non posset ; quia fatigantur, & deficiunt organa ex corruptibilitate naturæ ; ideo intelliguntur præcepta affirmativa, tam Veteris, quam Novi Testamenti, quantum ad tempora congrua.

### Reflexio 329.

**P**ostquam Moyſes assignavit maximum præceptum de dilectione Dei, removet deinde tria impedimenta prædictæ dilectionis. Primum erat copia rerum temporalium, quam Israelitæ exeuntes de deserto, & accedentes ad terram promissionis habituri erant : homo namque, de penuria veniens ad magnam abundantiam, solet in semetipso elevari, & inherere bono sensibili, & sic à dilectione Dei recedit : tanto namque quis à superno amore disiungitur, quanto inferius delectatur. Ratio autem fundamentalis est. Quia bonum secundum veritatem, vel secundum quod à nobis tanquam bonum æstimatur, movet ad fruitionem suam ; qui autem est in adversitate, non habet apud se aliquod Fortunæ bonum quo frui possit ; ideo cogitur ad Deum, qui est summum bonum, recurrere, illique adhærere & in ipso sperare ; quapropter, ut experientia demonstrat, homines in al-

Bb 3

bori-




boribus, & ægritudinibus positi, magis Deum cognoscunt, & amant, quam temporibus sanitatis, vel prosperitatis. E converso autem, quando succedit homini status felicitatis, adhærent illi aliqua bona fortunæ, quæ ante non adhærebant. Et quia sunt sensibilia, maximè immutant. Bona autem æterna, sunt solummodo intelligibilia; & ideo in prosperitate homo recedit ab amore Dei: in præsentia namque boni sensibilis, quod valde immutat, intelligibile, quod respectu nostræ fragilitatis, minoris est potestatis, non potest immutare, loquedo naturaliter; ideo sanctus Dux populum sibi commissum monet dicens: *Cumque introduxerit te Dominus Deus in terram, & dederit tibi Civitates magnas, & optimas, & domos plenas cunctarum opum, & comederis, & saturatus fueris, caue diligenter, ne obliuiscaris Domini. Secundum impedimētum erat si Israelitæ iurassent per falsos Deos, ideo dicitur: Dominum Deum tuum timebis, & illi soli servies, ac per nomen illius iurabis.* Sciendum autem quod hoc non est Præceptum, sed permissio: videbat enim Deus Iudæos pronos ad iurandum; unde ne per nomina idolorum iurarent, permittit illis iurare per nomen suum. Ex hoc autem loco, aliqui Rabbini dixerunt: iuramentum esse frequentandum; sed prorsus erraverunt, quia numquam iurare licet, nisi adsit necessitas; alias esset contra secundum præceptum Decalogi, de non accipiendo nomen Dei in vanum; tunc enim in vanum assumitur, cum sine necessitate profertur. Unde Filius Dei dixit *Matth. 5. Sit sermo vester, est, est: non, non.* Tertium impedimentum erat si homo tentaret Deum; ideo dicitur: *Non tentabis Dominum Deum tuum.* Sciendum est autem, quod tentare, est velle capere experientiam de aliqua re dubia; unde amicus tentat amicum, ut sciat utrum in necessitate possit de illo se promittere. Sic ille dicitur tentare Deum, qui agit ut sciat, utrum Deus subveniat in necessitatibus: talitque tentatio magnum peccatum est, cum non solum sit præsumptio, sed infidelitas; nam talis homo dubitat de potentia, & bonitate Dei.

CAP.



## CAP. VII. Reflexio 330.



Icto de impedimentis amandi Deum, quæ  
 proveniunt à seipſis; hîc agitur de impedi-  
 mentis provenientiſ ab adverſarijs. Hoc  
 autem erat, ſi Hebræi in terra promiſſionis  
 contraxiſſent matrimonia cum Chananæis;  
 quia filij nati, edocti fuiſſent à Matribus in  
 ritu Gentili, à quo ut totaliter eſſent remoti  
 præcipitur hîc, ut Lucos ſucciderent, ideſt loca nemoroſa  
 conſita apud Aras, in quibus Chananæi Luxurijs vacabant,  
 poſt nefanda Sacrificia Priapi, in quibus erat omne genus  
 carnalis abominationis; tum in coitu maſculorum ad invicem,  
 qui vocabantur effeminati, ideſt habentes vicem fœminarum,  
 tum quia erat communis concubitus virorum cum fœminis;  
 nullo obſervato fœdere Matrimonij. Prædictæ autem horren-  
 dæ luxuriæ fiebant in locis obſcuris, in quibus propter mul-  
 titudinem arborum lux Solis prorsus tollebatur. Nam quan-  
 tumcumque homines turpes fuerint, tamen numquam per-  
 diderunt iſtam verecundiam, exceptis aliquibus Philoſophis,  
 qui ſub ſpecie rectæ rationis, introduxerunt, ut coniuges in  
 patulo coniungerentur; quia omne licitum, publicum eſſe  
 volebant. Tullius autem in Libris de Republica, loquens  
 de converſatione carnali coniugum, dixit: *Omnia recte facta  
 ſe collocari in lucem deſiderant; hoc autem recte factum, cum  
 ſciri velit, videri renuit.* Iubetur deinde Iſraelitis, ut dele-  
 rent Chananæos uſque ad internecionem: nam propter enor-  
 miſſimas ſuas iniquitates, erant ex Dei ſententia condemnati  
 ad mortem, & Hebræi erant executores Divinæ Juſtitia, quæ  
 nolebat amplius ſuſtinere tam inaudita, & replicata ſcclera.



## CAP. VIII. Reflexio 331.

**P**osita incitamenta Divinae dilectionis, hinc ponuntur  
motiva ad amandum, & timendum Deum ex consi-  
deratione suae munificentiae in beneficijs praeeritis,  
quae debent esse nobis materia, ad continuè Deum diligen-  
dum: licet multoties contingat, ex humana perversitate, ho-  
mines in gratijs Dei magis insolescere, dum non gratias de-  
bitas Benefactori suo reddunt; sed tunc magis Divina con-  
temnunt, quam antea facerent; ut in ipsis impleatur quod scrip-  
tum est: *Incrassatus, dilatatus, impinguatus, dereliquit*  
*Deum factorem suum.* Narrantur igitur hinc beneficia à Do-  
mino exhibita in deserto Israelitis: in quo, pro pane recepe-  
runt manna de Caelo, *omne delectamentum, & omnem sua-*  
*vitatem habentem;* nec vnquam defuit per spatium quadra-  
ginta annorum. Et quia non erant, in loco ubi possent sibi  
providere de vestimento; per Dei miraculum, in praedicto spa-  
tio, vestimenta alicuius non defecerunt vetustate. Et com-  
munitè dicunt Doctores: quod vestimenta puerorum cres-  
cebant eis, secundum augmentum suae quantitatis, quia non  
habebant unde possent emere sibi vestimenta. In itinere au-  
tem tam longo, & continuato, non fuit attritus pes eorum.  
Quod tamen beneficium solummodo bonis concessum fuit;  
sicut de Manna, quantum ad varios sapes dulcedinis: nam  
mali in itinerando satis laboraverunt, ut patet num. 11. ubi  
dicitur: *ortum est murmur populi quasi dolentium pro labore:* do-  
lor autem maxime fit in pedibus, pro itinere. Sed sacra Scri-  
ptura frequenter attribuit toti populo, quod tantum illi con-  
venit ratione unius partis.

CAP.



## CAP. IX. Reflexio 332.



Vpra posita fuerunt incitamenta ad amorem Dei per sua beneficia; hic alia ponuntur ex recordatione Divinae misericordiae, non solum patienter portantis peccata populi, sed etiam illa remittentis, & de proximo introducentis populum in terram copiosissimam, & omnibus bonis abundantem. Admonet tamen Sanctus Dux populum, ne in bono, & prospero successu praesumeret, talem felicitatem provenire ex proprio merito, & iustitia, nullus enim quantumcumque Sanctus, de felicitate terrena sibi proveniente potest gloriari; quia licet aliquis habens gratiam, possit per illam mereri etiam bona temporalia; tamen non habuit ex se illam gratiam, neque illam meruit, alioquin ut ait Apostolus, *gratia non est gratia*; ideoque in nullo gloriandum nobis est, nisi in infirmitatibus nostris. Gloria vero, & laudes tribuendae sunt Deo, qui magnitudinem dedit, & gratiam. Ad excludendam autem praedictam praesumptionem dat Moyses salubre consilium populo, dicens: *Ne obliviscaris quomodo ad iracundiam provocaveris Dominum Deum tuum in solitudine*: Memoria namque peccatorum fugat elationem, & comprimit tumorem superbiae; redditque hominem humiliorem, & cautiorem: adeo ut Deus aliquando permittit suos cadere, ut meliores fiant. Et sic indirecte, uni magis cecidisse profuit, quam alteri stetit, dum lacrymis, & continuo dolore maculas criminum praeteritorum delet. Qui autem peccavit, & se deliquisse oblitus fuit, omnium pessimus est, quia ex oblivione peccati iustus se facit aequalem. Advertendum tamen est, quod quando ex memoria peccatorum timetur periculum recidivi; ut est memoria circa obiecta delectabilia carnis; cavendum est a particulari, & vehementi recordatione talis peccati, ne inflammata concu-



concupiscientia, ad illa perpetranda redeamus: sunt enim obiecta valde moventia ad fruitionem sui. In his ergo sufficit dolere in generali. Quando vero nullum apparet delectabile, retineri debet peccatum in memoria, ut continuè detestetur.

## CAP. X. Reflexio 333.



Vpra posita fuit narratio peccatorum; hinc subditur eorum remissio. Signum autem placationis Divinæ fuit reparatio Legis in secundis tabulis. Narrat ergo Moyses qualiter oraverit pro populo in monte ad Dominum, qui eum exaudivit; adeo ut populum non disperderet, sicut meruerat propter peccatum idolatriæ: subdens, quod Deus post tam clementem remissionem nil aliud petit à populo, nisi ut timeat ipsū Deum. Ordo namque in gratiæ perfectione talis est, ut primò homo timeat Deum, tanquam iustissimum punitorem, & sic observet eius mandata; deinde per assiduam eorum observantiam, concipit in se verum amorem Dei. Ad hunc autem debebant incessanter Israelitæ tendere, considerando quod licet Deus, supremus Dominus sit Cœli, & terræ, totiusque creaturæ; tamen dicit, quod patribus eorum conglutinator est; ad declarandum videlicet amorem suum singularem erga filios Israel. Verbum enim, *conglutinare*, signat quandam unionem: amor enim est vis unitiva, faciens duos esse unum; nam amicitia est idem velle, & idem nolle; ideoque debebant totaliter adhærere Deo per purum amorem, totam spem suam ponendo in ipso. Hortatur autem eos, ut circumciderent præputium cordis; videlicet superflua, & nociva desideria. Sicut enim præputium in carne, videtur aliquod in ipsa carne superfluum; ita malitia voluntatis magis est per superabundantiam, quam per defectum: utrumque tamen malum est, cum in medio consistat Virtus.

CAP.



## CAP. XI. Reflexio 334.



IN superioribus à capitulo sexto usque hinc posita fuerunt diversa incentiva ad amorem Divinum; hinc infert Moyses intentam conclusionem dicens: *Ama itaque Dominum Deum tuum, & observa præcepta eius.* Et sic ponit amorem Dei tamquam radicem, seu principium totius operationis nostræ. Etenim qui vere diligit Deum, omnia mandata observat, quæ sunt quædam viæ directivæ actuum nostrorum in rectum finem. In Divinis autem Præceptis, debet homo ita applicari, ut non leviter ex quolibet motu cuiuslibet tentationis, vel laboris, concutiat, & recedat a via Domini, quam elegit, sed debet immobilis persistere. Amor enim Dei radicans in anima, fortior est quam mors. Etenim diligentes Deum, spernunt mortem in hac momentanea vita, ut eo fruantur in æterna. De fortitudine autem huius amoris, ait Apostolus: *Quis nos separabit à Charitate Christi? Tribulatio, an angustia, an fames, an periculum, an persecutio, an gladius?* Deinde Moyses incitat populum de novo ad amorem Dei ex beneficijs futuris, sub conditione tamen, si illi obtemperarent; promittens, quod Dominus respiceret eorum terram, dando videlicet rorem, & pluviam secundum opportunitatem temporum. Si vero declinassent à dilectione, & servitute Dei, tunc Dominus clauderet Cælum, ne secundum eorum necessitates bene influeret, sed pestem, & alios morbos causaret. Ex motu enim Cæli fiunt omnes generationes, & corruptiones in terra, secundum virtutem influxivam illi datam à Deo.

## CAP. XII. Reflexio 335.



OSTquam Moyses explanavit illa, quæ pertinent ad Præceptum Divinæ dilectionis, quod est principium respectu præceptorum Decalogi; hinc ponit alia Præcepta, & monitiones, quæ sunt quasi



quasi quædam conclusiones elicite ex ipsis Præceptis. Iubet igitur, ut Israelitæ ingressi terram Chanaam, subverterent omnia loca, in quibus Gentes coluerant Idola. Positurus namque Deus locum sui cultus, destruit primò locum mali cultus; quia viâ rationis, & naturæ, prius malum removetur, quam bonum instituitur. Cum igitur Divinum nomen deberet resonare in prædicta terra, in Sacrificijs, & oblationibus, & laudibus Divinis, primo destruenda erant profana nomina Idolorum. Erat autem in tota terra unus locus eligendus pro cultu veri Dei, ne ex multiplicatione locorum, fumerent Israelitæ occasionem idolatræ: & in isto solo debebant Hebræi offerre Hostias, easque comedere epulando coram Domino. Intendebat enim Deus inducere filios Israel ad veram religionem, sed quia isti nimis carnales erant, trahebat illos ad se per quædam gaudia corporalia; ut sic comedendo de melioribus, & abundantiori modo, quam alijs temporibus, allicerentur ad se exercendum in actibus Patriæ: per assuetudinem autem, relinquebant corporalem delectationem, & surgebant principaliter in cultum Dei. Sicut nunc homines per timorem servilem bene operantur, & per talem exercitationem provehuntur, ad amandum Deum ex Charitate. Hunc modum tenuit Christus Dominus in principio suæ prædicationis; dulciter enim cum peccatoribus comedendo permansit: & ideo valde proficuum est, ut boni viri oblectent malos homines, tribuendo illis temporalia; hoc enim temperamento, corda eorum ad bonum trahunt. Et utinam omnes Episcopi, & alij Ecclesiæ Dei ministri, hunc modum tenerent: tunc enim verba correctionis, suam efficaciam haberent, & tali esca, non solum ex officio, sed etiam in praxi, vere essent piscatores hominum.

CAP.



## CAP. XIII. Reflexio 336.



Imato cultu Latriæ, hinc ponitur pœna contra illos, qui auderent remove populū à tali cultu. Iubetur autem, quod si surrexisset Propheta in populo prædicens signum, atque portentum, & illud evenerit; postea vero dixerit debere sequi Deos alienos, talis Propheta occideretur, tamquam Propheta dæmonum: nam impossibile est ipsum fuisse Dei Prophetam, cum Dominus idolatriam zelet, & detestetur. Et licet evenerit quod prædixerat, tamen nihil refert; quia dæmones aliquando prædicunt futura, quæ excedunt humanam cognitionem: qua propter in isto casu erat tentatio permessa à Deo, ut populus ratione fidei mereretur, & coram alijs appareret eius virtus, & etiam coram se ipso; homo enim non se cognoscit, donec mediantibus adversitatibus, sibi ipsi innotescat. Sic Deus tentavit Abraham, dum iussit illi, ut proprium filium immolaret, ut per obedientiam tam duram, innotesceret futuris generationibus mirabilis eius virtus, & constantissima fides. Sed dices, Deus neminem tentat, ut ait *Iacob. Apost.* Dicendum, quod tentatio duplex est. Vna est instigatio ad malum, puta ad iram, vel libidinem, & hoc modo Deus neminem tentat; nam istæ passionēs sunt à nobis, idest à principio intrinseco; Vnde idem Apostolus ait: *Vnusquisque autem tentatur a concupiscētia sua abstractus, & illeſus.* Alia est tentatio, quæ est occasio exhibendæ virtutis, & de ista non loquitur Apostolus, sed de prima. Hinc de iustis, & amicis Dei dicitur *Sap. cap. 3. Deus tentavit eos, & invenit illos dignos se: tamquam aurum in fornace probavit illos, & quasi Holocausti hostiam accepit illos.* Deinde ponitur determinatio pœnæ illi Civitati, quæ perpetrasset idolatriam. Et iubetur, quod percuterentur habitatores illius in ore gladij, usque ad animalia. Suppellectiles autem flammis darentur, cum tota Civitate



Civitate; ut sic averteretur Dominus ab ira furoris sui. Per prædictum namque peccatum provocatur ira Dei contra totum Regnum, quando negligitur puniri; nam tunc alij consentire in scelere videntur.

## CAP. XIV. Reflexio 337.




Vpra posita sunt Præcepta immediatè pertinentia ad Latriam: hîc ponuntur quædam alia spectantia ad corporalem munditiam, quæ ordinabatur in Latriam; nam immundi prohibebantur ingredi loca sacra. Primò igitur interdicitur Iudæis, ne carnes suas inciderent in morte charorum; nec facerent sibi Calvitium, eradicando videlicet capillos, qui sunt in anteriori parte capitis super frontem: hæc enim omnia faciebant idolatræ, à quorum moribus semper Deus arcebat populum suum. Item, quia non erat à fidelibus multum plangendum in morte amicorum, vel parentum; ut sic videretur differentia inter illos, qui totum bonum hominis putabant cessare in morte; & illos qui hominem morientem ad maiora bona transire firmiter credunt. Immoderatus ergo luctus, non decebat filios Dei, qui habebant fidem Resurrectionis. Moderatus tamen, procedens ex naturali pietate, decet. Secundo prohibetur Israelitis, ne comederent animalia immunda. Sciendum est autem, quod nulla immunditia spiritualis potest esse in brutis, quæ peccare nequeunt; tamen potest aliquo modo redundare in eis, in quantum homines utuntur illis ad mala: utpote quia illa immolant idolis; vel eis utuntur ad maleficia. Immunditia vero corporalis, potest esse directè in animalibus; vel quia immundo cibo utuntur, sicut Porcus; vel quia in loco immundo habitant, ex quo contrahunt fetorem; & propter utramque causam, multa animalia prohibebantur in Lege veteri. Deinde inducitur populus ad sustentationem Sacerdotum, & reliquorum ministrorum Dei;



Dei: non enim potuisset cultus Patriæ exerceri sine ministris ad hoc deputatis. Tandem inducitur populus ad sustentationem pauperum, dum præcipitur, quod anno tertio separarent Israelitæ aliam decimam, ex omnibus, quæ nascebantur eo tempore, & ista vocabatur decima pauperis, quæ fiebat solum de triennio in triennium, ne Iudæi pauperes cogerentur quærere eleemosynas à Gentilibus, vel servire illis pro sustentatione vitæ suæ, ne per hoc ad idolatriam inducerentur.

## CAP. XV. Reflexio 338.



**D**ico de eleemosyna, quæ fiebat pauperibus, agitur hic de illa, quæ fiebat omnibus debitoribus, per remissionem debiti in septimo anno. Sciendum est igitur, quod si aliquis mutuasset fratri suo Iudæo pecuniam, poterat quidem creditor cogere debitorem, ut solveret ante annum remissionis, sed si ante septimum annum non fuisset solutum debitum, non compellebatur mutuarius amplius solvere illud. Nec poterat accipiens mutuum renunciare privilegio septimi anni, quia Lex ista erat principaliter introducta in favorem pauperum. Porro hic monentur divites, ne refugerent mutuare pauperibus, ex eo quod appropinquaret annus septimus; nam talis cogitatio impia esset, & tunc necessitas pauperis clamaret ad Dominum. Deinde excluditur alia fraus, quæ erat contra honorem Divinum, dum dicitur: *Non operaberis in primogenito Bovis, & non tondebis primogenita ovium*. Aliqui enim Iudæi, propter eorum avaritiam, volebant arare in primogenito Bovis: unde per tres annos apud se retinebant illud animal. Similiter tondere volebant ovem primogenitam, antequam ista animalia offerrent Deo, & sic duo mala veniebant. Primum erat, quia illa, quæ Deo sanctificata erant, converteban-



bantur ad usus humanos. Secundum erat, quia damnificabantur Sacerdotes, propter retentionem dictorum animalium, quia non habebant fructum. Si vero animal fuisset maculosum, non debebat offerri Deo, sed pretium dabatur Sacerdotibus. Et hoc erat; tum quia videbatur vilescere cultus Divinus; tum quia res Sacrae quanto pulchriores sunt, tanto magis elevant mentes ad Cœlestia, & æterna. Ex quo infertur licere Ecclesias valde pulchras esse, tam in ædificijs, quam in pretiosis suppellectilibus, ut hæc terrena pulchritudo convertat animos nostros ad contemplandum fulgorem patriæ Cœlestis. Hinc legimus antiquum illud Tabernaculum, iussu Dei erectum à Moyse in deserto, habuisse multa auri, & argenti pondera. Templum verò, quod Salomon construxit Mons aureus videbatur; nihil enim erat in eo, quod non esset aurum, vel laminis aureis tectum. Cavere tamen debent Episcopi, ne dum Ecclesiæ magnis ædificiorum, & vasorum copijs replentur, pauperes Christi Domini, fame pereant; absurdum enim esset, prosternere lapides vivos, ut lapides mortui erigerentur. Præpositus ergo Ecclesiæ Dei, unum faciat, & alterum non omittat.

## CAP. XVI. Reflexio 339.



Supra posita fuerunt Præcepta ordinantia ad Patriam de septennio in septennium; hæc adiunguntur alia, quæ idem ordinabant in quolibet anno, respectu trium temporum, in quibus Iudæi celebrabant festa solemnia, videlicet: In primo mense, *Festum Phasæ* propter beneficium egressionis de Ægypto. Secundum erat *Festum Pentecostes* in mense tertio propter beneficium Legis datæ. Tertium erat *Festum Tabernaculorum*, propter beneficium conservationis Israelitarum in Deserto sterilissimo, ubi habitaverunt in Tabernaculis. Præscribitur autem  
locus



locus in quo Phasē immolandum erat ; & iste fuit postea Civitas Ierusalem , electa à Deo ad suum cultum ; ut nimirum cum maiori reverentia fieret ista immolatio , dum celebrabatur in Civitate , in qua specialiter positum erat nomen Dei . Prima autem dies incipiebat à vespere decimæ quartæ diei primi mensis , & terminabat in primo vespere decimæ Quintæ diei ; & tota illa die , cum nocte sequenti , debebant remanere Iudæi in Ierusalem ; mane autem facto , poterant recedere . Prædicta immolatio debebat fieri vespere ad occasum solis , & vocatur solis occasus , non solum tempus , quo sol cadit sub Horizonte , sed tempus à quo sol incipit declinare à puncto circuli meridiani . Vnde post meridiem decimæ quartæ diei , usque ad noctem , quacunque hora poterat immolari Agnus . Per septem autem dies debebant Israelitæ comedere azymos panes , qui vocantur panes afflictionis , quia talis panis est insipidus gustui , & stomacho ponderosissimus , & ideo repugnat sanitati : nam miscetur farina cum aqua frigida ; sine sale , & frumento ; quæ omnia subtiliant , & digerunt . Volebat autem Dominus , quod Israelitæ hunc panem ederent , ut haberent memoriam afflictionis , & pavoris , quem sustinuerant in egressu de Ægypto ,

### Reflexio 340.

**P**ostquam posita sunt præcepta , quæ sunt quasi conclusiones præceptorum Decalogi ordinantes ad Deum , ponuntur subsequenter illa , quæ sunt conclusiones ordinantes ad proximum . Ordo autem inter homines consistit in diversis gradibus Civium bene institutis ; & quia nulla societas potest permanere absque Iustitia ; ideo præscribuntur Iudices , & Magistri , ut iudicent populum iusto iudicio , ad quod duo necessaria sunt . Primum quod iudicantes sint in Lege Sapientes , & prudentes , ut sciant applicare iustam determinationem ad causas , quarum determinatio non reperitur scripta . Alterum requisitum , est bonitas


Cc

nitas



nitas secundum virtutem moralem: nam dato quod aliquis sciat quid agendum sit, tamen si virtutis habitum non habeat, ducetur à passione ad oppositum: hinc *Ar.* ait 7. *Ethic.* Quod malitia corrumpit rectum iudicium, & errare facit circa principia practica. Sicut erraverunt Senes exardescientes in pulchritudinem Susannæ. Hoc autem maxime evenit, quando iudex diligit munera, quæ excæcant oculos, & faciunt deviare à rectitudine, ut expressè dicitur hîc in *Tex.* Voluit autem Deus, quod Iudices essent in portis Civitatum; quia sicut iudex est persona publica cuilibet iustum distribuens; ita congruebat ei locus publicus, ad quem omnes, sive divites, sive pauperes possent accedere. Et hunc modum acceperunt Stoici, quorum sollicitudo fuit, omnibus insinuare virtutem. Sedebant enim in portis Civitatum, ut omnibus transeuntibus ipsam virtutem prædicarent. Olim vero iudices ferebantur in curribus per totam Civitatem, ut volentes aliquid petere ab ipsis, exeundo ianuas domus, invenirent iustitiam. Honestius tamen est, litigantes ad Iudicem currere, quàm Iudices ad litigantes pergere; nam distributivum Iustitiæ, quod in Civitate potissimum est, debet haberi in magno honore; ideoque in publico iudex sedere debet; ut qui causas habent, ad audiendam illius determinationem humiliter accedant.

## CAP. XVII. Reflexio 341.



Vpra posita fuit materia circa quam Iudices laborare deberent; hîc ponitur modus executionis circa Idolatriam puniendam. Advertendum est autem, quod licet Gentiles colerent elementa, & aliqui res elementatas; tamen magis venerabantur corpora Cœlestia putantes illa, non solum animata, sed in illis esse Deitatem. Videbant enim habere potestatem in istis inferiori-



rioribus: quia vero Sol, & Luna magis cognoscuntur quam cœtera astra; ideo magis ista, quam reliqua corpora coluerunt. Item propter manifestam motus varietatem: nam aliquando ascendunt versus caput Canceri ad latitudinem Septentrionalem; aliquando versus caput Capricorni ad latitudinem meridianam. Stelle autem, quæ sunt in octava sphaera, non habent declinationes, quia in illa fixæ sunt. Planetæ verò, licet declinationes habeant, tamen motus declinationis non percipitur, nec iudicatur ab omnibus, sed solummodo à Sapientibus. Item quia Gentiles videbant maiorem virtutem emanare ab his duobus luminaribus, quam à cœteris Astris. Sol enim luce sua nos letificat, & calore sanos reddit. Distinguit tempora, & facit terræ nascentia germinare, & quicquid in terra occidit, vel oritur, in ipsius potestate est. Hinc *Ar. 2. de Generat. ait. Quod per accessum Solis, & recessum in Circulo obliquo fiunt Generationes, & corruptiones in terra.* Luna verò potestatem gerit super humida. Fluxus, & refluxus maris, per quadraturas suas, remissius, vel intensius fit; totiusque agriculturæ, quæ superhumiditatem fundatur, domina est. Vnde Gentiles, ut abundarent terræ nascentibus, offerebant ei libamina: idemque fecerunt Iudæi, vocantes illam, Reginam Cœli, ut patet *Ieremiæ 44.* Colebantur etiam à Gentilibus duodecim signa Zodiaci, magis quam alia astra. Quam impietatem secuti pariter fuerunt Iudæi, ut patet *4. Reg.* Causa huius dementiæ fuit: quia cōmunis conceptus omnium mortalium fuit, Deum esse Maximum Ens, & Maximum Bonum, & ideo, cum aliquod corpus inter cœlestia magis de virtute influxiva habere rusticana simplicitas videbat, affirmabat esse Deum. Et quia inter astra, & astrorum constellationes, nullæ magis virtuosiores sunt ad influendum, quam signa zodiaci; ideo mortalium temeritas, & avaritia dicta signa Deos putabat.



## Reflexio 342.

**P**ost remotionem idolatriæ agitur de institutione Regis. Circa quod sciendum: quod illud quod hîc dicitur, non est præceptum, alioquin peccassent filij Israel petendo sibi Regem, cuius contrarium dicitur *Pr. Reg. 12.* sed est permissio de malo ipsius populi optantis sibi Regem. Nam bonum populi consistebat in hoc, quod solus Deus regnaret super illum, eoquod erat peculiaris suus populus. Sed quia Dominus sciebat populum petiturum Regem, posuit hîc conditiones illius, ne totale malum, in tali electione accideret. Magna namque regulatio necessaria est in Rege, & ideo non debet, poni nisi virtuosissimus. Est enim periculosum, omnia uni committere, ex 2. *Polit.* Inter Politias tamen, nulla melior est quam Regalis. Et ratio ea est, quia principatus sunt meliores, inquantum sunt minus seditiosi: nullus autem principatus seditione caret, nisi regalis, quia unus non potest discordare à seipso. Plures autem licet virtuosi sint, plerumque discordant: hinc *Arist. 12. Metaph.* ait; *Malum esse pluralitatem.* Non poterant autem Iudæi eligere in Regem hominem alterius Gentis, quantumcumque eis bonus videretur; quia nullus bonus esse potest, qui Deum verum non colit, conversus ad vanitatem simulacrorum, in quorum cultu suprema malitia consistit. Electo autem Rege, prohibuit illi Deus multiplicationem equorum, quod intelligitur ad iactantiam, non vero quoad decentiam sui status. Similiter ei interdicitur plurimas habere uxores. Non prohibetur igitur pro illo tempore simpliciter pluralitas uxorum, cum David, qui fuit sanctus, sex uxores habuerit; sed solummodo quod non haberet in numero excessivo; ne Rex induceretur ad nimiam carnalitatem. Prohibentur similiter Regi auri, & argenti immensa pondera, ne nimis gloriaretur divitijs. Moderata tamen pecunia non illi interdicitur; hæc enim erat necessaria propter



propter quotidianas expensas, & subitanea pericula, quæ regno suo poterant occurrere. Vnde de Rege fortasse dicere possumus id quod ait *Arist. secundo polit. de Civitate*: Quod non debeat esse, nec valde dives, nec valde pauper; nam si esset valde dives aggredieretur multa contra alios populos, ut opprimeret. Et tunc aliæ vicinæ politiæ insurgerent contra illam; vel alij populi ob magnas illius divitias, conspirarent contra illam, ut opibus illius ditarentur. Et sic patet, quod nimia copia divitiarum inquietam reddunt Civitatem, dum vel illa non quiescit, vel alij eam quiescere non sinunt. Non debet autem esse nimis pauper, quia præ inopia non posset sustinere hostiles incursus.

### Reflexio 343.

**S**Ecuta Regis electione, iussit Dominus, ut statim sibi describeret Deuteronomium, accipiens exemplar à Sacerdotibus. Et dicunt Hebræi, quod debebat habere volumen duplicatum. Vnum ad servandum in loco Thesauri sui, tamquam aliquod preciosissimum. Aliud vero ad portandum secum continuè, ut posset illud frequenter legere. Et sic disceret semper timere Dominum Deum suum, nec elevaretur in superbiam: hæc enim omnia consequuntur ad continuam Sacræ scripturæ meditationem. Timor enim servilis primò causatur: nam cum aliquis legit tot genera afflictionum peccatoribus inflicta, satis magnam occasionem habet, ad fugiendas iniquitates. Post hunc timorem subsequitur timor reverentialis, seu filialis, per quem homo cavet, ne illum offendat quem valde venerandum, & amandum putat: Nam ex lectione Divinæ Scripturæ reperimus magnam Dei potentiam, & sapientiam in admirabilibus operationibus suis; Immensamque bonitatem, in quotidiana beneficiorum largitione. Ex quo deinde in amorem, & obsequium erga Deum tendimus, & cavemus, ne Summum Bonum offendamus. Ex timore igitur venit observantia Le-



gis, & ex tali observatione, repressio passionum, ne in iactantiam, & superbiam elevemur. Quæ quidem omnia, specialiter Dominus prohibuit Regi; quia iste inter homines aliquod maximum, & excellentissimum est: unde cernens se omnibus maiorem, putare posset, se nihil debere subditis; ita quod nullum iustum esset inter eum, & subditos; sicut nec est inter hominem, & possessionem suam, *ex 8. Ethic.* Et ideo voluit Deus, ut Rex constitutus, statim consideraret per meditationem Legis, quod talis honor, non erat illi datus propter seipsum, sed propter alios, ut eos regeret, & illis inserviret. Vnde quidam Rex dixit filio suo, qui post se regnare debebat: *Nescis Fili, Regnum nostrum esse splendidam servitutem?* Et Homerus non vocavit Agamenonem bonum Regem, sed bonum Pastorem populorum; quia Rex debet curam gerere populi sui, sicut Pastor proprii Gregis, & ideo hinc *in Tex.* vocantur illius subditi, eius fratres: frater enim æqualitatis nomen est, ut sic existimaret eos sibi æquales in natura, quos voluntate Dei regendos suscipiebat.

## CAP. XVIII. Reflexio 344.



Vpra egit Legislator de statu Iudicum Sacerdotum; hinc agit de eorum sustentatione. Tribus enim Levi, non habuit partem in terra promissionis, nisi urbes ad habitandum, & suburbana ad alenda pecora; ideoque debebant de bonis aliorum sustentari, nam Persona publica debet vivere de sumptibus publicis. Sacerdotes autem, & Levitæ erant personæ publicæ, cum loco totius communitatis essent assignati ad ministerium Dei. Insuper instruebant populum, docentes qualiter vita esset dirigenda; ne igitur vacarent sæcularibus negotijs, sustentari debebant à populo. Etenim quælibet communitas etiam Genti-



Gentilium, determinavit aliquos ministros ad Divina peragenda, quibus dabantur omnia necessaria; ut patet de Ægyptijs, qui de horreis publicis ministrabant frumenta Sacerdotibus suis, & insuper assignatæ fuerant illis terræ particulares. *Hinc Arist. 8. Ethic.* ait, quod communicatio in Sacrificijs, & festivitatis Deorum, est quædam pars communicationis politicæ: Ideoque dicit quod debentur de communi determinari sumptus sacrificiorum, quia magna pars status politici est in honore deorum.

### Reflexio 345.

**P**ost præceptum de sustentandis Sacerdotibus veri Dei, removentur filij Israel à quibusdam abominationibus populorum inhabitantium terram promissionis: isti namque, per Sacrificia nefanda dæmonibus exhibita, querebant veritatem de futuris stando super tumulos mortuorum. Debebant enim filij Israel querere veritatem in lege Dei. Vbi autem legis determinatio non sufficeret, promittitur illis prophetica revelatio, dum dicitur: *Prophetam de gente tua, & de fratribus tuis sicut me suscitabit tibi Dominus Deus tuus, ipsum audies.* Ista autem auctoritas, licet possit intelligi de quolibet Propheta bono, tamen intelligitur principaliter de Christo Domino, qui fuit Propheta magnus, ad quem Prophetiæ aliorum Prophetarum ordinatæ fuerunt. Vndè Filius Dei testatus est hanc auctoritatem de se intelligi, ut patet *Joan. 5. & Lucæ 24. & Actu 3.* Principalis igitur sensus litteralis est de Christo Domino; Secundarius verò potest applicari Iosue, & cuilibet ali vero Propheta: Nam una littera potest importare duos sensus litterales, quando unus subordinatur alteri. Suscitavit etiam Deus aliquos Prophetas de Gentibus, ut patet de Iob, & de Sybillis, quæ multa prophetaverunt etiam de Christo Domino: Nam Cumana Sibylla vaticinata est Incarnationem Filij Dei dicens: *Iam nova progenies Cælo dimittitur alto.*



Et Sibylla Eriythrea prædixit Iudicium futurum dicens :

*Iudicij signum tellus sudore madescet ,*

*Et Rex adveniet per secula cuncta futurus .*

Hæc etiam prophetavit , Troiam bello perituram , & Homerum Græcorum Vatem , qui postea per multa tempora natus est , mendacia locuturum . Fertur autem Sibyllam Cumanam attulisse novem libros ad Tarquinium priscum , ac pro eis poposcisse trecentos Philippeos . Rege autem aspernante , ob magnitudinem pretij , in eius conspectu combussit tres libros , postulans idem pretium pro reliquis : cumque à Rege ut fatua irrideretur , tres alios combussit , petens pro tribus remanentibus idem pretium . Tunc Tarquinius commotus constantia mulieris , iussit statim dari pretium , præci- piens dictos tres libros in Capitolio religiosissimè servari , & à solis quindecim Viris de rebus dubijs , veluti oracula , consuli . Aliqui Doctores dicunt , quod libri omnium Sibyllarum in Capitolio servabantur , etiam magno tempore post Christum natum , & volentibus monstrabantur , exceptis tribus libris Sibyllæ Cumanæ . Demum omnes libros Sibyllinos Stillico , cum adversus Honorium , & Arcadium Principes defectionem moliretur , combussit ; de quo pulchrè cecinit Rutilius :

*Ne tantum patrijs serviret Proditor armis ,*

*Sancta sibyllina fata cremavit opus .*

## CAP. XIX. Reflexio 346.




Explicatis illis , quæ pertinent ad statum sublimium personarum , hæc ponuntur illa , quæ pertinent ad bonum statum inferiorum . In rectissimis namque Politijs nihil inordinatum manere debet . Et primò ponuntur illa , quæ ordinant hominem quantum ad irascibilem . Deordinatio autem partis irascibilis maximè apparet



ret in homicidio; quapropter lex ordinabat, quod occidens totaliter à casu posset refugium habere in aliqua determinata Civitate, ne consanguinei occisi in vindicando mortem illius, multiplicarent homicidia. Si vero homicidium commissum fuisset per insidias; tunc occisor, manens in Civitate refugij, tradebatur in manu proximi, cuius sanguis effusus fuerat, ut moreretur. Homicidium autem, & quodlibet aliud delictum, non probabatur per unicum tantum testem, sed per duos ad minus. Et ratio ea est, quia unus potest faciliter errare, vel corrumpi, quod non præsimitur in duobus. E contrario autem, si necessarij fuissent multi testes, auferretur via ad inveniendam veritatem, propter difficultatem inveniendi multos testes; ideoque, tam Divina quam humana iura, moderationem dederunt, ut nec unus sufficeret, nec valde multi prærequerentur. In ferendo autem testimonio, si quis aliquis dixisset contra fratrem suum falsum testimonium, puniebatur in eo quod facere tentavit; reddendo animam pro anima; oculum pro oculo, & hoc ut cœteri timorem haberent. Intentio namque cuiuslibet Legislatoris, in pœnarum inflictione est, ut subditi arceantur à scelere: magis enim intendit correctionem illorum, qui nondum mali sunt, sed possunt fieri mali, quam punitionem illorum, qui iustà ratione peccati commissi, torquentur.

## CAP. XX. Reflexio 347.



Acto de homicidio à particulari persona commissio, hic agitur de homicidio facto in communi, videlicet in bello, in quo Sacerdos debebat animare milites bonis exhortationibus, ad strenuè, & sine ullo timore certandum: nam per timorem cordis destituuntur membra exteriora ab actibus suis. Cum autem Israelitæ pugnarent pro Religione, & pro gloria Dei, longe ab eis timor



more esse debebat; quia Deus in bello iusto, per specialem protectionem adiuuat certantes. Post verba Sacerdotis, statim debebant Duces per singulas Turmas, audiente Exercitu, proclamare, ut quatuor genera hominum arcerentur à bello. Primus erat ille, qui domum ædificaverat, nec illam dedicaverat, hoc est, solemnizaverat. Pro quo sciendum, quod tunc temporis, antequam Dominus domus ibidem moraretur, invitabat amicos, cum quibus in ea epulabatur, & ista lætitia vocabatur dedicatio domus. Sicut solemnitas, quæ fit in consecratione Ecclesiarum vocatur dedicatio, & transfertur hoc ad quamlibet rem novam, dum ea uti incipimus. Ratio huius remotionis erat: quia talis homo cogitabat de domo prædicta vehementer; & ideo nolebat Deus, quod maneret in Castris; quia laxaretur animo, & remissè pugnaret, distractus à prædicta apprehensione. Secundus erat ille, qui plantaverat vineam, nec fecerat esse communem. Pro quo sciendum, quod tunc temporis, quando plantabatur vinea, fructus trium annorum erant immundi; quarto vero anno offerebantur Domino; in quinto autem possessor illius recipiebat fructus, vocabatque amicos ad comedendum de fructibus vineæ, & tunc dicebatur vinca facta communis; talis ergo homo debebat à castris recedere; quia multum afficiebatur ad fructus gustandos plantatæ vineæ, & per consequens iudicabatur ineptus ad fortiter bellandum. Tertius erat ille, qui desponsaverat Vxorem, non consummato cū illa matrimonio: animalis enim homo, circa primos sponsæ suæ amplexus, ardentissimo tenetur amore; ideo talis removebatur à castris; quia per distractionem ex vehementi concupiscentia causatam, non erat aptus ab bellum. Complacbat enim Deus Israelitis, quia populus adhuc carnalis, & rudis, à maximis, & licitis delectationibus arcendus non erat. Quarto loco repellebantur formidolosi, hoc est homines multum timentes: formido namque excessivum timorem denominat; non vero repellebantur illi, qui parum timidi erant; quia difficile est medium, circa timores,

& au-



& audacias habere. Nam materia cuiuslibet virtutis divisibilis est, & simpliciter medium adipisci, valde laudabile est; quapropter modicum declinare à medio timiditatis, vel audaciæ, non est vituperabile; sed solum damnandus est, qui multum excedit, vel deficit: formidolosi autem multum deficiunt à fortitudine, ideò à castris totaliter repellebantur.

### Reflexio 348.

**P**ost remotionem illorum, qui erant inepti ad pugnam, sequitur de divisione spoliarum: etenim in bello, devictis hostibus, sequuntur communiter prædæ. Inducuntur autem hic superiores ad actum iustitiæ distributiæ in dividendo exercitui ipsas prædas. In omni namque communicatione, & amicitia, est aliquod iustum inter communicantes, ut ait *Ar. 8. Ethic*: & quanto illud iustum maius est, tanto amicitia, & communicatio maior erit. Si vero nullum, tota amicitia dissolvitur. Pater hoc etiam in amicitia criminosa, seu communicatione: nam latrones, qui communicant in lucro, dum inter eos fit æqualis distributio rerum ablatarum, continuant amicitiam, & communicationem ad invicem; sed si aliquis maiorem partem sibi studeat appropriare, statim cessat amor, & litigia sequuntur. Hoc enim mirabile habet iustitia super cæteras virtutes, quod actus illius, tam in bonis, quam in malis requiritur ad commanendum; actus autem aliarum virtutum, prærequiruntur ad solam permanentiam in bono, ad malum autem nequaquam: & ob hoc *Ar. 5. Ethic*: vocavit iustitiam optimam virtutem, & inter cæteras excellentem, sicut Lucifer inter astra; nam ablata iustitia, nihil sunt Regna, nisi publica latrocinia, teste *Augustino 4. de Civit. Dei*. In bello autem, si Duces pro se prædam accipiant, nihil, aut modicum militibus dividentes; tunc isti non curant de pugna, labores refugiunt, vitam periculis non exponunt; sed data fuga, castra relinquunt: nihil enim magis est, quod aliquem Principem vinci ab hostibus faciat, quam



quam avaritia erga suos milites; hinc libro primo Alexandri-  
driedis dicitur:

*Nec Mania, nec Turres Ducem tutantur avarum.*

## CAP. XXI. Reflexio 349.



Ostquam actum est de homicidio, cuius auctor cognoscebatur; hinc consequenter agitur de illo cuius auctor penitus ignorabatur, & præscribitur modus inveniendi ipsum homicidium. Seniores enim illius Civitatis, quæ proximior erat cadaveri, debebant accipere vitulam, quæ non traxisset iugum; quia debebat esse fortis, & non fracta labore. Et hoc ad designandum ferocitatem committentis homicidium. Deinde ducebatur ad vallem asperam, & saxosam, & hinc cedebantur cervices illius: ad signandum, quod homicida, & etiam celantes ipsum homicidium, erant digni tali morte. Deinde, maiores Civitatis accedebant ad interfectum; tum ut magis moverentur intrinsecus, & abhorrerent falsum dicere; tum quia, presente occisore, est quoddam quasi naturale miraculum, ut vulnera occisi sudent sanguineum humorem, sicut multoties visum est. His peractis lavabant seniores manus suas; ad designandum, quod erant innocentes, & mundi à crimine; tamen per istam lotionem non fiebat intrinsece ulla munditia, sicut aliquæ Gentes putaverunt. Vnde Hercules lavit se in quodam fonte Libiæ, & sic credidit, se à cunctis piaculis absolutum: hinc Agareni in suis delubris habent fontes, in quibus sepiissime se lavant, putantes per hoc diluere sua facinora. Veruntamen, solum in Ecclesia Dei habet aqua vim luendi interius in anima peccata; quia nimirum Christus Dominus, tactu suæ sanctissimæ carnis, vim regenerativam tribuit aquis, ut deinde sequeretur plena remissio peccatorum.

Re-



## Reflexio 350.

**D**icto de homicidio, subsequitur de his, quæ solent præcedere ex odio. Sciendum est autem, quod licet prohibitum esset filijs Israel, accipere mulieres Chananæas; tamen propter effrenatam ipforum libidinem, concessit Deus, ut possent accipere Vxores de alijs Gentibus captas in Bello, dimisso tamen Gentilitatis ritu, hoc modo: radebat enim talis mulier sibi Cæsariem, & Ungues: per quæ designabatur dimissio Gentilitatis, & conversio ad Iudaismum; nam abscissio capillorum, & unguium significabat abrasionem cultus idolatriæ, qui vanus, superfluous, & superstitiosus est. Deinde deponebat vestem, in qua capta fuerat; per quod significabatur depositio actuum exteriorum, & habitus totius veteris conversationis. Tandem sedens flebat Patrem, & Matrem, tanquam actualiter mortuos; quia compassio naturalis exhibenda est semper parentibus; nec decet filios, sine cordis amaritudine, præterire funera parentum. His celebratis, ducebatur in domum Iudæi, eratque verè uxor illius. Sed quia frequenter contingebat, quod talis mulier fiebat odiosa marito: nam mulieres alienigenæ, cum habeant mores totaliter dissimiles, sunt odibiles viris suis, prohibetur hinc iniuria, quam posset illi facere maritus. Et præcipitur, quod si non placuisset oculis suis, teneretur illam dimittere liberam, absque ullo pretio recepto ab ea, vel à parentibus; nec poterat illam vendere, quia ex quo facta fuerat ei Vxor, non erat decens, quod rediret ad conditionem Ancillarum. Secundo excluditur effectus odij, respectu prolis, dum dicitur: quod si aliquis habuisset duas uxores; unam dilectam, & alteram, odiosam, si filius odiosæ fuisset primogenitus, non poterat pater, propter odium erga matrem, privare filium iure primogenituræ. Licebat autem tempore veteris testamenti habere plures uxores, maxime quia ante legem datam



datam, multi Sancti Patres plures uxores habuerunt. In hoc autem erat duplex ratio: in antiquis enim Patribus fuit desiderium multiplicandi populum Dei, qui promissus fuerat numerosus, sicut stellæ Cœli, & sicut arena maris, & per consequens hoc erat aliquo modo virtuosum, cum ad hoc non excitaret desiderium explendæ libidinis. Secunda causa erat permissio Dei: Israelitæ namque erant tam effrenatæ libidinis, quod si non habuissent plures uxores, adulteria, & alia vitia perpetrassent,

### Reflexio 351.

**P**ost remotionem odij parentum erga filios, præcipitur obsequium filiorum erga parentes, dum ipsis strictè imponitur obedientia; adeo ut si contumaces, & protervi fuissent, debebant à toto populo lapidibus obrui: filius namque tenetur audire præceptum patris, & matris, nisi mandaverint iniustum; est enim subditus illis, sicut populus Regi; quia principatus paternus est Regalis, & filij omnia beneficia recipiunt à parentibus, inter quæ principem locum tenet Esse, cui nullum bonum ei comparari potest, etiam si omnia simul sumantur, cum Esse sit perfectio absoluta, & fundamentum omnium perfectionum, tam naturalium, quam supernaturalium. Deinde prohibetur odium, quod posset aliquis habere contra damnatum ad mortem, & ideo agitur hic de illius tumulatione, & iubetur eadem die sepeliri; tum quia hoc erat opus misericordiæ; tum quia si cadaver in ligno diu mansisset, videbatur quidam contemptus humanæ naturæ, dum pars illa puniretur, quæ iam peccati, & malitiæ expers est. In textu autem redditur ratio huius determinationis, dum dicitur de suspenso: *Quia maledictus à Deo est*. Et accipitur maledictio pro pœna suspensionis inflicta à Iudicibus, qui in terra locum Dei tenent. Et in hoc sensu dixit Apostolus ad Galat. 3. de Christo Domino, quod *factus est pro nobis maledictum*; id est patiens pœnas



poenas, & habens dolores acerbissimos, sicut de ipso prædixerat *Isaias Cap. 53.* non verò culpam habens; ex qua maledictione secuta est in Gentibus benedictio Abrahæ. Supradicta autem lex, non tenetur à nobis universalitèr, quia hoc est præceptum Iudiciale. Iudicialia autem non manèt in novo Testamento, nisi instituantur ab Ecclesia, vel à Principibus temporalibus, per quos tribueretur eis aliqua vis. Licèt autem decens sit nostram honorare naturam; tamen quia maxima utilitas interdum accidit Reipublicæ, si criminosi pendeanr multis diebus in patibulis, ut ex hoc spectaculo arceantur subditi à sceleribus; iudicatur plerumque à nostris Iudicibus optimum esse relinquere Reorum membra in patibulis, & maxime in loco commissi delicti, usque ad totalem resolutionem.

## CAP. XXII. Reflexio 352.

**I**ostquam Moyſes ordinavit Irascibilem respectu personæ coniunctæ; hîc illam ordinat respectu non coniunctæ. Ad partem autem irascibilem pertinet, si homo subtrahat auxilium proximo, quia videtur hoc procedere ex odio, & importat non solum defectum pietatis, sed signum crudelitatis: ideò dicitur, quod animalia errantia reducantur ad domum proximi, ut per hoc Israelitæ excitarentur ad amorem suorum proximorum, saltèm per exteriora signa. Et ad hoc quod magis crescerent in pietate, ordinatur Irascibilis etiam respectu creaturæ irrationalis, dum iubetur, quod *non capiatur Avis simul cum filiis*. Ad crudelitatem namque pertinere videbatur, si avicula cum pullis caperetur. Et propter eandem rationem, prohibebantur Iudæi arare in Bove, & Asino, quia Bos est fortior, & habet maiorem passum, & per consequens Asinus nimis gravaretur. Non solum autem ordinatur irascibilis respectu damni corporalis; sed etiam



etiam respectu damni spiritualis: ideoque prohibetur, ne mulier utatur veste virili, nec vir veste foeminea; talis enim abusus est occasio libidinis exercendæ; posset enim mulier liberius conversari cum hominibus, & viceversa Vir cum mulieribus. Item, quia hoc erat superstitiosum; nam Gentiles mulieres in profanis Sacrificijs Martis, portabant arma virorum; & in nefandis Veneris Sacris, Viri portabant vestes, & instrumenta Mulierum, puta, fustum & similia. Deum ad magis ordinandam Irascibilem, præcepit Deus, quod in circuitu tecti domus fieret murus ad præcavendum periculo casus hominibus desuper ambulantes. In terra namque promissionis, tecta domorum erant plana: ibique conveniebant homines, causa recreationis: quapropter nisi fieret ibidem quoddam retinaculum, immineret periculum casus.

## Reflexio

353.

**O**rdinata parte irascibili, consequenter ordinatur concupiscibilis. Et primò reprimendo adulterium, pro quo decernitur poena lapidationis, tam viro, quam mulieri. Sciendum tamèn est, quod vir non arctabatur tantum legibus matrimonij, sicut Vxor. Vndè nunc etiam secundum Leges humanas, licet vir commisceatur alicui mulieri solutæ, non punitur. Sed mulier quocunque modo commisceatur alteri, etiam soluto, meretur mortem. Ratio differentiae est: quia magis in hoc foemina offendit virum, quam vir mulierem. Nam illa, facit hereditatem viri sui transire ad filios alienos, quos suscepit ex fornicatione cum alio, vel suscipere poterat. Maritus autem non, quia sola foemina cognoscit filios suos. Item, quia magna iniuria fit statui politico, dum filij degeneres assumuntur ad publicos honores, cum isti familiam patris sequantur; quod valdè inconveniens est, ut probat *Arist. 2. Polit.* contra Socratem, & Platonem. Reprimitur secundò concupiscentia ratione Stupri, Et



Et dicitur, quod si quis puellam sponsam proximi sui deflorasset in Civitate, uterque lapidaretur. Vir quidem, quia humiliavit uxorem proximi sui. Puella vero quia non clamavit, cum esset in civitate ubi poterat defendi ab iniuria, per homines accurrentes, & ideo lex præsupponebat ipsam confessisse. Si vero puella fuisset in agro, lapidabatur solummodo Vir; quia lex præsumebat, quod puella clamasset, ut deflorationem evaderet; sed non potuisse habere auxilium, & ideo non consensisse in peccatum. Ea enim quæ æqualiter bona, vel mala esse possunt, in bonam partem sunt interpretanda. Si autem quis deflorasset virginem non sponsam, debebat dare patri puellæ quinquaginta siclos, & illam semper habere in uxorem, si pater dare voluisset. Nec poterat eam dimittere toto tempore vitæ suæ, nisi propter adulterium. Ista autem erat magna pœna; quia cuilibet Iudæo, erat libertas repudiandi uxorem, qua libertate privati, nimis ægre ferebant Israelitæ talem legem.

## CAP. XXIII. Reflexio 354.



**D**eclaratis illis, quæ pertinent ad ordinationem partis irascibilis, & concupiscibilis; hinc consequenter ponuntur illa, quæ pertinent ad ordinationem partis rationalis; tum respectu boni communis; tum respectu boni singularis personæ. Sciendum est autem, quod bonum commune, maxime tempore pacis, ex tribus conservatur. Primum est, si bona, & honesta coniugia copulentur: tunc enim bona proles in Republica procreatur. Secundum est, si personæ immundæ elongentur à Divinis. Tertium, si personæ viles, & defectuosæ, ad honores, & regimen populi non admittantur; ideo hinc excluduntur Eunuchi, tamquam immundi ab ingressu Atrij, in quo solum homines mundi orabant. Nec illis tribuebatur in temporalibus

D d

bus



bus regimen populi; quia cum essent impotentes ad generandum, non decebat eos honor paternus, qui consistit in regimine populi. Vnde antiquitus Iudices, & Gubernatores populi, vocabantur Patres conscripti. Similiter excludebantur Manseres, Nothi, & Spuriij; quia nimirum, propter defectum natalium sunt multum contemptibiles, & periculosum est tales exaltare; quia subditi, & maximè Nobiles, non æquo animo tales sustinent, propter vilitatem originis: ideo dicitur hìc, quod eunucus, & manser non ingrederentur Ecclesiam Dei, usque ad decimam generationem. Sciendum est autem, quod Ecclesia potest accipi tripliciter. Vno modo, pro congregatione populi, & sic frequenter accipit. *Arist. 2. Polit.* Et tunc est sensus, quod Manseres, non intrarent in Ecclesiam Domini, hoc est, non darentur eis uxores de multitudine filiorum Israel. Secundo modo, accipitur pro loco sancto, ad quem poterant ingredi Laici, ut offerrent, & comederent hostias pacificas. Et ad talem locum non poterant intrare supradicti, quia reputabantur immundi. Tertiò, accipitur pro multitudine, quatenus habet ordinationem ad Rectores; & sic dicitur aliquis intrare Ecclesiam, cum datur ei principatus, vel officium. Ad hanc igitur assumptionem prohibentur supradicti, utpote personæ contemptibiles. Vnde etiam nunc in Novo Testamento, tales personæ meritò repelluntur ab ordinibus, & dignitatibus. Ammonites vero, & Moabitæ conversi ad Iudaismum, non intrabant Ecclesiam Dei in æternum. Ægyptij autem, & Idumæi conversi, intrabant in Ecclesiam post quartam generationem. Et ratio diversitatis erat, quia isti non peccaverant tam graviter contra populum Israel, sicut Ammonitæ, & Moabitæ; nam Ægyptij afflixerunt populum per persecutionem corporalem; & Idumæi similiter occurrendo in gladio filijs Israel, ut patet *Num. 20.* sed Moabitæ, & Ammonitæ persecuti sunt eos spiritualitèr, per mulieres suas, inducentes populum ad luxuriam, & idolatriam. Assignatur etiam hìc alia ratio: quia nimirum Idumæi descenderunt  
de



de Esau fratre Iacob; & sic erant quodammodo fratres Israelitarum: Ægyptij vero receperunt filios Israel in terram suam tempore famis; ideo istæ duæ Nationes, post temporis decursum, admittebantur ad contrahenda matrimonia, & ad Sanctuarium, & dignitates.

## Reflexio 355.

**D**icto de ordinatione partis rationalis, attendendo ad bonum commune tempore pacis; ordinatur subsequenter eadem potentia respectu temporis belli, quo ad bonum totius Reipublicæ, quod consistebat principaliter in munditia spiritali; nam quando Israelitæ mundè serviebant Deo, dabatur illis victoria; quapropter hic dicitur: *Quando egressus fueris adversus hostes tuos, custodies te ab omni re mala*: videlicet ab omni culpa; licet enim debeamus omni tempore custodire nos ab omni inquinamento peccati; tamèn hoc maxime fieri debet, tempore belli; ne tunc Deum iritemus, quando propitium habere in tam gravi necessitate debemus. Consistebat secundò bonum populi, in munditia corporali; ideo dicitur, quod si fuisset homo, nocturno pollutus somnio, debebat egredi extra castra; nec ad illa reverti, nisi ad vesperam lavaretur aqua. Et idem erat de alijs immunditijs; sed ponitur ista, pro exemplo, ut idem intelligatur de reliquis. Deinde precipitur assignatio loci extra castra ad requisita naturæ, & hoc propter reverentiam Divinæ Maiestatis. Nam in motione castrorum Sacerdotes cum Arca transibant per loca, ubi castra fixa fuerant. Et licet Deus non possit pollui sordibus locorum; tamen, quia mundare sordes in conspectu alicuius est honor inter homines, ideo hoc debebat fieri, in conspectu Dei, cui quilibet supremus honor semper, & ubique tribuendus est. Prohibetur deinde oblatio postribuli: irreverentia namque magna fuisset, si de mercede pollutissima aliquod oblatum Deo fuisset. Et similiter pretium canis,

D d 2

quod



quod intelligitur, secundum aliquos, de pretio, quod accipiebatur ab illis, qui locabant canes venaticos, & custodes ovium, ad impregnationem canicularum; erat enim turpe, & immundissimum lucrum, & perconsequens vilissima oblatio. Alij dicunt quod intelligitur de primogenito canis, qui cum esset animal immundum non poterat offerri. Et quamvis pro primogenitis aliorum animalium immundorum, darentur quinque sicli pro redemptione, ut habetur *Num. 18.* tamen pro primogenito canis, non dabantur, propter vilitatem huius animalis, sed interficebatur.


### Reflexio 356.

**P**ostquam actum est de ordinatione partis rationalis, quod ad bonum commune, subsequitur de illius ordinatione, attendendo ad bonum singularis personæ. Iubetur ergo ne Israelitæ traderent servum Domino suo, & intelligitur de servo, qui de terra aliena confugisset ad terram promissionis: & hoc fiebat in favorem fidei; ut nimirum ille servus habitans inter Iudæos, converteretur ad cultum veri Dei. Secundò præcipitur pietas erga proximum pauperem dum dicitur: *Non fenerabis fratri tuo ad usuram, pecuniam, nec fruges, nec quamlibet aliam rem, sed alieno.* Istud autem est permissio minoris mali, ad vitandum maius, scilicet ne Iudæi gravarent usuris fratres suos; erant enim avarissimi: unde si eis non fuisset permissum dare pecuniam sub usuris, extraneis, tradidissent illam sub fœnore proprijs concivibus. Tertiò iubetur personis singularibus fidelitas erga Deum: ad quam requiritur, quod homo adimpleat omne id, quod ei promisit per votum, quod solummodo fit Deo: nam vovere est actus Patriæ, quæ nulli alij, quam Deo tribuenda est. Dicitur ergo quod vovens non tardet reddere id quod vovit; magis enim acceptatur à Domino cum citò, quam dum serò redditur. Solicitos igitur nos esse oportet in adimplendo: etenim non reddentes promissa, Deus severe punit suo tempore



pore. Est tamen maior culpa, cum quis votum solemne infringit; quia circumstantia notoreitatis aggravat. Deinde post fidelitatem Deo debitam, præscribitur fidelitas erga proximum. Quapropter concedebatur quidem alicui ingredi vineam alterius, & comedere de fructibus: non tamen portare ad domum suam. Intentio namque Divinæ Legis erat inducere Hebræos ad amicabilem communicationem rerum suarum ad invicem; ideoque concessit in talibus esum, & prohibuit excessum, nempe deportationem extra, quia hoc pertinebat ad infidelitatem, & nimiam cupiditatem.

## CAP. XXIV. Reflexio 357.



Isto de legalitate circa quasdam personas non coniunctas, hic agitur de legalitate circa coniunctas. Et ordinatur per hoc pars rationalis in vita domestica, quæ maximè consistit in cohabitatione viri cum uxore, & quia contrariorum eadem est disciplina; ideo primo agitur de separatione viri ab uxore. Ad durtiam enim cordis Hebræorum, permissum illis fuit repudium. Licet autem repudiatio non esset præcepta, tamen conscriptio Libelli erat iussa repudianti; & hoc in favorem mulieris, ut posset alteri nubere. Insuper in Libello protestabatur vir, numquam petere ab illa debitum. Secuto autem repudio, non poterat amplius illam habere in uxorem. Et hoc disponebat Lex, ut Israelitæ essent minus proni, ad repudiandas uxores. Dabat deinde repudians omnia, quæ pertinebant ad ius uxoris; nempe bona dotalia, & partem bonorum de communi acquisitorum. Ratio autem, cur Lex vetus permittebat repudium; Lex autem Evangelica non, ea est: quia licet lex vetus esset à Deo, tamen erat data non universaliter, sed solummodo particulari politiæ Iudæorum, & per consequens intendebat solummodo bonum illius gentis. Sed


D d 3

illi



illi genti adhuc infirmæ, expediebat magis repudiare uxores, & usuras exercere cum alienis, ne Israelitæ uxores occiderent, & fratribus suis fœnerarent; ideo utrumque illis permissum est, non tamquam bonum, sed tamquam minus malum. Lex autem Evangelica, non est data alicui particulari populo, sed toti Mundo; quæ sicut absolutè omne iustum respicit, ita absolutè omne malum prohibet. Intendit enim id, quod est secundum se bonum; nec respicit utilitatem, vel bonum statum Politicæ quantum ad mundana incrementa, sed bonum spirituale cuiuslibet personæ. Et quia quodlibet malum est destructivum boni alicuius personæ spiritualis; ideo omne malum prohibet. Lex autem, quæ respicit bonum alicuius gentis specialiter, cuiusmodi erat lex vetus, non oportet, quod omne malum absolutè prohibeat; sed solummodo illud, quod est malum illi Politicæ, quam gubernat. Igitur illa lex dicitur simpliciter bona, quæ non deviat in aliquo ad id quod malum est: sed quicquid in ea continetur, est simpliciter bonum. Ex hoc patet, quod inter omnes legislationes humanas cuiuslibet Politicæ, nulla invenitur quæ sit simpliciter bona, ita quod in nullo deviet à bono simpliciter, ad id quod est malum simpliciter. Immo non debet legislator ponere alicui Politicæ optimam Legem simpliciter, quia seculares sunt imperfecti; ideoque non debet illis præscribere legem simpliciter perfectam, quia illam continuo frangerent, ob eorum imperfectionem.

## CAP. XXV. Reflexio 358.



Vp̄ia dictum fuit de directione rationalis, circa varias commutationes; hîc agitur de directione eiusdem circa distributiones pœnarum. Et primo de causis civilibus, quæ propter varias commutationes civium occurrere solent, ex quibus oriuntur contentiones: nam homines habent desideria inordinata, magisque volunt aliena repere, quam propria




pria largiri ; ideo ad ista sedandaponuntur Iudices , ad hoc ut iustè determinent, & ubi oportet, statuunt pœnas , & præmia , sic enim faciendo , pax Civitatis imperturbata permanet. Deinde determinatur pœna in causa matrimonij, quando videlicet moriebatur homo sine liberis : tunc enim frater defuncti , tenebatur uxorem illius accipere , ut suscitareret semen fratri suo . Primus enim filius , ex tali matrimonio procreatus , adscribebatur fratri defuncto , eique succedebat in hereditate . Ratio huius determinationis fuit, quia talis filius magis videbatur pertinere ad defunctum , quam si natus esset ex extraneo , & ideo quando recusabat frater superstes hoc facere, puniebatur pœna confusibili, tamquam devians à charitate fraterna . Tollebat enim uxor defuncti calceamentum de pede illius, & in eius faciem expuebat, tamquam homini indigno, & vocabatur nomen illius, *Domus Discalceati*, ut istud vituperium transiret ad posteros, & per hoc homines abhorrerent denegare suscitationem seminis fratrum suorum . Per ablationem autem calceamenti, signabatur talis homo privatus omni honore, à maximo usque ad infimum . Supradicta vero suscitatio, intelligebatur solummodo de fratribus maioribus : ut si frater primogenitus moreretur sine filiis, sequens frater tenebatur accipere eius uxorem ; & si iste moreretur similiter sine filiis, sequens frater tenebatur accipere eius uxorem, & sic de alijs . Si vero frater minor mortuus esset sine filiis, non tenebatur frater maior suscitare semen fratris sui minoris ; quia prædicta suscitatio fiebat ad conservandas familias primogenitorum, per quos principaliter descendebat linea patrum . Deinde ponitur pœna pro mulieris impudentia , quæ pro defensione viri sui, tenebat inimici pudenda : puniebatur enim, tum propter turpitudinem rei gestæ ; tum quia auferebatur ab homine possibilitatem se defendendi ; nam propter dolorem non poterat se movere : tum quia alia via honestiori poterat mulier procurare defensionem viri sui . Tandem exclusa iniustitia per severitatem pœnæ, concluditur Iustitia,



tia, dum dicitur: *Non habebis in sacco diversa pondera.*  
Vt nimirum homo cum maiori emeret, & cum minori men-  
sura venderet.

## CAP. XXVI. Reflexio 359.




Vpra, à cap. 12. usque nunc, fuerunt posita præ-  
cepta, quæ sunt quædam conclusiones elicite  
ex præceptis Decalogi; hinc ponitur intenta con-  
clusio, nimirum quod homo sit gratus Deo pro  
beneficijs receptis. Gratitude autem hominis  
ad Deum, debet esse non tantum in corde, sed etiam in ope-  
re; ideoque præcipiuntur Primitiæ, & Decimæ, in quarum  
actuali solutione profitebantur offerentes alta voce, se rece-  
pisse à Deo beneficia in multiplicatione terræ nascentium.  
Facta vero oblatione in Sanctuario, offerentes vacabant  
Epulis, admittentes secum ad convivia Levitas, & Advenas.  
Levitæ namque erant pauperes; nam interdum non sufficie-  
bant redditus decimarum, & aliarum rerum, ad ipsos susten-  
tandos. Similiter Advena, idest, ille qui de Gentilitate ad  
Iudaismum conversus fuerat: tales enim sunt valde pauperes,  
cum extra patriam sint; ideoque illos misericorditer foveri  
oportebat, ut alij Gentiles incitarentur ad cultum unius  
veri Dei. Sciendum autem, quod Decimæ regulariter erant  
duæ. Vna quæ dabatur Levitis; altera vero, quæ conser-  
vabatur pro pauperibus, & ista fiebat in tertio anno, & non  
presentabatur in Sanctuario, sed dimittebatur in singulis  
Civitatibus, pro Pauperibus, Viduis, & Pupillis. Porro  
offerentes primitias, protestabantur coram Deo, se non co-  
medisse de illis in luctu suo, neque in necessitate sua. Si ta-  
men fuisset magna necessitas, licitum erat comedere ex il-  
lis, sicut David, & Pueri sui comederunt de panibus pro-  
positionis, quibus vesci tantum licebat Sacerdotibus. Item  
profebantur, se non separasse decimas pro aliqua immun-  
ditia



ditia exercenda. Nam licet peccatum esset absolute, comedere de primitiis, & decimis separatis pro oblatione fienda Deo; tamen maius crimen fuisset, applicare decimam ad aliquem usum profanum. Sicut, si modo in Ecclesia Dei patrimonium Christi Domini, pauperibus debitum, & solæ sustentationi ministrorum, daretur canibus, consanguineis, luxui, meretricibus, & alijs contaminationibus.

## CAP. XXVII. Reflexio 360.



**I**n hoc capitulo excitatur populus ad observantiam Legis, per maledictiones transgressoribus inferendas, & præcipitur populo, ut transmissio Iordane, erigeret ingentes lapides, quos ferrum non tetigisset; videlicet dolando, vel quadrando; quandoquidem bene permittebatur, quod tangeret illos ferrum, dum extraherentur de lapidicina, quia in hoc adhuc manebant informes, cum non reducerentur ad aliquam distinctam figuram. Determinabatur autem hoc, ut Iudæi totaliter elongarentur ab idolatria, ad quam nimis erant proclivi. Super hos lapides, secundum aliquos Doctores, totum Deuteronomiū fuit inscriptum. Secundum vero alios, fuerunt scripta, solummodo decem præcepta Decalogi. Videtur tamen melior prima sententia, nam hic in *Tex.* dicitur: *Omnia verba legis huius.* Ista autem lex distinguitur contra primam, quæ fuit data in monte Sinai, ut patet infra cap. 29. ubi dicitur: *Hæc sunt verba federis, quæ præcepit Dominus Moysi, præter illud fædus, quod cum eis pepigit in Ore.* Poterat autem scribi in lapidibus prædictis totum Deuteronomium; quia erant ingentes, & levigabantur calce benè temperata, ita quod scriptura non fiebat immediate in lapide, sed in calce, ut tenacius imprimeretur, & possent fieri litteræ parvæ. Inter maledictiones autem, quæ hic ponuntur, prima, & principalis



lis est, contra illos, qui facerent sculptile, idest statuam ad adorandum; quia idolatria est maximum peccatum, adeout in scripturis sanctis, passim vocatur per antonomasiam, peccatum; quia per hoc nimis elongatur homo à Deo, dum cultus debitus Deo, tribuitur lapidi: unde in lege antiqua, si aliquis ex Israelitis in publico statuam erexisset, ut illam adoraret, puniebatur morte per Iudices; si autem in occulto, reservabatur tale peccatum Divino Iudicio puniendum; idemque, de omnibus alijs maledictionibus positis hìc: quia omnia occulte fieri possunt.

## CAP. XXVIII. Reflexio 361.



Vpra positæ sunt maledictiones; hìc ponuntur benedictiones, supposita observantia Divinæ Legis: exprimuntur autem benedictiones secundum ea, quæ solent homines desiderare in præsentì vita, & maxime, imperfecti, sicut erant tunc Iudæi, qui optabant prosperitatem domus suæ, quæ consistit principaliter in fecunditate prolis, & abundantia bonorum temporalium; ideoque ista primò prædicuntur. Cupiunt deinde imperfecti, honores, & dignitates maxime sublimes, & ista promittuntur dum dicitur: *Constituet te Dominus, in caput, & non in caudam*. Quod idem est, ac dicere: dominaberis alijs, & nemo dominabitur tibi; caput enim inter alias partes obtinet principatum, tam situ, quam dignitate. Situ, quia super omnes est. Dignitate vero, quia ab illo derivatur motus, & sensus ad alias partes. Deinde prædicatur transgressoribus Divinæ Legis supplicium, nempe penuria temporalium bonorum, his verbis: *Sit Cælum quod suprate est aneum, & terra quam calcas, ferrea: det Dominus imbrem terræ tuæ pulverem, & de Cælo descendat super te cinis*. Per quæ verba, extrema penuria denotatur: in duobus namque consistit rerum commestibilium fertilitas, scilicet



et in superiore aeris dispositione, & in terræ congrua susce-  
ptione; cum autem aliquid horum cessat, tunc sterilitas  
contingit, ideoque ponitur in Cœlo influente durities, &  
in terra suscipiente privatio humiditatis, quæ necessaria est  
ad fructus producendos. Loco enim imbrium humectan-  
tium terram, assignatur pulvis, qui totaliter humiditate pri-  
vatus est; & cinis, qui est in ultimo gradu desiccativus, cum  
sit ultima resolutio corporis combusti, per actionem ignis  
perfectam. Tandem prædicitur inter alia, ignominia, priva-  
tio libertatis, dum dicitur: *Reducet te Dominus classibus in*  
*Ægyptum*. Hoc autem fuit impletum in destructione Ierusa-  
lem per Titum. Capta namque Civitate, omnes Iudæi fue-  
runt captivati, in tantum quod dabantur triginta Israelitæ,  
pro uno denario, & ideo oneratae fuerunt plures Naves de  
ipsis, in quibus ducti fuerunt Alexandriam, quæ est in  
Ægypto, ut ibi carius venderentur.

## CAP. XXIX. Reflexio 362.




Onitur in hoc Capitulo prædictarum benedictio-  
num, & maledictionum susceptio. Sicut enim  
Israelitæ in Oreb professi sunt, se suscipere Le-  
gem Dei, illamque observare; sic explicata ea-  
dem Lege per Moysen super Iordancum, & ma-  
nifestè expressis maledictionibus, & benedictionibus, promi-  
serunt prædictam legem inviolabiliter observare sub præ-  
dictis conditionibus. Volebat enim Deus in susceptione  
Legis voluntatem, & consensum Israelitarum, ut ipsi in hoc  
mererentur: nam etiam si non consensissent, tamen remane-  
bant obligati, quia Dominus mandabat. Secundo, ut in  
excusabiles essent; & ideo contra inobservantes prædicitur,  
quod Deus non ignosceret. Quando enim peccata sunt ex  
infirmirate, vel ignorantia, Deus faciliter indulget, respiciens  
nos tamquam ex fragili massa procreatos. Quando vero pec-  
catum



catum ex pura malitia committitur, non ita facile Deus ignoscit, licet semper ignoscat, quantumcumque grave peccatum sit dummodo sincero, & contrito corde veniam petamus. Ad magis autem inducendum populum ad observantiam Divinæ Legis commemorat sanctus Dux Divina beneficia, & maximè tria, nempe, educationem de Ægypto, quæ importabat totalem libertatem relicta domo servitutis, & regale dominium in terra Chanaam. Secundo recolat conservationem in deserto sterilissimo; in quo vestimenta eorum non fuerunt attrita, & filijs suis vestimenta crescebant, parvulis ipsis ad maiorem ætatem venientibus. Similiter calceamenta semel facta, duraverunt semper illesa per quadraginta annos. Tertio refert victoriam à Deo illis concessam de duobus potentissimis Regibus Schon, & Og, ex quibus concludebat Sanctus Dux, quod observarent Israël Legem Dei, & timerent illius transgressionem; ne post Divina beneficia, experirentur rigorem Divinæ Iustitiæ.

### CAP. XXX. Reflexio 363.




**S**upra posita fuit multiplicatio poenarum pro peccantibus; hic ponitur earum relaxatio pro poenitentibus: vera namque poenitentia Deum placat, & punitionem debitam removet; & ille qui debebat recipere punitiones, & flagella, recipit bona à Deo. Advertendum est tamen, quod licet in Sacra Scriptura promittantur prosperitates, nulla conditione apposita, tamen semper intelligitur earum impletio, si homo cui fit promissio, permanserit in eodem statu bonitatis; ideoque hic in *Tex.* dicitur: *Revertetur Dominus, ut gaudeat super te in omnibus bonis, sicut gavisus est in patribus tuis; si tamen audieris vocem Domini Dei tui, & custodieris præcepta eius.* Ex quibus verbis manifeste patet, quod status bonitatis necessario prærequiritur, ad conse-



Consequendam promissionem bonorum; adhærendo videlicet per charitatem Deo, qui est vita nostra; idest ille à quo sumus, vivimus, & movemur. Est enim primum agens, & continuus gubernans. Nam cum sit prima causa, in omnem rem influit, maxime, & semper ut patet in *pr. prop. lib. de caus.* Vnde hoc notum est, quod si Deus ab agendo, vel conservando ista inferiora desisteret per unicum tantum momentum, omnia necessario redigerentur in nihilum; quia licet sint multæ causæ semper agentes, naturaliter subordinatæ; tamen quia istæ causatæ sunt à Deo, & ab ipso conservantur, sunt ab eo necessario dependentes; tum in essendo, tum in operando; quapropter, si generalis gubernatio, quantumcumque modica cessaret, prædictæ causæ perirent, & per consequens omnes res in nihilum reducerentur, sicut erant antequam à Deo crearentur.

## CAP. XXXI. Reflexio 364.



**I**N superioribus posita fuerunt præcepta; hinc consequenter inducitur populus ad perseverantiam in Lege, per modum cuiusdam testamenti; nam Moyses de proximo erat moriturus. Præmittitur tamen institutio novi Ducis: fuit enim necessarium, quod adhuc vivente Moyse, institueretur eius successor, ne post eius mortem surgeret in populo, semper ad malum propenso, seditio. Vocavit ergo Moyses Iosue, prædicens ipsum introducturum populum Dei, in terram promissionis, dixitque illi: *Confortare, & esto robustus.* Quali diceret ne formides suscipere onus tanti regiminis, quia Deus in omnibus te prosperabit. Iosue namque formidabat tantum onus subire, considerans, quod Moyses, qui erat talis, ac tantus; tamen gravatus mole dignitatis, & tantis replicatis seditionibus tumultuantis plebis, peccaverat ad aquas contradictionis.

Sed



Sed quia audivit voluntatem Dei esse, ut post Moysen regeret populum, humiliter obedivit, sed non se ingessit; quia ille, qui dignitatem petit, vel superbe appetit, non est eligendus, sed repellendus, cum per hoc sit prorsus indignus consequi Prælationem. Vocatus ergo Iosue non recusavit, sed obedientiam suo superiori exhibuit. Tunc Dominus apparuit in Columna Nubis: ut nimirum, per præsentiam Divinæ suæ Maiestatif in signo visibili, esset Iosue maioris auctoritatis in conspectu totius populi; omnesque illum recognoscerent tamquam Dei ministrum, ab ipso specialiter electum; & ut per hanc apparitionem, haberet de cætero sanctus Dux imperturbabilem constantiam in proximis bellorum eventibus, dum manifeste cognoscebat suam electionem approbatam à Deo, per signum coelitus missum coram omni populo sibi commissio.


### Reflexio 365.

**P**ost institutionē Ducis, ponitur instructio Plebis obtemperare debentis, quia Dux nihil proficeret, nisi plebe principaliter Deo, secundariò Principi obediret. Quæ quidem obedientia per Legis memoriam conservatur; ideo Moyses illam scripsit, & tradidit Sacerdotibus: ad quos enim spectat docere populum, ipsam Legem explanando. Præcepit autem illis, ut legerent verba Legis in septimo anno semper; quia tunc filij Israel, liberati à debitis, poterant melius ire ad Templum, & Legem attentius audire. Similiter in festo Tabernaculorum; quia in tali solemnitate manebant Israelitæ pluribus diebus in loco sancto, quam in alijs festivitatibus. Iussit etiam sanctus Dux, quod lex non solum legeretur adultis; sed etiam parvulis, ut sic eorum mentibus magis imprimeretur. Primæ namque impressiones fortissimæ sunt; quia in pueris organa receptiva tenera sunt, & per consequens fit fortior impressio. Adde quod pueri nullas adhuc species aliarum rerum receperunt; ideoque anima,



anima, toto conatu se vertit super id, quod ei proponitur. Cum autem factæ sunt multæ impressiones, non potest totaliter intendere, novis supervenientibus, & ideo secundæ impressiones debiliores sunt, & tertiæ magis, & sic de alijs. Quapropter videmus, quod homines occupati circa multa, faciliter ab illis elabuntur illa, quæ de novo audiunt: quia ista radican- tur remissè in anima ad plurima intenta: hinc *Ar. 2. Ethic.* ait, quod non modicum refert, à iuventute sic, vel sic assuescere. Et Plato voluit, quod homines à tenera ætate instruerentur ad recte lætandum, & tristandum, quia in his est perfecta disciplina.

## CAP. XXXII. Reflexio 366.



Es-cripta institutione Ducis, ponitur hìc exhortatio Plebis, ad perseverantiam in Divinis mandatis; & hoc per Canticum memoria retinendum, & iugiter voce decantandum, in quo Cœlum, & Terra vocantur in testimonium: tum ad comprehendendam omnem creaturam; tum ad perpetuam durationem Testium; tum ad significandam firmitatem verbi: quia inter res sensibiles, nullæ creaturæ sunt ita firmæ, sicut Cœlum, & Terra. Recolit autem Moyses in hoc Cantico Divina beneficia, ad maiorem peccati aggravationem. Nam, cum tanta Deus pro Israelitis egisset, debebant totaliter abhorrere prevaricationem Divinæ Legis. Primum autem beneficium fuit Creatio, quod notatur cum dicitur: *Numquid non ipse est pater tuus, qui possedit te, & fecit, & creavit te?* Secundum fuit electio gratuita, quæ designatur illis verbis: *Quando dividebat Altissimus Gentes quando separabat filios Adam, constituit terminos populorum, iuxta numerum filiorum Israel.* Pro intelligentia testus sciendum, quod in confusione Linguarum divisæ sunt Gentes per totum orbem, & populi distincti, secundum



secundum septuagintas linguas, & huius numeri præcisæ fuerunt filij Israel, in Ægyptum descendentes cum Iacob. Et tunc populus Israel fuit Deo specialiter dedicatus, alijs ad Idolatriam declinantibus. Tertium fuit, separando populum ab Idolatris, dum Deus liberavit Abram de terra Chaldæorum, ubi vigeat idolatria, quod notatur cum dicitur: *Invenit eum in terra deserta in loco horroris, & vasta solitudinis.* Vocatur autem Chaldæa *terra deserta*, quia erat privata cultu Dei. Et dicitur *locus horroris*, nempe timoris; quia homines per timorem à Nembrod illis incussum, cogeantur adorare ignem. Quartum fuit, paterna dilectio, qua Dominus eduxit filios Israel de captivitate ægyptiaca, ducens eos per desertum, & custodiens illos specialiter in omnibus necessitatibus: quæ omnia notantur cum dicitur: *Circumduxit eum, & docuit, & custodivit, quasi pupillam oculi sui: sicut Aquila provocans ad volandum pullos suos, & super eos volitans, expandit alas suas, & assumpsit eum, atque portavit in humeris suis.* Pro intelligentia *Tex.* notandum est, quod Aquila, ut provocet filios ad volandum, volat super eos, ut ipsi volare concupiscant. Sic Deus volens educere de Ægypto Israelitas, provocavit illos ad exeundum, per multa mirabilia, quæ fecit. Præterea Aquila, quando vult transferre Pullos de loco ad locum, portat eos super humeros: non enim à parte superiori, sed ab inferiori timet, ne emittantur sagittæ, & ideo ponit pullos super humeros suos, ut magis ipsa, quam filij, percutiatur telis: sic Angelus, repræsentans personam Dei, posuit se inter castra filiorum Israel, & Ægyptiorum super mare rubrum, ne illorum sagittæ læderent Hebræos. Quintum fuit, solemnis introductio in terram promissionis, quæ habebat omnium bonorum abundantiam, quod notatur illis verbis: *Constituit eum super excelsam terram, ut comederet fructus agrorum, & sugeret mel de petra, oleumque, de saxo durissimo.*

Re-



## Reflexio 367.

**E**Narratis divinis beneficijs, ponitur consequenter ingr-  
titudo Hebræorum: perversus enim populus, in crassa-  
tus delicijs, impinguatus divitijs, ditatus honoribus,  
& dilatatus terreno dominio, recessit à Deo benefactore suo.  
Ista enim solent homines deducere extra metas rationis, mul-  
tisque malis, & varijs sceleribus implicare. Prædicitur vero  
ingrato populo iusta ultio, illis verbis: *Ignis succensus est in  
furore meo, & ardebit usque ad inferni novissima; devorabitque  
terram cum germine suo, & montium fundamenta comburet.  
Congregabo super eos mala, & sagittas meas complebo in eis.*  
Vocatur autem nomine ignis ultio Divina, quia iste est ma-  
gis afflictivus. Et facit comparationem de magno igne, qui  
non solum terram comburit, & incinerat; sed etiam montium  
fundamenta exurit. Sic pœna inflicta à Deo, totum hominem  
peccatorem eradicat, & potentes viros, cuiusmodi sunt  
Reges, & Principes, quando vult, evellit ab eorum tempo-  
rali sublimitate. Pœnæ vero inflictæ à Deo, vocantur Sagittæ,  
quia ut plurimum improvisis nobis, & non expectantibus  
adveniunt. Sunt enim firmiter retentæ in Dei Thesauris; vi-  
delicet in secretissimis penetralibus divinæ suæ Sapientiæ,  
ad puniendum peccatores suo tempore: pro omni namque  
culpa debetur pœna; vel quam homo sibi imponat, vel quam  
Deus illi infligat; non enim decet, relinquere dedecus culpæ,  
sine decore Iustitiæ.

## Reflexio 368.

**P**ostquam denunciata sunt mala futura populo Israel  
propter sua peccata, consequenter denunciatur hîc  
destructio suorum adversariorum: fuit enim iste modus  
Prophetarum, ut post denunciationem pœnæ debitæ pecca-  
tis, prædicerent deinde flagella inimicorum, ad aliqualem

E c

conso-



consolationem populi Dei. Et hoc rationabiliter, quia licet infideles, essent executores Divinae Iustitiae puniendo Israelitas, qui Deum offenderant; tamen hoc non faciebant ex amore, vel obedientia ad Deum; sed ex cupiditate nocendi, vel ex aliqua alia mala voluntate, & ideo merebantur à Deo puniri, quia non intendebant exequi Divinam Iustitiam, sed destruere divinum cultum, qui apud Iudaeos vigeat. Deus autem voluntatibus malis hominum utitur solummodo ad gloriam suam, convertendo sua providentia perversas illas voluntates, ad bonum Iustitiae; specificat enim ad bonum, actum malum. Prædicatur ergo punitio adversariorum illis verbis: *Laudate Gentes populum eius, quia sanguinem servorum suorum ulciscetur, & vindictam retribuet in hostes eorum.* Adverte autem, quod accipitur hic totum pro parte, secundum morem Divinae Scripturae. Licet enim in populo Israele essent multi mali, tamen cum illis erant multi boni, & isti frequenter cum malis interficiebantur, vel captivi ducebantur; sicut patet de Tobia, & Daniele cum socijs suis, & de vindicta taliū servorum Dei, loquitur hic Divina Scriptura.

### CAP. XXXIII. Reflexio 369.



Via in superiori Capitulo, fuit prænunciata à Deo mors Moysis, ponitur hic benedictio eiusdem super quamlibet Tribum. Mos enim erat Sanctorum Patrum, imminente morte sua, benedicere filios, ideo Moyses hoc observavit. Ponitur autem primo benedictio Ruben, his verbis: *Vivat Ruben, & non moriatur, & sit parvus in numero.* Hoc autem dixit Moyses, concordans dicto Iacob, Genes. 49. Deinde benedicatur Iuda, his verbis: *Audi Domine vocem Iudae: manus eius pugnabunt pro eo, & adiutor illius contra adversarios eius erit.* Ista autem dicuntur, quia de Iuda descendere debebant Reges, qui clamarent in bello adiu-



adiuari à Domino; ut patet de David, qui toties clama-  
vit liberari à persecutione Saulis; & Asa ab exercitu Æthio-  
pum; Iosaphat ab Ammonitis, & Ezechias ab exercitu Se-  
nacherib: Dicitur *Manus eius pugnabit pro eo*; quia usque  
ad electionem Saulis, Tribus Iuda habuit Ducatum belli, ut  
patet *Iud. 1.* Tertio loco, benedicitur Levi his verbis: *Per-  
fectio tua, & Doctrina tua viro sancto tuo, quem probasti in  
tentatione, & iudicasti ad aquas contradictionis. Qui dixit  
patri suo, & matri sue nescio vos, & fratribus suis, ignoro vos:  
& nescierunt filios suos: ponent Thymiama in furore tuo.* Dici-  
tur *perfectio tua, & doctrina*; quia vita sancta debet esse cum  
scientia indivisibiliter annexa Sacerdotio, & hæc doctrina,  
derivata est à Moyse ad Levitas. Et dirigendo verba ad  
Deum, dicit se fuisse à Domino probatum *ad aquas contra-  
dictionis*, dum illi decrevit pœnam mortis. Et quia filij Levi  
ad præceptum Moyſis interfecerunt propinquos suos, propter  
culpam contractam in adoratione Vituli, ideo talem Tribum  
dicitur ignorasse patrem, & matrem. Propter huiusmodi  
autem zelum, fuit talis Tribus electa ad ministrandum Deo  
in Altari, ubi ponebatur Thymiama, ad avertendum furo-  
rem Dei, à populo peccante: oblato namque Sacrificio cum  
Thymiamate, auferebatur divina indignatio. Quarto loco  
benedicitur Benjamin, his verbis: *Amantissimus Domini habi-  
tabit confidenter in eo quasi in Thalamo, tota die morabitur, &  
inter humeros illius requiescet.* Pro intelligentia *Tex.* scien-  
dum, quod in sorte Benjamin futurum erat Templum, in quo  
speciali modo habitabat Dominus, & vocatur *Thalamus*, ad  
denotandam requiem contemplationis, & vacationem ab  
omnibus curis mundanis. Dicitur *Inter humeros illius re-  
quiescet*: Quia licet humeri sint in superiori parte corporis;  
tamen inferiores sunt capite: & per hoc pulchrè designabatur  
locus ædificationis Templi. Nam licet hoc ædificatum fue-  
rit in monte Moria, nō tamen in summitate montis, sed prope  
ipsum, & sic erat ibi illa proportio, quæ intercedit inter  
humeros, & caput. Quinto loco benedicitur Ioseph, his



verbis: De benedictione Domini terra eius; de pomis Cœli, & Rore, atque abyſſo ſubiacente; De pomis fructuum Solis, ac Lunæ, de vertice antiquorum montium; de pomis collium æternorum. Benedictio illius, qui apparuit in Rubo, veniat ſuper caput Ioseph, & ſuper verticem Nazaræi inter fratres ſuos. *Quasi primogeniti tauri pulchritudo eius.* Dicitur de benedictionibus Domini terra eius, quia ſors Ioseph erat valde fertilis. Dicitur de pomis Cœli, & rore, atque abyſſo ſubiacente; quia arbores fructificant ex influentia Cœli, & Stellarum; terra autem humectata, eſt apta ad fructificandum; humectatur autem à ſuperiori parte, ex deſcenſu roris; ab inferiori vero, ex aquis latentibus ſub terra, quæ nomine abyſſi deſignantur. Dicitur de pomis fructuum Solis, & Lunæ; ad deſignandum quod inter Cœli luminaria, Sol, & Luna habent maiorem efficaciam ſuper terræ naſcentia: dicitur de vertice antiquorum montium; quia ibi fructus citius ad maturitatem veniunt, & propter novitatem magis diliguntur: dicitur Benedictio illius, qui apparuit in Rubo. id eſt Dei, qui apparuit Moyſi in Deſerto in Rubo ardente. Vocatur autem Ioseph Nazareus, quia inter fratres fuit ſanctior: dicitur *Quasi primogenita Tauri*: propter Tribum Ephraim, quæ fuit bellicoſa, & propter Regnum decem Tribuum, quod fuit datum in primo Rege Ieroboam, ut patet 3. Reg. cap. 11. Sexto loco benedicitur Zabulon, & Iſſachar ſimul; ſortes enim eorum fuerunt propinquæ, his verbis: *Letare Zabulon in exitu tuo, & Iſſachar in Tabernaculis tuis. Populos vocabunt ad montem. Qui inundationem Maris, quasi lac ſugent, & theſauros abſconditos arenarum.* Pro intelligentia textus ſciendum eſt, quod Tribus Zabulon fuit intenta negotiationibus; Tribus vero Iſſachar ſtudio Legis: & ut liberius ad hoc vacaret, Tribus Zabulon providebat illi, ſaltem in magna parte, de neceſſarijs; ideo dicitur ad Zabulon: *Letare in exitu tuo.* Nempe pro negotiationibus exercendis. Et Iſſachar in Tabernaculis tuis; ſcilicet quieſcendo in eis pro ſtudio divinæ Legis. Iſti vero vocabant populos ad montem, id eſt ad Templum; in



in solemnitatibus enim veniebat ibi populus ad audiendam doctrinam legis, à Doctoribus de Tribu Issachar. Et quia isti sustentabantur, ut dictum est à Tribu Zabulon, ideo dicitur: *Inundationem maris, quasi lac fuent.* Id est bona delata in navibus: *Et Thesauros absconditos arenarum:* Videlicet metalla, & lapides pretiosos, qui de arena terræ extrahuntur,

### Reflexio 170.

**P**ostis benedictionibus pro filiis Dominarum, ponuntur consequenter benedictiones pro filiis Ancillarum.

Et primo benedicatur Gad his verbis: *Benedictus in latitudine Gad: quasi Leo requievit, capitque brachium, & verticem.* Et vidit principatum suum, quod in parte sua Doctor esset repositus. Dicitur *benedictus in latitudine;* quia fors terræ suæ, erat latissima. Dicitur *quasi Leo requievit,* quia hæc Tribus fuit valde bellicosa; per brachium autem intelliguntur milites inimici, & per verticem intelligitur Dux eorum; Neutri autem poterant sustinere impetum Gaditarum; quapropter in bellis contra Chananæos, fuerunt positi in fronte exercitus: Dicitur, *quod in parte sua Doctor esset positus;* quia in sorte Gad erat mons Nebo, in quo sepultus fuit Moyses, magnus Legis Doctor, quod quidem cedebat in magnum honorem prædictæ Tribus. Secundo benedicatur Dan his verbis: *Dan Catulus leonis, fluet largiter de Basam.* Vocatur autem *catulus leonis,* propter Samsonem de tali Tribu oriundus, qui fortissimus in iuventute sua fuit. Dicitur, *Fluet largiter de Basam.* Propter fluvium Iordanem, qui oritur in sorte Dan, iuxta Civitatem captam ab ipsis, quæ prius Lachis vocabatur, ad radices montis Libani, ubi sunt duo fontes, unus nomine Ior, & alter Dan, qui simul iuncti nomen Iordanis efficiunt. Primus tamen ortus Iordanis est in Basam, nam paleæ ibi immixtæ, subterraneo meatu ductæ, reci-



recipiuntur in Dan. Tercio benedicatur Nephthali his verbis *Nephthali: abundantia perfruetur, & plenus erit benedictionibus Domini: Mare, & meridiem possidebit*: Per quæ verba, designatur fertilitas suæ sortis, in qua terræ nascentia citius appropinquabant ad maturitatem, quam in alijs locis; unde de fructibus illius afferebantur primitiæ ad Templum; & sic Sacerdotes pulcherrimis eloquijs benedicebant Deum. Dicitur: *Mare, & meridiem possidebit*. Quia Mare Galicæ, quantum ad suam partem meridionalem, cecidit in sortem Nephthali. Tandem benedicatur Aser his verbis: *Benedictus in filijs Aser; sit placens fratribus suis, & tingat in oleo pedem suum; Ferrum, & æs calceamentum eius*. Dicitur *benedictus in filijs*; quia fuit valde multiplicatus in prole. Dicitur *Placens fratribus suis*: Per quod designatur pulchritudo prolis: nam filix talis Tribus, fuerunt ita pulchræ, ut iudicarentur dignæ nubere Regibus, & Sacerdotibus. Dicitur *Tingat in oleo pedem suum*: Ad denotandam copiam olivarum. Et quia in sorte illius fuerunt multæ mineræ ferri, & æris, quæ calcabantur ab illis, qui ibi operabantur, ut extraherent ferrum, & æs; ideo dicitur ferrum, & æs calceamentum eius. Hic quæri potest quare Simeon non fuit benedictus. Ad hoc respondent DD. quod fuit privatus benedictione, quia Princeps huius Tribus fornicatus fuit in Beelphegor, ex quo immissa fuit mortalitas in populo à Deo offenso, ob prædictum scelus.

## CAP. XXXIV. Reflexio 371.



Ompleta benedictione populi, consequenter describitur mors Moyſis, & eius Sepulchrum: ad vocem enim Domini ascendit sanctus Dux in verticem Phasga; ostenditq; ei Dominus omnem terram promissionis, quam totam conspexit, non viribus naturalibus; quia species venientes à tali distantia, vel nihil, vel debi-



debiliter immutabant potentiam visivam; sed Dominus Deus elevavit potentiam visivam Moysis; vel præsentavit ei species omnium locorum, ut haberet perfectam, & distinctam cognitionem de illis; nihilque notabile remaneret, quod non cognosceret. Hoc autem factum est ad sancti Ducis consolationem, ut terram tam delectabilem, non potens, stante diffinitiva Dei sententia, ingredi, saltem in articulo mortis ipsam intueretur. Igitur eadem die, in qua Moyses dedit benedictiones, mortuus est in monte Abarim, qui mons habebat longitudinem magnam, & in isto erat quædam pars alta, quæ vocabatur mons Nebo, in quem perrexit Moyses, ibique iubente Deo mortuus est, nulla ægritudine præcedente; sed Domini voluntate, animam de corpore educente, cum esset centum, & viginti annorum. Nec caligavit oculus eius, nec dentes moti sunt, & omnes sensus illius usque in finem vivaces remanserunt, quod est mirabile in senibus, propter distemperantiam complexionis. Migravit autem ex hac mortali vita suaviter, & quietè. Desideraverat enim mortem illam, quam habuit Aaron frater suus; ideo Dominus Deus eam illi concessit: quam nobis etiam Clementissimus Deus dignetur donare, per Dominum nostrum Iesum Christum Filium suum. Amen.

F I N I S.



**L**ibrum, cui titulus est *Literales Reflexiones in Pentateu-  
chum Moysis &c. Auctore Per Illustri ac Admod. Rever.  
D. Petro Paulo Ponticello I.V.D. Vidi & attentè perlegi Ego infra-  
scriptus de mandato Illustriss. & Reverendiss. D. Flammini Nobi-  
li Vicarij Generalis Eminentiss. & Reverendiss. D.D. Iulij Car-  
dinalis Spinulæ Episcopi Lucani, nihilque in eo censura dignum  
observavi, sed omnia tuta, Sana, Sacrisque Expositoribus conso-  
na, ac proinde divine Scripturæ studiosis plurimum profutura, si  
ijs ad quos spectat typis mandari placuerit. Datum in Monaste-  
rio S. Frigidiani die 30. Ianuarij 1684.*

*D. Augustinus Bendinelli Can. Reg. Lat. Abbas Privi-  
legiatus, & Revisor Synodalis.*

**E**go infra scriptus de mandato Reverendiss. Domini Flammini  
Nobili Vicarij Generalis Eminentiss. & Reverendiss. Iulij  
Cardinalis Spinulæ Episcopi Lucani, perlegi Librum, cui titulus est:  
*Literales Reflexiones in Pentateuchum Moysis, elaboratum stu-  
dio, & ingenio Per Illustris, & Admod. Rever. Domini Petri Pauli  
Ponticelli, I.V.D. & inveni sanam, & catholicam doctrinam ad  
mentem SS. Patrum, sacrorum Expositorum, dignum propterea, si  
itâ videbitur, qui in lucem edi possit. Datum in aedibus S. Mariæ  
Curtis Orland. die 22. Iulij 1688.*

*Constantinus Manfredi Congregat. Matris Dei Exa-  
minator Synodalis.*

**I M P R I M A T V R.**

*Flamminius Nobili Vic. Generalis Lucensis.*


**L**iterales Reflexiones hîc summo studio, & ingenij felicità-  
tate expositas cum iucunditate animi perlegi, & quia dignas  
omnium oculis ut exponantur diudicavi, prælo etiam donari pos-  
se ad publicam utilitatem libenter assentior.

*Ego Laurentius Motroni I. V. D. & Nobilis Lucensis  
Illustriss. Officij super Iurisdictione Præpositus,*



# INDEX.

## A



- Aron cur petijt Inaures ut formaret Idolum? In hoc fuit valdè imperfectus. Reflexio 206. pag. 239.*
- Abel obtulit Deo de melioribus gregis sui. Ref. 27. p. 32.*
- Abel interpretatur, Luctus, & nihil. Congregavit oves, quæ mansuetæ erant: Curavit eas ad otium fungiendum. Ref. 26. pag. 31.*
- Abra hæc constantia, & fides in filio immolando. Ref. 72. pag. 88.*
- Abram Idola patris confregit, & ab ipso accusatus, mittitur in ignem, sed Divina virtute servatur illæsus. Ref. 51. pag. 61.*
- Abram cur fuerit honoratus ab Egyptijs? Ref. 53. pag. 64.*
- Abram quare petijt signum si Deo credidit? Ref. 57. pag. 69.*
- Abram cur divisit animalia quadrupedia, non vero aves? Ref. 58. pag. 72.*
- Abram quare accepit tertiam uxorem de Chananais, cum nullam de istis voluerit dare Isaac filio suo? Ref. 77. pag. 95.*
- Abstinentes à vino sunt acutiores ingenij. Ref. 272. pag. 320.*
- Actus Latriæ exterior in quo consistat. Ref. 27. pag. 32.*
- Actus matrimonialis habet annexam quandam turpitudinem. Ref. 166. pag. 197.*
- Adam fuit deceptus, sed non seductus. Ref. 20. pag. 24.*
- Adam habuit omnes scientias, & etiam cognitionem de supernaturalibus. Ref. 16. pag. 19.*
- Adam luxit centum annos mortem filij sui Abel, & per centum annos se continuit ab uxore. Ref. 32. pag. 37.*
- Adam ministerio Angelorum ductus fuit in Paradiso terrestri. Ref. 12. pag. 15.*
- Adam cognovit supernaturaliter formationē Hevæ de costa suâ. R. 18. p. 21.*
- Adæ, quare non erat bonum esse solum? Ref. 16. pag. 18.*
- Æternum, non accipitur semper in Sacra Scriptura proprie, sed large, videlicet pro longo tempore. Ref. 61. pag. 75.*
- Agar, secundum aliquos Doctores, fuit filia Regis Egypti. Passa fuit abortum in solitudine, quem Deus vivificavit. Ref. 60. pag. 74.*
- Agareni quid sentiant de Beatis in æterna vita? Ref. 6. pag. 8.*
- Agni Paschalis immolatio ad quid instituta? debebat esse masculus, & anniculus. Ref. 147, pag. 176. & Ref. 149. pag. 178.*
- Agnus Paschalis erat figura Christi Domini. Ref. 152. pag. 180.*
- Altare holocausti quid representaret, & cur sanguine aspergeretur? Ref. 59. pag. 74.*

EF

Altare.



# I N D E X.

- Altare Thymiamatis ad quid inserviret? Ref. 202. pag. 236.*  
*Amor Dei, est radix bonæ operationis nostræ. Ref. 334. pag. 395.*  
*Ancilla gentilis non remanebat libera in septimo anno, sed adhuc erat serva una cum filiis. Ref. 178. pag. 209.*  
*Ancilla hebræa adveniente pubertate exhibat de servitute. Non poterat vendi Gentili. Et quid si fuisset deflorata? Ref. 179. pag. 210.*  
*Angeli non habent fixa nomina stabilia. Ref. 93. pag. 114.*  
*Angeli non sunt proprie in loco, sed improprie. Ref. 127. pag. 153.*  
*Angelus apparens in deserto Ancilla Agar adversa facie, quid significaret? Ref. 60. pag. 75.*  
*Angelus non potest deficere per naturam. Non comedit proprie. Et quomodo convertat cibum? Ref. 65. pag. 80.*  
*Angelus luctans cū Iacob, cur dixit nomen suum esse mirabile? R. 93 p. 114.*  
*Angelus non potest operari miracula. Ref. 211. pag. 245.*  
*Angelus, in corpore assumpto, potest facere quod videatur ab uno, & non ab alio. Ref. 299. pag. 352.*  
*Anima rationalis est immediata a Deo per creationem, quam solus potest unire corpori. Ref. 8. pag. 9.*  
*Anima cur dicatur esse in sanguine magis, quam in alijs corporis partibus? Ref. 248. pag. 290.*  
*Animalia in statu iustitiæ originalis, erant totaliter homini subiecta Ref. 9. pag. 11.*  
*Animalia fuerant adducta ad Noe ministerio Angelorum, vel Divino instinctu venerunt, omni uferitate depulsa. Ref. 38. pag. 44.*  
*Animæ rationali naturaliter inditum est, ut sapiat cælestia. R. 11. p. 13.*  
*Anni peregrinationis seminis Abram, quomodo computandi? R. 59. p. 73.*  
*Aquæ Crystallina, de qua natura sint. Ref. 3. pag. 4.*  
*Arca Noe fuit constructa spatio centum annorum. Ref. 37. pag. 43.*  
*Arca Testamenti ponebatur in medio totius exercitus. Ref. 276. pag. 325.*  
*Aspersio septennaria sanguinis immolatæ victimæ, quid signaret. Ref. 223. pag. 260.*  
*Astrologia ubi fuerit inventa. Ref. 53. pag. 64.*  
*Avis non poterat capi simul cum filiis. Ref. 352. 415.*

## B

- B** *Baal fuit Idolum multarum gentium. Ref. 300. pag. 353.*  
*Balam, an fuerit Propheta Dei, vel Dæmonis. Ref. 295. pag. 348.*  
*Balaam erat magnus Astrologus in iudicialibus. Ref. 296. pag. 349.*  
*Balaam prophetauit de Romanis. Ref. 305. pag. 359.*  
*Belli tempore specialiter cavendum est ab omni peccato. Ref. 355. pag. 419.*  
*Benedicere pertinet ex officio ad Sacerdotem. Ref. 56. pag. 68.*



## I N D E X.

- Benedictio Dei data Sabbato quid fuerit?* Ref. 10. pag. 12.  
*Benedictio in Satvis litteris quid importet.* Ref. 43. pag. 50.  
*Benedictio universalium cognationum data Abraham. completâ est in Christo Domino.* Ref. 51. pag. 62.  
*Benedictione data Jacob, cur Isaac exparit.* Ref. 84. pag. 103.  
*Beneficia conferre non laborantibus in Ecclesia Dei, universale scandalum est.* Ref. 258. pag. 302.  
*Beneficia Dei augent magis peccatum subsequenter.* Ref. 277. pag. 326.  
*Beneficia Dei præterita, & præsentia debent esse singulare motivum ad ipsum ardentius diligendum.* Ref. 331. pag. 392.  
*Bona temporalia, quare promittebantur in antiqua lege?* Reg 171. pag. 202.  
*Bonum commune ut conservetur, detrahendum est bona particulari.* Ref. 318. pag. 375.

## C

- C***aim cur movit seditionem contra Moysen?* Ref. 286. pag. 336.  
*Caim obtulit Deo de fructibus corrosis, & putrefactis.* Ref. 27. p. 32.  
*Caim magis laboravit in acquirenda cibos, quam Adâ posteritas per Seth.* Ref. 28. pag. 33.  
*Caim mutavit simplicitatem primi sæculi in malitiam, exercuitque rapinas.* Ref. 30. pag. 36.  
*Caim desperavit de Divina Misericordia; & quomodo intelligantur illa verba [ Qui occiderit Caim septuplum punietur? ]* Ref. 29. pag. 34.  
*Calliditas Serpentis ad quem principaliter referatur?* Ref. 19. pag. 23.  
*Carnes hostiæ immolatæ pro peccato non poterant comedi à mulieribus, sed à solis filiis masculis Sacerdotum.* Ref. 229. pag. 266.  
*Carnes Hostiæ pacificæ debebant comedi eadem die; hostiæ verò votivæ poterant comedi etiam secunda die, & quare?* Ref. 231. pag. 268.  
*Caro generata ex alimento est impurius quam prima deperdita.* Ref. 13. p. 16.  
*Cerebrum hominis diversimodè se habet, in quadraturis ex coniunctionibus Lunæ.* Ref. 41. pag. 48.  
*Cete grandia quid sint, & quid de ipsis turpiter dicant Hebræi?* Ref. 6. pag. 7.  
*Cham peccans cur non maledicatur à patre in propria persona?* Ref. 45. p. 54.  
*Cherubin habens flammæum gladium ante Paradysum, quomodo intelligatur?* Ref. 25. pag. 30.  
*Clibanus fumans, & Lampas transiens inter partes animalium, quid significaret?* Ref. 59. pag. 73.  
*Circumcisio tria necessario requirebat.* Ref. 61. pag. 75.  
*Circumcisio quare habebat determinatam corporis partem? & cur dicatur fœdus æternum?* ibidem.  
*Cognitio prophetica fit tribus modis.* Ref. 281. pag. 330.



# I N D E X.

- Coitus tam hominum, quam lumentorum non fuit in Arcâ. Ref. 38. pag. 45.  
 Comedere in Vespere salubrius est, quam in Meridie. Ref. 159. pag. 189.  
 Comminatio Dei non adimpleta, non arguit mutabilitatem in Deo, sed in li-  
 bero arbitrio hominis. Ref. 302. pag. 356.  
 Confessio facta Hirco quid denotaret? Ref. 247. pag. 288.  
 Confirmatio antiquæ legis cur facta fuerit per ignem obscurum? R. 324. p. 383.  
 Consecrationes Sacerdotum, eorumque significationes. Ref. 199. pag. 233.  
 Costa Adæ non fuit sublata nuda, sed cum aliqua carne sibi adharente. Ref.  
 17. pag. 21.  
 Crux quare, & quomodo adoranda. Ref. 168. pag. 199.  
 Cubiti extensio quanta sit. Ref. 36. pag. 41.  
 Cultus unius veri Dei firmat Regna; cessatio illius eradicat Imperia. Ref.  
 58. par. 71.  
 Cultus Simulacrorum dicit supremam malitiam. Ref. 342. pag. 404.

## D

- D**Eambulare Dei ad auram, quomodo intelligatur? Ref. 21. pag. 26.  
 Decima pro pauperibus fiebat de triennio in triennium. R. 337. p. 399.  
 Decima non dabatur in septimo anno. Ref. 258. pag. 322.  
 Deum esse, est per se naturaliter notum. Ref. 132. pag. 158.  
 Deus, licet puniat, tamen in ipsa punitione misereatur. Ref. 25. pag. 30.  
 Deus totaliter excedit conditionem nostri intellectus. Ref. 1. pag. 2.  
 Deus in aliqua similitudine creata apparuit Adæ post illius transgressionem.  
 Ref. 21. pag. 26.  
 Deus cum dicitur descendere, quid importet? Ref. 50. pag. 60.  
 Deus cur iuravit per semetipsum? Re. 74. pag. 90.  
 Deus quare puniebat magis Iudæos idolatrantés quam alias gentes? Ref.  
 210. pag. 244.  
 Deus quare prohibuit Balaam maledicere Israelitis, cum ista nihil illis no-  
 cere posset. Ref. 297. pag. 350.  
 Diabolus non habebat potestatem tentandi hominem interius in statu inno-  
 centiæ. Ref. 19. pag. 23.  
 Diabolus non potest transmutare compositum in aliud compositum. Ref.  
 135. pag. 162.  
 Diluvium quo anni tempore acciderit. Ref. 39. pag. 46.  
 Divisio animalium facta ab Abram, quid significaret? Ref. 58. pag. 72.  
 Dominatio in Republica plebei hominis est valde periculosa. R. 320. p. 379.  
 Dominium est homini naturale. Ref. 9. pag. 11.  
 Dominus occidens servum incurrerat eandem pœnam, ac si occidisset homi-  
 nem liberum. Ref. 180. pag. 211.  
 Domus intra civitatem, vel villas muratas non poterat redimi anno elapso.  
 Ref. 260. pag. 305.  
 Ecclesia



# I N D E X.

## E

- E**cclesia quare transtulit festum Sabbati in Dominicam? Ref. 326. p. 386.  
 Elementa quomodo fuerint distincta, & cur in tex. fiat tantum mentio  
 de Terra, & Aqua? Ref. 4. pag. 5.  
 Elevatio manuum Moysis in bello, quid denotaret? Ref. 163. pag. 193.  
 Empyreum cur sic docetur, & quare Moyses non fecerit de illo specialem  
 mentionem? Ref. 1. pag. 2.  
 Enos quare dicatur invocasse nomen Domini, & cum Deo ambulasse. Ref.  
 32. pag. 37.  
 Episcopi, & alij Prælati Ecclesiæ, quomodo debeant regere subditos. Ref.  
 335. pag. 396.  
 Esau invenit modos fallendi Aves. Ref. 80. pag. 98. Fuit Simoniacus in  
 vendenda primogenitura. Ref. 81. pag. 99.  
 Esus sanguinis, & Adipis erat prohibitus sub pœnâ mortis. R. 122. p. 260.  
 Eucharistiæ Sacrificium successit loco veterum sacrificiorum. R. 200. p. 234.  
 Expulsio primorum parentum de Paradiso qua hora acciderit? Ref. 21 p. 26.

## F

- F**acies Moysis quare dicebatur cornuta? Ref. 212. pag. 248.  
 Fenestra Arcæ de qua materia fuerit? Ref. 38. pag. 45.  
 Fermentatum semper removebatur à Sacrificio. Ref. 221. pag. 258.  
 Festivitates, Solemnitates, & Feriæ quomodo differant, & quare non  
 fuerint institutæ à Christo Domino? Ref. 255. pag. 298.  
 Festum expiationis fiebat duplici de causa. Ref. 246. pag. 286.  
 Filia Lot quare dormierunt cum Patre? Ref. 69. pag. 84.  
 Filius in lege naturæ quid agere debebat antequam sequeretur paternam  
 benedictionem. Ref. 83. pag. 101.  
 Fimbriæ hyacinthinæ quare iussæ Hebræis. Ref. 285. pag. 335.  
 Firmamentum proprie acceptum. Et quomodo dividat aquas ab aquis?  
 Ref. 3. pag. 4.  
 Fractio Tabularum, fuit signum evâcuationis Legalium in adventu Christi  
 Domini. Ref. 208. pag. 241.  
 Fructus percepti ab emptore fundi, computabantur in sortem, deductis labo-  
 ribus. Ref. 259. pag. 304.  
 Furans hominem, eumque vendens pœnam mortis incurrebat. R. 180. p. 211.

## G

- G**eneratio in tenerâ aetate facta mala est. Ref. 89. pag. 110.  
 Generatio, in Sacra scriptura, aliquando accipitur pro eventu rei.  
 Ref. 99. pag. 120.  
 Generositas Moysis in contemnenda morte, ut obediret Deo. Ref. 314. p. 370.

Ff 3

Gentiles



# I N D E X.

*Gentiles per quid salvabantur in lege naturæ, & tempore legis scriptæ.*  
Ref. 63. pag. 78.

*Gentiles cur colebant septem planetas?* Ref. 301. pag. 354.

*Gentiles adorabant corpora cælestia, & offerebant Libamina Lunæ.* Ref. 341. pag. 403.

*Gradus coniugij illiciti prohibitio.* Ref. 250. pag. 291.

*Gratia est aliquod mollificativum animæ. Eius privatio reddit animam duram, & ad bonum immobilem: eius subtractio nullam dicit imperfectionem in Deo. Gratia vero, quam Deus largitur homini post lapsum, vocatur prima gratia, quæ non cadit sub merito.* Ref. 142. pag. 170.

*Gratia quam dedit Deus populo suo coram ægyptijs quid fuerit?* Ref. 146. pag. 175.

*Græci computant annos suos à primo anno Regni Alexandri, cum prius illos putarent eos per Olimpiades.* Ref. 148. pag. 177.

## H

*Hebræi computant annos suos ab eductione de Egipto, cum prius illos computarent ab Orbe condito.* Ref. 148. pag. 177.

*Hercules cur lavit se in fonte Libyæ?* Ref. 349. pag. 412.

*Hæreditas quare non fuit assignata Sacerdotibus, & Levitis?* R. 289. p. 341.

*Heva cur magis a serpente, quam ab alio animali tentata fuerit. Multipliciter peccavit, antequam comederet de fructu arboris. Dubitavit de morte futura, licet Deus absolute illam comminasset.* Ref. 19. pag. 23.

*Hevæ nomen quid significet.* Ref. 24. pag. 30.

*Hispania, Celtiberia, & Hesperia vocata.* Ref. 46. pag. 55.

*Holocaustum quare sic dictum, & quid significaret?* Ref. 219. pag. 255.

*Homicidium, si erat voluntarium, non gaudebat occisor de immunitate Sanctuarij.* Ref. 318. pag. 376.

*Homines primi sæculi cur pervenirent ad tam longam ætatem.* R. 33. p. 38.

*Homo immundus usque ad occasum Solis, quid significaret?* Ref. 239. p. 277.

*Homo coeundo etiam cum propria uxore contrahebat immunditiam impediendam illum ab ingressu Sanctuarij.* Ref. 244. pag. 285.

*Homo, si permansisset in statu innocentie, numquam probasset senectutem.* Ref. 13. pag. 16.

*Homo in periculis constitutus, omittens illa, quæ dicuntur humana prudentia, gravissimè peccat.* Ref. 315. pag. 372.

*Homo naturaliter optat vivere in Politiâ, & quare separatio ab illa sit illi dolorosa.* Ref. 324. pag. 384.

*Homo in adversitate positus, magis cognoscit Deum, quam in prosperitate.* Ref. 329. pag. 390.

*Honores quando virtuosè fugiuntur, & quando non.* Ref. 108. pag. 130.

Hori-



# I N D E X.

Horizonte mutato sequitur mutatio Ascendentis in Domibus Cæli. Ref. 302. pag. 356.

Hostia pacifica ad quid immolabatur, & quare sic vocaretur. Ref. 222. pag. 259.

## I

**I**acob mansit quatuordecim annos in Tabernaculis Melchisedech, & Heber, ut res divinas addisceret. Ref. 80. pag. 98.

Idiomatum primum in Orbe quale fuerit. Ref. 49. pag. 58.

Idiomata communiter tenetur fuisse septuaginta duo. Ref. 50. pag. 61.

Idolatra quare in coniunctionibus Planetarum faciebant coire diversa specie animalia; & in agro seminabant diversa coniunctim semina; & vestibus ex pluribus contextis utebantur? Ref. 251. pag. 293.

Idolatria quando, & quomodo inceperit. Ref. 51. pag. 61. & R. 300. p. 353.

Idolum Moloch quomodo esset; & quare Iudæi sacrificarent illi filios suos? Ref. 252. pag. 294.

Ignis sacer Sanctuarij non poterat extingui aquis, & fuit conservatus usque ad captivitatem Babylonicam. Ref. 234. pag. 272.

Ignis profanus in Atrio, ad quid inserviret? Ref. 235. pag. 273.

Imaginativa, quam virtutem habeat super materiam unde fiunt conceptus? Ref. 90. pag. 111.

Imagines cur permixta Christianis? Ref. 168. pag. 199.

Imago, & similitudo Dei in homine quid importet? Ref. 8. pag. 10.

Immunditia in veteri lege duplex erat. Ref. 290. pag. 341. & Ref. 238. pag. 275.

Immunditia mulieris parientis masculum, vel feminam. Ref. 240. p. 278.

Induratio cordis Pharaonis, quid propriè esset? Ref. 142. pag. 169.

Iniquitas Sanctuarij in quo consisteret? Ref. 289. pag. 340.

Iris quomodo generetur? Ref. 44. pag. 52.

Isaac habens Vxorem sterilem, cur non accepit aliam minus principalem sicut fecit Pater? Ref. 79. pag. 97.

Isaac cur non descendit in Ægyptum, cū in Palestina esset fames? Ref. 82. pag. 100.

Iubilum quare sic dictum? Ref. 259. pag. 303.

Iudicium debet fieri in tranquillitate animi, quæ significatur per sessionem Iudicis. Ref. 164. pag. 194.

Iuge Sacrificium duplex erat. Ref. 288. pag. 265.

Iusti ex societate malorum incurrunt aliquando pœnam temporalem. Ref. 55. pag. 66.

Iustitia originalis quid esset, & in quo consisteret? Ref. 19. pag. 23.

Iustitia quare vocetur ab Aristotele optima virtus, & sicut Lucifer inter Astra. Ref. 348. pag. 411.

Ff 4

Labor



# I N D E X.

## L

- L**abor à Deo homini comminatus est communis omnibus. Ref. 24. p. 29.
- Labores reddunt homines fortiores ad bella tractanda. Ref. 283. p. 334.
- Lamech introduxit bigamiam contra naturæ institutionem. Et quare Sanctis Patribus permessa fuerit. Ref. 31. pag. 36.
- Lapis à Iacob in monte erectus quid figuraret? Ref. 87. pag. 107.
- Lapis Saphirinus visus ab Israelitis, quid denotaret? Ref. 186. pag. 217.
- Legislator non debet ponere alicui Politicæ legem simpliciter bonam. Ref. 357. pag. 422.
- Leprosi quomodo cognoscebantur? Et quare spectabat illius cognitio ad Sacerdotem. Ref. 241. pag. 281.
- Leprosi quomodo esset in veste? Ref. 242. pag. 281.
- Leprosi mundatio quas ceremonias admitteret? Ref. 243. pag. 282.
- Levitæ quare fuerint electi ad ministrandum Deo, cæteris exclusis. Ref. 268. pag. 315.
- Levitæ aliquando veniant sub nomine Israelitarum, aliquando non. Ref. 266. pag. 313.
- Levitæ ponebantur in vigesimo quinto anno ad ministerium suum addiscendum; sed non ministrabant nisi in vigesimo, & cessabant ministrare in quinquagesimo. Ref. 269. pag. 317. Et Ref. 274. pag. 323.
- Levitæ non poterant, in suburbanis sibi assignatis, facere agros, vel vineas. Ref. 289. pag. 341. & Ref. 318. pag. 375.
- Lex Evangelica est data toti mundo, sed non obligat omnes ad perfectionem. Ref. 272. pag. 321.
- Lex Mosaica non inducebat per observantiam suam aliquam utilitatem directè. Ref. 226. pag. 263.
- Lex Divina verè est sapientia. Ref. 323. pag. 382.
- Liber vitæ quid sit, & quomodo aliqui scribantur, vel deleantur. Ref. 209. pag. 243.
- Libri Sibyllarum conservabantur in Capitolio. Ref. 345. pag. 408.
- Lignum vitæ ad quid positum in Paradiso? Ref. 13. pag. 15.
- Lignum scientiæ boni, & mali quare sic denominatum? Ref. 15. pag. 18.
- Lotio Sacerdotum ante eorum consecrationem quid significaret; & quare fiebat in manibus, & pedibus eorum? Ref. 232. pag. 270.
- Lutherani dictum de vita, & morte. Ref. 301. pag. 355.

## M

- M**adianitæ puellæ quomodo cognoscebantur esse virgines? Ref. 314. pag. 371.
- Mala, quæ Iudæi sustinebant in Ægypto, quare mittebantur à Deo. Ref. 132. pag. 158.
- Maledictio



## I N D E X

- Maledictio serpentis, in quo consistat?* Ref. 22. pag. 27.
- Maledictus, in Sacra scriptura, idem est, ac patiens pœnas.* Ref. 351. pag. 414.
- Malis bene uti, proprium est Divinæ Sapientiæ, ac Bonitatis, quæ illa convertit ad reſtitutionem alicuius boni effectus.* Ref. 110. pag. 132.
- Manna liqueſcebat ad calorem ſolis, & indurabatur ad calorem ignis.* Ref. 261. pag. 191.
- Manna conſervata in Arca quid ſignificaret?* Ref. 193. pag. 225.
- Meditatio Divinæ præſentiæ retrahit hominem a peccato.* Ref. 61. pag. 75.
- Medius Siclus quare dabatur ab Iſraelitis. Et quid eſſet tranſire ad nomen?* Ref. 203. pag. 237.
- Mel cur excludebatur a ſacrificio Domini?* Ref. 221. pag. 258.
- Memoria peccatorum quando meditando, quando fugiendo.* Ref. 332. p. 393.
- Menſa propoſitionis, quare ſic vocata?* Ref. 190. pag. 221.
- Methodius martyr, quid reſerat de filiis Iſmael ex annalibus ſæculorum?* Ref. 62. pag. 77.
- Modus quo Deus gubernat inferiora non intelligitur, niſi à Beatis in Cælo exiſtentibus.* Ref. 50. pag. 60.
- Moralis Doctrina inanis eſt, niſi reducat ad opus.* Ref. 328. pag. 389.
- Mors animalis quare acceptabatur à Deo in ſacrificio?* Ref. 222. pag. 259.
- Moyſes, & Aaron, in quo peccaverunt ad aquas contradictionis.* Ref. 292. pag. 344.

## N

- N** *Adab, & Abiu non fuerunt devorati ab igne, ſed occiſi. Nec veſtes eorum ſuccenſæ, ſed cum ipsis intactis ſepulti. Et ex hoc inolevit laudabilis conſuetudo, quod Sacerdotes novæ legis ſepeliantur cum veſtibus Sacerdotalibus.* Ref. 235. pag. 273.
- Natura humana cur producta in uno individuo in ſexu virili?* Ref. 11. pag. 14.
- Nazariæi quare ſic vocati?* Ref. 272. pag. 320.
- Nefanda Priapi Sacrificia continebant omne genus carnalis abominætionis.* Ref. 330. pag. 391.
- Nembrod traditur in veniſſe aſtologiam. Fuit libidine dominandi avidus. Et quare dicatur Robuſtus venator coram Domino.* Ref. 47. pag. 56.
- Ninive ſic vocata à Nino primo Rege Aſſyriorum. Duravit hoc regnum per annos mille quadringentos.* Ref. 47. pag. 57.
- Noe invenit ruſticalia inſtrumenta.* Ref. 33. pag. 39.
- Noe laboravit in conſtructione Arce una cum tribus filiis ſuis, & alijs hominibus, mercede conductis, centum annos.* Ref. 37. pag. 43.
- Noe habens vinum quare ſtatim inebriatus eſt?* Ref. 45. pag. 53.

Noe



# I N D E X.

- N**oe cur expectabat septem dies inter unam missionem Columbae, & alteram? Ref. 41. pag. 48.
- Noemia** invenit lanificium. Ref. 31. pag. 37.
- Nomen Domini Tetragrammaton** quanta venerationis esset? & quid significaret? Ref. 133. pag. 159. Et cur scriptum in lamina sancta in fronte Sacerdotis. Ref. 217. pag. 252.
- Nothi, spurij, manseres, & eunuchi,** repellebantur, tum ab honoribus, tum ab ingressu Atrij, utpotè personae contemptibiles. Ref. 354. p. 418.
- Nubes caliginosa** super montem Sinai, quid denotaret? Ref. 167. pag. 197.
- Nubes operiens Tabernaculum** quid significaret? Ref. 218. pag. 252.
- Numerus annorum mansionis filiorum Israel in Aegypto,** à quo tempore sit accipiendus? Ref. 153. pag. 182.

## O

- O**bedientiâ virium inferiorum respectu rationis, & corporis respectu animae quare homini subtrahitur? Ref. 9. pag. 11.
- Oblationes Principum tribuum,** eorumque significatio. Ref. 273. pag. 321.
- Oblationes concomitantes Sacrificium** quot essent, eorumque rationes. Ref. 221. pag. 258.
- Oblationes omnes** pertinebant ad Sacerdotes, & Levitas; nempe Decima, Primitiae, dona Deo facta, & Redemptiones primogenitorum. Ref. 256. pag. 300.
- Observatio Legis** in principio multum curanda est, eiusque transgressio rigore punienda. Ref. 236. pag. 274.
- Obtenebratio circa azibilia,** provenit ex peccato antecedenti. Ref. 284. pag. 335.
- Occidens aliquem insidiosè,** evellendus erat etiam ab Altari Dei. Ref. 180. pag. 211.
- Oculi primorum parentum,** quomodo fuerint aperti, & quid per oculos intelligatur? Ref. 20. pag. 25.
- Odium** quod habet homo contra serpentem est innatum, & quare. Ref. 22. pag. 27.
- Oleo** quo ungebatur Tabernaculum, non poterat ungi caro hominis sub pœna mortis, exceptis Sacerdotibus, & Regibus. Nec poterat ab aliquo confici, ut tali odore perfrueretur. Ref. 204. pag. 238.
- Oleum,** Thus non offerebatur in sacrificio pro peccato. Ref. 226. pag. 264.
- Opera legis** secundum se, non iustificabant, sed ex obedientia, & fide Mediatoris tunc futuri. Ref. 249. pag. 291.
- Operimentum Tabernaculi** quatuplex esset. Ref. 192. pag. 223.
- Opus Tabernaculi,** licet esset ad honorem Dei, tamen non poterat fieri in Sabbato. Ref. 205. pag. 239. & Ref. 213. pag. 248.

Oratio



## I N D E X:

- O**ratio stendā est in *Aurora*. Ref. 214. pag. 249.  
 Orationi instandum est etiam in obtinendis illis, quæ Deûs facere disposuit.  
 Ref. 156. pag. 186.  
 Ornamenta Summi Pontificis quot essent, eorumque significationes. Ref.  
 197. pag. 229. & sequenti.  
 Ornatus strictè acceptus quid importet? Ref. 4. pag. 5.  
 Ornatus depositus ab Israelitis iussu Dei post fabricationem idoli, quid  
 esset? Ref. 210. pag. 245.  
 Oves quatuor restituebantur pro furto unius tantam ovis, cum tamen in  
 alijs furtis sufficeret reddere duplum. Ref. 181. pag. 212.

## P

- P**anes propositionis quomodo disponebantur? Ref. 257. pag. 301.  
 Paradisus terrestris erat debitus statui Innocentie. Ref. 12. pag. 14.  
 Paradisus terrestris, in qua parte Orientis sit, & de illius altitudine, ibidem.  
 Partes pudendæ quare causent in nobis erubescētiā? Ref. 20. pag. 25.  
 Peccata posteriora, ratione ingrati tudinis, sunt graviora. Ref. 263. p. 308.  
 Peccatum Pontificis maius est quocumque alio; ideoque carnes talis Sacri-  
 ficii, non cremabantur in Sanctuario, sed extra castra. Ref. 223. p. 260.  
 Peccatum Principis est magnum extensivè; tamen carnes talis Sacrificij  
 non portabantur extra castra. Et quare pro peccato Principis offereba-  
 tur hircus? Ref. 225. pag. 262.  
 Peccatum in Spiritum Sanctum proprie acceptum quando sit. Ref. 227.  
 pag. 265.  
 Peccatum non remittebatur ex conditione Sacrificiorum, sed ex fide, &  
 obedientia, & contritione offerentis. Ref. 226. pag. 263.  
 Penalitates non poterant esse in statu innocentie. Ref. 15. pag. 18.  
 Phantasia dominatur toti naturæ corporali, maxime in somno. Ref. 244.  
 pag. 284.  
 Pompei calamitas accidit ex contemptu Templi Dei. Ref. 305. pag. 360.  
 Populus constituitur per decem homines, sed non per minorem numerum;  
 Ref. 66. pag. 82.  
 Præcepta Decalogi duo ultima, quare prohibeant etiam actum interiorem,  
 non vero alia? Ref. 176. pag. 206.  
 Præcepta respectu veteris Testamenti distingui possunt in quatuor genera.  
 Ref. 177. pag. 207. Et cum sint de lege naturæ, quare data fuerunt per  
 legem positivam? ibidem.  
 Præceptum de non comedendo de ligno scientiæ boni, & mali, quare de-  
 derit Deus Adæ? Ref. 15. pag. 18.  
 Præceptum Sabbati partim est morale, partim ceremoniale. Ref. 326.  
 pag. 386.

Præceptum



# I N D E X.

- Præceptum de non commedendo carnem cum sanguine datum in lege naturæ, quare non obliget in nova lege?* Ref. 43. pag. 51.  
*Predicata tripliciter dicuntur de Deo.* Ref. 133. pag. 160.  
*Primogeniti in lege naturæ erant Sacerdotes.* Ref. 81. pag. 99.  
*Primogeniti in nova lege, quare non sint specialiter obligati Deo, sicut in antiqua?* Ref. 268. pag. 315.  
*Principatus, & communicatio economica, non poterant esse in statu Innocentie.* Ref. 23. pag. 28.  
*Principem non decet esse pusillanimum in adversis, & quare.* Ref. 310. pag. 365.  
*Promissa Dei sunt conditionalia, & quomodo intelligenda?* Ref. 57. p. 70.  
*Propheta quando esset occidendus?* Ref. 336. pag. 397.  
*Prophete non sunt abundantiores sapientia, & consilio alijs hominibus.* Ref. 165. pag. 195.  
*Prophetia proprie, & large dicta.* Ref. 73. pag. 89.  
*Prosperitas quare faciat homines immemores amicorum.* Ref. 105. p. 127.  
*Providentia Divina quodam speciali modo respicit Principes.* Ref. 106. pag. 128.  
*Provincia qualibet habet Angelum de ordine superiori, & sub illo multos de ordine inferiori ad illam regendam.* Ref. 92. pag. 113.

## Q

- Quadrata figura exercitus, est optima dispositio ad bellum.* Ref. 267. pag. 314.  
*Quantitas vestimentorum in Deserto, crescebat, ipsis pueris crescentibus.* Ref. 331. pag. 392.  
*Quantitas prædæ in bello debebat æqualiter dividi.* Ref. 348. pag. 411.  
*Quantitas Terræ promissionis, cur fuerit præfinita?* Ref. 317. pag. 374.  
*Quantitas manna accipienda erat æqualiter per singula capita, & quare facta fuerit talis assignatio?* Ref. 161. pag. 191.  
*Quantitati corporis proprie convenit locatio.* Ref. 127. pag. 152.  
*Quatuor genera hominum arcebantur à bello.* Ref. 247. pag. 410.  
*Quies politica conservatur per æqualitatem iustitiæ commutativæ.* Ref. 164. pag. 194.  
*Quiescere Dei ab opere suo, quid importet?* Ref. 10. pag. 12.

## R

- Rachel quare furata est Idola Patris?* Ref. 91. pag. 112.  
*Ratio absorbetur in actu venereo.* Ref. 20. pag. 25.  
*Redditus Ecclesiæ Ministris, & pauperibus tantum sunt distribuendi.* Ref. 359. pag. 425.

Rega



# I N D E X.

*Rēgalis politia est melior omnibus alijs.* Ref. 342. pag. 404.

*Reges antiquitus erant Domini unius tantum Civitatis, vel parvi Oppidi.*  
Ref. 55. pag. 67.

*Regis permissio Israelitis fuit ad malum populi, ipsum Regem male peten-  
tis.* Ref. 342. pag. 404.

*Repudium quare permissum in lege antiqua, & prohibitum in nova.* Ref.  
357. pag. 421.

*Res sacræ quanto pulchriores sunt, tanto magis elevant mentem ad Cæ-  
lestia.* Ref. 338. pag. 400.

*Res immobilis redibat ad priorem Dominum in iubilæo, sed non res mobilis.*  
Ref. 259. pag. 303.

*Revelationes Divinæ solent fieri mentibus à perturbationibus sæculi totali-  
ter purgatis.* Ref. 54. pag. 66.

*Romani dominantes terram Iudæorum instituebant Reges, & Pontifices*  
Ref. 305. pag. 360.

*Romanum Imperium à quo descendat secundum Iudæos.* Ref. 98. pag. 120.

*Romanus exercitus in bello Cannensi quare deletus fuerit?* Ref. 310. p. 365.

*Rubus ardens, & non comburens quid significaret?* Ref. 128. pag. 153.

*Ruminatio in animalibus est signū temperatæ complexionis.* R. 237. p. 275.

**S** *Abbati sanctificatio in quo consistat?* Ref. 10. p. 13. & Ref. 170. p. 200.

*Sacerdotes non poterant sibi retinere res immobiles, quas per votum  
factum à secularibus recipiebant; sed tenebantur vendere ipsi voventi,  
vel alijs de Tribu sua.* Ref. 265. pag. 310.

*Sacerdotes portabant cineres extra castra, & quare resolvebantur usque  
ad favillam.* Ref. 228. pag. 266.

*Sacerdotes cur prohibiti intervenire exequijs mortuorum.* Ref. 253. p. 295.

*Sacerdotes tangebant Sacrum Tabernaculi pavimentum nudis pedibus.  
Ungebantur sanguine Arietis immolati in extremo auriculæ dexteræ  
manus, ac pedis dexteri.* Ref. 232. pag. 270.

*Sacerdotes si non habeant unde convenienter vivant, vilescit eorum mini-  
sterium.* Ref. 113. pag. 135. Unde Sacerdotes Egyptij recipiebant ali-  
menta à Rege. ibidem.

*Sacrificia cur fiebant de tribus speciebus animalium terrestrium, & de  
duabus speciebus avium?* Ref. 220. pag. 256.

*Sacrificii consumatio, erat in crematione incensi.* Ref. 202. pag. 236.

*Sanctuarium habet at omnia totaliter aurea, aut auro purissimo cooperta.*  
Ref. 215. par. 250.

*Sanctuariū dicebatur pollui ex peccatis Sacerdotū, & populi.* R. 247. p. 288.

*Sanctuariū non habebat ullos redditus.* Ref. 256. pag. 300.

*Sanguis victimarum aspersus super altare, & super populum, quid deno-  
taret?* Ref. 186. pag. 217.

San.



I N D E X.

- Sanguis tingens Cornu Altaris quid significaret? Ref. 200. pag. 233.  
 Sanguis aspersus directe contra Oraculum quid denotaret? Ref. 247. p. 288.  
 Saræ pudicitia servatur illæsa, etiam inter Aulicos. Ref. 53. pag. 64.  
 Scala quam vidit Iacob in somno, quid significaret? Ref. 86. pag. 105.  
 Scientiæ ex Egyptijs transierunt ad Græcos. Ref. 53. pag. 64.  
 Sem est Melchisedech, ita dictus propter bonitatem sui Regiminis. Fuit  
 Rex Ierusalem, & Sacerdos. Et in quo sensu dicatur non habuisse pa-  
 trem, nec matrem, nec genealogiam, nec principium vitæ, nec finem, ut  
 loquitur Apostolus Ref. 48. pag. 58.  
 Senectus quomodo inducatur. Ref. 13. pag. 16.  
 Serpens æneus ad quid fuerit positus in deserto, & cuius esset Figura? Ref.  
 294. pag. 347.  
 Servitus reddit homines ineptos ad bellum, & ad animosas virilitates.  
 Ref. 156. pag. 186.  
 Servo Ebræo, nolenti in septimo anno exire de servitute, quare perforabatur  
 auris Subula. Ref. 178. pag. 209.  
 Sibyllarum vaticinatio de Christo Domino. Ref. 345. pag. 407.  
 Signum positum à Deo super Caim quid esset? Ref. 29. pag. 35.  
 Simila spectabat ad Sacerdotes, qui de illa faciebant panes azymos in  
 Sanctuario, & isti comedebantur a solis filiis masculis ipsorum Sacerdotum.  
 Ref. 229. pag. 267.  
 Sodomitæ propter delicias terræ suæ, & otium, non solum ad illicita, sed  
 etiam ad nefanda defluerunt. Occiderunt acerbissima morte Puellam,  
 eo quod dederat eleemosynam pauperi ipsam petenti. Ref. 66. pag. 81.  
 Somnus quomodo fiat. Ref. 17. pag. 20.  
 Sopor, & horror super Abraham quid significaret? Ref. 59. pag. 72.  
 Sors quare mittebatur super duos hircos? Ref. 246. pag. 287.  
 Status naturæ conditæ, seu originalis iustitiæ, quid importaret. Ref. 9. p. 11.  
 Stillico combussit libros sibyllinos. Ref. 345. pag. 407.  
 Summus Sacerdos ungebatur in capite, non verò reliqui Sacerdotes. Ref.  
 199. pag. 233.  
 Summus Sacerdos debebat ducere uxorem Virginem de tribu suâ; vel de  
 stirpe Regia. Ref. 253. pag. 296.  
 Superior distribuens uni personæ plurâ beneficia quàm necesse sit sustentâ-  
 tioni illius, iniustus est. Ref. 320. pag. 380.

T

- T**Abernaculi interioris, & exterioris significatio. Ref. 193. pag. 225.  
 Tabula legis de qua materia fuerint? Ref. 187. pag. 218.  
 Talionis pœna quomodo reduceretur in praxi? Ref. 180. pag. 211.  
 Tentari hominem conveniens fuit, licet Deus sciret illum esse casurum. Ref.  
 20. pag. 25.

Terræ



## I N D E X.

*Terrâ in septimo anno non colebatur. Et Dominus fundi non poterat recipere fructus nisi ad suæ familiæ sustentationem. Ref. 258. pag. 302.*

*Thymiama cremabatur mane & vespere super Altare incensi. Ref. 195. pag. 227.*

*Tribuum, & Familiarum distinctio quare iussa a Domino? Ref. 259. p. 304.*

*Trinitas in divinis individue operatur ea quæ sunt ab extra; secus autem ea, quæ sunt ab intra. Ref. 8. pag. 10.*

*Tubalcaim invenit artem ferrariam, & res bellicas docuit. R. 31. p. 36.*

*Tubis argenteis clangebatur super Holocaustum, & super Hostias pacificas, non vero super Hostias pro peccato. Ref. 276. pag. 325.*

*Turris Babel ad quam altitudinem pervenire debebat secundum intentionem edificantium, & quomodo peccaverunt? Ref. 49. pag. 59.*

## V

*Vacca Rusa immolatio, eiusque ceremoniæ, & significationes. Ref. 290. pag. 342.*

*Vas fictile, in quo caro Sacrificij cocta fuerat, confringebatur; Aneum vero lavabatur. Ref. 229. pag. 267.*

*Verba, crescite, & multiplicamini, quando sonabant præceptum? R. f. 43. pag. 50.*

*Verba Dei iuramento firmata per quid differant, a non iuramento firmatis? Ref. 74. pag. 90.*

*Verba Domini dicentis ad Moysen Ego sum, qui sum quid importarent? Ref. 129. pag. 154.*

*Veritas Sacra Scriptura non debet argui ex veritate Sacra Scriptura. Ref. 323. pag. 382.*

*Vesper dicitur non solum tempus in quo Sol occidit sub Horizontem; sed statim ac incipit declinare a puncto Circuli Meridiani. Ref. 339 pag. 401.*

*Vir & Vxor quomodo sint duo in carne una? Ref. 18. pag. 21.*

*Vir regens Rempublicam, si non sit contentus honore, & gloria, quam Civitas illi tribuit, sed requirit alia, Tyrannus est. Ref. 83. pag. 102.*

*Vir luctans cum Iacob quis esset; & quare luctaretur cum eo usque ad Auroram? Ref. 93. pag. 114.*

*Vir & Vxor debent se valde diligere, ut tollantur radia, quæ in communicatione continuata nascuntur. Ref. 18. pag. 22.*

*Vir Israelita debebat ducere Vxorem de Tribu sua; dispensatum tamen fuit, ut Tribus Sacerdotalis, & Regia possent ad invicem contrahere matrimonia. Ref. 319. pag. 377.*

*Vir non arctatur tantum legibus Matrimonij, quantum Vxor. Ref. 353. pag. 416.*

*Virga Aaron quare protulit Amygdalas. Ref. 288. pag. 339.*

Vir



## I N D E X.

- Virgâ Moysis eiusque portentia quid significarent?* Ref. 130. pag. 155.  
*Virgæ Magorum non fuerunt conversæ virtute Dæmonum in Serpentes, sed solummodo apparenter. Velsi fuit vera conversio, accidit virtute divina.* Ref. 135. pag. 162.  
*Virgo Deipara, licet exempta à lege Mulieris parientis, tamen voluit eam observare ex humilitate.* Ref. 240. pag. 279.  
*Virtutis profectus consistit in tolerantia adversitatum.* Ref. 91. pag. 112.  
*Unio Principis sæcularis cum Ecclesiastico, conservat pacem Republicæ.* Ref. 319. pag. 377.  
*Unitas legum, & identitâs loci requiritur ad populi unitatem.* R. 95. p. 117.  
*Voluntas regit omnes alias partes corporis principatu dispolitico; partes autem genitales principatu politico, rogando, & suadendo.* R. 20. p. 25.  
*Voti transgressio, punitur a Deo tempore suo.* Ref. 356. pag. 420.  
*Votum est magis obligatorium, quam iuramentum.* Ref. 313. pag. 369.  
*Votû delendi Vrbes Chananæorum quare esset Deo acceptum?* R. 294. p. 346.  
*Vsura quare permissa Iudæis?* Ref. 356. pag. 420.  
*Vultus Moysis quomodo induit radios luminosos, ita ut non possent intendere in eum filij Israel?* Ref. 211. pag. 246.  
*Vxor, & Concubina plerumque in Sacra Scripturâ promiscue accipiuntur.* Ref. 77. pag. 95.  
*Vxor Lot respiciens retro quare peccaverit?* Ref. 68. pag. 83.  
*Vxorum pluralitas cur permissa ante, & post legem scriptam.* Ref. 350. pag. 413.  
*Vxorum pluralitâs, quâmvīs pro aliquo bono fine licuerit, tamen pluralitâs Virorum uni mulieri, etiam stante æquali bono fine, licere nequit.* Ref. 89. pag. 110.

## P

- Z** Elotypia cur vocetur Spiritus? Illius Sacrificium, & caremonia  
 Ref. 271. pag. 318.  
*Zelus Leviticæ Tribus, firmavit in illâ Sacerdotium.* Ref. 369. pag. 435.  
*Zelus Phinees placavit Deum iratum.* Ref. 307. pag. 362.

## F I N I S.




ERRATA	CORRIGE	ERRATA	CORRIGE
ultimis pag. 12.	ultimus.	impetratio pag. 272.	imprecatio.
provideri pag. 21.	providere	Passarem pag. 283.	passerem.
non aliqua pag. 22.	non est aliqua.	excluden- pag. 286.	excludenda.
si his verbis pag. 29.	his verbis.	Sancta pag. 288.	Sancti.
obsequium sum pag. 32.	obsequiū suum.	dicedarur pag. 288.	dicebatur.
vel perpetua pag. 35.	vel in perpetua.	ut pag. 289.	&.
CAP. V. pag. 34.	REFLEXIO.	Aavena pag. 306.	Advena.
planitiæ pag. 42.	planitia.	portare pag. 321.	portari.
præcedentem pag. 53.	præcedens.	calefacibat pag. 347.	calefiebat.
descendant Greci p. 55.	descēdunt Græci.	missis pag. 349.	missi.
ostento pag. 74.	ostenso.	quem pag. 354.	quem.
fatum pag. 84.	factum.	timuerant pag. 358.	timuerunt.
perierant pag. 84.	perierat.	cepto pag. 360.	capto.
imputabilis pag. 96.	immutabilis.	mentionem pag. 363.	mentionem.
terrannus pag. 102.	Tyrannus.	deursum pag. 366.	decursum.
si autem pag. 114.	ly autem.	vires pag. 370.	vires.
& hic pag. 155.	Et hic.	Mari pag. 374.	Maris.
eundenque pag. 168.	idemque.	de pag. 377.	in.
Hebræos pag. 174.	Hebræis.	somnis pag. 388.	somnijs.
summi pag. 178.	sumi.	alboribus pag. 389.	laboribus.
propri pag. 209.	proprie.	talitque pag. 390.	talitque.
sumerent pag. 234.	sumeret.	peccassent pag. 404.	non peccassent.
ponerentque pag. 234.	poneretque.	Sex pag. 409.	lex.
Thymiamatum p. 235.	Thymiamatis.	ratione pag. 409.	rationem.
extruccionem pag. 238.	constructionem.	stipissime pag. 412.	sape.
tenetur pag. 238.	tenentur.	fil s pag. 428.	filijs.
rubro pag. 253.	rubo.	vivimur pag. 429.	vivimus.
abruta pag. 261.	abrupta.	causata pag. 429.	causæ.
habendo pag. 269.	pro habendo.	Septuagintas pag. 432.	septuaginta.















005265840